



كَتَاوُج سِي السَّيِّدِ



يُحْفَظُ بَعِيداً عَنِ مُتَنَاوَلِ أَيْدِي الرِّجَالِ

إِيهَابُ مَعَوِضٍ



كُتَابُ سَيِّدِ السَّيِّدِ

للمزيد من الروايات والكتب الحصرية
انضموا لـجروب ساحر الكتب

sa7eralkutub.com

او زيارة موقعنا



كتالوج سي السيد

إيهاب معوض

■ الطبعة الأولى يناير 2018

الغلاف: كريم آدم

التصحيح اللغوي: محمد حمدي

رقم الإيداع: 2017/26361

الترقيم الدولي: 5 - 024 - 824 - 977 - 978

جميع حقوق الطبع محفوظة

186 عمارات امتداد رمسيس 2 - أمام أرض المعارض - مدينة نصر

هاتف: 0220812006

rewaq2011@gmail.com

facebook.com/RewaQ.Publishing



للنشر والتوزيع

للمزيد من الروايات والكتب الحصرية

انضموا لـجروب ساحر الكتب

sa7eralkutub.com

او زيارة موقعنا



كِتَابُ الْوُج سَيِّدِ السَّيِّدِ

إِيهَابُ مَعَوْضَ

الرواق للنشر والتوزيع

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



تقديم

أنا هبة السواح اللي عملت كتاب «سندريلا سيكرت» واللي إيهاب حاول في المقدمة بتاعته يقنعكم ماتشتر وهووش، بس الحمد لله الكتاب نزل وحقق أعلى مبيعات، ودلوقتي جت فرصتي علشان انتقم منه، علشان كده باحذركم بجد..

إوعوا تشتروا الـ..... مش قادرة أقوها

يعني بلاش تـ..... ضميري مش جايني

هاقول إيه بس.. برضو العيش والملح له تمن... خلاص عفوت عنه والمسامح كريم..

وبصراحة بصراحة يعني.. الكتاب أكثر من رائع وأعتقد بإذن الله إنه هيغير تاريخ علاقة الرجل والمرأة، لأنه فعلا كتالوج بيشرح بمتهى الدقة وخفة الدم، ومن خلال حكاوي بنعيشها يوميا، كل تفصيلا عن شخصية الرجل بكل أبعادها، كمان بيدينا لأول مرة أدوات امتلاك الرجل والسيطرة عليه.. وهو المطلوب طبعا:)

أنا عارفة ان إيهاب مش محتاج دعاية ولا تزكية، وواثقة انه هيكسر الدنيا كالعادة بأسلوبه المرح ودماغه المطرقة.

يلا بونايتي.. وجبة دسمة ومفرحة.

- لاحظ يا وائل إن كلامك جارح، وأنا باتعصب بسرعة ويمكن
أكنسل الغدا.

تكنسل الغدا يا واطي وأنا اللي جايب لك فكرة كتاب تكسر الدنيا؟!

- هي فين يا عم الفكرة دي!

- (كيف تشقطين عريسا).. هي دي الفكرة.

- يا سلام! عايزني أعمل كتاب عن شقطة العرسان؟ ليه شايفني
قرني؟! إنما أعمل كتاب عن شقطة الحريم ماشي.

- ونعم الأخلاق... طب اسمع يا معلم.. إنت هتعمل كتاب بمنظورك
انت، بس من خلال فكرة الجروب.

- اللي هي إيه بقى فكرة الجروب؟

- هاقول لك.. فكرة الجروب إن البنات بيتحدوا ويساعدوا بعض
علشان كل واحدة تلاقي عريس مناسب، مش بس كده، دي كمان لو
متجوزة وجوزها بيخونها، يساعدوها علشان تسترده.

- طب وهيعملوا كده ازاى؟

- يا حبيبي مش لسه هيعملوا، دول عملوا خلاص وابتدوا كمان
يحققوا نتائج، يعني من كام شهر بنت دخلت الجروب وقالت انها معجبة
بزميلها في الشغل، لكن هو مش في دماغه من أصله.. حطت صورتها
وبياناته وف خلال أسبوع كان البنات جمعوا كل البيانات عنه.

منهم الي دخلت عنده الصفحة واشتغلت عليه علشان تعرف أخلاقه وأفكاره، ومنهم الي طلعت متخصصة ف علم النفس وابتدت تعلمها ازاى تتعامل مع النوع ده وتجذبه ليها، والأجل بقى من كل ده إن فيه بنت شافت صورته وقالت ده معايا في الجيم، وأخذتها معاها وقربتهم من بعض، والنتيجة إن الباشا وقع على جدور رقبتة، وقدم لها الشبكة أمبارح، والنهارده حاطين صورته وعليها شريطة سودا وكاتيين...#مبروووك تم الشقـط.

- يا نهار بنفسجي! دول جهاز مخبراتي كامل.. باقول لك إيه وحياة أبوك شوف كده لا يكونوا حاطين صورتي انا كمان، أصل النهارده ريهام مراتي صورتنى بالموبايل وانا نازل بدون مناسبة وقالت لي أصلك بتوحشني! مصيبة لا تكون مشتركة في الجروب!

- يا عم اتنيل، ده لو مراتك حطت صورتك البنات هتسبب الجروب.

- ماشي يا عم المحيط.. إنما تعالى هنا، قل لي انت ازاى بتعرف الكلام ده وهما جروب حريمي مقفول؟

- يا ريس ما هي مراتي معاهم على الجروب.

- يا سلااام! ومراتك بتعمل إيه على الجروب؟ بتشقـط عريس؟!

- احترم نفسك يا ااض.. دي بتدخل عشان لما تشك اني بافكر اخونها تحط صورتي وتقول «احذروا هذا الرجل عنده الإيدز».

طبعا أنا ف لحظة كنت لافف الغدا لوائل، وباقول له وريني عرض كتافك وما تجيش هنا إلا ومعاك التحاليل اللي تثبت انك سليم.

دخلت مكتبي وقفلت على نفسي، وفكرة الجروب بتلمع في دماغي،
بس ازااي أعمله كتاب؟!!

إزااي أخلي البنات يوصلوا لطريقة مشروعة ومحترمة يقدروا بيها
يختاروا شريك حياتهم، مش يفضلوا قاعدين في البيت مستنيين ابن
الحلال، وازاي أخلي الزوجة تحتفظ بجوزها وتحميه وتحمي نفسها من
أي خيانة متوقعة؟

فكرت كتبيير.. وراجعت عشرات الرسائل اللي بتجيلي على المجلة
والصفحة...

فكرت وعصرت دماغي لحد ما ربنا هداني للفنكوش اللي هيغير
تاريخ البشرية.. (كتالوج سي السيد).

كتالوج مبني على فكرة (الاحتلال يبدأ من المعرفة)..

يعني لما تفهمي اللي بيدور في دماغ الراجل هتقدري تحتليه، واللي
باقدمهولك في الكتاب ده هو خيوطه.. بيحب إيه، بيكره إيه، بيحلم
بإيه، يفكر ازااي، إيه نقط ضعفه وإيه مراكز قوته...

من خلال الخيوط دي هتقدري تفهمي أي راجل في الدنيا يفكر
ازاي، والأجمل من كده إنك هتقدري تحدد نوع الراجل اللي ف
حياتك، وتحوليه لعروسة ماريونت ف إيديكي...

- إيه رايك في الفكرة دي؟

جامدة.. صح؟

- طب يلا بينا..



الفصل الأول

الاحتياجات الأساسية عند الراجل

- التقدير
- الغريزة
- العاطفة

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



التقدير الاحتياج الأول عند الراجل

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

أنا مش قصير أوزعة.. أنا طويل واهبل.. أنا الراجل.. أجدع راجل في الدنيا.. وأقوى راجل في الحياة، أنا الحمش الأصيل والكريم والشهم، أنا القلب الكبير والحقيقة والوهم، أنا المخ والعضلات والقلب والفقرات، أنا الراجل، أنا اللي باتعب علشانك، وباحارب علشانك، وباموت علشانك، وباتجوز عليك علشانك، أنا اللي باعمل كل حاجة علشانك آه والمصحف.. أصل انا الراجل.

أنا اللي ممكن اهد الدنيا علشانك وابنيها علشانك، أنا اللي ممكن اجيب لك لبن العصفور، وأقف علشانك في أي طابور... ما انا قلت لك أنا الراجل، أنا سندك وعزوتك وأهلك، أنا ضهرك وكتفك ودراعك، أنا ودانك اللي بتسمعي بيها الكلام، ومناخيرك حتى لو عندك زكام.. أنا الراجل.

- طب والله العظيم تنفع أغنية جامدة جدا، مخ وعضلات، قلب وفقرات.. يا سلام على السجع.. دي لو اتغنت تكسر الدنيا.

- بس المهم بقى تتغنى على مين؟

- على الراجل طبعا.

- إيه ده.. هو ينفع حد يغني على الراجل؟

- أيوه ينفع طبعا جدا قوي لازم على طول باستمرار.

- طب مين اللي يقدر يغني عليه؟

- حضرتك يا أستاذة.

- ويا ترى هيصدقني لو غنيت عليه؟

- أيوه لازم جدا قوي خالص على طول باستمرار.

هي دي الحقيقة يا صديقتي.. الرجل ييموت في الست اللي تغني عليه،
أو بمعنى أصح تمدحه وتحسسه بقيمته عندها، والغريبة انه هيصدقها
حتى لو عارف انها بتشتغله..

يعني جربي كده تقولي له واحدة من الجمل السحرية دي «الله
ينور عليك - إنت جامد جدا - ماحدث غيرك كان يعرف يعمل كده
- إنت أعظم راجل في الدنيا - أنا من غيرك ولا حاجة - إنت ف عينيا
كل رجالة الدنيا»...

هتلاقيه انتشى كده وانتفض وانطبر... يعني إيه انطبر دي؟

مش مهم، بس لازم تصدقي إن شوية الكلام العبيط التقليدي ده
ممكن يخليه يعشقك لدرجة الإدمان، ويخليه يعمل المستحيل علشان
يفضل يسمعه باستمرار.

التقدير هو أول احتياجات الرجل.

كل الكلام اللي فات ده، الجدمه والهزار، كان هدفه إنك تفهمي
أهمية التقدير عند الرجل، لأن التقدير هو طاقة الحياة اللي بتهون عليه
أي صعب، والطاقة دي بيستمددها من كلمات الإعجاب على لسانك
ونظرات الانبهار في عينيك..

في هرم «ماوسلو» للاحتياجات البشرية (اعملي عليه سيرش)

هتلاقي التميز هو قمة الاحتياجات عند البشر عموما، ولأن إحساس
التميز هو أعلى درجات الإحساس بالتقدير، يبقى أكيد الرجل هيعلم

دايما يبه في عيون الناس عموما، وف عيونك انتي بالذات، ساعتها هيحس انه مختلف.. إنه الأفضل والأقوى والأجدع والأطيب، وهو ده #المطلوب.

وعلشان تفهمي ازاي التقدير أخذ المكانة دي في حياته، هاحكي لك قصة تكوينه من البداية:

١ - إزاي اتخلق..

آدم (الراجل) اتخلق قبلك في الجنة، وأول نعمة ربنا اداها له يوم ما اتخلق كانت التقدير، لحظة ما أمر (سبحانه وتعالى) الملائكة إنهم يسجدوا له..

تخيلي! الملائكة بكل قدراتهم ومكانتهم مطلوب منهم يقدموا الولاء للكائن البسيط ده، ويعملوا معاه حاجة مش ممكن يعملوها غير للخالق سبحانه وتعالى وهي السجود!

دي كانت بذرة تكوين التقدير والتميز عند الراجل..

دخل آدم الجنة وعاش فيها سنين ما حدش يعرف عددها، لكن الغريبة انه رغم كل النعيم اللي كان فيه ما قدرش يستمتع، واستوحش، أييوه استوحش في الجنة.. تخيلي!

والكلام ده رغم اختلاف بعض العلماء عليه لكن الإمام أحمد ابن حنبل رواه في حديث صحيح عن النبي - صلى الله عيه وسلم - وكان نصح: «بيننا آدم - عليه السلام - في الجنة، إذ استوحش، فبيننا هو نائم، إذ خلق الله من ضلعه حواء، فلما استيقظ ورآها سأها من أنتِ؟ فقالت امرأة، فسأها وما اسمك؟ قالت حواء، فسأها ولم تُخلقتِ؟ قالت سكنا لك.»

ده نص الحديث زي ما جِه في رواية الإمام ابن حنبل، واللي نقدر نستنتج منه حاجات مهمة جدا (برضو قابلة للخلاف)..

- الراجل مايقدرش يعيش من غير امرأة حتى ولو في الجنة، وربنا سبحانه وتعالى أّخر خلقها علشان يحسسه بقيمتها ف حياته ومكانتها عنده، فيحافظ عليها.

- خلقه قبلها في الجنة علشان يتعلم قبلها، ويفهم كل حاجة عن المكان (الجنة) وبالتالي يقدر يعلمها ويلف بيها ويشرح لها.. «دي عدن، دي الفردوس، دي أنهار، دي محيطات...» وبكده يتمتع بنظرات الإعجاب والانبهار في عينيها، ويحقق الهدف الأول لوجوده، اللي هو التقدير.

- خلقها من ضلعه علشان يربطها بيه علاقة الجزء بالكل، اللي هي علاقة الأب ببنته، فطبيعي يحس بقوامته عليها، وتقديرها ليه، وكمان يعاملها بمنتهى الحب والرحمة، ويديها الأمان لأنها بنته وحتة منه، فقوّته تبقى ليها مش عليها.

يبقى كده وصلنا إلى إن طريقة خلق آدم رسمت دوره ف حياتك و حياة كل الكائنات.. وهو القوامة والتميز.

٢- إزاي ابتدى على الأرض..

خلصت تجربة الجنة ونزلوا على الأرض، وفي الأثر يقولوا إن آدم نزل في مكان بنسميه دلوقتي الهند، وحواء نزلت في مكان بنسميه دلوقتي مكة، وبعد سنين اتقابلوا ف عرفات.. معنى كده إن آدم هو اللي لف الدنيا علشان يوصل لحواء مش العكس، وده يؤكد نفس المفهوم، إن آدم مايعرفش يعيش من غير حواء، لكن حواء لو حققت

الأمان لنفسها هتستغنى عن آدم.. (نص الستات لو جالها عقد عمل في الكويت هتخلع جوزها).

مات آدم وحواء، وامتد النسل لحد ما وصلنا للعصر البدائي اللي اتعرفنا عليه من خلال جداريات الكهوف، زي كهف التاميرا وغيره... (طرزان) كان طول النهار في الغابة بيصطاد علشان يرجع بالأكل والأمان (لشيتا)، بيرجع وهو بيحلم بنظرات الإعجاب في عينيها لما يدخل وهو شايل الغزاة ف إيد، والإيد الثانية شايل فيها الأسد اللي كان بيحوم حوالين الكهف..

بالأكل والحماية قدر يوصل طرزان (الراجل) لحلمه الأول.. التقدير من شيتا (الأنثى) طب انا راضي ذمتك.. شيتا ده اسم أنثى!

٣- إزاي اتربي..

دلوقتي ركزي معايا علشان هانيمك تنويم مغناطيسي..

غمضي عينيكي.. فاكرة وانتي صغيره لما كنتي طفلة.. وكانوا بيسألوكي هتجوزي مين لما تكبري يا توتة؟ وانتي كنتي تردي زي العبيطة وتقولي هاتجوز بابا أو عمو (دول محارم يا فندم) وبالتالي كانوا بيحبوا لك عروسة سندريلا وسنووايت لعب لطفولتك، وطبعاً سندريلا وسنووايت وغيرهم مجرد قصص لبنات عاشوا يحلموا بالخلاص عن طريق الأمير العاشق، يعني بديهي هيتشكل أول أهداف حياتك ويكون (الحب والجواز).. وده هياكد جواكي إن البنث عبارة عن واحدة فاشلة قاعدة مستنية الأمير اللي هيغير حياتها.. «شفتي عملوا فيكي إيه؟»... منهم لله.

طب فاكرة لما كانوا بيسألوا أخوكي عايز تطلع إيه لما تكبر يا ميدو؟
ويرد المتشرد ويقول عايز اطلع ظابط علشان اقتل الحرامية واحمي
ماما.. وبالتالي كانوا بيحبوا له مسدس وبنديقية لعب لطفولته، عشان
يأكدوا جواه نفس المعنى... ومن هنا وللمرة الثالثة اترسخ مفهوم
القوامة والتقدير جواه..

لسه خليكى نايمة.. إنتي رايحة فين؟ أقسم بالله ده انا لازم اعقدك
في حياتك.. اصبري..

فاكرة لما اتخرجت من الكلية وبعدها بكام سنة قابلتني نسرین صاحبك
وسألتك وهي بتبص على صباغك بمنتهى الخبائثة وبتسألك «هو انتي
انخطبتى ولا لسه؟» واتني ارتبكتي زي ما تكوني عاملة مصيبة وقلتي
لسه؟!؟

طب فاكرة نفس اليوم لما محمود اخو نسرین قابل اخوكي ميدو
بعد ما اتخرجوا بكام سنة وسأله «اشتغلت ولا لسه يا ريس؟» وكان
ساعتها بيص على مفتاح عربيته، وكان هيجيله سكتة قلبية لو عرف
انه اشتغل قبله وكم ان جاب عربية؟ (حب التنافس بين الذكور أو
بمعنى أصح الحقد يعني)..

خلاص يلا فتّحي عينيكى واجري انتحري أو اقتلي اخوكى.

٤ - التطور وسقوط التقدير..

في البند ده بالذات فتّحي عينيكى قوي، وفنجليها على الآخر،
علشان ده العصر اللي انتي عايشة فيه دلوقتى، والي حصلت فيه المصيبة
الكبرى..

كبرقي انتي وهو، وكل واحد فيكم حقق ذاته، وبقيتي لأول مرة ند
ليه.. اشتغلتي ونجحتي وانتهى احتياجك لدوره التقليدي ف حياتك
(الأكل - الأمان) بقيتي تعرفي بتحقيهم لنفسك وبنفسك، بقيتي مديرة
ودكتورة ووزيرة وأحيانا رئيسة، وبالتالي اتغيرت احتياجاتك منه..
فابتديتي تصرخي وتقولي «عايزة حب، عايزة رومانسية واهتمام وكلام
حلو، أنا مش محتاجة راجل يجيب لي أكل وشرب، أنا محتاجة اهتمام
ومشاركة وتقدير لدوري في حياتك»...

ويسمعك الراجل وانتي بتقولي الكلام ده ويجيله إحباط ويسأل نفسه:

«يعني خلاص انتي مش محتاجة قوتي ولا كفاحي علشانك؟»

يعني مش هاشوف في عينيك نظرات التقدير تاني؟

بتقولي محتاجة رومانسية وكلام حلوا بس للأسف أنا مش مفطور
على كده.. هتقولي لي ما انت كنت بتعرف تقول أيام الخطوبة.. هاقول
لك أنا كنت بس باحاول اجذبك علشان اخليكي تحبيني وتختاريني،
لكن صديقتي دي مش طبيعتي ومش فطرتي.. أنا بتاع إنجاز وشغل
وتحقيق احتياجات.. أقدر اعبرك عن حبي بالعتاء، إنتي بس اطلبي
وأنا اجيب لك، اتعبي وأنا اعالجك.. خافي وأنا اهميكي.

هو ده يا صديقتي العصر اللي حصل فيه الخلاف بينكم، وزادت
الحناقات ووصلت نسبة الطلاق ٦٠٪..

بس يا ترى مين فيكم اللي غلط؟ هو ولا انتي؟

مش هاقول لك دلوقتي.. استني للأخر وانتي هتعرفي لواحدك،

يلا نكمل..

ده تصريح من الدين بقوامته عليكي، بس ده مش تفضيل ليه ولا تقليل منك، لكن تكليف وتحميل مسؤولية.. ربنا ميزه بالقوة علشان يحميكي مش يضربك ويهينك، وف نفس الوقت ميزك بالضعف والرقه علشان تحسي بيه وتديله الحنان، ولو كان تميزه إنه ينجح ويحجب فلوس يبقى علشان يصرفها عليكي ويحقق احتياجاتك، مش يصرفها على غيرك ولا يستقوى بيها عليكي.

القوامة هنا يعني إقرار بتميزه عنك من باب الاختلاف، علشان كده من الذكاء انك تحافظي على الشعور ده جواه وتنميه دايبا، لازم يحس انه مميز في حياتك، إنه الأفضل والأنسب والأقوى والأجدر بامتلاكك وإسعادك، لأنه لما يفقد الشعور ده معاكي بيروح يدور على واحدة غيرك (حتى لو أقل منك) علشان يحس بقوامته عليها... القوامة يعني تقدير.. يعني قبول، ثقة، إنجاز مهام، تحقيق أهداف، هو متبرمج على ده، ودي أكثر حاجة بيحبها ف نفسه، علشان كده إوعي تحرميه منها.

القوامة يعني لقب..

اللقب هو أهم رموز التقدير عند الرجال، علشان كده ممكن يضيع عمره في المذاكرة علشان يحصل على اللقب ده أيا كان. (حضرة الطباط، سيادة الوزير، جناب الدكتور، الأسطي هو كشة) وممكن يضحى بعمره علشان يسمع الألقاب دي منك، ويحس بإنك فخورة بيها (أنا حرم فلان).

تحقيق اللقب هو أول أحلامه، والاستفادة من اللقب واستثماره هو الحلم الثاني على طول، علشان كده لما بيخلص جامعة بيدور على شغل على طول، علشان يجيب تمن اللقب اللي ضيع فيه نص شبابه.

في المرحلة دي مش هيشوف حاجة قدامه غير تحقيق النجاح واستثمار اللقب (حتى قصة الحب في حياته هياجلها لحد ما ينجح أو يضحى بيها علشان يحقق ذاته).

مفهومه عن الجواز..

تعالى اما اصدمك..

مفهوم الراجل عن الجواز هو مجرد تكملة لتحقيق ذاته، وشعوره بالانتصار وإنجاز المهام برضو، يعني هو دور من ضمن الأدوار وهيجيله وقته (بعد ما يحقق ذاته) يعني في الوقت اللي بتحلمي فيه حضرتك يان زميلك في الكلية يجي يخطبك، بيكون هو شارد في عالم الأحلام لتحقيق الهدف الأولانى والثانى (اللقب واستثمار اللقب) علشان كده بيديكى بومية بعد التخرج على طول، ويختفي وهو يقول لنفسه جواز إيه يا ماما؟!!

طب بدمتك عمرك سمعتي عن شاب بيحلم بالبدلة السوداء والبايون زي ما حضرتك بتحلمي بالفستان الأبيض والفرح والزفة والتورته والبوفية؟ طب عمرك شفتي شاب بيحلم بشهر العسل ويسأل هيقضيه ازاي وفين؟

الراجل مسالم وأحلامه بسيطة جدا.. هو عايز سرير في أي داهية والسلام، حتى فكرة الأطفال مش بيحلم بيها ولا بيحلم يخلف ولا يفكر في أسماء ولاده في المستقبل، إلا لما يستقر تماما وتيجي مرحلة الخلفة.

يبقى كده اتفقنا ان كل حاجة ف حياة الراجل مرحلة وليها وقتها،
بما فيها الجواز...

طب ليه ساعات بيبقى جاهز نفسيا للجواز بس بياجل القرار،
رغم انه اوان المرحلة زي ما قلنا؟

الإجابة المؤلمة إنه:

• بيخلص دراسة وجيش وهو عنده ٣٠ سنة ولسه هيدور على
شغل.

• مش لاقى شغل ولا شقة هيتجوز ازاى؟

• أبوكي عايز منه شبكة وفرح بـ ٨٧٦٢٥٨٢٥ جنيه.

• كل الأفلام في السينما، وكم ان اصحابه، بيحكوا له عن خنقة
الجواز وقرف المسؤولية والولاد، وما حدش بيحكى له عن
التجارب الناجحة.

• شايف تجارب فاشلة، زي قرابيه وأصحابه ومش بعيد أبوه وامه
نفسهم، وسامعهم بيتخانقوا كل يوم والثاني وممكن يتطلقوا.

• فيه بنات بتديله كل حاجة بدون جواز، هيتجوز ليه؟

• الدراما والأفلام والكليات رفعوا سقف أحلامه في اختيار
البنات وجالها، فبقى عايز نانسي عجرم وهيفاء وإليسا، لكن
المتاح «نجمده» و«بخاطرهما» هيتجوز ليه؟

- يعني إيه؟! خلاص مش هاتجوز؟! خلاص هابور؟!!

- يا بنتي اهدي ماتخافيش، وحياتك لأعلمك ازاي تخليه ياخذ
القرار غصب عنه، وينفذه كمان...

إزاي تصطادي عريس بالتقدير؟

اتفقنا من المقدمة إن من حقدك تختاري شريك حياتك، ومن حقدك لما
يعجبك أي شاب تحاولي تجذبيه ليكي، طالما الطريقة محترمة ومشروعة،
بس مش معنى كده انك تلاقي مز ماشي في الشارع ويعجبك فتروحي
تكلميه، ساعتها طبعاً هايصرخ ويقول الحقوا البت بتتحرش بيا (ده لو
انتي مش أمورة) لكن لنفترض مثلاً إن معاكي زميل في الشغل، محترم
وعاجبك وعازية تصطاده عريس (عريس مش صحوية) هتعملي إيه؟
طبعاً لو عملتي فيها البت الجريئة المتحضرة- زي الأفلام- ورحتي قلتي
له (إنت عاجبني أو عازية اتجوزك يا ض) هيحصل أكثر من احتمال:

١- هيطلع خام ووشه يحمر ويتخضض من جرأتك وهي فهمك غلط.

٢- هيطلع ذئب ويطمع فيكي ويستغل إعجابك ويسعى لعلاقة

بدون جواز.

٣- هي عمل متحضر وينبهر بيكي بس مستحيل يعتبرك زوجة في

المستقبل.

يبقى الحل هو التقدير... والخطة كالاتي تاتاتاتا:

أولاً لازم تفهمي ان الأمير بتاع سندريلا غير الأمير بتاع دلوقت،

الأمير بتاع دلوقتي عايز أميرة زيه (دكتورة زيه، مهندسة زيه...) يبقى

لازم تكوني إنسانة ناجحة.. كمان لازم تهتمي بمظهرك في الفترة دي

بزيادة حبتين، ويا ريت بالمرّة تستحمي علشان الريحة، ولو مافيش

بينكم كلام أو أصدقاء مشتركين يبقى اكتفي بنظرة إعجاب (منك) كل فترة، أو كل اما يعمل موقف كويس قدامك، علشان يفهم من خلالها انه ضمن اهتماماتك وفي المحيط بتاع إعجابك.

مثال (١)

الباشا داخل مثلا ببدة جديدة.. بصي له من فوق لتحت كأنك بتقولي له إيه الشياكة دي، بشرط تكون نظرة مبتسمة وسريعة جدا، بعدها تكلمي شغلك بمنتهى الحياء (قال يعني الواد خطفك بشياكته وهو داخل).

مثال (٢)

لقتيه بيتعامل مع حد بشكل محترم ومهذب، أو يبطلع فلوس زيادة للساعي، أو بيتكلم والناس ملمومة عليه وبتسمعه، بصي له بنفس نظرة الإعجاب، وممكن تهزي راسك دليل انبهارك.

أما لو بينكم كلام وأصدقاء مشتركين وواقفين كلكم وبتكلموا في السياسة مثلا، وجه عليه الدور ويعلق.. ساعتها برضو بصي له باهتمام وهزي راسك، وأظهري اقتناعك بكل اللي بيقوله، هتلاقه فوراً بوجه كلامه ليكي وهيتدي يفتي أكثر ويعمل نفسه أبو العريف، ابتسمي بانبهار كأنه بيقول درر.

مثال (٣)

لو احتجتني حاجة في الشغل وعارفة انه يفهم فيها، روعي واسألني، ولما يجاوب - حتى لو غلط - حسسيه إنه جاب التايمة، وقولي له «بتعرف الحاجات دي ازاي؟»، هيتدي برضو يفتي ويكلمك عن الدكتوراه

اللي عملها في كوالالمبور وماحدث يعرف عنها حاجة علشان الحسد.

مثال (٤)

داخل الشغل ولابس حاجة جديدة (المره دي بينكم زمالة وكلام) روعي وقولي له جايب منين التيشرت ده؟ أصل انا شفت واحد زيه بالظبط في التوحيد والنور فرع باريس، هيرد عليكى بمتهى السعادة، لااااا ده انا جايبه من فيكتوريا سيكرت فرع إيطاليا، وعندى منه الأحمر والأخضر والأصفر.. هيبتي ينزع، صدقيه وحسيه انه ماحصلش (إوعي تقولي له إن فيكتوريا سيكرت بتاع لانجيري لاحسن يكرهك) المهم انا عايز أوصل لك ان طريقة التقدير، وإحساسه بانه مميز أو خبير، تلفت نظره وتحليه يقعد طول الليل يفكر فيكي، ويحاول يهتم بشياكته أكثر علشان يسمع منك كلمة إعجاب تاني، وخصوصا بعد ما حس انه ف دايرة اهتمامك.

المدح أعظم طريقة للتقدير:

إزاي تمدحيه؟

هو - إيه رأيك يا حبيبي في الفيلم اللي دخلتهولك ده.. يا ترى عجبك؟

هي - آه يا حبيبي طبعا فيلم تحفة جدا متشكرة قوي.

هو - طب الحمد لله.. أنا مبسوط قوي قوي انه عاجبك.. بس شفتي قد إيه التصوير رائع؟

هي - آه فعلا.

هو - شفتي كمان الإخراج رهيب ازاي؟

هي - عندك حق؟

هو - بس إيه رأيك في الأبطال وأداءهم الرهيب؟

هي - حبيبي هو انت اللي ألفت الفيلم ده وأخرجته ومخبي عليا؟!

عند حضرتك حق... هو فعلا جواه دلوقتي شعور ان هو اللي عمل الفيلم بالكامل، وده لأنك قلتي له من الأول خالص لما سألك.. (الفيلم تحفة جدا).. علشان كده اعتبر ان المدح له شخصيا مش للفيلم.. ودي بقى طبيعة الراجل، وبالتالي دي أحسن طريقة لمدحه.. يعني إنك تمدحي حاجة عملها بالفعل، أو حاجة حققها لك، أو موقف خلاكي مبسوطة، الراجل بيعتبر المجاملة الموجهة لأي (فعل) قام بيه مجاملة موجهة ليه شخصيا، وده عكس طبيعة حضرتك، إنتي بتحبي تكون المجاملة موجهة ليكي إنتي.. شكلك، جمالك، ستايلك، ريحتك، أنوثتك.
أمثلة:

لما انتي تقولي: ياااه الوقت معاك بيعدي بسرعة (بتمدحي الحالة).
هو يرد: إنتي ف منتهى الرقة (بيمدحك انتي).

لما انتي تقولي: برافو عليك اختيارك للمطعم رائع (بتمدحي المطعم).
هو يرد: على فكرة انتي ذوقك حلو وبتطبخي أحسن من المطعم ده (بيمدحك).

إنتي تقولي: طريقة كلامك مقنعة جدا وبتوصل لي المعلومة سهلة (بتمدحي الطريقة).

هو يرد: إنني اللي ذكية وملاحة (بيشتغللك).

يبقى إذا مدحك لمواقفه وأفعاله يعتبر مدح غير مباشر له شخصياً،
وده بيخليه عايز يكرر المواقف دي تاني علشان يسمع نفس كلمات
إعجابك وتقديرك، وده بيصب ف إحساسه بالتميز والنجاح والإنجاز
زي ما قلنا.

- فهمتي حاجة؟

- لا.

- ولا انا.

لماذا يخشى المرأة المكتملة؟

من فترة كده نزلت عندي على الأكونت بوست عن المرأة المكتملة،
وقلت فيه: البنت الأمورة ممكن تلاقي شريك حياتها بسهولة، والبنت
الغنية اللي من عيلة ممكن أي راجل يتقدم لها، والبنت المثقفة اللي ليها
مركز ممكن أي راجل يحلم بيها، لكن البنت الأمورة الغنية المثقفة اللي
من عيلة وليها مركز (يعني اللي عندها كل حاجة) صعب تلاقي راجل
يتقدم لها.

طبعا كل البنات على الصفحة علقوا بحسرة وتنهيده (معاك حق
والله) وكأنهم هما المقصودين بالبوست.. وأنا طبعا كالعادة جدع
وياطنش ومبارضاش اخرج أي واحدة وادخل عندها واشوف صورتها،
علشان اتأكد ان كلهم بيشتغلوا نفسهم... يلا رينا حلیم ستار وكلنا
عندنا ولايا.

المهم نرجع لموضوعنا.

أنا طبعا يوم ما نشرت البوست ماكانش فيه مساحة أشرح السبب..
لكن هنا طالما المجال أوسع يبقى يلا بينا نفكر مع بعض..

طبعا من وصفي للبنت المكتملة نقدر نتوقع في الأول إنها حلم كل
راجل، والعrsan داخلين خارجين عليها، لكن الغربية ومن خلال
المشاكل اللي بتجيلي، إن النوع ده من البنات فعلا بتوصل للأربعين
بدون جواز..

و عشان ابقى محايد هقولك ان أحيانا بتكون هي السبب، وده لما بترفع
سقف أحلامها في الراجل، ولأنها شخصية مميزة واستثنائية وشايفة ان
من حقها تحلم براجل استثنائي.. بس للأسف الراجل الاستثنائي ده
مابقاش موجود كتير (والله البنات بتحلم براجل عادي مش لاقية).

وطبعا حلمها في الراجل الاستثنائي ده بيخليها ترفض عرسان
كتير، لحد ما العمر بييجري بيها وفي الآخر بتقبل أي حد والسلام..
و دي المشكلة.. علشان كده بانصحك لو انتي البنت دي لازم تقبلي
من طموحاتك في الراجل، وتختاري حد مناسب وتقفي جنبه لحد ما
يبقى الراجل المميز اللي بتحلمي بيه..

طب نرجع للسؤال تاني:

ليه معظم البنات اللي من النوع ده مش بيتقدم لهم عرسان كتير؟
وأحيانا مش بيتقدم لهم عرسان خالص؟

رغم إن المنطق بيقول ان أي راجل بيحلم بواحدة مكتملة يتباهى
بيها وتسنده بإمكانيتها (من منطلق ان جوازه نوع من أنواع الصفقات)

زي ما قلنا، ولكن برضو بيتراجع لما يلاقي واحدة بإمكانيتها دي، وده راجع لواحد من الأسباب دي:

- غالبا ممكن العريس المناسب يكون موجود في عالمك ومعجب بيكي، وخايف يتقدم لأنه واثق انه هيترفض بسبب إمكانياتك الهائلة.

- ممكن بيقى راجل معجب بيكي بس طموحه تقليدي .. يعني بيحلم بزوجة بسيطة تطيعه، وتقول له حاضر وطيب، وتربي العيال وتخدمه، وطبعاً لأنه مش فاهم هيبقى شايفك لا تصلحي لأي حاجة من دي، رغم إنك أجدر من غيرك على النجاح في كل الأدوار، بما فيهم دور الزوجة والأم (غبي ماعلشي).

- خايف يتجوزك وتقارني بينه وبين أي حد ناجح من أهلك أو حتى أصدقائك.

- خايف يتجوزك وتنشغلي عنه بطموحك وأحلامك وتنجح في كل يوم أكثر وتبعدي عنه، أو تحسي انه مابقاش مناسب وتخلعيه (واطية وتعملها).

- خايف إن نجاحك ومركزك يكون قتل الجانب الرومانسي والغريزي في شخصيتك فيلاقيكي في البيت الأسطى حنفي (راجع فيلم مراتي مدير عام بتاع شادية وصلاح ذو الفقار)

- القوامة ف مفهوم الراجل هي الإنفاق والسلطة والقوة، والحاجات دي كلها عندك، يبقى هيتوقع ان هيته وقوامته هتضيع معاكي.

• الراجل اتفطر على إنه يعبر عن حبه ليكي بالحماية وتوفير الاحتياجات، فيسأل نفسه اللي زيك هاعبر لها ازاى عن حبي، وهي عندها الفلوس والعيلة والبوليس والأمن والحماية؟! وناسي جنباه إنك عبيطة وكلمه حلوة تخليكي تعشقية وتديله مرتبك كله.

طب إيه الحل وتعملي إيه!؟

طبعا مش ذنبك يعني إنك طموحة وربنا اداكي كل حاجة، علشان كده هاعمل معاكي واجب واذيكي شوية حلول واختاري منهم اللي يناسبك:

١ - انتحري وريحي نفسك وريحينا.

٢ - حاولي تقللي سقف أحلامك في نموذج الزوج، لأن السوق مضروب والرجالة نصها تاواني والنص الثاني مايفكرش يتجوز.
٣ - لو لقيتي راجل محترم، وراجل بجد، بس أقل منك في الإمكانيات، وحسيتي انه خايف يتقدم لاحسن يترفض.. ما عنديش مانع إنك تتواضعي قدامه وتحسسيه إنه مبهر بالنسبة لك، وممكن كمان تلفتي نظره لأحلامك البسيطة في الراجل (يا سلام لو الاقي راجل فاشل كده وغبي زيك.. أتجوزه وأقف جنبه).. بكده هيحس انك واقعة ومش لاقية عريس، وهيتتنك عليكي.. ساعتها اديله بالجزمة وخليكي في بيت أبوكي (السنجلة چنتلة).

بس أرجوكي وانتي بتفكري تختاري عريس احذري حاجتين:

الأولانية: بلاش تقللي من نفسك فيحس انك واقعة زي ما كنت باهزر.. ويستغل ده ويتتنك عليكي.

التانية: احذري الراجل النصاب اللي بيلعب على البنت المكتملة
زيك، أو يتجوزها من باب الاستغلال.

طب عندي سؤال أخير...

- هل معنى كده إنك ممكن توافقى على أي واحد وخلص علسان
يبقى ليكي بيت وأسرة؟

- لأ طبعا.. عندنا حاجات ينفع التجاوز عنها وحاجات ماينفمش...

١- فرق المستوى المادي:

ماعنديش مانع يبقى أقل منك ماديا وأفلاطون بيقول (خدوهم
فقرا واشحتوا معاهم).. والتجاوز عن الفرق في المستوى المادي هنا
نابع من ثقفتي إنه ممكن يطلع زوج طموح ومجتهد، ويشغل ويبقى
أغنى منك.. يعني الفرق ده وارد جدا زواله مع الوقت.

٢- فرق المستوى الاجتماعي:

بصراحة مش حاسب يبقى أقل منك اجتماعيا، علسان مركبات
النقص عند بعض الرجال، واللي بتبان بعد الجواز أحيانا، وتاني حاجة
علشان الولاد يتربوا ف جو أسري متناغم، يعني مش يروحوا عند تيتة
(أم حضرتك) تقوم تأكلهم بالشوكة والسكينة وتكلمهم فرنساوي..
وبعد كده يروحوا عند تيتة (أم جنابه) تقوم تشغلهم على ميكروباص
وتهزر معاهم تقول لهم تعالوا يا ولاد البلغة.

٣- فرق العمر:

طبعا يُفضل يبقى أكبر منك، علسان اكتمال القوامه، وعلشان يملا

عينيكى، وما عنديش مانع يبقى من سنك أو أصغر منك بسنة أو ستين ..
لكن أكثر من كده مش هاوافق غير بشر وط:

- أمه تكون موافقة، وحطى تحتها ميت خط .. لأن الأمهات دايمًا بتكره ان ابنها يتجوز مطلقه أو أرملة أو واحدة أكبر منه.
- يكون راجل ناضج، كلمته من دماغه (سامعة .. من دماغه) عاقل وكبير يقدر يحتويكى، مش يستعرض عليكى بمركبات نقصه، ويعمل راجل ع الفاضى والمليان.
- يكون عنده مميزات كثيرة تخليكى تتنازلى عن العيب ده فى الجواز.
- أهم حاجة بقى إنك لما تتجوزيه لازم تنكدي عليه وتقرفيه فى حياته، علشان يعجز بسرعة والسن بيان عليه، والناس تفتكروا أكبر منك بعشرين سنة .. أى خدمة.

إزاي بالتقدير تدعمية لو فشل؟

أكبر قاعدة فى تقييم صفات الراجل زي ما قلنا هي إنه متبرمج على تحقيق الأهداف وإنجاز المهام الموكلة إليه بأي طريقة، حتى لو عن طريق حضرتك .. المهم والهدف هو إنجازها .. أما الوسيلة فمش فارقة معاه .. يعني لو فيه مهمة المفروض يعملها ولاقى حد غيره عملها بيفرح جدا ويكسل أكثر ويتعود على كده.

مثال (١):

لو الحنفية مكسورة بس شغالة بتنزل ميه، مش هيصالحها طالما لسه بتقوم بدورها، ولو تاني يوم لقاها اتصلحت مش هيسأل ازاي أو مين صالحها، المهم انها اتصلحت، المهمة تمت.

طلبتي منه يروح يدفع مصاريف الولاد أكثر من مرة، وطنش وكسل وكبر دماغه.. حضرتك خفتي على مستقبل العيال لاحسن يترقدوا، صحيتي بدري ورحتي دفعيتها وانتي بتنفخي من مناخيرك ومش طايقة دبان وشك.. رجعتي لقيتيه نايم.. اديتيله كلمتين في عضمه من زهقك.. هيتسم لك ببلاهة أو يتجاهلك أو يزعق فيكي ويعمل أسد، ويقول لك ما انا كنت ناوي السنة الجاية اروح ادفع لهم مع بعض.

في كل الأحوال هو مبسوط في قرارة نفسه، ومستريح ان المهمة تم إنجازها بنجاح وعلى أكمل وجه، مش مهم ازاي، وده في حد ذاته مصيبة بالنسبة لك، بس المصيبة الأكبر انه هيتعود على كده، وهيعتبره حق مكتسب وواجب عليك، ولو فكرتي تكسلي بعد كده عن النوع ده من المشاوير، زي مثلا اجتماع أولياء الأمور - اللي دايمًا يطنشه - ساعتها هيشخط فيكي ويتهمك بالتقصير، لأن المهمة بقت موكلة ليكي بالتعود بسبب غلطتك.

طب والحل؟

الحل انك تسيبي المركب تغرق.. مستقبل العيال هيبضيع؟! مش هيبضيع صدقيني.. هو هيروح يدفع لو حس انك مكبرة دماغك، وحتى لو مادفعش مش مهم، في داهية سنة من مدرسة الولاد، أهون ما يعيش طول العمر متواكل ويبقى عارف ان آخرك وكبيرك توبخيه وتديله كلمتين وخلاص.. صدقيني الموضوع سهل جدا، هو عنده استعداد فطري وقدرة على حل أي مشكلة، لأنه بطبيعته كائن مسؤول، بدليل

انه أيام الصحوية والخطوبة كان ممكن يصحى بدري علشان يعمل لك رخصة العربية، أو يساعدك في حل أي مشكلة، كمان دلوقتي ممكن يعمل أي حاجة تطلبها منه صاحبتة الأمورة في الشغل عن طيب خاطر (باهدي النفوس) بس ده لأنه مش حاسس إنه فرض عليه، وصاحبتة بتعرف تشغله.

يبقى من الذكاء انك تحسسيه برضو إن ده مش فرض عليه، وإنه بيعمله لأنه إنسان محترم متحمل المسؤولية.. كمان اشكره جدا لما يعمل كده (زي زميلته في الشغل ما بتعمل) وزي ما كتتي بتعملي أيام الخطوبة.

مثال (٣):

دلوقتي جوزك مثلا كسول ومش بتاع شغل، كل يوم يسبب شغلانة ويحس انها مش مناسبة، ومستني يجيله منصب رئيس مجلس إدارة البنك المركزي، على أساس ان دي إمكانياته اللي هو شايفها، وبالتالي هيقعد في البيت كثير ويمكن على طول، غالبا حضرتك في الأول بتصدقيه وتعاظفي معاه، ووارد تباعي شبكتك علشان البيت يمشي، وارد تستلفي من أهلك، أو تاخدي قرض أو تعتمدي على مرتبك أو الفلوس اللي محوشاها، علشان برضو تساعديه والمركب تمشي.

كل ده من وجهه نظرك صح، على أساس انك زوجة أصيلة بتقف جنب جوزها، بس للأسف انتي بدون ما تقصدي بتقتلي رجولته وتلغي إحساسه بالمسؤولية، لأن البيت كان مهمة مكلف بيها وانتي بتنجزها بالنيابة عنه، وده من وجهة نظره نجاح زي ما قلنا في المثال الأولاني.. والطبيعي ان اللي هيحصل كالاتي وبالترتيب:

- في الأول هيرفض تماما إنك تساعديه، أو تصرفي على البيت،

وهيردد عبارات زي (أنا ما قبلش مراتي تصرف عليا، أنا راجل البيت وبكرة الحال يتعدل).

- بعد كده هيتدي يقبل مساعدتك على استحياء وهو يبشكرك جدا بمتتهى الامتنان، ويوعدك انه هيعوضك بكرة بإذن الله.

- مع الوقت والتعود هيتدي يطلب منك بنفسه تصرفي على البيت، وده هيكون في صورة رجاء وامتنان.

- في المرحلة الأخيرة اللي بيوصل لها كل الرجاله، إنه يطلب مساعدتك على إنها حق مكتسب، باعتباره دورك الطبيعي في البيت، وساعتها هيقول لك بقسوة (ما تتصرفي - ما تجيبي من أهلك - ما تبيعي دهبك - ما تستلفي - ما تنزلي تشتغلي).

شفتي التدرج ده؟ كله بسبب انك خالفتي الفطرة ولخبطتي تركيبته الجينية، طب والحل .. هتعملي إيه؟

قبل ما افكر معاكي في الحل عايز ألفت نظرك لنقطتين.

الأولانية:

لو جوزك - لا قدر الله - عاجز أو مريض مثلا وبيحاول يشتغل ومش لاقى أي شغلانة (أي شغلانة مهما كانت) حتى لو مش مناسبة، يبقى ساعتها دورك تساعديه في حدود طاقتك، أو ترفضي تكلمي لو مش قادرة وتفصلي (لا يكلف الله نفسا إلا وسعها).

الثانية:

ساعديه في البداية بطريقة بسيطة (٢٠٠٠ جنيه كنتي محوشاهم وهيخلصوا) ولا حظي ردود فعله، يعني لو ما بتدأش يحس على دمه

ويدور على شغل، يبقى تقفي فورا عن المساعدة، بشرط انك ماتستنيش لحد ما الديون تكثر عليك، لأن معظم الرجالة في الوقت ده ممكن تياس وتستسلم وتهرب بصورة أو بأخرى.. يعني تلاقيه ينام كثير، أو ينزل يقعد على القهوة مع اصحابه، وممكن كمان يياس تماما ويطلقك (إنتي الكسبانة) ووارد جدا يكون رد فعله غريب زي إنه مثلا يبقى بارد جدا ناحية أي مشكلة.. وممكن العكس، يعني يبقى عصبي جدا ويستخدم الصوت العالي ويشتم ويضرب، علشان يعوض رجولته اللي خسرها نتيجة عجزه المادي.. وده لأن العنف أو التبلد أو الانسحاب أسهل على الرجل من المواجهة والاعتراف بفشله وضعفه، وبالذات قدامك.

نرجع بقى لموضوع الحل.. المفروض تعملي إيه؟

العلاج بالتقدير لو فشل..

مبدئيا إوعي توبخيه أو تقلي منه أو تعابريه، إوعي يعرف انك بتحكي لأهلك أو أصحابك عن فشله، إوعي تقارني بينه وبين حد تاني.. لازم تبتي بالمساندة المعنوية، يعني تساعديه ياخذ قرار الشغل بالدعم وزرع الثقة في نفسه (إيه المانع تبتي ف شغلانة بسيطة؟ أنا واثقة انك هتنجح وتبقى أفضل.. إنت طول عمرك مكافح وطموح - أنا واثقة ف قدراتك جدا - إحنا محتاجين ليك ومن غيرك نضيع).. فكريه بتاريخه في النجاح.. فكريه بربنا وتوفيقه وعمله الصالح، كمان ضروري في المرحلة دي تهتمى بأنوثتك ومظهرك، يعني البسي كويس في البيت واتدلعي واهتمي بالعلاقة الحميمة بينكم علشان يحس بزجولته، لو ابتي ياخذ خطوات للوقوف على رجله، يبقى قدمي مساعدة مادية بسيطة كأنها فلوس كانت متشالة للزمن، بس هتخلص بسرعة جدا زي

ما قلنا قبل كده.. كمان لازم تخفي عنه أي دخل أو ميراث عندك علشان مايعتمدش عليه.. قولي مثلا (إخواتي خدوا مني الفلوس - مرتبي نزل للنص - خلاص هيرفدوني - بابا مديون ولازم اديله الفلوس اللي معايا) افضلي اقبلي كل أبواب الحل من عندك، حتى لو اضطررتي تاخدي أجازة بدون مرتب فترة، خليه يدور على الحل من عنده.

طب لو كل ده برضه وماحسيتيش باستجابة؟ يعني لسه نايم في البيت أو قاعد على القهوة.. ساعتها لازم تسيبي المركب تغرق بالكامل واستحملي فترة، اشترى أكل ليكي وللولاد ويحي يلاقي التلاجة فاضية، ماتديهوش مصاريف الولاد وضحي بسنة، لو عليه قضية ديون ماتعرضيش المساعدة غير يوم تنفيذ الحكم، ويحي عن طريق غير مباشر (مش منك).

أنا عارف ان كل ده ضغط على أعصابك، بس صدقيني انتي فعلا بتساعديه يستعيد رجولته، وده أرحم بكثير من إنه يتحول لمسخ ويقعد لك في البيت، ساعتها هتكرهي نفسك وبيتك وحياتك، علشان كده ابتدي بالحلول دي، ويكون آخرها هو تهديدك بالانفصال أو تطليبي منه مايرجعش البيت، أو حتى تسيبي البيت لفترة مؤقتة على سبيل الضغط..

دي ف رأيي أفضل طريقة ممكن تساعد بيها جوزك، بس قبل ما انسى عايز منك طلبين... (سحلب وشيشة).

١ - لو حضرتك لسه آنسة ومخطوبة يبقى ركزي مع خطيبك، ولو لقيتته كل يوم بيسيب شغلانة ويدخل في الثانية، أو مايشغلش خالص، أو مستني عقد عمل من خالته في الكويت، يبقى اخلعي منه، كمان لو عيانة أو مزنوقة وماعرضش المساعدة، يبقى مش بتاع تحمل مسؤولية وبرضو اخلعي.

٢ - أما لو متجوزة يبقى ربي ابنك (الولد) من البداية انه يبقى راجل، رفقا بالست اللي هتيجي من بعدك وتتجوزه أرجووووكي.. ده رجاء شخصي، يعني خليه يساعدك في كل حاجة، حسسيه إنه الراجل بتاعك.. يشيل معاكي الشنطة، يروح معاكي الماركت، يساعدك في توضيب البيت، يكتف أبوه وانتي بتضريه، اطلبي منه يجميكي أحيانا من أي حاجة (الأوضة ضلمة تعالى نام جنبي)، ادعمي قدراته الرجولية وصحتها، ولما يعمل كده امدحيه علشان يحب يثبت رجولته على طول، وتبقى دي طبيعته.

يعني أرجوكي علمي إبنك يبقى راجل كامل كفاية.. زهقنا من أنصاف الرجالة، وكله منك انتي ومن تربيتك المهيبة... والمصحف هتجيبني لي السكر والشاي والقهوة وهدفعني انتي الحساب.

العطاء مرهون بالتقدير

(نحن نحب من يحتاجون إلينا)

الراجل مش بيدي حاجة لوجه الله أبدا.. غير لولاده.. ده العطاء الوحيد اللي مش مرهون عنده بمقابل.. اما أي عطاء تاني فهو مرهون بالمقابل.. والمقابل ده مش مقابل مادي، لكن مقابل معنوي.. وهو برضو التقدير.. يعني مثلا لما يجيب لك هدية لازم يسمع بعديها كلمة زي دي: (متشكرة قوي - ربنا يخليك ليا - ماكانش حد هيعرف يجيبها لي غيرك) بكده يحس بالانتصار، لأن العطاء في قاموسه هو نوع من أنواع التحدي والتميز على غيره من جنس الرجالة، زي ما قلنا وهانفضل نقول. كمان حسسيه باحتياجك الشخصي ليه، وإن الحاجة دي مايعملهاش

غيره، ساعتها هيفرح قوي، بشرط يكون كريم بالفطرة، لأن البخيل ماينفعش معاه أي حل غير الخنق أو الدبح، كمان لازم تكون الحاجة دي ضمن إمكانياته، لأن الراجل الكريم لو طلبتي منه حاجة خارج استطاعته ومش في حدود إمكانياته مش هيقدر يعملها، وفي الحالة دي هيبقى محبَط جدا وهيحس بالفشل، وممكن يفقد رغبته في العطاء عموماً.

ده العطاء عند الراجل، وانا عارف إنك صعب تصدقي كلام كتير من اللي قلته، لأنك كالعادة بتقارنيها بتركيبتك وبتسألني نفسك: إزاي هو كده؟ وازاي أنا كامرأة باذي بدون حدود وبدون مقابل؟

والإجابة إن العطاء عند حضرتك رغبة ومتعة ف حد ذاته، يعني مثلاً لو جبتي له هدية بيبقى كل هدفك انه يستخدمها ويفرح بيها، حتى ولو ما أظهرش ده.. المهم يكون سعيد وخلص، وده بسبب غريزة الأمومة اللي جواكي (العطاء اللاحدود بدون مقابل)، بس ده مايمنعش إنك بتطلبي أحياناً مقابل نفسي وهو (الاحترام والإخلاص) يعني مثلاً ماينفعش تجيبي له هدية يقوم يديها لصاحبه أو لصاحبه! كده يبقى عدم تقدير وإهانة لمشاعرك، ومن حقت تطلبي خلع، وانا عندي محامي كويس لو عايزة...

كمان ماتقدر يش تستحملي تعيشي عمرك كله معاه وتضحكي علشانه بشبابك، وفي الآخر يخونك أو يرميكي أو يقلل من دورك في حياته، يعني مثلاً تبقي طول النهار في البيت بين الغسيل والطبخ وتربية العيال والقرف، ويجي آخر اليوم يقول لك (ما انتي قاعدة ومستريحة)

لاااااا كده تنفجري وتطلعي القديم والجديد على جتته..

الخلاصة إن حضرتك كأنثى بتدي بدون حدود وبدون مقابل، بس لو حسيتي بالإهانة أو الخيانة بتتحولي وتطالبي بالعطاء، بس للأسف أحيانا الراجل لو أناني بيكون اتعود ياخذ منك، وساعات بيوصل من الندالة إنه يكون في حياته واحدة غيرك بيستمع بإنه بيديها ويحس برجولته معاها، وساعتها يقول لك انتي السبب، لأن حبك وعطائك كان حب زايد وعطاء أمومي، ووارد جدا يجي يطلب منك تروحي تحطبي له.. (واطي ويعملها)..

يبقى من البداية نفهم إننا لازم نتعامل معاها بطريقة (منطق الصفقات) يعني عطاء مقابل أخذ... عطاء مرهون بالاحترام والإخلاص والعطاء المائل، وده بيكون من البداية ومن أول يوم، علشان ماترجعيش تنفجري وتعابيره زي ما بنشوف في الأفلام العربي (أنا اللي لميتك من الشوارع يا بوبي - أنا اللي عملتك بني آدم يا بسبس)

الانتقاد والنصيحة

- أولا الانتقاد:

طالما فهمتي ان أكثر حاجة بيعجبها الراجل هي التقدير، يبقى لازم تصدقي ان أكثر حاجة بيكرها هي الانتقاد، وبالذات الكلام اللي زي: (إنت غلطان - إنت ما بتعرفش - إنت مش فاهم - طب هاشرح لك - خلي حد يفهمك - طول عمرك ما بتعملش كذا - عمرك ما جبت لي كذا - لو راجل اعمل كذا)..

دي تقريبا أكثر جمل بيكرها الراجل، فطبيعي لما يسمعها منك هيكرهك انتي كمان، وممكن يطلقك عادي جدا.. ليه بقى؟ لأنها جمل

بتمس رجولته وقوامته، وتهز ثقته في نفسه، واحنا اتعلمنا اننا (بنحب اللي يخلينا نحب نفسنا) بس انتي كده بتخليه يكره نفسه واللي جابوه ويكره حياته، ووارد جدا - وزي ما بنقول دايمًا - يروح يعرف واحدة ست أقل منك بكتير علشان تحسسه بقيمته وقدراته وتقول له كلام عكس ده تماما (إنت جامد جدا - إنت أعظم وأحن راجل في الدنيا - إحنا من غيرك ولا حاجة وناقصنا كام مليون حاجة) تغني عليه يعني، والمصيبة انه بعبطه بيصدق.

- طب لو بيعمل حاجة غلط ولازم ألفت نظره أعمل إيه؟

- مبدئيا بلاش تنتقديه قدام حد، وبالذات أهله وأصحابه وأولاده، وعودي نفسك على الانتقاد بطريقة الساندوتش، وهي إنك تحطي النقد بين مدحين (٢ مدح) مثال:

نفترض إنه لابس كرافت مش حلوة يبقى هتقولي: القميص ده تحفة عليك، لكن الكرافت مش لايقة عليهم، بس البنطلون جامد جدا، هنا ابتديتي بالمدح (القميص تحفة) علشان تفتحي شهيته للانتقاد اللي جاي، (الكرافت مش لايقة) ده الانتقاد، وفي الآخر هتنتهي بمدح جديد (البنطلون جامد جدا) وبكده هيمشي وهو مبسوط ومش مخنوق منك.. وصدقيني لو عملتي الطريقة دي ف أي انتقاد هيحب يسمعك. ده بالنسبة للانتقاد، أما النصيحة بقى فهي تاني حاجة بيكرهها في حياته.

- ثانيا النصيحة:

عموما هو مش بيحب النصيحة غير لما يطلبها، لأنها بتحسسه إنه

ضعيف وغير قادر على الحل، بس ممكن يقبلها من واحد صاحبه، ولازم يكون واثق ان صاحبه ده يفهم في الحاجة دي، يعني لو عنده مشكلة مادية هيروح لصاحبه اللي كان معاه في ابتدائي ودلوقتي شغال في بنك (مش هيروح لصاحبه اللي بيستريح في الكلام معاه) ولو جت النصيحة من صاحبه بتاع البنك هيتقبلها وينفذها فوراً، لكن لو جت النصيحة من حضرتك هيكرهها، لأن قناعاته اللي اترى عليها بتقول إنه مميز عنك في كل حاجة، وإنه الأقوى والأذكى والأجدر على حل مشاكله وأخذ قراراته، وبالتالي لو جت النصيحة منك بتبقى تقليل من مكانته جواكي وتقليل لثقتة في نفسه، علشان كده بيحب جداً يعيش في دور الخبير ويديكي نصايح مش ياخذ منك، وبالتالي لو واحدة عايزة توقع أي راجل دايبا تسأله وتعمل نفسها منبهة بالإجابة (زي ما قلنا في القصة اللي فاتت)، يعني مثلاً أسأليه صفار البيضة أبيض ولا أبيض؟ هيقول لك فوراً أبيض تقومي تقولي له بانبهار فعلاً انت عبقرى، بس عرفت ازاى مع إنك أدبى رياضة؟! هيقول لك علشان أبيض ضمير غائب ممنوع من الصرف، وبعدين أصل انا كنت دايبا اطلع الأول على دفعتنا في الكيمياء، وبيتدي يحكي لك عن عبقريته ف كل المجالات، وانتي تبقي فاتحة بؤك زي الهبله وبتهزي راسك كأنك قاعدة مع ألبرت أينشتين.

وبمناسبة أينشتين وعبقريته، هاحكي لك قصة حصلت معاه ويقول فيها: «عندما تزوجت أخبرتني زوجتي بأن من تزوج عبقرى مثلى لا تستطيع أن تتخذ أي قرارات كبيرة أو مصيرية، لذا فقد عقدت معي اتفاقاً بأن نوزع القرارات الحياتية بيننا.. أنا ألتخذ القرارات الكبيرة المصيرية،

وهي تتخذ القرارات البسيطة الساذجة.. والآن وبعد ٥٠ عاما زواجًا،
اكتشفت أننا لم نتخذ قرارا واحدا كبيرا أو مصيريا».

شفتي الوليّة؟ ضحكت عليه وأقنعتة إن كل القرارات بسيطة
وساذجة، وبالتالي هي اللي لازم تاخذها.. يعني المزة خلت أينشتين
كيس جوافة في البيت.

وعندنا برضو عالمة مشهورة جدا لا تقل عبقرية عن زوجة أينشتين،
اسمها المطربة سميرة سعيد.. ودي عملت أغنية قديمة باعتبارها دستور،
لو اتبعته أي زوجة هتخلي جوزها طاووس (باسكُت وبقول لك أمرك،
تؤمرني يا مالك عمري، تحلم وتفوق من حلمك، وانت بتنفذ أمرني)
وعهد الله ولية جامدة ومحترفة.

حلو الكلام؟ كلام جميل؟ لا مش جميل طبعا.

طب جوزي واقع في مشكلة ولازم انصححه، لأنه هيروح في داهية،
وانا فاهمة وعارفة الحل، أو ممكن اسأل واساعده.. أعمل إيه؟

عندك ٣ طرق:

- ١- النصيحة بشكل غير مباشر.. يعني مثلا (حبيبي أنا سمعت مرة
ان واحد كان واقع في مشكلة زي دي وعمل كذا... وقدمي له الحل).
- ٢- حسسيه إنه هو صاحب الحل يعني مثلا (أيوه يا حبيبي مش
انت مرة زماااان قلت ان الراجل لما بيقع في المشكلة دي لازم يعمل
كذا؟ وقدمي له الحل.. هيصدقك حتى لو كذب).
- ٣- قولي له طب تفتكر تحلها ازاى؟ هيبتيدي يهرتل ويقول لك أي
كلام (كان المفروض اعمل كذا)، خدي الكلام الملخبط ده وجمعيه في

دماغك، وقولي له أياوااان زي ما انت قلت كده بالظبط، تعمل كذا
(وقولي الحل الصحيح).

يعني من الآخر اقنعيه إنه هو الدماغ الكبيرة العظيمة المفكرة، وانتي
مجرد رقبة بسيطة ماهاش أي لازمة، ولما يجي يموت طلعي له لسانك
وقولي له زي ما قالت مرات شارلي شابلن لجوزها (على فكرة يا فكيك
الرقبة هي اللي كانت بتحرك الدماغ) وبكده تضمني انه يعيش مشلول
بدل ما يموت ويسيبك.

كدة خلصنا الاحتياج الأول عند الراجل.. يلا ندخل على الثاني.





الغريزة

الاحتياج الثاني عند الراجل

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

الغريزة عند الرجل هي الاحتياج الثاني بعد التقدير.. وفيه كمان متخصصين بيعتبروها الاحتياج الأول.. وده طبعا بيختلف من راجل للثاني، وللأسف الحقيقة دي بتزعل الستات والرجال، وده الغريب في الموضوع!

الرجل بيزعل وبيعتر ان الكلام ده اتهام ليه بانه حيوان غريزي! والست بتزعل وبتعتبره اتهام ليها بانها مجرد جسم بيستخدمه الرجل علشان يشبع شهوته!

وطبعا زعلهم على راسي من فوق، بس والله أنا مش صاحب النظريات دي.

في الأول عندي كام سؤال كده تعالي نفكر فيهم مع بعض:

السؤال الأولاني:

يا ترى الغريزة عند الرجل (أول) احتياجاته ولا (كل) احتياجاته؟ شوفي، وبمتهى الصراحة، لو قابلك راجل وحسيتي ان الغريزة كل احتياجاته اخلعي فوراً، لأنه بكده فعلاً اتحول لحيوان.. لكن لو كان يبجك بس ساعات بيلمح بمشاعره الغريزية؟ هنا هتفرق لأن الإنسان عموماً، والرجل بشكل خاص، بتحركه أربع احتياجات، هي الاحتياج الجسدي، الروحي، العقلي، العاطفي.. ولما بيختار شريكة حياته بيدور على الاحتياجات الأربعة مع بعض.

يعني أولاً: واحدة تشبعه جسدياً.. وده مرتبط بشكلها وتفاصيل جسمها وإحساسه بالإثارة معها.

ثانيا: واحدة بتفكر معاه.. يعني عقل.. علشان تساعده في تنظيم وإدارة حياته.

ثالثا: واحدة رومانسية يحبها وتحبه.

رابعا: واحدة تحقق له الإشباع الروحي.. يعني صديقة دمها خفيف وروحها جميلة.

إذن الراجل عايز من حضرتك كل الحاجات الأربعة دي، ومترتين جواه، الأول الاحتياج الغريزي، وبعد كده باقي الاحتياجات، لكن لو كان مش عايز غير الأولاني بس؟ يبقى أكيد حيوان واهتمامه بيكي هينتهي بمجرد ما يحقق الإشباع الغريزي ده... علشان كده قلت لك اخلعي ساعتها.

السؤال الثاني:

ليه المحرك الغريزي قوي كده عند الراجل وأكثر منك بكثير؟

- علميا وچينيا الراجل عنده نسبة كبيرة جدا من هرمون (تستوستيرون) وأكثر منك بكثير، وده اللي بيخلي الرغبة الجنسية عنده أزيد، وكمان بيخلي استشارته أسهل.

- الجنس عند الراجل هو نوع من أنواع التعبير عن الحب، ومفتاح الوصول لقلبه، عكس حضرتك (إنتي الحب مفتاح غريزتك، ومش ممكن عملي جنس مع واحد مش بتحبيه) هو ما شاء الله دايس في أي حاجة.

- لما نوصل لباب لغات الحب عند الراجل، هنكتشف إن معظم

الرجالة بصريين وحسين (حضرتك سمعية) وطبعا لأنه بصري هيبقى
ف حالة إثارة دائمة بسبب البلاوي اللي بيشفها في الشارع والتليفزيون
والنت... لكن حضرتك لأنك سمعية محتاجة راجل ياكل ودانك شهرين
ثلاثة علشان يحرك مشاعرك وغرايزك.

- الراجل ما عندوش فترات ركود جنسي (بيريوذ- نفاث- طمث-
انقطاع طمث) يعني ما شاء الله، اللهم لا حسد، طول العمر جاهز
للعلاقة ويمكن لبعده السبعين كمان (الجيل ده كبيره سن الثلاثين).

- العلاقة الجسدية بالنسبة للراجل هي إحساس برجولته وانتصاره
وتحقيق ذاته.. بدليل إنه لو فشل فيها يبحدس بجمده رجولته.. وطبعا في
الريف والأحياء البسيطة للأسف عندهم مصطلح إن الراجل الفاشل
جنسيا مش راجل أصلا.

السؤال الثالث:

هل الراجل لما بيخونك جسديا يبقى مش يبحدسك؟

في الحقيقة لأ... وانا عارف ان الإجابة دي هتخليكي تقطعي الكتاب
حالا... بس أرجو كي استني وافتكري الفلوس اللي دفعيتها... أنا واثق
انك بتقولي مستحيل تكون بيحبني ويخونني، أكيد ماكانش بيحبني....
وده لأنك محترمة وبنيت ناس ومستحيل تعمل علاقة في العموم أو على
الأقل مع واحد مش بتحبيه، وخصوصا لو بتحبي غيره (أي خدمة)
وده راجع لسبيين:

١ - إن ربنا مزودك بصمام أمان تقدري بيه تتحكمي ف نفسك
وغرايزك... ودي نعمة علشان تقدري تحافظي على نفسك وعلى عفتك
وعفة المجتمع.

٢- (وده الأهم) إن الحب والجنس عندك مطلب روحي ولا يمكن تفصلي بينهم، لكن عند جنباه الجنس مطلب جسدي، والحب مطلب روحي، ويقدر يفصل بينهم، علشان كده يقدر يعمل علاقة جسدية مع واحدة مش بيحبها من باب الاحتياج الجسدي، وف نفس الوقت يكون بيحب حضرتك وبتحقي له المطلب والاحتياج الروحي (طلعت روحه كائن جبار والنعمة).

طب ندخل في السؤال اللي بيجيلي على الأكونت كل يوم خمسين مرة: خطيبي دايا يطلب يتكلم معايا في مواضيع خارجة، وساعات في التليفون يطلب صور ليا، ممكن بلبس البيت، وممكن أكثر من كده، ساعات بيسألني لابسة إيه دلوقتي؟ نايمة ازاى؟ بتفكري ف إيه؟ وكلها طبعا تلميحات واضحة، والغريبة اني لما استعبط أو اشخط فيه أو أرفض اتكلم في الحاجات دي، ألاقيه يتعصب ويقفل المكالمة ويتهمني بالبرود، أنا طبعا بابقى متعصبة أكثر منه ومحرجة ومش عارفة أرد، وباسأل نفسي هو ليه كل اللي في دماغه المواضيع دي؟! وهل العيب فيا ولا العيب فيه؟! وازاي أرد عليه؟

طبعا أنا شرحت لك شوية حاجات ممكن تفسر لك هو ليه بيفكر كده... وده هيخليكي ماتحسيس انه استثناء والعيب فيه أو فيكي زي ما قلتي (مع إن والله فيه ولاد محترمة مش بتتكلم في الحاجات دي) لكن تعالي نفكر في الموضوع بعمق شوية، وندور على حلول:

خلينا تاني نفكر إن الغريزة محرك أساسي عنده، وصعب يتقبل علاقة مافيهاش جنس، حتى ولو بالصور أو الكلام.

- أفندم! نعم! يعني حضرتك عايزني أتجاوب معاه؟!

- يا بنتي اتهدّي... أنا لسه باكمل.

طب هل مطلوب منك التجاوب؟

لا طبعا... أنا ضد ده تماما، لأنه ببساطة مخالف للقيم والدين...
وثانيا إنه هيخلع منك وهيفهم إنك محترفة لو تجاوبتي.

- يوووووه خنقتني... يعني أعمل إيه؟!

- شوفي... أنا شرحت لك الفصل ده علشان تلتسمي له بعض العذر،
وتفهمي إنه ف حالة توهج بسبب العزوية والبلاوي اللي بيشفوها كل
يوم، وماتستخدميش معاه طريقة ٤ - ٢ - ٤ اللي هي التطفيش (إيه اللي
انت بتقوله ده يا حيوان؟ - هو انت فاكرني إيه؟ - والمصحف اديك
بالجزمة - طب والله هاقول لبابا) علشان خاطري بلاش الطريقة
دي... ماحدث لاقى عرسان دلوقتي، وممكن يخلع ويحي واحد أنيل
منه... تعالي أحسن نتعلم نروضه ازاى.

- في البداية حسسيه بأدب إنك مصدومة من الكلام ومكسوفة جدا
(انصبي عليه يعني) ومستغربة وماكنتيش متوقعة إنه يفكر فيكي كده.

- ماتخليهوش يتهادى في الكلام - برضو بأدب وباحترام - واطلبي
تقفلي المكالمة تحت أي مبرر (الطيبخ على النار، ماما بتندهلي، خالتي
بتولد).

- لو رفض يقفل وطلب تتكلموا مع بعض في الموضوع ده، على
اعتبار انه عادي بين أي اتنين مخطوبين، فهميه إنها ممكن تبقى عادي

لواحدة غيرك، وإنك واثقة انه محترم وبيحترمك ومقدرة احتياجاته وعارفة ان مصدرها حب، بس ف نفس الوقت فهميه إنك بتحترمي نفسك وثقة أهلك فيكي وده الأهم، فهميه إنك بتخافي من ربنا وواثقة من القاعدة اللي بتقول من تعجل بشيء قبل أوانه عوقب بالحرمان منه، وإنك خايفة تتحرمي منه وبكرة هتبقى ف بيته (اشتغليه يعني).

- بلاش الرد بخوف أو عصبية، بلاش تقولي لأهلك إلا لو كتتي واثقة من تفهمهم وبينكم صداقة تسمح بده.

- لو عمل زعلان وقفل معاكي، ادلقيه خالص وتأكدي انه لو انسحب أو بطل يكلمك (وده مستحيل) يبقى كان عيل أو حيوان ونيته مش كويسة ويلعب بيكي، وإوعي تتصلي بيه بعد المكالمة دي مهما اختفى، لأن اتصالك معناه اعتذار منك، والمفروض يحصل العكس، ولو اتصل اتكلمي عادي بدون ما تسأليه عن سبب اختفاؤه، واستعبطي على الآخر.

- طبعا بلاش تبعتي أي صورة ليكي خالص، لأننا مانضمنش هتكملوا مع بعض ولا لا، وماتعرفيش نواياه، ووارد تضعع وتلاقيها بكرة على النت، كمان بلاش فيديو كول أو مكالمات ليلية لأنها طبيعي بتحرك الغرايز وبتبقى تمهيد لبلاوي بعد كده... ودايما أرجوكي وانتي بتكلميه حسسيه إن حد جنبك في الأوضة، حتى ولو أختك الصغيرة، علشان يبقى قلقان يتطرق للمواضيع دي، وكمان يبقى عندك مبرر لعدم التماذي معاه.

تحذير هام وحياة أبوكي:

لو خطيبك أو الشاب اللي ف حياتك محترف هيحاول يستدرجك

- واضح انك باردة جدا، وانا للأسف مش هاقدر أكمل لأنى محتاج بنت دافية.

- على فكرة انتي كده مش بتحيني، لأن اللي بتحب بتبقى دايا نفسها تعمل مع حبيبها كل حاجة، وبتفكر دايا تسعده.

- لااااا... واضح انك معقدة بجد... أكيد حصل في حياتك تجربة خلتك تكرهي الجنس.

- شوفي بقى، أنا زي أي شاب وعندي احتياجات، ولو انتي ماديتيها ليش هاروح ادور عليها مع واحدة غيرك.

- غوري يا بت... إنتي فلاحه متخلفة رجعية، اجري شوفي البنات ولاد الناس بيفكروا ازاي.

- العلاقات في الغرب بتنجح لأن البنت والولد بيعملوا علاقة قبل الجواز وبيفهموا بعض.

- تعرفي إن العلاقة الجنسية بتقرب أي اتنين من بعض؟ يعني احنا لو عملنا كده هنجب بعض أكثر، وانا شخصيا هادمينك واموت فيكي ولا يمكن هاسيبك أبدا.

- والله والله عمري ما فكرت ف جسمك أبدا... أنا بس محتاج ألمسك، أحضنك، أبوسك، أحس بمشاعرك... دي حاجات طبيعية بين أي اتنين، ومش ممكن هاسمح يحصل بيننا أكثر من كده..

- يا بنتي بطلي غباوة... أنا ممكن أعمل ده مع أي واحدة غيرك

وبسهولة جدا، وعندى كثير قوي، بس انا باحبك وعايزه منك انتي،
مش من غيرك... افهمي بقى.

- البنت لما بتدي لحبييها جسمها بيحس انها خلاص بقت مراته...
إنتي مش عايزاني أحس انك بقيتي مراتي؟!!

دي العشر جل الي ممكن يحاول يوقعك بيهم... أرجوكي مجرد
ما تسمعيهم اضحكي وافتحي له الصفحة دي من الكتاب، وقولي
له كله مكتوب يا ريس... ساعتها طبعاً هيخلع منك... أي خدمة...
ضيعت لك المز.

الغريزة في ليلة الزفاف

يا إيهاب انا مش طايقة جوزي، وندمانه اني اتجوزت أصلاً، من
أول يوم جواز هدم أي مشاعر جوايا... كنت متخيلة انه بعد الفرح
هياخدني في حضنه ونقعد نتكلم عن مشاعرنا وحياتنا الي جاية...
لقيته مافيش في دماغه غير حاجة واحدة بس... وكأن مشاعره كلها
اتلخصت في الاحتياج الجنسي... قضيت أول يوم في توتر وخوف
ورفضت انه يقرب مني، لقيته استغرب جدا واتهمني اني مش باحبه،
وبقى عصبي قوي... واتكرر الموضوع ثاني يوم بنفس تفاصيله...
لكن في ثالث يوم ابتدي يتعامل بعصبية وغباء وحصل الموضوع، كنا
ساعتها في الأوتيل، بعدين سافرنا شهر العسل وبرزو بقى عايزنا
نقضي معظم اليوم في السرير، أنا باكتب لك دلوقتي واحنا في الأوتيل
وباعيط بجد، أنا مصدومة... مش ده الراجل الي انا حبيته... فين
إحساسه بيا ورومانسيته؟! أنا بجد حاسة اني بقيت اكرهه.

.....

الرسالة دي جات لي أكثر من مرة بأكثر من طريقة، وكنت بابقى
مختار أرد على صاحبة الرسالة واقول لها إيه!

كنت بابقى عارف الإجابة، بس مش لاقى طريقة أوصلها لها بيها...
كل اللي كنت باقوله ساعتها: اصبري وعدي أول شهر، وكل حاجة
هتبقى طبيعية... لكن اللي اكتشفته بعد كده ان البنت عمرها ما بتنسى
اللي حصل.

وخصوصا لو كان استخدم معاها بعض العنف وهو في حالة
الاحتياج والإثارة، علشان كده خليني أتكلم هنا بالتفصيل شوية،
ويا ريت تفكري معايا بعقلك مش بمشاعرك.

هل حد فيهم غلطان؟ طب لو حد غلطان يبقى مين؟ وليه غلطان؟
أولا نبتدي بالبنت:

طبيعي انها رومانسية بالفطرة، ومتخيلة ان دي ليلة العمر اللي بتبتدي
بفرح ورقص وجنان، وتنتهي برومانسية وحب ودلع... يبقى بديهي
هتصدم لو شافت حبيبها يتحرك بشكل غريزي، ويتجاهل مشاعرها
واحتياجها للكلام والمداعبة والحضن والتطمين.

ثانيا الولد:

ده شاب وأهم احتياجاته الغريزة، زي ما قلنا، وعاش معظم شبابه
من سن البلوغ ١٣ سنة لحد النهارده (يعني عشرة خمستاشر سنة) كابت
رغباته ويحلم باليوم ده... يبقى بديهي يتحرك بدافع غريزي.

طب مين كده الغلطان؟

أنا شايف ان الاتنين غلط والاتنين صح... بس هاجيب اللوم على
الولد أكثر، لأنه الأقوى والأجراً والأجدر على رسم تفاصيل اليوم
بأي صورة.

بمعنى إنه كان ممكن يخفي احتياجاته الغريزية الصادمة دي عن
حبيبته لمدة كام ساعة، ويتعامل معاها بشكل رومانسي، ويحسها انه
أسعد واحد في الدنيا بوجودها ف بيته (ينصب عليها يعني) ياخذها
ف حضنه بمنتهى الحب والحنان، ويحتوي مخاوفها ويطمئنها، يفهمها
إنه حبيبها اللي خايف عليها، وإنه مش هيعمل معاها علاقة غير لما
تهدى وتتظمن وتكون مستعدة جسدياً ونفسياً.

ممكن ساعتها بيتدوا يتفرجوا على صور الفرح، ويفتكروا ذكرياتهم
وينموا على أهلها وأهله والمعازيم (شوفي أمك كانت بتاكل في البوفيه
ازاي؟) ممكن يرقصوا سلو على أغنية رومانسية هادية (آه لو لعبت
يا زهر مثلاً) ممكن يلعبوا شطرنج أو كوتشينة أو حتى مصارعة على
السريـر، يمكن ربنا ينفخ في صورة العروسة وتنهـار وتقول له شيلني
يا حواش... ممكن كمان بيتدوا يهزروا ويلعبوا ألعاب لذيفة (اللي يخسر
يقلع حاجة من هدومه).

طبعاً كل دي طرق لاجتياز الخوف والغربة بينهم... لأن العروسة
مهما كانت واخدة على العريس قبل الجواز، إلا إن ليلة الدخلة بتبقى
ليلة رهبة جواها... يمكن السبب في الناس اللي بتستهبل وتحكي لها
قصص دموية عن الليلة دي؟! جايـز... المهم ان البنت بتبقى فعلاً
متوترة جداً، ووارد يحصل عندها تشنجات نتيجة الخوف، وتبقى غير
قادرة على العلاقة بأي طريقة، والكارثة الأكيد لو الولد حاول بعنف،

ساعتها هتحصل مشاكل كثير وهي يقضوا الليلة في المستشفى (لو كانت ضعيفة وغلبانة) أو يقضوها في القسم (لو كانت قوية ومفترية) المهم انه في الحالتين واحد هيتعور وواحد هيتسجن.. طب ليه؟ ما نخلينا مؤدبين أحسن، وبلاها النهارده... آه والله بلاها النهارده... يعني إيه المانع نتخمد علشان تعبانين من الفرح والرقص وبكرة محلها ربنا؟ واهو نكون أخذنا على بعض أكثر، وتاني يوم لو الولد حس باستجابة منها يتعامل بهدوء.. (ويا ريت يستخدم مراهم تقليدية لتسهيل الإيلاج).

ده دور الولد في رأيي، واللي لازم يفهمه من أصحابه المحترمين المجريين، أو أبوه الخبرة اللي المفروض مصاحبه، واللي أكيد هيديلوا معلومات كافية، والأهم إنهم يحذروه من المنشطات والبلاوي السودا، علشان البنات ماتتصدمش (لأنها بتأذي جسمها في البداية، وبتعودها على حالة معينة في العلاقة) وكمان يشرحوا له إنه من بداية الجواز لو اتعود على المنشطات هتنتهي قدراته أو تقل مع الوقت، ويفهموه إن الزوجة بتتأقلم على قدرات جوزها مهما كانت بسيطة، لأنها المفروض ماجربتش غيره (المفروض يعني) وأهم من كده يشرحوا له خطوات المداعبة الجنسية قبل العلاقة (قدموا لأنفسكم) علشان العروسة تبقى جاهزة للعلاقة الكاملة، وما يحصلش إصابات ملاعب لا قدر الله.

أما بقى عن دور البنات، فهي لازم تفهم من البداية احتياجات جوزها، وتعرف إن الغريزة احتياج قوي جدا عنده وأضعاف أضعاف احتياجاتها، وتفهم كمان انه ما عندوش صمام أمان زيها، يعني صعب يتحكم في شهوته... علشان كده من الذكاء انها تحتويه و ماتصطدمش معاه أو تسفه من احتياجاته، وتلومه عليها، أو تحسسه انه حيوان غريزي...

بالعكس دي لازم تقوله انها مقدره احتياجاته بس محتاجة وقت بسيط
علشان ياخدوا على بعض، وتكون جاهزة... وياريت بلاش تخاف أو
توري له خوفها، لأن ده بيوتره أكثر ما هو متوتر... كمان من الأفضل
إن البننت تقلب الموضوع من البداية هزار... يعني مثلا (إجري يا
الأوضة الثانية عايزة اغيّر هدومي - باتكسف يا منيل - إوعى تمسك
إيدي لاسجنتك والم عليك الجيران) حاجات كده نفك بيها الليلة بدل
الكلبشة دي.

هو الراجل عايزني خام ولا محترفة في ليلة الزفاف؟ وهل يشيره أكثر
إني أكون متفاعلة معاه ولا أسيبه يتفاعل مع نفسه واعمل من بنها؟
بجد سؤال صعب جدا، وانا كراجل وصلت لإجابته بعد ٤ جوازات،
وبعد ما سألت كل أصدقائي المحترمين والغير محترمين والمحترفين
والهواة ووصلت للآتي:

الي بيحصل للبننت في الليلة دي كذا سيناريو:

- تبقى مرعوبة، زي صديقتنا الي فاتت، وبتترعش وخايفة يلمسها،
وبالتالي ممكن تبقى عنيفة في ردود فعلها... ودي زي ما قلنا بتقضي
الصباحية في المستشفى أو القسم.

- تبقى في موقف المتفرج... يعني سايباه مندمج مع نفسه ومفجلة
عينها وبتفرج بيعمل إية ومركزة جدا (بتذاكر علشان تحكي لصاحباتها)
ووارد جدا ساعتها تضحك غصب عنها أو ترد على الموبايل مثلا، وهو
عايش حياته ومندمج في العلاقة، وتشاور له باعتذار (متأسفة، كمل
انا معاك)... ودي طبعا بيطلقها ف نفس اليوم.

- تنام وتسيبه يتفاعل مع نفسه وهي كاتمة صوتها علشان مايقولش عليها قليلة الأدب، ودي بيتتهي منها بسرعة وينام جنبها وتاني يوم يتجوز عليها.

٤ - تتفاعل وتندمج وتطلب أوضاع وتصرخ بصوت عالي (إنت جامد جدي ياض) ودي طبعا بيطلب لها بوليس الآداب.

يعني م الآخر كده الأربعة غلط ونهايتهم سودا، علشان كده قلت إن سؤال صديقتنا صعب...

طب الراجل عايز إيه؟

اتضح بعد الفحص والتجربة والمداولة، إن الراجل عايز البنت الخام اللي تحس وتنهار!

بمعنى إنها تبقى مرتبكة ومتوترة في أول العلاقة، بحكم انها أول مرة تجرب، وده بيديله شعور رائع إنه أول راجل يدخل حياتها ويقتحم جسمها، وده ف حد ذاته مشبع جدا ليه.

لما بيتدي يقرب منها بقى، المفروض يحس انها عايزاه، رغم خوفها، لأن المفروض ان مشاعرها الجنسية اتحركت، بس برضو خوفها وعدم خبرتها مانعينها تندمج معاها، وبالتالي مستحيل هتخلع هدومها لواحدها مثلا، وده أفضل عشان يستمتع هو بالشغلانة دي (يموت في تقشير الموز).. طبعا هتسيبه يعمل كده مع شوية خجل ورفض بسيط، وفي النهاية تستسلم له بدون تفاعل... لكن فورا هيبان عليها الانفعال والاندماج لأنها إنسانة وليها مشاعر وغرايز... بديهي عينيها هتغمض من الانفعال... بديهي هيبقى جسمها بيرتعش من الرغبة... بديهي هيخرج منها صوت هادي وتأوهات تدل على استمتاعها بدون

صخب (شعورك بالمتعة قمة إثارته) بعد ٧ دقائق بالكثير المفروض تكون وصلت لقمة الإثارة (الأورجازم) وغصب عنها لازم تندمج، وإيدها تتحرك حو اليه، وجسمها يتحرك في حالة من الإثارة والوجع اللذيذ، مع صرخات لذيدة تدل على الألم الممتع... طبعا كل الحالة دي مثيرة جدا فيندمج هو أكثر، مع قمة اندماجه وقبل وصوله للأورجازم هي كمان لازم تنهار وتضيع وتبقى أشبه بالمغمى عليها، ويقف تفاعلها وتغمض عينيها خالص وتروح من الدنيا، بس تفضل تأوهاتا الهادية دليل وجود إحساس في معادلة الرغبة.

وحالة الانهيار الأخيرة دي مهمة جدا... لأنها بتحسس الرجل بقدرته، ويفهم إنه قدر يسيطر عليها ويخرجها برة الوعي بقدراته الخارقة الرهيبة الفظيعة.

خلاص انتهى الموضوع ووصل الرجل للنهاية ونام جنبها.. (الحتة اللي جاية دي مهمة جدا):

حالا هيدور جوة دماغ البنت حوار غريب!

دلوقتي هو أخذ اللي عاوزه... يا ترى أنا لسه مهمة عنده؟ يا ترى هياخدني ف حضنه؟ يا ترى اتبسط من العلاقة ولا انا كنت باردة؟ يا ترى هيشكرني؟ هيبوسني؟ هيهدفني من على السرير؟

كلها أسئلة هتدور في دماغها أول يوم وكذا يوم بعد العلاقة، بس النهارده أهم يوم محتاجة فيه الإجابة... والإجابة لازم توصل من الباشا بالفعل وبالكلام مع بعض.. يعني الطبيعي انها منهارة ومهدودة ومستتية الحضن والكلمة الحلوة... يلا يا باشا... إديها زي ما هي بتحلم...

خدها ف حضنك بحب وحنان وقول لها باحبك قوي.. إنتي جذابة جدا.. إنتي أكثر ست ممتعة في العالم.

صدقني يا صديقي الكلام والإحساس ده بيصنع النهارده تاريخ العلاقة بينكم، وهي بالذات هتعيش طول عمرها فافكرة اللحظات دي.

علشان كده الراجل لو اداها ضهره ونام هتبقى ليلة سودا على دماغه ودماغ أهله، وهفضل طول عمرها تكرة اللي جابوه، بس انا من رأيي برضو يكون عندها من الذكاء انها ماتستسلمش لو عمل كده، ممكن يكون غبي وماعندوش خبرة، يعني عادي جدا تاخذ إيديه بحب وتلفها حواليتها وتقول له باحبك قوي، وتقول له كلام تقدير يحسسه برجولته (إنت أفظع راجل في الدنيا) طبعا ساعتها هيفوق ويركز ويتعدل لها ويسألها: وانتى بقى وحياة امك عرفتي مين اني أفظع راجل في الدنيا؟ طبعا لو قالت له عمو إيهاب قال كده في الكتاب، هيدور عليا ويقتلني، ولو ما قالتلوش يبقى هيتأكد انها محترفة وهيطلقها أو يقتلها... وبكده تبقى استريح من وجع الدماغ والقرع.

طيب...

دلوقتي قبل ما اتنقل لنقطة تانية عايز أقول لك حاجة أخيرة...

بعض البنات بيبقى ليها - للأسف - تجربة قبل الجواز، وبالتالي ممكن ده بيان للراجل! وممكن كمان تكون متوهجة بالفطرة، فتبان ليها تصرفات محترفة فيتخض منها، علشان كده باطلب منها ومن أي بنت انها تمهد قبل الجواز بأيام بسيطة للراجل اللي هتتجوزه وتقول له انها ابتدت تقرأ كتب عن العلاقات الجنسية علشان تتعلم... وتطلب منه

هو كمان انه يقرأ أو تديله أي كتاب، وتفهمه إن من الخطأ أنهم يمشوا ورا تجارب اللي سبقوهم، سواء أب أو أم أو أصدقاء، والأفضل إنهم يثقفوا أنفسهم، والتمهيد ده هيخليه يبرر لها بعض الخبرة اللي ممكن تبان غصب عنها بحكم الثقافة أو التجربة، كمان مهم جدا ماتصار حوش بأي تجربة قبل الجواز (إلا طبعاً لو كانت اتجوزت) ودايماً تنكر، وتثق إن ده مش عيب ولا حرام، وإن الأصل هو ستر المعصية حتى عن الزوج، طالما ثابت عنها... كمان مافيش مانع انها تطلب منه يعلمها بعض الحاجات «الأبيحة» في العلاقة (حتى ولو عارفها) وبعد كده تمارسها معاه على أساس انها تلميذته النجبية... هيفرح قوي.

الفرق بين الممارسة عندك وعنده:

ندخل بقى على الكلام الجدد، وسامعيني هاكون مباشر شوية علشان لازم تعرفي المعلومات دي:

- هو بيوصل لقمة الرغبة في ثانية واحدة مع أي حركة أو كلمة، ويمكن من غير أي مسبب، لكن حضرتك محتاجة ٧ دقائق على الأقل من المداعبة والكلام الحلو علشان توصلي.

- هدفه في بداية العلاقة هو (الإيلاج) وف نهاية العلاقة هو الوصول للقمة (القذف) بعدها يوصل لمرحلة الهدوء والسكينة، وتنتهي العلاقة من وجهة نظره، وينظفي تماماً ويحتاج ينام علشان يجدد طاقته، لكن حضرتك ما عندكيش لحظة نهاية (٨٥٪ من ستات العالم لا تصل للأورجاسم) لكن بتستمتعي طول العلاقة، علشان كده ممكن تدريبي نفسك انك توصلي للذة ف نفس الوقت معاه، ويمكن تتدربوا على كده مع بعض بالتفاهم والتكرار، علشان توصلوا لقمة المتعة.

- وارد يحتاج للقاء ثاني بعد ساعة أو أكثر أو أقل، واللقاء ده ممتع ليكي انتي أكثر من الأولاني، لأن جوزك بيكون أهدي معاكي وأقرب للرومانسية منها للإثارة، لكن طبعاً هو بيحب اللقاء الأولاني أكثر علشان يبقى لسه ف قمة الإثارة.

- لأنه بصري يبقى أكيد مش هيحب انك تظفي النور، شكلك ومكياجك ولبسك بالنسبة له قمة الإثارة، لكن حضرتك لأنك رومانسية وخجولة عايزة تعيشي الحكاية كلها في الضلمة، علشان كده تعالوا نوصل لمنطقة وسط، يعني نقضيها نور خافت وشمع (كمان علشان مايشوفش ديفوهات جسمك ويطلقك).

- هو بيحب السرعة والعنف في العلاقة، وانتي بتحبي الهدوء والرقه في الحركات والانفعالات، علشان كده ياريت نبتدي أول دقائق بطريقته (عنف وسرعة) ونكمل بطريقتك (هدوء ورقة).

- مراكز الإحساس متوزعة على جسم حضرتك بالكامل، علشان كده ممكن تثارى لو لمس أي حته ف جسمك، لكن هو ما عند هوش غير مكان واحد بس بيثيره، وما فيش مانع تتعاملي مع المكان ده بصوابك أو بشفايفك (مش عيب ده جوزك يا عبيطة).

- هو مستعد للعلاقة في أي وقت (تعبان جسمانيا - مضغوط عصيبا - مانامش - جعان) كل الحالات دي وارد يطلب فيها علاقة، وده عكس حضرتك لأنك محتاجة حمام دافي للاسترخاء، وراحة ساعتين قبل العلاقة، وجسم مستريح وحالة هادية.

- ممكن يستمتع بالعلاقة معاكي والباب مفتوح، العيال صاحيين،

أمك تحت السرير، لكن حضرتك عايزة الباب مقفول والعيال نائمة والجيران عزّلوا.

- بعد العلاقة هو محتاج ينام علشان يشحن طاقة، وحضرتك بعد العلاقة محتاجة كلام حلو وحضن ودعم نفسي، علشان كده لازم ١٠ دقائق رومانسية بعد العلاقة ويمكن بعدها نتخمد.

- هو ملول جدا ويحب التغيير في كل حاجة، وأحيانا يحب يمارس العلاقة في أماكن غريبة، ويطرق أكثر غرابة، وده بسبب احتياجه (للدوبامين)، وعلشان تفهمي تأثير الدوبامين عليه لازم تقري الرسالة دي بتركيز: أحيانا جوزي لما يبجي من الشغل ويلاقيني لابسة ومستعدة للعلاقة بيتعصب ويتلكك على أي حاجة ويسيني وينام... وأحيانا العكس، يعني لما يبجي ويلاقيني نائمة حتى لو بلبس عادي، يصحيني ويطلب علاقة، وأنا طبعا بابقى في الحلم السابع، ويمكن كمان وأنا في المطبخ ألاقية يشدني وأنا بهدوم المطبخ مثلا، هو كده يبقى راجل طبيعي؟

كل التصرفات الغريبة للراجل في العلاقة الخاصة، والتي بتسميها المرأة طلبات شاذة، بيكون سببها رغبة الراجل في الحصول على حالة الإثارة اللي بتحفضه على الدخول في العلاقة والاستمتاع بيها، وده راجع (للدوبامين) ناقل عصبي في المخ، نقصه بيسبب فتور وملل للإنسان عموما والراجل بشكل خاص، علشان كده بيلجأ لأي تصرف غير تقليدي علشان يعمل له تحفيز وإثارة، والست الشاطرة هي اللي ماتطلبش تأجيل العلاقة ولا دقيقة، لما الراجل يطلبها (مهما كانت غير مستعدة خاااالص).

وده لأن هو عايز:

علاقة غير متوقعة البداية، أو مشاهد مثيرة ومحفزة.

عايز علاقة والعيال صاحية والجو مكهرب علشان الإثارة.

عايز علاقة على السلم، في المصعد، في المطبخ، على الأرض.

عايز أوضاع غريبة وانفعالات جديدة.

عايز NOW OR NEVER، يعني لازم دلوقتي حالا.

لكن انتي عايزة:

تجهيز وحمام واستعداد وشمع وموسيقى وعشا.

تمهيد ومداعبة وملاطفة.

عايزة كل حاجة منطقية ومحسوبة ونضيفه من غرفة وسرير وملابس.

عايزة العيال تنام، والجيران تعزل زي ما قلنا.

مفهومة عن البوسة:

مش عارف مين العالم الصايح اللي قال (القبلة عند الرجل محاولة إقناع علوي لغزو سفلي)، الكلام ده صحيح، وده لأن الراجل بحكم إنه ذئب بشري زي ما قلنا، بيعتبر البوسة مخدر عاطفي بالنسبة للمرأة، بيتندي بيها كتمهيد لحاجات تانية أكثر أباحة (والمصحف احنا عايزين الحرق) يعني تلاقي الراجل بيبوسها وهو مركز مع عينها، يا ترى غمضت؟ أيوه تبقى ابتدت تنهار... بيتندي يلمس أماكن تانية.

علشان كده الزوجة الذكية هي اللي تخلية يحب البوسة.. بمعنى إنه

لما يبوسها تغمض وتنهار على طول.. ساعتها يحس انه أسد وخلها
تضيع في ثانية.

أما البوسة بالنسبة لحضرتك فهي جزء لا يتجزأ من الحنان والرومانسية،
علشان كده كل الستات بتزعل جدا لما جوزها يتجاهل البوسة قبل وأثناء
العلاقة، وتقول اشمعنى كان هيموت عليها أيام الخطوبة.. ساعتها
طبعاً انا باسكت ومش بالاقى رد، لكن باقول في سري (حسبي الله
ونعم الوكيل فينا).

بيصالح بالجنس:

طالما اقتنعنا إن الجنس بالنسبة له صورة من صور التعبير عن الحب،
يبقى أرجوكي ماتستغريش لما تكوني متخانقة معاه وضارين بعض
بالرشاشات وبالآلي، ويجيلك آخر الليل يسحبك (لا مؤاخذة) لأوضة
النوم.. قال إيه.. الباشا بيصالحك! طبعاً انتي ساعتها بتبقي عايزة
تصرخي وتقولي له بتعمل إيه يا بني آدم؟ أنا زعلانة منك! يعني تعالى
صالحني بكلمة حلوة، اعتذر لي، احضني، هات لي هدية، إديني ٥٠
جنيه فإيدي!

لكن تاخدي على أوضة النوم! إيه المصالحة ف كده؟!!

طبعاً حضرتك عندك حق، وانا مقدر مشاعرك، بس أقسم لك بالله
إنه مظلوم لأنه فاهم غلط.. فاكر انه كده بيصالحك، والدليل انه لو
زعلان منك ودخلتي عليه أوضة النوم ولا بسة بيبي دول هيفتكرك
جاية تصالحيه.

شفتي بقى انك على طول ظالماء؟ منك لله يا شيخة (بصوت سعيد صالح في مدرسة المشاغبين).

بس انا لو منك تنتهزي الفرصة، وتقولي له خلاص مش زعلانة بس تعالى نتكلم شوية، وتبتدي تعاتبه وتحطي أسس للخلاف.

يجب النتائج ويكره الخطوات:

هو مش عايز يوجع دماغه بالخطوات ولا عايز يشوفها أصلا.. هو عايز النتيجة.. يعني مش شرط يشوفك وانتي بتحطي برفان، هيبقى سعيد أكثر لو شم ريحتك وأقنع نفسه انك كده خلقة ربنا، هيتبسط قوي لما تدخل عليه أوضة النوم بمكياچك، مش تقعدى قدام التسمية تحطي المكياچ، ويبقى شايفك وانتي بتزوري الحقيقة وبتركبي كل أدوات النصب قدامه من (لينسز- إكستنشن- روج) هو نفسه هيقنع نفسه ان دي طبيعتك لو ماشافكيش بتعملها.

على فكره جوة الراجل زرار بيدوس عليه يخليه يصدق الكذب، بشرط يكون كذب باحتراف.. يعني مثلا روجي اعلمي تقشير بشرة وانفخي شفايفك وغيري كل حته مش مناسبة ف جسمك، اعلمي كل ده وارجعي البيت واسألية (مش حاسس ان فيا حاجة متغيرة؟).. هايقول لك طبعا ملاحظ جدا من أول ما دخلتي، اسألية تاني: طب إيه هي الحاجة المتغيرة؟

هيرد بمنتهى الثقة: لابسة بلوزة جديدة.

صدقيني هو مش بيكذب.. هو فعلا جواه حاجة ربنا خلقها بتخليه يتعايش مع كذبك.. حتى دلحك ومياصتك لما تحبي تثيريه، هتلاقه

مصدقها بإرادته وبيقنع نفسه انك فعلا دلوعة ومثيرة، رغم إنك بتعملي كده علشان يزود مصروف البيت مثلا.

الأخطر من كده بقى إنه بيكره خطوات معينة زي (السويت) بس طبعا بيحب النتيجة.. كمان ييفقد الرغبة فيكي للأبد لو شاف منك ريحة سيئة، سواء كانت ثوم، بصل، طبيخ، سجاير، عرق، آثار حيض، وقت الولادة.

دي كلها حاجات هتجيب له فتور منك مدى الحياة.. لكن هو عادي جدا يطلب منك بوسة وهو ريحته سجاير، ومش غاسل سنانه بعد أكلة كشري بالثوم والتقلية وبالصلصة.. يع.. حاجة تقرف والله.

إمتى يفشل جنسيا أو يجيله فتور؟

- زي ما قلنا، مواقف لو شافك بتعملها هتجيب له فتور، زي السويت أو الولادة... إلخ.
- ملل بسبب طول فترة الجواز وتكرار العلاقة (راجعني فيلم النوم في العسل).
- زوجة شخصيتها قوية وعنيفة في التعامل وصوتها عالي تخليه يفقد إحساسه.
- زوجة دائمة الانتقاد وتخليه يفقد الثقة في نفسه ورجولته (٣٠٪ عندهم ارتخاء، ٥٠٪ سرعة قذف بسبب التوتر).
- أزمة مادية أو مشاكل في الشغل أو ضغوط أو فشل مشروع.
- دخول سن معين زي الستين مثلا، وضعف القدرة نتيجة الشيخوخة (٥٪ يصابون بالفشل).

- مرض لا قدر الله زي السكر بيقلل قدرته شوية.
- غباء من الراجل اللي اتعود يتفرج على أفلام إباحية، فيجيله فتور نتيجة رفع سقف أحلامه في العلاقة، والسئات الوهمية الغير حقيقية اللي بيشفوها، والانفعالات المصطنعة.
- دي مواقف أو أسباب ممكن توصل الزوج لمرحلة الفتور من العلاقة، أو الفشل بشكل جزئي أو الفشل الكامل، ولازم حضرتك تركزي جدا وتتجنبها على قد ما تقدرى (باستثناء المرض طبعا).
- ولو حصل لا قدر الله ولقيتي جوزك بيمر بالحالة دي، لازم تفكري في السبب وتبتدي العلاج، وأفضل حاجة تعملها دايا انك ترجعي له ثقته بنفسه، وتحسسبه إنك مش ملاحظة فشله، ومش فارق معاكى لأنك بتحبيه، والأهم من كده إنك تصبري لأنه وارد تكون فترة ركود مؤقتة بينكم نتيجة ظروف، وده بيحصل بين الزوجين.
- طب لو حصل حاجة زي كده هتبقى إيه النتائج السلبية عليكم؟
- هيتندي يحاول يعوض فشله بطريقة تانية، زي إنه يحاول يثبت رجولته بالقوة البدنية، يعني وارد يشتم أو يضرب علشان يؤكد لك انه لسه محتفظ بقوته ومش مكسور قدامك.
- وارد يدور على علاقة تانية يحاول يثبت فيها رجولته بأي طريقة، حتى لو اضطر يصرف على واحدة علشان تحسسه برجولته.
- وارد ينفجر ويسيب البيت كنوع من أنواع الهروب، ووارد يبقى مقضيها كافيهاات ويرجع كل يوم الفجر.
- ممكن الحالة تزيد عنده وتتحول من فتور لفشل جنسي كامل،

أو يدخل في اكتئاب وتبدي صحته تنهار، ويحس باليأس من الحياة كلها.

طبعاً احنا ف غنى عن الكلام ده، ونقدر من البداية نتجنبه بإننا نديله دعم نفسي بالتقدير والحب.

طب هل حضرتك تقدري تستحملي فضله؟

من نعمة ربنا عليكى إنك عندك صمام الأمان الغريزي زي ما قلنا، كمان الإثارة عندك مرهونة معظم الوقت بمحاولات الرجل لاستثارتك، علشان كده ستات كتير تقدر تتعايش مع ضعف قدرات جوزها، وفيه ستات تقدر تتعايش كمان مع فضله الجنسي الكامل، بدليل ان معظم الأرامل بيكملوا حياتهم من غير راجل، وكثير من المطلقات، وده عكس الراجل اللي لازم يفهم إنك مش هتقدرى تتحملي قصوره الجنسي أو فضله إلا إذا كان بيعوضك بالحب وبالحنان والرعاية، وتلبية الاحتياجات بكل أنواعها.. وساعتها هتقدرى تشغلي نفسك بالولاد والطموح والمشاريع الجديدة، وتبني معاه حاله أشبه بالصدقة اللي ممكن تعوضك عن احتياجاتك الجسدية، لكن طبعاً مانقدرش ننكر ان فيه بعض الستات لا يمكن تقدر تتحمل ضعف قدرات الراجل أو فضله، وفي الحالة دي مش هيبقى قدامها حل غير الانفصال لتجنب الوقوع في الخيانة الزوجية، ربنا يعافينا.

طب هل فيه راجل بارد؟

وارد يكون راجل احتياجاته الجسدية قليلة جداً، ويطلب العلاقة مع مراته كل فترة طويلة يمكن تعدي الشهور، وده بيبقى راجع لكذا

سبب، أهمها تركيبته الجسدية، ويمكن بسبب مشكلة نفسية أو تجربة سابقة، أو خلافات دائمة مع الزوجة، ويمكن يكون بسبب مشكلة صعبة يمر بيها، أو مشكلة عضوية خاصة بضعف هرمون الذكورة جواه.

للأسف ومن خلال المشاكل اللي بتجيلي، شباب كثير بيدمروا قدراتهم الجنسية نتيجة تأخر سن جوازه، ومتابعة الأفلام الإباحية اللي بترفع سقف أحلامه للعلاقة الزوجية، فيصتدم لما يقابل الواقع ويتجوز، ويكتشف انها مختلفة تماما عن اللي بيشفه من انفعالات وأجسام وأبطال وهمية، فيبتدي يكره العلاقة ويجيله فتور، ويكمل في مشاهدة نفس الأفلام حتى بعد الجواز، لحد لما يوصل لمرحلة الإدمان، ويبقى عنده المشاهدة دي أفضل من العلاقة نفسها، وطبعاً بتقوده إلى إنه يتخلص من الرغبة بنفسه (ممارسة سرية ذاتية).. ويتحكي لي بنات كثير انها اتجوزت وجوزها بيقل على نفسه الأوضة ويتفرج، وأحياناً يطلب منها تتفرج معاه.. وبصراحة انا مش متخيل ازاى يقبل على مراته تشوف جسم راجل ثاني غيره؟

علشان كده باطلب من الزوجة انها ترفض تتفرج معاه وتاخذ موقف محدد (بدون ما تفضحه عند أهلها أو أهله).

دي طبعاً الأسباب، وطبعاً احنا قلنا من شوية بقية الأسباب اللي ممكن تعمل للراجل برود جنسي أو فتور.

طب هل فيه ست باردة؟

جوزي دايماً يعايرني بإنى باردة من أول شهر جواز، إزاى اعرف إذا كان ده حقيقي ولا لا؟ ولو حقيقي هل له علاج؟

ده سؤال جالي أكثر من مرة، وكانت دايمًا إجابتي واحدة:

المرأة آلة موسيقية، والنغمة اللي بتخرج منها بتعتمد على العازف، يعني عادي جدًا ممكن يخليها تنشز، وممكن كمان يخليها تتطلع قماش، كلة حسب إمكانياته وشطارته وصبره عليها.

لكن وارد وجود استثناء، يعني امرأة ما عندهاش استعداد دائم أو مش بتحب العلاقة دي.

والسبب غالبًا بيكون:

- جراحة ختان عنيفة ف طفولتها.
- ذكريات سلبية عن الجنس (ليلة زفاف خاطئة - مشاهدة علاقة أبوية فاشلة - تعرضها لمحاولة اغتصاب).
- خجل زايد نتيجة التربية المتحفظة.
- برود نتيجة كثرة مشاهدة الأفلام الإباحية والعادة السرية (جاتكم البلا ملتوتوا البلد).
- معاملة عنيفة من جوزها أو عدم اهتمام بنفسه (ريحته معفنة ومش بيغسل سنان أهله)
- جهل من جوزها ف توصيلها لقمة الرغبة - الأورجازم - (جفاف في المهبل نتيجة ما فيش تمهيد ومداعبة).
- آلام عضوية مرضية (لازم نعرضها على طبيب أو سمكري سيارات).

الجميل بقى إن رغم كل ده ممكن تبان انها مثيرة مع جوزها لو عملت الآتي:

- ممارسة تمرينات (كيجل) لرفع الاستعداد الجنسي (اعملوا سيرش مش هتلاقوا حاجة)
- مصارحة الزوج بأهم ما يحرك مشاعرها، وطلب رسمي على يد محضر بالمداعبة والكلام الرومانسي.
- التركيز على انفعالات الرجل والتأثير به.
- بعض التمثيل والانفعالات لتوصيل الرجل للمتعة، مما ينعكس عليها.
- استخدام بعض الألفاظ التي ترفع درجة الإثارة (يا وحش - يا مجرم - بس بقى - اتبيل على خيبتك).
- التثقيف الجنسي بكل أشكاله.
- وأخيرا يا مدام، ثقي بنفسك وراقبي جوزك، شكله كده بيعط.

.....

يبقى كده اقتنعنا انه مافيش تقريبا ست باردة، لكن ممكن تبقى أسوأ من الست الباردة لو قررت تبقى الأنسة عصمت زي صديقتنا دي:
مشهد رأسي في غرفة نوم الأنسة عصمت.

الزمان: ليلة الدخلة.

المكان: منزلهم الجديد.

- الزوج: أخيرا بقينا مع بعض ف بيت واحد (وبيحاول يتجاوز).

- الأنسة عصمت: من فضلك احترم نفسك.

- حبيبتي انتي بقيتي مراقي!

- مراتك في عينك.. هو انت مافيش في دماغك غير الحاجات دي؟!؟

- أفندم! أو مال هيكون في دماغني إيه النهارده؟ نراجع منهج ثانوية

عامة؟!؟

- طب انجز.. عايز ايه دلوقتي؟

- عايز آخذك في حضني ونتخمد يا عمري.. يلا بقى.

- طب استنى يا بني آدم.. اطفي النور الأول علشان باتكسف.

- طب ما تقلعي بقى.

- من فضلك بلاش الطريقة دي واحترم نفسك علشان باتكسف..

إنت مش شاقط واحدة من الشارع.

- أنا آسف.. واضح انك فهمتيني غلط يا حبيبتي.. طب ممكن بوسة؟

- يع.. إيه القرف ده؟ إنت مش عارف ان البوسة عبارة عن إفرازات

حمضية لعابية، وكمات بتنقل أمراض الكبد وفيروس سي ودي و... و...

- خلااااص كفاية أبوس إيدك.. كرهتيني في نعمة ربنا.. طب ما

تيجي بقى نعمل سيكو سيكو!

- إيه الأباحة دي؟!؟ إنت جريء قوي، ومن الآخر كده أنا مش

باحب اقول الكلام ده ولا اسمعه.

- اللهم طولك يا روح.. طب ممكن يا أخت تديني حقي الشرعي

بها لا يخالف شرع الله؟

- حاضر يا أخ اتفضل.. بس يا ريت تنجز علشان عندي شغل
الصبح.. كمان خلي بالك بالك علشان عاملة شعري وما فيش وقت اروح
للكوافير تاني بكرة.. فرجاء منك الحرص والتأني.

- نعم يا أختي! طب خليكاي نايمة بالطرحة وانا داخل انام في الزفت
الحمام.. بس فكّريني لما اصحى أبقى اطلقك.

- إية ده؟ هتنام في الحمام وتسييني؟ هي دي الرجولة؟! أوك إنت
الخسران، كنت لسه هالبس لك البيجامة الجديدة.





العاطفة

الاحتياج الثالث عند الراجل

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

يا منى أرجوكي إوعي تسييني.. أنا من غيرك اموت، إنتي كل حاجة ف حياتي، إنتي الوحيدة اللي حبيتها ومش ممكن هاحب بعدها، إنتي عارفة انتي بالنسبة لي إيه؟ إنتي الهوا اللي باتنفسه، الهدف اللي عايش علشانه، إنتي حبي الأول والأخير، إنتي الحياة نفسها.

.....

طبعا صديقنا ده نصاب، يعني إما بيضحك على منى، وإما بيضحك على نفسه، وفي الحقيقة وعلشان ماظلموش، هو غالبا الاحتمال الثاني، يعني بيضحك على نفسه، وجايز فعلا يكون مصدق انه حاسس بالحاجات دي.. مصدق ان لما منى تسييه هيترهبن ويعيش على ذكراها، مصدق انها لو سابته فعلا هيموت (حصلت مع روميو).

فعلا جايز يكون مصدق كل ده، علشان كده قدر يعبر بالكلام الحلوه، واللي ممكن يخلي منى تنهار وتكمل معاه (ده أنا نفسي انهرت).

لكن هل دي الحقيقة؟

- يعني لو منى سابته مش هيحب غيرها؟

(٩٨٪ من الرجالة الأرامل بيتجوزوا في نفس السنة بعد وفاة الزوجة).

- طب هل وارد يجب عليها تاني بعد كام سنة وهي في حياته؟

(٧٠٪ من الرجالة بيخونوا زوجاتهم).

- طب الأهم من كده.. هل هو إنسان زي حضرتك وعنده مشاعر؟

(المشاعر عند ٨٠٪ من الرجالة مرتبطة بتحقيق المصالح)

طب لو عنده مشاعر هيحبر عنها ازاى؟

(٩٥٪ من الرجال يعبرون عن مشاعرهم بالفعل).

طب تعالي لما أصدمك أكثر:

العواطف عند الرجال بتتلخص في حاجتين بس، هما الحزن والفرح. الحزن بيعبر عنه بالصمت والانطواء، مش بالعياط والدموع زي حضرتك، وده لأنه اتربي على إن الرجل ماينفعش يعيط، وإلا يبقى لا مؤاخذه واحدة ست، علشان كده قدرته على التحكم في مشاعر الحزن قوية، وبتخليه بيان أحيانا عنيف وجبلة، لكن في الحقيقة هو مظلوم لأن مشاعر الحزن دي أحيانا بتتكبت جواه وبتنفجر في صورة تانية، زي إنه مثلا يحدف حضرتك من البلكونة..

الفرح بيعبر عنه بالابتسامة، ونادر لما يعبر عنه بالضحك علشان يعمل فيها واد تقيل.

دا ملخص المشاعر عنده، لكن موضوع الحب والرومانسية والهيام بالنسبة له كلام فارغ، لأن الحب ف قاموسه هو تحقيق مطالب الحبيب وإشباع احتياجاته زي ما قلنا.

طب تسأليني: إزاي كان مصدعني وهارينني كلام حب وهيام ورومانسية ودباديب حمرا أيام الشالطة والخطوبة؟

أرد عليكى بكل أسى وحزن، واقول لك: للأسف كان بينصب عليكى، كان بيخالف طبيعته وبيقنع نفسه انه رومانسي، وبيشتغللك بكل أساليب الصيد لأنه فعلا صياد.. ولما تقعي في الشبكة وتتجوزيه وتدخلي القفص بيرجع لطبيعته الأصلية، يعني صامت أو بالكثير فايريشن، ولو حضرتك لسه ماتجوزتيش ومش مصدقاني أسألني أي

واحدة متجوزة من صاحباتك، أو حتى أسألي الست والدتك.. هل
واحدة منهم سمعت عن راجل يتكلم في الرومانسية ويوجب دبايب
بعد الجواز؟

هتلاقي الإجابة صادمة، مافيش غير واحدة بس اللي هتقول لك أيوه!
وساعتها لازم تثقي إن جوزها بيخونها أو متجوز عليها وبيربح
ضميره بالهدايا دي.

لكن هل معنى كده ان الراجل مش بيحب؟ لأ طبعا بيحب ويحب
جدا كمان، وممكن يضحى بحياته علشان اللي بيحبها.. بس الاختلاف
في طريقة تعبيره عن الحب واللي سمينها فوق (تحقيق مطالب وإشباع
احتياجات).

وأكبر دليل على كده إن لو حضرتك عيانة هيقب الدنيا علشان يجيب
لك دكتور، ويستلف من طوب الأرض علشان يعالجك (عارف اني
كداب) بس الحقيقة إنه فعلا بيحب بطريقته، بس خدي بالك علشان
تفهمي طريقته في الحب.. لو عيانة هيجيب لك الدكتور، وبعد كده
هيروح يتعشى ويتفرج على الماتش، وبعد كده ينام، مش هيسهر جنبك
زي ما حضرتك بتعملي معاه، وده مش دليل كافي على إنه جبلة زي
ما قلنا، لكن في الحقيقة هو برضو ضمن تكوينه (اللارومانسي) لازم
يسسط نفسه وينام ويستريح علشان يشحن طاقته ويقوم فايق ويعرف
يروح الشغل، وده لأنه عارف دوره ومحدده جدا.. لازم يساعدك بشكل
إيجابي، يعني يروح الشغل فايق فيجيب فلوس يعالجك بيها (مش كفاية
انه متجوز واحدة عيانة زيك؟ احمدي ربنا).

البشر عموما والراجل بشكل خاص بيعبر عن مشاعره به طرق:

١- بالكلام... يعني يشتغلك وياكل ودانك بكلام الحب والرومانسية رقيق (باحبك - باعشقتك - باموت فيكي - وحشتيني - يا جزمة) ويمكن بكلام الإعجاب (إنتي أمورة قوي - ياااه على الشياكة - إنتي استايل جدا - إنتي معفنة جدا)، وطبعاً حضرتك تموت في الطريقة دي، يعني عايزاه ياكل ودانك بالكلام ليل نهار... بس للأسف دي صفة مفتعلة فيه زي ما قلنا، يعني بينصب عليك في الخطوبة لحد ما يتجوزك، وابقى قابليني لو سمعتي بعد الجواز غير كلمة فين الأكل يا ولية؟ العيال ما استحمتش ليه؟ إنتي ما بتشبعيش فلوس؟! (كلام يسم البدن.... جاتنا القرف).

٢ - باللمسة... اللي هي يعني الاتصال الجسدي، يعني يطبطب عليك، يمسك إيديكي، يحضنك، ييوسك (لا مؤاخذة)... ولو فتحتي له الباب هيعمل أكثر من كده، ودي اسمها اللمسة البريئة، وهو شاطر جدا فيها ودايماً هيطلبها منك ساعة الخطوبة، وياريت تخليكي جدعة وتعذبيه، لأنه لما بياخذها قبل الجواز بيزهدا بعد الجواز.

٣ - الوقت... يعني يديكي مساحة في حياته... يفرغ لك جزء من وقته... يشوفك ويكلمك كتير... يخرج معاكي... يصدعك في الموبايل (يشغلك بالرسايل والشات) ودي الطريقة اللي بتحتاجها أي ست، بس للأسف الراجل ما يفهمش ده ويفتكر انه بيعوضها بالفلوس (أنا باعمل كل ده علشان مين؟) لكن في الخطوبة هتلاقه بيعبر عن حبه بالوقت، وبالذات في الجيل ده، لأن كل الشباب صايعة ومش لاقية

شغل، يعني ماورا هوش غيرك، فماتفر حيش قوي لأنه لما يلاقي شغل مش هيعبرك، يبقى أحسن لك اشغلي نفسك من دلوقتي.

٤ - الرعاية والاهتمام... ودي من وجهة نظري أصدق طريقة للتعبير عن الحب، وأكبر فرصة لتقييم الرجل اللي في حياتك، راجل ولا مش راجل؟ هل يساعدك ويوفر لك احتياجاتك (في حدود إمكانياته طبعا)؟ يعني تتصلي بيه لو العربية عطلت تلاقيه في ثانية جنبك بونش؟ لو واحد عاكسك يضربه ويتحبس علشانك؟ لو عيانة يجيب لك الدكتور (ويخليكي تدفعي طبعا)؟ يعني من الآخر جدع وشهم ومتعاون ولا مكبر دماغه؟

وميزة الرجل اللي بيعبر بالاهتمام إنه بعد الجواز تلاقيه على طول متلقح جنبك في المطبخ لحد ما يوصلك لدرجة إنك تتخني وتقولي له إخفى من وشي الساعة دي.. خليني أتتيل اطبخ، وطبعا الطريقة دي بيلجأ ليها أي راجل راجع من إعاره في الخليج ومشتاق لقعدة البيت، أو بعد عمر طويل لما يتحال على المعاش ويخليكي تكرهي أم الرعاية على أم الاهتمام على أم الكتاب على أم اللي كاتبه.

بس ارجع واقول لك لو الرجل اللي ف حياتك كده يبقى يبجلك بجد، وامسكي فيه بإيديكي وسنانك.
٥ - الهدية... والاهتمام... هدية.. هدية.. هدية.

إيه يا بنتي مالك ضحكتي كده وريقك جري! ده انا قلت كلمه واحده «هدية» أو مال لو كنت بعثت لك هدية بجد!

طبعا هدية يعني موبايل، جزمة، برفان، سوليتير، جوز فراخ... وانتي طبعا تموتي ف أي حاجة ملفوفة، حتى لو قبلها زمنية، بس للأسف

طريقة الحب دي مش بيعبر عنها غير اللي معاهم فلوس، وطبعا كلنا شحاتين، يبقى لازم تشتغلي يا ماما وتعتمدي على نفسك وتجيبي الهدية اللي تعجبك وتديها لخطيبك أو جوزك يقدمها لك في أي مناسبة، وتتصوري بيها وتنزليها على الفايس بوك وتقولي شوفوا المزبوعي جاب لي إيه؟ فتاخدي لك عين تتلقني فيها بسبب حسرة صاحبائك اللي عمرهم ما شافوا هدية من يوم ما اتجوزوا.

لا والله باهزر، فيه شباب ورجالة محترمين بيحبوا هدايا حتى ولو بسيطة، حتى ولو وردة، وواثق ان حضرتك مش مادية خالص ورومانسية جدا وبتفرحي بالهدية أيا كان تمنها، المهم يكون حاسسها ومش بيعملها واجب، والأهم من كده يكون لاففها كويس وعاملها لك مفاجأة.

دول اله طرق اللي بيعبر بيهم الراجل عن حبه ليكي.

يلا شوفي الراجل اللي ف حياتك بيعبر بأني طريقة، وحاولي تستمتعي بيها، وحسسيه بقيمتها عندك، وفي نفس الوقت حاولي تنمي فيه التعبير بالطرق اللي ممكن ترضيكي، ومش عيب انك تلفتي نظره ليها لو مش واخذ باله.

وطبعا أنجح علاقة هي اللي يقدر الطرفين يعبروا بالخمس طرق (بنسب متفاوتة) وبدون ما يتجاهلوا أي واحدة فيهم، وأهم من كل ده لما تيجي تعبري له عن مشاعرك، فكري بنفس الطريقة دي، يعني اسألي نفسك هو بيحب أنهي طريقة أكثر؟

وطبعا هتوصلي لنفس النتيجة المقندلة، اللمسة قبل الجواز، والرعاية بعد الجواز... حسبي الله ونعم الوكيل فينا.

مش عايزم الحب غير البدايات

الصفة دي أغرب صفاته، وهتفسر لك كتير من تصرفاته.

يعني افتكري كده إحساسه بيكي وانفعالاته ف أول العلاقة، وقارني بين انفعالاته وحماسه دلوقتي، هتلاقي فرق كبير.

وده لأن الراجل فعلا مدمن بدايات، ومهووس باللقاء الأول معاكي.

بيعشق كل حاجة في أولها... متعة أول مرة وافقتي تكلميه، وشعور الانتصار بإنه قدر يوصل لك، متعة أول مرة وافقتي تشوفيه، وإحساسه بإنه خلاكي تتخلي عن حذرك وتقابليه، متعة أول نظرة، وهلفة أول لمسة، وإحساس أول كلمة حب، الحرارة اللي بتزيد في أول كل حاجة بينكم... هي دي أكثر حاجات بتشده فيكي وفي العلاقة عموما.

في اللقاءات اللي بعد كده بيرتفع ترمومتر حماسك انتي للعلاقة، وبينزله عنده لحد ما يوصل لمنطقة الاستقرار... وساعتها وارد يستقر، ووارد ينزل بفعل الملل والتكرار والفتور... وللأسف هو أصلا كائن ملول بالفطرة... يعني نفس الحاجات اللي كانت بتشيريه في الأول، زي اهتماماتك مثلا، هي نفس الحاجات اللي ممكن توصله للملل بعد وقت من تكرارها، وخصوصا لو زادت.

فيه متخصصين شايقين إن معظم محاولات الراجل انه يدخل علاقة جديدة، مصدرها هو فكرة البحث عن البدايات، بيبقى عايز يعيش كل البدايات من جديد... أول مقابلة، أول لمسة، أول اعتراف، لأنه زي ما قلنا كل حاجة بتتكرر في حياته بتفقد قيمتها، ويبقى حماسه وبتنطفي رغبتة فيها.

أحيانا الراجل بيتهم مراته بإنها باردة ومش قادرة تثيره، على اعتبار
انها السبب والعيب منها، رغم ان غالبا تبقى المشكلة عنده هو، ومرتبطة
بتكوينه الملول زي ما قلنا.

طب هل الموضوع ده له حل؟

- قبل ما افكر معاكي في الحل، أحب اقول لك إن مش كل الرجالة
زي بعضها، ووارد يكون الراجل اللي في حياتك مختلف، وده استثناء.

لكن لو حسيتي ان خطييك أو جوزك ابتدى يمل من العلاقة ويفقد
حماسه (حتى ولو لسه متمسك بيكي) ساعتها لازم ترجعي خطوة لورا،
بس الخطوة دي هناخدها حسب نوع علاقتكم:

- أولا لو كان لسه خطييك:

لو خطييك ابتدى يحس بالملل واهتمامه ابتدى يقل، يبقى انتي كمان
لازم تقلمي اهتمامك وتخليكي رد فعل لاهتمامه... إوعي تتصلي بيه تاني لو
ماردش عليك... هي مرة واحدة وتستني، لو ماتصلش ماتكرريهاش...
ويا ريت يبقى دايا اتصالك رد على اتصاله مش العكس برضو، ولو
حس بالتجاهل ده إوعي تقولي له إنك بتعملي كده بسبب تجاهله! أو
تستغبي وتقولي له عمو إيهاب اللي قال لي أعمل كده! أقسم بالله
هاخنتك... قولي له لا يا حبيبي والله مشغولة الأيام دي وعندني كذا
حاجة باعملها، وفعلا اشغلي نفسك عنه... أو قولي له بابا بقى يعترض
على المكالمات الكثير بيننا، طبعا هيعمل زعلان ويدلقتك يومين ثلاثة..
طر.. ولا كأنك هنا... فترة وهيتدي يتعود على طريقتك الجديدة، ولما
يرجع يعاملك بحماس يبقى نرجع نعامله بحماس.

- ثانيا لو كان بقى جوزك:

لو جوزك ابتردى يفقد حماسه ليكي وللعلاقة، يبقى برضو ارجعي خطوة لورا... يعني بطلي تتصلي بيه وهو برة (باتظمن عليك - هترجع إمتى؟ - واحشني) إوقفني كل ده فورا، مايرجعش كل يوم يلاقيكي جاهزة للعلاقة (لبس مثير - كلام وإيحاءات) برضو هدي اللعب في الجزئية دي، خليه هو اللي يطلب، بس طبعاً ساعتها وافقي... وأهم من كل ده إنه مايحسش انك مجرد حته موييليا مركونة ومستنياه في البيت، يعني اشغلي نفسك باهتومات تانية، ويا ريت تنزلي شغل، ولو رافض اعلمي شغل حر في البيت أو حضري دراسات عليا، انزلي عمل تطوعي، كورسات، امسكي كتاب واشغلي نفسك (اشتري كل الكتب بتاعتي)، مش عايزه يحس انك مرهونة بيه وبتطوفي حواليه، عايزه يتعصب ويقول لك انتي بقيتي على طول مشغولة ومش مهتمية بيا... ساعتها تعرفي انك انتصرتي، بس إوعي تبالغي في التجاهل والبرود لاحسن يرجع لك البيت معاه مراته التانية.

صداقة ولا حب؟

الصداقة بين الرجال والست موضوع الدين حسمه من زمان لما قال (ولا متخذات أخدان) وده رفض واضح للمرأة إنها تقول ده صاحبي وده صديقي، وانا شخصيا ومن خلال آلاف المشاكل اللي عاصرتها، اكتشفت ان معظم الصداقات بين البنت والولد بتنتهي بعلاقة، يعني باعتراف طرف من الاتنين بالحب أو وقوعهم في تجربة جسدية.

وكنت دايا لما اقول رأيي ده ف أي ندوة أو برنامج أو حتى محاضرة، الأقي شباب كتير يتهموني بالتخلف، ويكون دايا رأيهم إن الصداقة

دي مرهونة بالمستوى الثقافي للأفراد والمجتمعات.

وكانوا يستدلوا على كده بإن الغرب عندهم معنى الصداقة ده محترم جدا ومهم لأبعد مدى، كمان كان بيقولوا لي إن الصداقة بقت واقع بعد ظهور المدارس المشتركة والجامعات والجمعيات والندوات اللي بيصادق فيها البنات والولد.

بصراحة كنت ساعتها باسكت واقول يمكن انا اللي رجعي ومتخلف وفاهم غلط.

علشان كده في الكتاب ده قررت ادور واجيب مراجع واشوف الحقيقة، من خلال رأي المتخصصين وبالذات الغرب.. والحمد لله وصلت لنفس النتيجة اللي أكدت قناعاتي.

يعني مثلا:

(ستيف هارفي) الباحث الأمريكي الشهير عمل تجربة لطيفة قوي:

جاب ١٠٠ شاب و ١٠٠ بنت بينهم صداقة بريئة جدا، وفصلهم عن بعض، وادى لكل واحد وواحدة ورقة يكتب فيها رأيه من غير ما يكتب اسمه.

والسؤال كان للولاد: هل تتمنى تعمل علاقة مع صديقتك؟

ونفس السؤال للبنات: هل تتمنى عملي علاقة مع صديقك؟

واتلم الورق وكانت المفاجأة.. ١٠٠٪ من الشباب الذكور قالوا أيوه طبعا تتمنى، و٥٪ من البنات قالوا أيوه موافقين و٩٥٪ رفضوا.

ودي كانت نتيجة صادمة لستيف ومساعدينه، لكن مش صادمة ليا.

لكن احنا كعرب طبعاً فاهمين ان الراجل الغربي ده بلغ من التحضر إنه اتجرد من صفاته الذكورية، وقدر يرتقي فوق رغباته وشهواته، مع إن اللي حصل هو العكس، إنهم اندمجوا في الشهوة لحد ما وصلوا للشذوذ. ونفس الكلام ده بتأكدته الدراسة اللي عملتها الأكاديمية البرازيلية للتضامن والأخوة، واللي أكدت إن ٨٨٪ من الأصدقاء (بنات مع أولاد) بتقوم بينهم مع العشرة والوقت علاقة حميمة وممارسة جسدية، مرة واحدة على الأقل.

طب هارجع تاني للشباب اللي بيرفضوا رأيي في الندوات، واسأل أي واحد فيهم السؤال التقليدي العبيط:

هل توافق إن أختك يكون ليها صديق ولد؟ طبعاً هاتوقع انه من الإحراج في وسط الناس هيرد (طالما بابليك وويذاوت فيلينج سو وات؟!)

لكن الحقيقة إنه بيطلع صايح وبيرفض تحت مبرر إنه مش ضامن يكون صديق أخته محترم.

وعلشان أكّد لك مدى خطورة صداقة الراجل والست، تعالي اسمعي قصة الست دي اللي جات لي على الإن بوكس:

أنا متجوزة من ١٠ سنين، وكنت باحب جوزي قوي، وكان له صديق عشرة عمرة زي اخوه بالظبط، عرفني عليه وقال لي من أول يوم جواز ده أخويا في غيابي وحضوري... وفعلاً الراجل كان محترم جداً وبقي مع الوقت زي اخويا لسنين طويلة... أي وقت كنت ألبأ له ألقية جنبي.. يمكن أكثر من جوزي واخويا نفسه.

من كام شهر لقيت شات على موبايل جوزي مع واحدة شمال، وكان الشات في منتهى القذارة، قعدت كاتمة ف نفسي أكثر من أسبوع، وفجأة جوزي قال انه مسافر تركيا شغل.

ساعتها طلبت صديقه وانا منهارة وقلت له أرجوك حاول تعرف لي هو فين ومع مين، لأنني لقيت الشات اياه..

في نفس اليوم الساعة ٢ فجرا وبعد سفر جوزي اتصل بيا صديقه اللي حاول ينكر الحقيقة، لكن لما بكيت وحلّفته بالعشرة اعترف لي ان جوزي مسافر مع واحدة.. أنا طبعا انهرت وحسيت اني هاموت، قفلت معاه وانا مش قادرة اتنفس... وبعد نص ساعة لقيته بيخبط عليا، فتحت له وانا مش في وعيي من الصدمة، وهو كمان كان مصدوم ومش عارف يبرر اللي حصل من جوزي.. دخلنا واتكلمنا أكثر من ٣ ساعات... حاول يهديني لكن للأسف الموضوع اتطور بيننا وحصلت علاقة... أنا مش عارفة عملت كده ازاى؟ هل بدافع الانتقام، ولا بسبب الضعف والاحتياج اللي سابه جويا تقصير جوزي الفترة الأخيرة؟ مش عارفة.. لكن كل اللي اعرفه اني هاموت من تأنيب الضمير، وخصوصا اني ابتديت استرجع تصرفات الصديق ده، وافتكرت انه كان بيحاول معايا من زمان بشكل غير مباشر بكلمات الإعجاب، ووارد جدا يكون كذب في موضوع ان جوزي سافر مع واحدة.

.....

ده ملخص الرسالة اللي جات لي واللي أكدت جويا فكرة استحالة وجود صداقة بين راجل وست، ودة علميا لـ ٣ أسباب:

أولا الصداقة عموما علاقة روحية، يعني روحين يقربوا من بعض ويفهموا ويحسوا ببعض، يعني سهل جدا تتحول لعلاقة عاطفية.

ثانيا الصديق ييعرف كل حاجة عن صديقتة، زي أسرارها اللي ممكن يستغلها، ونقط ضعفها، واحتياجها اللي وارد يلعب عليه زي صديقنا الخاين في القصة اللي فاتت.

ثالثا وارد إن المرأة تكتفي بعلاقة الصداقة بينها وبين راجل لأنها عاطفية بتحركها المشاعر وإحساس الأمان، لكن مستحيل الراجل يكتفي بالصداقة أبدا، إلا إذا كانت المرأة عاملة حائط صد، لأنه زي ما قلنا غريزي وأهم وأقوى محرك له الجنس.

يبقى علشان كده أرجوكي بلاش تقولي لي ده صاحبي وعشرة عمري وزبي اخويا والكلام الفارغ ده.. كده كده هو مش زيك (لا نفسيا ولا جسديا) وأقسم بالله لو جات له أي فرصة لعلاقة معاكي ما هيردد لحظة، وإذا كان لسه محترم معاكي لحد دلوقتي يبقى مافيش غير احتمالين، إما خجول وخايف يخسرك، أو الاحتمال الثاني إنه... ولا بلاش.

الحب والفراق والنسيان

(أكبر نقطة ضعف بتجمد حياتنا إننا نفقد حد اتعلقنا بيه)

إلحقني يا إيهاب..

البنبي آدم اللي كنت باحبه.. اتخانقنا مع بعض الأسبوع اللي فات وقررنا نتقابل علشان نشوف هنفشك ل ازاى، لقيته فجأة عامل لي بلوك من كل حاجة، دخلت عنده من أكونت واحدة صاحبتني لقيته متصور مع صاحبتة الجديدة في الجونة، ويضحك ومقضيها ولا كأن فيه حاجة

حصلت في حياته.. تخيل!؟ وانا اللي كنت قافلة الأوضة على نفسي وعمالة
اعيط واتفرج على صورنا مع بعض، ومستتية انه يكلمني علشان نتعاتب،
هو ازاي كده؟! ده لسه من كام يوم كان بيقول لي باحبك وباموت
فيكي وماقدرش اعيش من غيرك.. إزاي في لحظة ينسى علاقة ستين
ويتبدي من جديد كأنه داس على زرار فنسي كل حاجة!؟

.....

مستغربة ليه؟ ما هي دي طبيعة الراجل، وزى ما قلت لك كثير
إنه بطبيعته كائن عملي مش عاطفي.. علشان كده بيعسب كل حاجة
بمنطق المكاسب والخسائر، يعني لو حس انه لازم ينهي التجربة هينهيها
فورا وبدون مقدمات، ومش هيرد عليكى، وهيرفض مقابلة الوداع
الأخيرة الحزينة اللي بتحلمي بيها، واللحظات الدرامية اللي بتعجبك
في آخر كل قصة، النسيان بالنسبة له انتصار وبالنسبة لحضرتك خيانة
وانكسار.. وحتى لو حس بعد نهاية التجربة بشوية وجع وألم، فده
لأنه كان متعود عليكى أو كنتي بتحقيقي له حاجات صعب يعوضها
من واحدة غيرك، أو صعب يلاقي واحدة أفضل منك، ورغم كل
ده مستحيل هيعبر عن الوجد اللي جواه، لأنه شايف ضعف وخلل
في رجولته، بس أكبر وجع بيعسه لما انتي اللي تبتدي الانسحاب من
حياته، ساعتها بيتعذب بجذ ومستحيل ينساكي.. بس حتى الشعور
ده مش نابع من عاطفة لكن نابع من انكسار ثقته ف نفسه.. وده لأنك
ببساطة اتخلتتي عن وجوده ف حياتك ووارد تعرفي غيره.. وبرضو
وللمرة الثانية مش هيستسلم للمشاعر دي أبدا ولا هيعيش حزين
على الإطلاق، مش هيعمل زيك ويقعد يعذب في نفسه ويسمع أغاني
حزينة وينزل بوستات درامية.. بالعكس ده هيعمل لك بلوك فورا

ويقطع أي حاجة تفكره بيكي، ويمكن يمسح صورك والشات اللي بينكم، ومستحيل هيتكلم أو يحكي لحد عن ذكرياته معاكي علشان مايفتكركش ويضطر يضعف..

هيفكر بسرعة جدا في بديل ليكي، وهيحذف نفسه ف تجربة علشان تعوضه عنك وتحقق له احتياجاته وتحليه ينساكي أسرع وما يضعفش ويفكر يرجع لك.

بس خدي بالك لو البنت اللي دخلت حياته أفضل منك وبتحقق له احتياجاته أكثر هينساكي فورا، لكن لو اكتشف انك كنتي الأفضل هيبتدي بيعت رسايل تقليدية في المناسبات، أو ينزل بوستات يفكرك بالحب لحد ما تستجيب، ولو طنشتيه هينهار ويتصل بيكي، ولو عاملتيه بتجاهل هيقفل في وشك السكة ويختفي فترة علشان كرامته، وبعدها لازم يرجع منهار تماما ويقدم كل التنازلات، علشان كده أنصحك لو عايزة ترجعي له يبقى لازم تعذبيه شوية قبل ما ترجعي، وترجعي غالبية جدا علشان يحافظ عليكي بعد كده.

كمان لازم تثقي إن الراجل ممكن ينساكي في يوم ويدخل تجربة تانية، بس يقعد طول عمره يفتكرك، لكن انتي عايزة حد أدنى ٣ شهور (فترة العدة النفسية والجسدية) علشان تنسيه خالص، وعمرك ما تفتكرية تاني أبدا..

- طب ليه إنتي بتاخدي وقت أكثر في النسيان وبتنكسري لما بتخرجي من التجربة؟

• علشان انتي كائن عاطفي بالفطرة وطبعك الإخلاص، كمان أحادية في مشاعرك وشايفة ان النسيان خيانة وانكسار.

• علشان خروج الراجل من حياتك بيهز ثقتك في نفسك، ويحسسك انك ماكتيش مشبعة لاحتياجاته، بدليل انه قرر يكمل حياته من غيرك.

• بديهي إنك اتعودتي عليه نتيجة طول فترة الارتباط، والتعود أحيانا بيكون أصعب من الحب.

• تجاهل الراجل ليكي بعد نهاية التجربة (زي ما قلنا) وعدم محاولته استعادتك، بترجم جواكي انه دخل تجربة ثانية، وده بيصحى الغيرة جواكي وبيعذبك، فتبتدي تدخلي صفحته وتحللي كل بوست بيكتبه وكل صورة بينزلها، والنتيجة إنه يفضل عايش جواكي، والغيرة توجعك أكثر فتبتدي تنزلي صور وبوستات حزينة، وده بيخليه يحس بالانتصار ومايفكرش يرجع لك (أرجوكي اعلمي له بلوك).

• وارد تكوني وقعتي في الغلطة التقليدية أثناء العلاقة، إنك لخصتي وجودك في وجوده، ونسيتي أصحابك وأهلك ودراسك وشغلك ولغيتي عالمك الخاص، وبالتالي بقى عندك فراغ كبير بعد خروجه.

• يأسك من إنك هتدخلي تجربة ثانية أو تلاقى حب تاني أو جواز تاني بيعذبك أكثر.

• وجوده ف حياتك كان مرتبط بحلم البيت والأسرة والحياة الجديدة، والخروج من قيود بابا وماما وأخوكي، كل ده انهيار بخروجه.

• أحيانا بيكون حصل بينكم تجاوز أو علاقة جسدية حتى ولو بسيطة، ودي مصيبة ف حد ذاتها، لأنك بتتعودي عليه جدا بسبب

الاحتياج الغريزي، أو يحصل العكس إنك تحسي بالانكسار لأنه سرق حته من جسمك وهرب، وممكن ضميرك يوجعك أو تحسي بالذنب.

• طبعاً بخروجه من حياتك افتقدتي الكلام الحلو ونظرات الإعجاب ورغبتك في اللبس والشياكة، لأنه كان مرتبط بإعجابه، وبالتالي حصلت مشكلة فأنوثتك.

• حضرتك عندك خاصية اسمها الانتقام الأهل، يعني توهمي نفسك انك عايزاه يرجع علسان تنتقمي منه.. والنتيجة إنك بتدوري حوالين الحلم اللي بيخليه يومياً في دماغك، رغم إنه لو رجع لك هتغفري له لأنك عبيطة.

وأخيراً، شوفي يا بنت الحلال، أنا عارف ان كلمة «كل شيء» قسمة ونصيب» كلمة تقليدية من وجهة نظرك، رغم انها فعلاً الحقيقة، لكن أرجوكي لما تدخلتي تجربة خليكي حذرة وحافظي على نفسك، وماتلخصيش وجودك في وجود أي راجل، ولو فكر يسبيك أو يخلع اقلي فوراً الباب وراه واكسري ١٠٠ قلة، قاومي مشاعرك وفكري نفسك بعيوبه وندالته.. بس بلاش تدخلتي تجربة قبل ٣ شهور، وخليكي حذرة من الاندفاع في تجربة وهمية بهدف النسيان.

والأحسن من كل ده تتلمي وبلاش علاقات أصلاً قبل الجواز..

ده بالنسبة للمخطوبة.. أما بقى لو كتتي متجوزة وجوزك طلقك أو خلع يبقى كل اللي فات ده ينطبق عليكى وعليه، ولازم تاخدي كل كلمة قلتها لك بالحرف، وأوعدك هتسمعي خبر حلو في خلال يومين (هيتجوز عليكى).



الفصل الثاني

صفات الراجل الأساسية

- مايفهمش في الستات
- بيعحب الغموض ويعشق التميز
- مايبحش المفاجآت
- صياد بالفطرة
- بيعشق استرداد ممتلكاته
- أهم حاجة يطفى الحريقة
- بيعحب الحرية ويكره الحصار
- كائن بصري جدا
- ملتزم جدا عكس تصوراتك
- مايبدفعش فلوس في حاجة ممكن ياخذها ببلاش

للمزيد من الروايات والكتب الحصرية
انضموا لجرؤب ساحر الكتب



ما يفهمش في الستات

للمزيد من الروايات والكتب الحصرية
انضموا لجروب سحر الكتب

sa7eralkutub.com

او زيارة موقعنا

لم تستطع صفحة النيل الزرقاء، بمشهدها الخلاب، أن تخفي مشاعر
الحزن والضيق التي ارتسمت على وجه (سها).

أخرجها من صمتها الذي استمر لبضع دقائق صوت زوجها (حماصة)
الذي نسيت أنه يشاركها الطاولة في احتفالها الأول بعيد زواجها.

- مالك يا سها؟!

تنهدت سها في أسي عميق ولم تجب... فاعتدل حماصة في جلسته
واقترب برأسه منها، ووضع يده على كتفها في حنو وهو يتمتم.

- ما تنطقي يا بت!

ظلت سها مطرقة، ثم رفعت رأسها وصرخت بصوت جهوري:
- هو انت جبلة يا أخي؟ ما تحس لواحدك! ولا انت ربنا شال منك
الإحساس يا بعيد؟

اتسعت عيناه في دهشة، وارتخت ذراعه من على كتفها، وظل يحدق
فيها بعدم استيعاب.. فتابعت في تحد وإصرار:

- أيوه مابتحسش، ولو كان عندك ذرة إحساس واحدة كنت فهممتي
لواحدك ومن غير ما اتكلم.

احمر وجه حماصة، وكاد يلقي بكوب السحلب في وجهها، ولكنه
آثر السلامة بقول هادئ:

- أيوه مابتحسش وإذا كان عاجبك.. إنجزي بقى هتقولي مالك ولا
اقلب التراييزة في وش أهلك على المسا؟

هزت سها رأسها ثم انفجرت بالبكاء، فرفع حماصة وجهها بكفه
واستطرد..

- ما هو شوفي يا بنت الناس.. أنا لا باضرب الودع ولا باقرا الكف
علشان اعرف مالك.. وطالما قلبتيها نكد يبقى ادفعي انتي ثمن المشاريب،
أو اتصلي بابوكي يجي يدفعهم وياخذك معاه بالمرّة، أنا قايم.

حاولت سها أن تجذب يده وأن تثنيه عن عزمه، فأبى.. نادته متوسلة:

- طب هات ه جنيه أحاسب يا معفن!

فانطلق حماسة متجاهلا طلبها ومضى...

.....

ليه رأيك؟ شفتيني وانا باكتب كلام عميق.. والمصحف ينفع اكتب
رواية مجرمة.. يلا.. سبع صنايع والبخت ضايح.

بس تعالي نرجع تاني لموضوعنا ونسأل نفسنا:

يا ترى سها زعلانة من إيه؟ زعلانة من حاجة معينة عملها حماسة؟
ولا حصلت لها مشكلة وحماسة مش مركز؟ بصراحة مش فارق معايا
زعلانة من إيه ولا عايز اعرف، علشان احنا عندنا مشكلة أكبر، وهي
إن سها متخيلة ان حماسة لازم هيفهم لواحد، أو هيحس بيها من غير
ما تتكلم، على اعتبار ان ده الحب ف مفهومها، وبتقيسه على نفسها
وواثقة انها ممكن تحس بيه من غير ما يتكلم، بس المشكلة انها مش
فاهمة إن حماسة زي أي راجل وماعندوش الأوبشن ده، والموديل
كله كده، هو مش جبلة ولا بارد زي ما سها اهتمته، هو في اللالالاند
ومش بيافهم في مشاعر الستات زي ما كان بيكدب عليها أيام الخطوبة
علشان يوربها انه صايح وفهلوي ومقطع السمكة وديلها، ودي للأسف
طبيعته وطبيعة كل الرجالة.. مش ممكن يقرأ اللي في دماغك.

وخصوصا لو كانوا السه ف سنة أولى جواز ويكتشفوا بعض، بس
يمكن ربنا ينفخ في صورته بعد ١٠ سنين ويتدي يتوقع هي زعلانة
من إيه، وبالتالي لو عندك مشكلة، لو بيغلط فيكي ومش بيعتذر، لو
بيعمل حاجة بتزعلك بدون قصده، صدقيني والله العظيم مش بيبقى
تجاهل مقصود منه، علشان كده أرجو كي لو ماحسش بيكي من نفسه
اتكلمي، ولو طلبتي منه حاجة ونسي يجيبها فكريه، ولو موجوعة قولي
له إنك موجوعة.. صدقيني ده الحل الوحيد، هتقولي لي طب وإيه
لازمتها لما يعمل حاجة بعد اما الفت نظره أو اشتكي منها؟! هاقول
لك اتعودي تستمتعي بأفعاله مش بإحساسه.. هتقولي لي طب ولو
مافيش أفعال كمان؟ هاقول لك يبقى اطلقني وماتوجعيش دماغني..
زهقتيني في عيشتي.

وبعدين هاتي ودنك هاقول لك كلمه سر:

احمدي ربنا إن الرجل اتخلق بالتركيبة الغبية دي، لأنه أقسم بالله
لو كان بيقرأ اللي جواكي كان احتلك واستعبدك وسيطر عليك..
خليكي بجبروتك كده وخليه بغاوته، كده أحسن لينا كلنا.. وانتي
فاهماني وانا فاهمك وعندني كل سيديهاك..



بيحب الغموض ويعشق التميز

للمزيد من الروايات والكتب الحصرية
انضموا لجرّوب ساحر الكتب

sa7eralkutub.com

او زيارة موقعنا



- صباح الفل يا حاج منصور.. والنبي اديني ٢ كيلو تفاح.

- عيني يا باشا... نقى الي انت عايزه.

- لاااااا... مش عايز من المعروض.. ما عندكش كرتونة مقفولة

ومستخبية جوة؟

- طبعا يا باشا... عندي كرتونة ١٠ كيلو شايها للبشوات الي زيك...

بس هي غالية شوية.

- طب هاتها يا معلم وما يهكمش الفلوس.

.....

طبعا التفاح اللي جوة هو اللي برة، بس الي حصل ان الفكهاني -
بحكم الخبرة - بقى يفهم الفرق بين الراجل والست... الست هتنتقي
من الموجود، وعلشان يضحك عليها هيقول لها إن دول آخر شوية
وعليهم عرض سعر، لكن علشان يضحك على الراجل هيقنعه انه زبونه
(وخصوصا لو معاه حد، علشان يخليه يترسم قدامه، قال يعني بيشتري
تفاح كل يوم) وحتى لو مامعا هوش حد هيحسسه إنه مميز جدا، وإنه
ماينفعش ياخذ اللي بياخده الناس العادية، لأنه باشا، وعلشان الباشا
يثبت انه باشا مش هيتكلم في السعر، وياخدهم ويمشي زي ال... باشا.

كمان في السينما معروف ان الراجل لو متوقع نهاية الفيلم هيمشي
ويسيبه، ونادر لما يدخل فيلم مرتين، ولو طبقنا الكلام ده على علاقته
بالمرأة يبقى لازم يحس ان المرأة اللي في حياته مميزة... ويفرح جدا لو
صاحبه أو أهله قالوا له انها جامدة جدا... بيحس ساعتها انه عمل
إنجاز وانتصار، وإنه مميز بيها عن كل الرجالة.

كمان يبحب يكون أول راجل في حياتك، علشان كده بلاش تحكي له عن أي تجربة سابقة ليكي قبله... لكن لو خطوبة معلنه أو جواز رسمي ماشي احكي له، بس ماتقوليش تفاصيل زي مثلا (ركبنا أنا وخطيبي الأولاني عربية وخدني على طريق السويس الصحراوي) غلط جدا... لا أرجوكي اكدي، ولو سألك عملتو إيه قولي ماحصلش حاجة، وياذن الله ربنا هيسامحك علشان سترتي نفسك.

ولاحظي كمان انه سوسة... يعني دايا هيطلب منك تبقي واضحة في كل حاجة على أساس ان دي ميزة فيكي، رغم إنه بيعشق جدا غموضك والجزء المستخبي فيكي (قلة الكلام-التعبير بالنظرة) وإوعي تصدقيه لما يقول لك لبسك العريان ده تحفة وضحككتك العالية تجنن، وطريقة تدخينك للسيجارة والشيشة تهبل، كل الكلام ده دليل انه منبهر بيكي بس كصاحبة أو علاقة غير مشروعة، لكن يتجوزك؟! لا... صدقيني في الآخر هيتجوز واحدة تنفع تبقى أم لعياله، لأنه زي ما قلت لك بيعشق الغموض.

يعني هجيبها لك من الآخر وعلى بلاطة، لو عايزاه يدخل البيت انصبي عليه واشتغليه، وعيشي ف دور المؤدبة الغامضة.



مش بيحب المفاجآت

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

رغم إن الرجل بيان من برة انه همجي وعشوائي، لكن الحقيقة إن ده الظاهر بس، لكن جواه كائن منظم ومرتب إلى أقصى درجة.. بدليل انه (زي ما هنتشرح في اللي جاي) دماغه مرتبة من جوة لفايلات ودفاتر ولا أرشيف وزارة المالية.

علشان كده مش ممكن يستمتع بحاجة مش مستعد ليها.. ودي طبعا حاجة صعب ان حضرتك تصدقيها، لأنك برضو بتقيسي نفسك بيه وبتقولي ازاياي؟! ده أنا أكثر حاجة باحبها في حياتي المفاجآت! طب استني هاقول لك على قصة حكيتها قبل كده في كتاب «الرجالة من بولاق والنساء من أول فيصل»، ويمكن تكون حصلت لحضرتك شخصيا، أو لواحدة من صاحباتك:

لما سوزي لقت الحياة بينها وبين عبد الصمد بقت مملدة وفاترة، عبد الصمد ابتدى يزهب وعينه تزوغ وتجيله رسايل مربية على الواتساب بالليل، قررت انها تكسر الملل وخصوصا ان النهارده عيد جوازهم، فقررت تعمل له الحاجات اللي بيحبها (الجمبري والتورته والبيبي دول) مشهد رأسي في غرفة المعيشة:

ضوء خافت ينبعث من شموع فرنسية القوام، لها رائحة الأوركيد (الأوركيد مالوش ريحة) تصبغ الغرفة والأثاث باللون الأحمر القاني، يشاركها في الجريمة المزمعة ضوء القمر المتسلل من النافذة المغلقة خلف الطاولة المستديرة، تلك الطاولة التي حفلت اليوم بكل ما لذ وطاب من المأكولات البحرية.

في ركن الغرفة الهادئ وعلى مرمى باب الشقة الموصل، كانت تقف

سوزي كنصل سيف يتأهب، وعيناها مصوبتان نحو الباب الذي بدأ يفتح بهدوء شديد.

دخل عبد الصمد، بارتبائه المعهود حين يتلقى قبل عودته من سوزي مكالمة دافئة تنذر بشيء قادم (إوعى تتأخر النهارده يا بيبي عشان عايزاك).

استجمع عبد الصمد قواه التي خارت في طريق العودة من كثرة التفكير فيما سيلقاه، ودخل من الباب يبحث عن سوزي التي توقع استقبالها بمجرد دخوله، ولكنه ما إن وقعت عيناه على الطاولة المتلائة بالفوسفور حتى زال عنه ارتبائه وغاص في لعبه سابحا، حتى وصل إلى شاطئ المنضدة، استقبله باحتفاء مقعده الدائم.

عشر دقائق متسارعة، كانت كفيلا بأن تعيد الأطباق إلى سابق عهدها قبل دخولها إلى هذه الشقة، استقرت الأطباق فارغة على الطاولة، واستقرت الحسرة وخيبة الأمل في عيني سوزي، التي وقفت مستندة إلى الجدار المتاخم في ذهول... أصوات مختلفة النغمات والإيقاع كانت تخرج من حلق عبد الصمد، دليل نجاح عملية الهضم، قبل أن يكتشف وجودها الذي أعاده إلى ارتبائه الأول، فاستقبلها بابتسامة بلهاء قائلا:

- إنتي هنا يا حبيبيتي؟

- بونى بيتي يا حبيبي (قالتها وهي تعض على أسنانها).

ابتسم عبد الصمد في وجه سوزي التي ردت إليه ابتسامته المرتبكة بابتسامة ساخرة، تبعثها بكلمات أكثر جدية:

- وليه يا حبيبي جيت على نفسك وسبت الأطباق؟ ما كنت تاكلها

بالمرة!

قالتها وهي تحتنق بالبكاء مندفعة صوب غرفة النوم، فلحقها محاولاً
الكشف عن سر غضبها الغامض جداً.....

- مالك بس يا حبيبي زعلانة من إيه؟

قالها وهو يخلع ملابسه ويستند على الفراش المتزين بالورود المجففة،
تلك التي أعدتها سوزي لتجعل من الغرفة بستاناً يليق بهذه الليلة.

ردت سوزي وهي تجبس دموعها:

- بقى كده يا صوصو، معقولة ماشفتش غير الأكل بس، وأنا اللي كنت
فاكراك جايب هدية وجاي تحتفل معايا بعيد جوازنا تقوم تسييني و...
قطع بكاء سوزي وحديثها صوت متصل الإيقاع خرج من أنف
عبد الصمد خالاً.

.....

ها إيه رأي حضرتك؟

شفتي أخونا عبد الصمد باشا ورد فعله؟

زعلتي انتي كمان من رد فعله؟

ما قلنا ١٠٠ مرة الرجالة ما بتحبش المفاجآت.

وبعدين الراجل راجع من الشغل مرتبك علشان المكالمة المبهمة،
وسوزي متخيلة إن الطريقة دي هتخليه راجع سعيد ومبتهج، مش
فاهمة إنه كده هيرجع خايف ومرتبك! لأ وكمان متوقعة إنه هيفتكر
عيد جوازهم ويحيب لها هدية! عشم إبليس في الجنة... يا فندم هو فيه

راجل يفتكر أكل إيه امبارح أصلا علشان يفتكر عيد جوازه؟! احمدي ربنا انه فاكرا انه متجوز، ده انا ليا واحد صاحبي بيرجع كل يوم من شغله على بيت امه وتفكره انه متجوز.

علشان كده قلت لك وباقول لك وهافضل اقول لك لحد ما اموت...
الراجل مش بيعحب المفاجآت.. يعني لازم تمهدي بالكلام لأي حاجة عايزة تعملها، وياريت تقولي بصراحة أحسن... يعني مثلا لو ناوية له على ليلة حمرا غير بريئة زي سوزي يبقى لازم تتصلي بيه وتلفتي نظره علشان يعمل حسابه، يعني مثلا ياخذ حباية منشطة (للذاكرة طبعا)، أو يأجل ميعاد نيئين زميلته في الشغل اللي كان ناوي يزورها علشان يتظمن على رجليها اللي اتأصعت امبارح.

المهم أقصد يعني لازم تديله فرصة يستعد بأي طريقة، لأنه ممكن يتفاجئ بحضرتك كده لابسة المصايب دي، فيجيله ارتخاء في أحباله الصوتية، وتبقى فضيحتة بجلاجل، وماتقوملوش قومة بعد كده.

ده بالنسبة للمفاجأة، طب بالنسبة للمناسبات، زي عيد ميلادك وعيد جوازكم.. تعملي إيه لو نسي؟

أنا شخصيا مش هاجاوب.. بس هخليكي تجاوبي واشهدك على نفسك.

حضرتك جربتته على مدار ٢٠ سنة جواز... هل عمره افتكر أي مناسبة من دي؟

- لأ طبعا... والمصحف أبدا.

- مصدقك من غير ما تحلفي... ما انا برضو راجل متجوز وياما

اتعلقت في النجفة بسبب المناسبات السعيدة دي... بس هنعمل ايه؟
والله العظيم احنا علميا ما عندناش ذاكرة تواريخ أصلا...

يعني لاحظني كده واسألني نفسك لو راجل عنده ميعاد بكرة هيعمل
ايه؟ طبعا هتلاقه لاطع خمسين ورقة على الحيطه علشان تفكره بالميعاد،
لكن حضرتك ما شاء الله اللهم لا حسد، فاكدة كل حاجة باليوم
والساعة والثانية، فاكر يا حبيبي أول مرة قابلتك فيها.. أول كلمة
ناديت لك بيها.. أول مرة اقول يا حبيبي... يا حبيبي وفاكر معانيها...
الله.. عظمة على عظمة يا عندليب.

أهو حضرتك كده، فاكدة كل الذكريات المقندلة دي... لأ وكمان
بتسميها أعياد وعازاه يفتكرها ويحيب لك هدية في كل مناسبة منها
(عيد أول مرة شفنا بعض، عيد قراية فاتحتنا، عيد خطوبتنا، عيد كتب
كتابنا، عيد جوازنا، عيد تحرير سينما، عيد أول مرة لطشك بالقلم).

طب وإيه الحل ف دي كمان؟ هل المفروض تنسي الذكريات دي
وتبطلي تحتفلي بيها؟

لأ طبعا.. بس أرجوكي افهمي القاعدة دي (ما لا يؤخذ كله لا
يترك كله) يعني ياريت تلخصي الأعياد دي وكفاية قوي عيد جوازكم
وعيد تحرير سينما.

وطالما صدقتيني واثأكدتي انه ما عندوش ذاكرة تواريخ، يبقى إيه المانع
تيجي على نفسك شوية وتفكره قبلها بأسبوع؟ بس ممكن ينسى! طب
قبلها بيوم؟ برضو هينسى! طب في نفس اليوم؟ كده وارد ما ينساش..
بس أحسن من كل ده إنك تدخلي طرف تالت.. يعني مثلا تخلي أخته،

أختك، صديقكم.. أي حد مشترك بينكم يفكره قبلها بيوم (قال يعني الطرف ده فاكر عيد جوازكم، وبيبارك ويسأله هتحتفل مع مراتك فين بكرة؟)

ساعتها جوزك طبعاً هيتكسف على دمه ويعمل نفسه فاكر، ويقول له يا باشا دا أنا عامل لها مفاجأة جامدة جدا، بس اوعى تقول لها، وبكده تبقي ضمتي خروجة وهدية كمان، وعلى رأي ديكارت (الي يجي منه أحسن منه).





صياد بالفطرة

للمزيد من الروايات والكتب الحصرية
انضموا لجرّوب ساحر الكتب

sa7eralkutub.com

او زيارة موقعنا

الراجل لغاية دلوقتي مش عايز يتخلص من شخصية الصياد اللي اتخلق بيها واتفطر عليها.. من ساعة ما ساب الجنة ونزل على الأرض وهو بيعشق حاجة اسمها الصيد.. يعني مثلاً زمان أيام العصر البدائي كنتي تلاقيه يقعد بالساعات مستخبي ورا صخرة في الغابة في عز البرد أو الحر، علشان يعمل كمين لغزاة معدية.

- طب يا ترى كانت قمة المتعة بالنسبة له إنه يصطادها؟

- تخيلي لآ! طب تصدقيني لو قلت لك العكس تماماً؟! يعني الراجل بيجيله فتور لما الغزاة تقع بسرعة في شباكه، ويمكن جدا يزهدا ويرميها جنبه ويروح يدور على غيرها.. وكل ما كان وقوعها أسهل كل ما يزهدا أسرع، ويمكن كل اللي هيحلم بيه بعد صيدها إنه يعلق رقبته على جدران كهفه علشان يحس بالانتصار ويشبع غروره (والمصحف مريض).. الأكثر من كده إنه لو نزل يصطاد غزاة منطلقه ولاقى غزاة تانية جت اترمت تحت رجله بدون أي مجهود مش هايعبرها من أصله، وهيجري بسرعة ورا الغزاة اللي منطلقه علشان يحس بقمة المتعة وهو بيطاردها، والجدير بالذكر إن الشباب الصيغ عندنا في شبرا كان ليهم دايمًا مقولة مأثورة (صيده أحسن من أكله) كمان لو اتفرجتني على مواقع الصيد هتلاقي كل الرجالة تحب تتصور جنب سمكة كبيرة، وتقول أنا اللي اصطدتها (الكذب بيجري ف دمنا)...

إنتي اللي هتصنفي نفسك في حياته

طالما صدقتيني إن الراجل بيعشق الصيد يبقى انتي بسهولة تقدري تصنفي نفسك في حياته، يا ترى هتبقي غزاة سهلة تقع من أول كلمة

ومن قبل ما يدخل هتقدر تعرف عنه كل حاجة، وبالذات الحاجات اللي تهمها، نوع عربيته، نوع التيشرت، الموبايل، الجزمة، والأهم من كل ده عنده كام سنة، يعني هينفع عريس ولا هتقضيها رغي ولف بالعربية زي امبارح وأول امبارح؟

هي يمكن تكون بحكم التجارب والمقابلات الكثير بقت بنت محترفة، بس طول عمرها مكسورة من جواها وبتحلم زي أي بنت بزوج وبيت وأسرة، بس للأسف مش عارفة ازاي وفين تلاقي الراجل المناسب، علشان كده بتقضي طول اليوم في شغلها، ولما تزهد بالليل وتحس بالخنقة تنزل على أي كافيه يمكن تتكعبل في واحد محترم تتجوزه، أو نص محترم ترغي معاه وترجع بيتها محبطة كالعادة.

بس الأكيد انها النهارده، وزى كل خميس، اختارت المكان والوقت الغلط، ومش فاضل غير الطريقة اللي هتحسم بيها الموضوع، واللي هتفشل برضو زي كل مرة.

سامح هيدخل على الكاشير يشتري علبة سجاير وعينه عليها، بعد كده هيلف شمال علشان يستلم مج الكابتشينو، هيقف جنبها وهو بيحط السكر، هيصلمها وبيتسم ويشوف رد فعلها اللي متوقعة مقدما، ردها للابتسامة بابتسامة معناها موافقة مبدئيا على التعارف، وبعد عشر دقائق أكيد طبعا هيكتشف ان التكيف في المكان حر جدا وهيعزمها يلفوا بالعربية شوية، لو رفضت هيطلب رقم موبايلها أو هيسبها رقم موبايله، ويتحرك لرف الكتب بتاعة مكتبة «ألف» بمنتهى التناكة (قال يعني مثقف بروح أهله).. لو وافقت تركب العربية معاه يبقى هيصنفها تصنيف مش محترم، وهيعزمها تتفرج على شقته،

ولو رفضت تروح معاه شقته؟ هيضحك بمنتهى السخرية والاستغراب
وهيقول لها واحدة من الجمل الـ٧ الشهيرة:

- ياااه ده انتي قديمة قوي.
- يا ماما بلاش تعيشي في الدور الدنيا اتطورت.
- واضح انك باردة ومالكيش في العلاقات بجد.
- أجمل حاجة ف أوروبا إن البنت والولد مش بيتجوزوا غير
لما يجربوا بعض.
- على فكرة انتي فهمتيني غلط.. أنا مافيش في نيتي أي حاجة
من اللي في دماغك.
- إيه ده؟ إنتي مش واثقة فيا ولا انا شكلي مش محترم؟
- على فكرة هتلاقي ماما صاحبة وبالمره اعرفك عليها، يعني انا
نيتي مش وحشة.

ده لو رفضت، أما لو وافقت تبقى خلاص صنفت نفسها صيد
سهل، وبصراحة سواء رفضت أو وافقت هي كده كده صنفت نفسها.

طب لو رفضت من أساسه تتركب معاه واكتفت بإنها تديله رقم
موبايلها؟ ساعتها كانت قبل ما تروح البيت هتلاقيه طالبها يتظمن
عليها (وصلتي ولا لسه؟ أنا بس كنت باتظمن عليك) وبديهي إنه
تاني وتالت ورابع يوم هيتصل بيها، وغالبا هيتصل بالليل، والمصيبة
بقي في المكالمه الليله دي إنها ممكن تبقى بداية وتمهيد لبلاوي زرقا بعد
كده، وغالبا المقابلة الجاية أو بالكثير اللي بعدها هيعزمها في شقته.

طب لو كانت اكتفت بإنها تاخذ رقم تليفونه؟ ساعتها كانت هتبقى

مضطرة تكلمه وترخص نفسها، أو تتجاهله وتنسى الموضوع.

يعني بكده كل الاحتمالات الموضوع فاكس.

- يا عم بلاش تبقى مكلحك! مش يمكن تكون فعلا محترمة وما فيش حاجة في دماغها، ودي فعلا طريقة لبسها وجاية هنا بالصدفة، مسافرة مثلا أو مستنية صاحبته، أو عندها مقابلة شغل؟

- وارد والله، بس ساعتها كانت المفروض هتتعامل معاه بمنتهى الاستخفاف والسخرية، ولو فعلا أعجب بيها وهو جاد في الارتباط كان هيستنى يمشي وراها بالعربية ويعرف عنوانها، ويفكر في خطوة الارتباط، ده لو كان جاد، وده احتمال ضعيف.

الغزاة سهلة رقم ٢:

الغزاة السهلة برضو ممكن تبقى موجودة على الفايسبوك، وهي بنت عاملة عرض أزياء على الفوتوز عندها، وغالبا ممكن تكون كاتبة على صفحتها (لا أقبل الأصدقاء الأولاد ولا الحوار على الإن بوكس) ودي بقى صيدة سهلة جدا لمعظم محترفين الفايسبوك، وبالذات لصديقنا (سيف) اللي هتلاقي دايبا صفحته عليها مليون لايك مضروبين، ويسرق بوستات محترمة من صفحات غيره وعامل فيها مثقف، صورة البروفایل بتاعته غالبا بتبقى شاب بادي بيلد وسيم.

هيدخل يعلق عندها كام مرة بانبهار، وبعد كده هيدخل على الخاص، وهيدور الحوار بينهم كالاتي:

- على فكرة أسلوبك راقى جدا وبوستاتك بتعجبيني.



- (البنت بعد ما تدخل وتتأكد من وسامته) متشكرة قوي.
- على فكرة أنا أول مرة أكلم بنت على الخاص.. بس حسيت انك محترمة ومهذبة.
- وانا كمان أول مرة أرد على ولد، بس حسيت انك مؤدب.
- طب ممكن آخذ رقمك ونتكلم على الواتساب؟
- لأ طبعا أنا مش باذي رقمي لأولاد.
- طب انا متأسف. (ويعمل زعلان)
- خلاص انت زعلت؟ طيب خذ الرقم اهوه.
- (على الواتساب) يااه صورتك جميلة قوي.
- متشكرة.. وانت كمان أمور.
- (بعد كلام كثير) بعد إذنك هاقوم اصلي الفجر وارجع لك.
- ياااه.. والله انتي بنت حلال.. وانا كمان هاقوم اصلي وارجع لك.
- (بعد ما رجعوا) ممكن اشوفك بكرة؟
- لأ طبعا انتي فاكرني إيه!
- أنا متأسف.. أقصد تكوني خارجة مع اصحابك واشوفك بالصدفة.
- آه كده ممكن.. أنا موجودة بكرة الساعة ٦ في كافية أم سحلول، ممكن تيجي.
- طب انا هاجيلك الساعة ٥ قبل اصحابك ما ييجوا.

- أوك.

- ولا اقول لك.. لو معاكي عربية ماتيجي تاخدينني من البيت وبالمرّة افترجك على شقتي؟

- نعم! إنت بتقول إيه؟ لأ طبعاً.

- واضح انك مش واثقة فيا، أو مش واثقة في نفسك!

- لأ طبعاً واثقة فيك وواثقة في نفسي، وهاجي علشان اثبت لك كده، بس هامشي على طول.

.....

طبعاً الشيطان بيبقى بيتابع الشات ومنبهر.

ده بقى النوع الثاني من الغزال السهل، وطبعاً فيه أنواع كثير، لكن في النهاية كلهم بيصبوا في مصلحة الصياد العادي.. لكن الأخطر من الصياد العادي هو الصياد الحقيير، والغزالة الضعيفة السهلة من وجهة نظر الصياد الحقيير هي بنت مالهاش تجارب، بنت رومانسية بتحلم تحب وتتحب، والغزالة الأسهل من وجه نظر الصياد الحقيير برضو هي أرملة أو مطلقة نفسها تعوض انكسارها، أو بنت داخله على الأربعين وبتحلم ببيت وأسرّة وولاد، يعني بني آدمين كل حلمهم البيت والاستقرار.. لكن لأنه صياد حقيير اعتبرهم صيد.

علشان كده لو حضرتك واحدة من دول، أرجوكي بلاش تبيني له نقطة ضعفك، واتعاملي معاه دايمًا من فوق وإوعي يشوف احتياجك ده.

دي صورة الغزالة السهلة ف مفهوم الصياد المحترف عموماً.

ساعات بارمي باللوم عليه لأنه صياد قذر، وساعات بارمي باللوم عليها لأنها رضية تبقى صيد سهل، بس الواقع اللي لازم نعرف بيه إن الراجل اتفطر على مهنة الصيد.

أدوات صيده:

- أولاً لازم يدرس نقطة ضعفك ويعرف إيه أكثر احتياجاتك.
- (فلوس - اهتمام - رومانسية - مفاجآت - وقار) ويتدي يلعب عليها.
- هيمارس عليكى كل أنواع السخاء من فلوس لاهتمام.
- هيستعرض بكل إمكانياته (فلوس - عربية - ساعة - مظهر - علاقات - سلطة) ويتكلم كثير عن مشاريعه ونجاحه وإنجازاته.
- مش هيتكلم عن جسمك ولا هيتكلم عن الجنس في الأول، لحد ما تطمني له (أما لو بجح وصيد عبيط هيطلب منك سكس من أول يوم).
- هيكلمك عن الوقار والأدب والدين والأخلاق، ويتدي واحدة واحدة يستدرجك ويحتويكي لحد ما تتطمني له.
- هيجاملك كثير ويمدح صفاتك وأخلاقك.
- هيطاردك بالاهتمام والسؤال كل شوية.
- هيوعدك بالجواز ويعرفك على أصدقاءه وأهله على إنك خطيبته، لكن مش هياخذ خطوة رسمي (بالكتير هيعرفك على أمه في التليفون علشان يطمنك ليه).

بس انتي تقدري تتجنبي كل أسلحته دي لو عندك ثقة بنفسك
وتجاهلتيه، ساعتها هيتحول من صياد لصيدة، يعني تخليه يدخل البيت
من بابه، وده اللي بتعمله البنت المحترمة لما ترفض تعمل علاقة مع أي
شاب، ودايا أقول إن البنات السهلة هي اللي بتخلي البنات المحترمة
ماتتجوزش، لأنها لما بتوفر للولد علاقة ببلاش مايقاش مضطر يدخل
البيت عند المحترمة، ويدفع مهر وشبكة وفرح وشقة وحياة كاملة.

لكن كده كده البنت المحترمة هيفضل موطنها الأصلي هو بيت
ابوها، بنت يقابلها في الجامعة أو الشغل أو في الحفلة أو في النادي أو
الجيم أو الساحل أو حتى صالونات، تعجبه ويكلمها بمتهى الاحترام
وتشاور له بصباعها على بيت ابوها، وتقول له ده موطني الأصلي يا باشا.

موسم الجفاف عند الصياد

الولد الدونچوان - مدمن العلاقات - بيحصل عنده ظاهرة غريبة
جدا اسمها موسم الجفاف!

الدنيا تبقى فل والحياة كلها بنات، وفجأة وبدون مقدمات أو مبررات
يختفوا كلهم، وطبعاً هو مدمن بنات زي ما قلنا، فيبتدي يدور في دفاتره
القديمة، لو كان تنك قوي هيبعت رسالة لكل البنات اللي سابهم من
زمان، وحشتيني، إنتي فين؟ طب اسألني، أو بيعت إيموشن قلب مثلاً.

ولو مش تنك هيتصل بواحدة واحدة ويشوف مين هترد.

البنت اللي وصلت لها الرسالة أو المكالمة لو لسه بتحبه هتتهار فوراً،
وترد زي العبيطة لأنها فاكرة انه لسه بيعحبها، أو افتكر ذكرياتها الجميلة.

وحشتني يا ندل، يا خاين، لسه فاكرفي.

وارد يكون مش فاكرها أصلا، بس هييتدي يرر هو ليه انسحب من حياتها، وغالبا بتكون مبرراته غريبة، أصل انا كنت راكب مكوك فضائي ونازل على كوكب زحل فخطفتني كائنات خرافية وطلبوا ديه من ابويا ولسه دافعها.. البنت لأنها بتحبه بتقرر تصدق وتقول له فورا أرجوك يا حبيبي بلاش تروح زحل تاني، بيحلف الولد انه مش هييعد تاني والعيطة بتصدق، وطبعاً بتملا فراغ حياته لحد ما موسم الجفاف يخلص بظهور أي صيد جديد، يختفي الولد فجأة وتحاول البنت تسأل عليه في زحل، في عطارد، أو حتى في الزقازيق وماتلاقيهوش، يمكن بعد كام شهر أو كام سنة يتكرر الموسم ويكرر المكاملة، بس النتيجة واحدة، إنتي مجرد مسكن مؤقت لإدمانه المرضي، وأي صيد سهل هيتساب بسهولة، وعلى رأى أحمد عدوية (إيزي كوم إيزي جو).

أرجوكي لما يتصل قولي له معلى يا ضنايا، لف لفه وتعالى علشان باغسل المواعين، هيفهم على طول.

يعني الخلاصة بلاش تبقي لاصقة جروح.. يخف وبعد كده يرميها.



بيعشق استرداد ممتلكاته

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



محمود صحي م النوم:

- صباح الخير يا ماما.

- صباح الخير يا حبيبي.

محمود غسل وشه وفطر وابتدى يلبس هدومه علشان ينزل شغله،
وفجأة:

- على فكرة يا حبيبي أنا اديت القميص البني بتاعك لابن البواب،
لأنك راكته من شهور ومش بتلبسه.

محمود فعلا ماكانش فاكر القميص ده أصلا، أو كان راكته ومش
بيفكر يلبسه، بس اللي حصل دلوقتي إن ملكية القميص انتقلت لغيره
وبدون رضاه.. علشان كده شعور الامتلاك والغيرة تحرك جواه وصرخ
في وش امه:

- إنتي ازاي تديله القميص ده؟ ده كان أحسن قميص عندي، دا
أنا كنت شايله علشان المناسبات المهمة.

طبعا محمود مصدق نفسه رغم ان الكلام ده كذب، واللي بيحصل
جواه مجرد انفعال تلقائي نتيجة فقدانه حاجة كان يملكها، وإحساسه
بأنه مش هيقدر يستردها، علشان كده بينزل فوراً لابن البواب ويتخانىق
معه علشان يرجع له القميص...

وفي الحالة دي وارد يحصل احتمال من ثلاثة...

١- ابن البواب يرجع له القميص فوراً، وبالتالي محمود مش هيحس
بقيمته ويلبسه مرة أو اتنين بالكثير، وبعد كده يركنه.

٢ - ابن البواب يعذبه كذا مرة لحد ما يديهوله أو يطلب مقابل
مادي كبير على أساس انه باعه مثلا لواحد تاني، ولازم يرد فلوسه
علشان يسترده...

وفي الحالة دي محمود هيدفع أي تمن علشان يسترد القميص، وهيحس
بقيمتة وعمره ما هيركنه تاني.

٣ - ابن البواب يرفض يديهوله، أو يقول له مش عارف ضاع فين،
وفي الحالة دي ينهار محمود ويكي من قلبه على القميص، ويحس انه كان
كل حياته ومستقبله، ويدعي ربنا يرددهوله.. وده لأنه بقى مستحيل
يسترده.

.....

دي الحكاية العبيطة المكررة واللي هتفهمي منها علاقة الراجل
بممتلكاته وسامحيني لما اقول لك انه شايفك ضمن ممتلكاته، وإنك
بالنسبة له زي القميص ده، أو بالكتير زي البدلة علشان ماتزعليش..
وعشان أوضح لك أكثر تعالي نطبق القصة عليكم:

كان بينكم قصة حب أو ارتباط وخلع منك، أو ابتدى يتعامل
معاكي ببرود نتيجة امتلاكه الكامل ليكي وحالة الشبع منك، فقرر
يركنك على الرف ومابقاش يكلمك غير كل فين وفين، وفجأة سمع
انك ارتبطتي أو حبيتي أو قررتي تخلعي منه، ساعتها هيحصل له زي
ما حصل لما سمع ان ابن البواب أخذ القميص المكون.. هيتجنن
ويتخيل انه كان يبحبك وكان واخذ أجازة منك كام يوم، وإنه كان
ضروري هيرجع لك ويكمل حياته معاكي...

هيتخيل انك كنتي أجمل حد ف حياته، ويسترجع كل ذكرياتك
الحلوة...

هيندم ويجزن ويطاردك ويحارب علشان يسترذك!

ونرجع تاني للاختيارات الثلاثة:

١- هترجعي بسهولة وتساعيه وتقبلي ندمه واعتذاره زي العبيطة
ويركنك تاني.

٢- هتعذبيه وتخليه يلف حوالين نفسه، أو يخطبك ويبقى ده شرطك
الغالي للرجوع، وفي الحالة دي يعرف قيمتك.

٣- هترفضي ترجعي وتخليه يعيش طول عمره ندمان، وتنفدي
بجلدك من إنسان متردد... وده أفضل حل.

بس برضو الاختيار ليكي، ولو عايزة نصيحتي.. اتجوزي ابن
البواب أحسن.



أهم حاجة يطفى الحريقة

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

هو كده حلقة ربنا.. راجل مطافي... يشوف الحريقة يجري يطفئها
فورا بدون تفكير... طب يا عم استنى شوية... شوف مين اللي ولعها...
وولعها ليه؟

المدام سستها بتوجعها... وداخله عليك الأوضة بتمايص وماسكة
بؤها وبتقول لك زي (راقية إبراهيم) في فيلم (رصاصه في القلب)
أي... سستي... سستي بتوجعني قوي ومش عارفة أعمل إيه...
تقوم انت بمتتهى الفكاهة تقول لها: طب ما تروحي للدكتور...
أو تعالي أوديكي للدكتور.

يا سلام... إيه العبقرية دي؟ يعني جنابك جبت التايهه... ما هو
أكيد اللي سستها بتوجعها هتروح للدكتور، أكيد يعني مش هتروح مارينا!
لكن ركز شوية يا أختنا واسأل نفسك هي جاية لك بتمايص ليه؟
ما هي كان ممكن بسهولة تتصل تحجز عند الدكتور!

أكيد محتاجة حاجة تانية! يمكن محتاجة كلمتين حلوين مثلا، طبطبة،
مشاركة، إحساس بوجعها، يعني محتاجة تقول لها زي ما قال الأستاذ
عبد الوهاب (فين؟ فين؟ يا هانم أنا مش شايف قدامي غير صفين
لولي) والمصحف لو قلت لها كده هتلاقيها نامت في حضنك ونسيت
سنانها واللي جابوها كمان.. يا باشا.. ستات.. ستات.. افهم بقى.

لكن هتقولي مين؟!؟

بس بيني وبينك يا مدام، وعلشان برضو مانبقاش ظالمينه وجاين
عليه، اللي عمله ده (لما قال لها أوديكي للدكتور) دليل الحب من وجهة
نظره... لأنه اتعود لما يسمع مشكلة يقدم الحل فورا... ويتخيل دايا



بيحب الحرية ويكره الحصار

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

عملت مرة سرفاي على الأكونت عندي عن سبب إضراب الشباب (الذكور) عن الجواز، لقيت إن من أكثر الأسباب خوفهم من فقدان الحرية، وترسيخ فكرة ان العزوية حرية والسنجلة چنتلة، وبيت الزوجية سجن، والزوجة سجان، وإنه من يوم ما يتجوز هيتسئل كنت فين؟ وتأخرت ليه؟ وكنت مع مين؟ الأسئلة اللي كان بيكرها في بيت أهله، والي اتخلص منها ساعة ما اشتغل واستقل ماديا، يعني قبل خطوبته أو جوازه من حضرتك...

وفيه إحصائية تانية عملها المركز القومي للبحوث الجنائية، أثبتت إن معظم حالات الطلاق بتقع في سنة أولى جواز، نتيجة مفهوم الحرية عند الذكور..

يعني الشاب بيتجوز ويبقى عايز يكمل في حياة العزوية، كل يوم يخرج مع أصحابه ويسيب مراته (العروسة الجديدة) لواحدها في البيت، فتبتدي تطالبه يبقى معاها وهو يرفض على اعتبار انها بتحاصره وتسجنه، فتبتدي المشاكل والخناقات ويحصل الطلاق.

علشان كده دايمًا بانصح أي زوجة في بداية حياتها انها تفتح مساحة من الحرية لجوزها، لحد ما يخرج من مرحلة العزوية النفسية، ويدخل للجواز الفعلي... يعني تديله يوم في الأسبوع يخرج مع أصحابه، يعزمهم في البيت، يقعد معاها ع القهوة.

ومع الوقت تبتدي تجذبه للبيت بنفس الطريقة... يعني تشوفه بيلاقي إيه معاها وتعمله في البيت، تحيب مثلا طاولة، بلاي ستيشن، أو تخرج معاها ويعملوا مجتمع أصحاب بنات وولاد يوم كل فترة، مع الاحتفاظ بدفا البيت والتلفزيون والونس الأسري، اللي لازم ياخذ عليه مع



الوقت والي بيحصل بشكل تلقائي لما يخلفوا أول طفل.

بس للأسف البنت الشرقية اتربت على إن الراجل هو محور حياتها وهدفها الوحيد، وإنه لما يخرج يبقي رافضها بشكل شخصي، ومع الجواز بيتسرخ المفهوم ده جواها أكثر... (الراجل هو الحياة).. يبقي طبيعي انها تطوف حواليه وتحاصره، ويبقى كل شغلها الشاغل يا ترى لسه يبجبني؟ يا ترى يبجب يقعد معايا؟ يا ترى ممكن يخونني أو يسينني؟ وطبعاً رد فعل كل ده هو حصار الراجل بالاهتمام اللي بيخنق، والأسئلة اللي بتخليه يكره البيت ويعتبره سجن:

أتأخرت ليه يا حبيبي؟ هتيجي إمتى؟ وحشتني بقى.. عايزة نقعد مع بعض زي زمان.

تبتدي تزيد الفجوة بينهم لما هي تهتم وتطارده وهو يتخنق ويهرب. علشان كده الست الذكية هي اللي تقدر توازن وتعمل زي ما بتقول شيري أرجوف في كتابها:

(why men love bitches)

لا تجعليه كل عالمك.. لا تضحي بأصدقائك وهواياتك وعملك من أجله.. لا تدوبي في عالمه.. لا تلخصي عالمك فيه.. لا تكوني مصنع حلوى فيزهدك.. كوني له مكافأة كل يوم.

بس طبعاً ورغم كل الكلام ده مش مطلوب من حضرتك تعملي العكس، اللي هو التجاهل التام، يعني ماشي يبقي ليكي اهتمامات وشغل وعالم خاص، لكن يبقي هو رقم واحد في حياتك (مش كل الأرقام)،

وتخليه هو كمان يبقى له اهتمامات وعالم خاص، بس لازم يبقى بينكم
عالم مشترك مافيهوش أي حد تاني، لا فايسبوك ولا واتساب ولا أهل
ولا جيران ولا أصحاب.

والعالم المشترك ده هو دليل نجاح الحياة الزوجية، وعلشان خاطري
- وخليكي دايمًا حافظة القاعدة دي - (كل شيء يلاحق الرجل يهرب
منه) إلا طبعًا زميلته في الشغل، هتلاحقه هيتجوزها عرفي.





كائن بصري

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

هو بالفعل كائن بصري... يعني بيقيم أي واحدة في الأول بعينه، وعينه هي بوابة الدخول لعالمه، عجبته افضلي ادخلي، ماعجبتيهوش يبقى هيعتبرك زميلة أو صديقة أو زي اخته.

علشان كده أول ما بيتعرف على واحدة مثلا على الفايس بوك بيتدي يطلب منها صورة علشان يتأكد من جمالها وتفصيلها، وفي الحقيقة الصورة بتعمل له حالة من المتعة البصرية اللي بتخليه يتعلق بالواحدة مؤقتا، بس مش معنى كده إنك تبعتي صورتك زي العبيطة وتلاقيها نازلة بكرة على كل المواقع!

خدي بالك هو كده كده هيقول لك انا كائن بصري، وساعتها قولي له بصري على نفسك لحد ما نتخطب أو نتجوز، والصور كمان أرجوووكي أيام الخطوبة تبقى غاية في التحفظ... ما حدش عارف هتكملوا ولا لا.

من كام سنة عملت بوست بالمضمون ده فلقيت بنت دخلت على الخاص بتقول لي (الكلام ده مش حقيقي، لأنني ليا علاقة بشاب على الفايس بوك، اتعرفنا على بعض ولحد دلوقتي ماشافش صورتي، كمان مع الوقت حبني جدا ودلوقتي طالب يتقدم لي)... دا كان كلامها لكن الحقيقة اللي أكملت وجهة نظري إن الولد سألها كتير انتي شكل مين، فردت (أنا شكل فلانة من الممثلات).

فابتدي يرسم صورة ذهنية ليها، والصورة طبعا شكل الفنانة اياها بالظبط، وابتدي العبيط يحب الصورة اللي في دماغه، كمان اللي اكتشفته انه طلب منها توصف نفسها، يعني طولها، شعرها، لونها، تفاصيل جسمها، ومن خلال وصفها كمل رسم الصورة اللي في دماغه واتعلق

بيها أكثر، يعني برضو الولد طلع بصري بس من خلال صورة ذهنية رسمها بنفسه جواه.

المشكلة بقى لما يقابلها أول مرة! للأسف دي غالبا بتبقي أول وآخر مقابلة، بعديها بيعمل لها بلوك، وده لأن الصورة الحقيقية غالبا بتبقي مختلفة عن الصورة اللي رسمها في دماغه، وطبعا بنت لما وصفت كانت بتوصف صورتها الوهمية لنفسها اللي اترسمت جواها من خلال مجاملات أصحابها اللي بيحبوها، يعني أكيد قالوا لها انتي ميكس من هيفاء وهبي ونانسي عجرم وإليسا (كل البنات بيضحكوا على بعض) وهي طبعا قالت له نفس الوصف، وبالتالي رفعت سقف أحلامه في الجمال، علشان كده مهما كانت جميلة في الحقيقة برضو مش هيشوفها جميلة وهيخلع، لأنه قارن الصورتين ببعض وطلعت النتيجة (اسماعيل يس) فصرخ لانا مش دي اللي كنت باحبها.

كمان لاحظي كده لو انتي مخطوبة وخطيبك سافر دولة يشتغل فيها، هتلاقيه بيطلب منك صور كثير، وأحيانا صور خارجة علشان يعمل إشباع بصري غريزي بيها (إوعي تبعتي له).. خليه كده علشان يتعذب ويرجع يتجوزك.

وعلى فكرة أنا كتير باطلب العكس من الزوجة، يعني أقول لها تبعت لجوزها صورها لو مسافر، علشان تخليه دايم يفكر فيها..



ملتزم جدا عكس تصوراتك

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

من فترة كده قرئت على السوشيال ميديا دراسة بخصوص الموضوع
ده وعجبتني جدا..

الدراسة عملتها باحثة في علم الاجتماع، وبتأكد فيها إن الرجل
أكثر التزاما وانضباطا واحتراما لمواعيده من المرأة، وده طبعا عكس
تصورات ناس كتير، والمبهر في الدراسة دي إن الباحثة استشهدت بأدلة
منطقية وعمرها ما خطرت على بال حد من المتخصصين، زي مثلا:

أولا أغنية ماما زمانها جاية، جاية بعد شوية، جاية لعب وحاجات.
بتقول الباحثة عن الأغنية دي إنها دليل قاطع لا يقبل الشك على
عدم التزام المرأة عموما، بدليل (ماما زمانها جاية، جاية بعد شوية)
يعني ما حددتش هتيجي الساعة كام!

ثاني حاجة الأغنية بتقول (جاية لعب وحاجات) وكلمة (حاجات)
هنا بتأكد إن المرأة ماعندهاش خطة.. يعني بتشتري أي حاجة تقابلها
في سكتها وخلاص.

ثانيا أغنية بابا جاي إمتى.. جاي الساعة ٦، راكب ولا ماشي،
راكب بسكليتة.

وهنا هنلاحظ ان كل حاجة منظمة ومحددة، الرجل هيجي الساعة
٦ بالظبط (محدد الزمان بالثانية) كمان نوع ووسيلة الانتقال (راكب
بسكليتة)..

أعتقد ما فيش أدلة أكثر من كده.. يلا تصفيق حاد..

طب تعالي نتكلم جد بقى:

بنات كثير بقى عندها كليشية ثابت في حياتها، وهو إن (الراجل
بني آدم غير ملتزم) وده بسبب دخولها تجارب كثير فاشلة، وخروجهها
بنتائج سلبية إدتها انطباع سيئ عن المخلوق ده، يعني كام مرة اداها
ميعاد و تأخر أو ماجاش تحت مبررات وهمية؟ وده طبعا بعد ما امتلكها
وضمن حبها! كام مرة وعددها بالجواز وخلع؟ كام مرة وعددها بالإخلاص
وخان؟ كام مرة غلط فيها وندم واعترف بغلطته ورجع غلط تاني؟ أكيد
كثير.. علشان كده بتشوفه وبتشوف كل الرجاله كائنات غير ملتزمة.
بس الغريب بقى إن دي مش الحقيقة.. والحقيقة انه بني آدم ملتزم
جدا، بشرط تطبيق قانون الثواب والعقاب معاه.

يعني مثلا لو هنقيس على الراجل اللي في حياتك واللي شايفاه غير
ملتزم، أكيد بيروح شغله في ميعاده بالضبط... وده لأنه واثق إن تأخيره
معناه خسارة مادية أو خصم أو توبيخ من مديره، طب كام مرة مادفعش
إيجار شقته ف ميعادها؟ أعتقد ولا مرة، أو يمكن حصلت مرة واحدة
وبعد كده جاله تهديد بالطرد فاحترم نفسه وبقى يدفع في الميعاد باليوم،
وده لأنه واثق ان عدم التزامه وتأخيره هيخليه يبات في الشارع، طب
كام مرة شتم مديره وأهاناه؟ كام مرة اتخانق مع ظابط في اللجنة وشتمه؟
كام مرة.. كام مرة؟ مافيش ولا مرة!

ممكن اقول لك مليون موقف وتكون الإجابة عليهم ب مافيش ولا
مرة، لأنه في كل المواقف دي مجبر يكون ملتزم والسبب واحد... إنه
خايف من عواقب عدم التزامه (العقاب).

حلو قوي... يبقى هنا عندنا معادلة فيها طرفين:

(هو) طرف أول ثابت فيها، (حضرتك ومديره وصاحب شقته والظابط) طرف ثاني متغير، يبقى بصراحة كده تفتكري مين الغلط ومين السبب في عدم التزامه؟ لما هو هو نفس البني آدم بيبقى ملتزم مع أي حد غيرك؟

- طب تعالي ناخذ مثال أصعب شوية:

الزوج في أول شهر جواز قال لمراته اعلمي لي كوباية شاي، ثاني شهر قال لها اجري اعلمي لي كوباية شاي، ثالث شهر قال لها غوري اعلمي لي كوباية شاي، ثاني سنة زقها (تحول من اللسان للإيد) علشان تعمل له شاي، غضب عنها اتعصبت وقالت له ليه بتزقني؟ راح شتمها ولطشها بالقلم... إنتي كمان بتردي عليا؟! دخلت تعيط... دخل صالحها... بعد فترة اتنسى اللي حصل وراجع من الشغل تعبان، لقاها مش طابخة... راح جايها من شعرها في المطبخ... انفجرت في العياط وردت عليه بعصبية، راح شاتمها بأهلها واللي جابوها (ودخل في مرحلة الشلايت)، غضبت يومين عند أهلها... ما عبرهاش... أهلها اتصلوا بيه.. رجعت ثاني بعد قعدة عرب.

.Stoop

- نقف هنا بقى علشان اللي جاي بقى إسمه أسلوب حياة... دلوقتي ده بقى سيستم العلاقة بينهم.. لما يتعصب يشتم، لما ترد أو حتى تسكت يضرها، ممكن تغضب ثاني عند أهلها أو في أوصتها، يصلح بكلمة أو بالجنس وفي النهاية الموضوع يتحل باعتذار ويوعدها بعدم التكرار.

السؤال المؤلم:

كيف تحول هذا الرجل المحترم إلى عربي؟ ومين السبب؟

طب لو كان اتجوز واحدة أكثر إيجابية واحترام لنفسها كان هيعمل كده؟

طب لو حضرتك أخذتي من البداية موقف قاطع وصارم لما غلط بالشتيمة وهددتي بقطع العلاقة أو حتى الطلاق.. كان هيعمل ايه؟

طب لو كان يوم لما ضربك أهلك اتدخلوا وابوكي واخواتك الرجالة مسحوا بيه الأرض، وقالوا بتتنا مش بتضرب لأنها مش جارية عندك، لو عملوا كده كان هيتأدى فيها؟ ما اعتقدش.

هتسأليني بس حضرتك دايا بتقول إن ماينفesch الزوجة تدخل أهلها في الخلافات بينها وبين جوزها؟!

هاقول لك يا ستي افهمي أبوس إيدك.. الخلافات حاجة والضرب حاجة تانية خالص، لأن أي زوج هيمد إيدته على مراته بدون رادع قوي منها أو من أهلها هيتأدى، وهيوصل لمرحلة الشلوت.

هتسأليني ثاني طب حضرتك ممكن لما أبوها أو أخوها يتدخلوا، يقوم الموضوع يكبر وتوصل لخناقة أو طلاق!

هاقول لك المفروض ان الأب أو الأخ عندهم من الحكمة والعقل إنهم يهددوه أول مرة... ويجيبوا حق بتتهم بالعقل - ده أول مرة - ولو مار تدعش ياخدوا بتتهم معاهم حتى ولو رسيت على طلاقها... لأنها كده هتتطلق مع الزمن، والنهارده أحسن من بكرة طالما لسه صغيرة وما فيش أولاد، وحتى لو كبيرة وعندها أولاد حرام تعيش جارية وتعذب نفسها.. ربنا مايرضاش بكده.

طبعا مش معنى كلامي إن الزوجة ترفع صوتها على جوزها لما يكون متعصب، زي ما باسمع أحيانا ان الراجل يكون تعبان نفسيا أو جاي من الشغل زهقان ويتعصب على مراته فترد عليه (إنت مش من حقك تتعصب عليا وأقسم بالله لو...).

طبعا هي كده اللي فتحت باب الإهانة، وكانت لازم من الأول تبتي بالنقاش والحنية مرة وبالجنس مرة وتستخدم سلاح الأنوثة، يعني تعيط وتعمل نفسها زعلانة، لو صالح توافق (أول مرة بس) لكن تاني مرة يكون ليها وقفة ونقاش محترم (من فضلك إنت جوزي وأنا بحترمك قوي وواثقة إنك بتحترمني، أرجوك بلاش إهانة لأنني مش هاقدر استحملها تاني، لأن دي خطوط حمراء حياتي) وتاني يوم تعمل قطعة وخصام كبير وماتحكيش لأهلها إلا إذا (شتم بالأهل أو مد إيده).

كده فهمنا إن الراجل بطبيعته كائن ملتزم بس الدور عليكي، والريموت في إيديكي، وانتي عارفة ان القاعدة اللي بتحكم البشر عموما هي:

(من أمن العقاب أساء الأدب)

والقاعدة اللي بتحكم المتجوزين:

(أديك حب وحنان وإخلاص وجنس، تديني إخلاص ورعاية واهتمام واحترام)

يعني مافيش حاجة بدون مقابل، وسيبك من جملة بكرة هيتغير لواحد.

لأن المثل يقول:

دبل ال... تطلع البت لأمها.



ما بيدف عش فلوس في حاجة ممکن ياخذها ببلاش

للمزيد من الروايات والكتب الحصرية
انضموا لـجروب سحر الكتب

sa7eralkutub.com

او زيارة موقعنا

دي حكاية للأطفال تحت خمس سنين، ياريت تفهمي منها حاجة،
بس أرجوكي ركزي.

- كان يا ما كان، كان فيه بنت عبيطة عندها مطعم تحفة وفيه أكل
يجنن... العبيطة بتحب الحرامي، بس طبعا ماتعرفش انه حرامي...
وده لأنها عبيطة.

الحرامي كل يوم يجي المطعم عندها ياكل ببلاش، والعبيطة بتتكسف
تطلب فلوس منه، يعني تمن اللي بيطفحه... وطبعا الحرامي بيطنش..
طبيعي ان الحرامي من وقت للتاني يزهدق من أكل العبيطة ويختفي فترة،
تقوم العبيطة من عبتها تتصل بيه وتسال عليه وتقول له: إنت فين؟
يلا تعالى علشان تاكل ببلاش تاني! يطنشها الحرامي فترة ولما مايلاقيش
مطاعم غيرها ببلاش يرجع ويعتذر عن غيابه ويقدم مبررات عبيطة...
العبيطة تغفر وتسامح وتقدم أكلها تالاني ببلاش.

بس أكيد بييجي عليها وقت تنفجر وتطلب منه يدفع الحساب.. (إنت
لازم تيجي تتقدم لي) الحرامي لأنه محترف وكان بيقدم دايا مبررات
وهمية، بيحس ان النهارده يوم الحساب والعبيطة فاقت وزهقت، فيحسبها
ويضربها في دماغه ويقول (إزاي ادفع النهارده فلوس في حاجة باكلها
من سنين ببلاش؟! طب ما انا اجر ب مطعم تاني يكون طعمه مختلف،
وساعتها ممكن ادفع فيه).

بيهرب الحرامي ويختفي خالص... وتقع العبيطة تعيط وهي بتسال
نفسها:

يا ترى انا كنت غلطانة لما طلبت منه يدفع الحساب؟

يا ترى الأكل بتاعي مابقاش يعجبه فراح يدور على مطعم تاني؟
العبيطة لأنها عبيطة بتسأل نفسها أسئلة عبيطة، علشان كده أنا
مسميها في القصة عبيطة.

بس الحقيقة إنك كنتي عبيطة لما ضيعتي عمرك مع حرامي، وكنتي
عبيطة لما ما طلبتيش منه يدفع الفاتورة من أول يوم علشان يحترمك
ويقدرك ويحس انك غالية... صدقيني أكلك كان رائع بس لأنه ببلاش
الحرامي ما قدر وش، وصدقيني بكرة ربنا هيو قعه ف واحدة تنتقم منه
وتأخذ تارك وتار كل عبيطة سرق عمرها.

أرجوكي فوقي والحقي اللي فاضل من عمرك، وإوعي تفتحي له
الباب تاني لو رجع، لأنه كده كده هيرجع... بس هيتصدم لما يلاقيكي
كاتبة على باب المطعم (الأكل هنا بفلوس وممنوع دخول الحرامية)
ساعتها ربنا هيرزقك بزبون محترم يدفع ويتقدم ويحيب شبكة وشقة
ويقدر أكلك اللذيذ.

ويا ريت تبقي تبعتي لي ٢ كيلو محشي لما تتجوزي.

سؤال للأذكاء فقط:

حد يعرف انا قلت كلمة (عبيطة) كام مرة في القصة دي؟

على فكرة.. لو قررتي تعديهم تبقي فعلا عبيطة.



الفصل الثالث

مفاهيم الراجل الخاصة

- مفهومه عن الكلام.
- مفهومه عن الأكل.
- مفهومه عن التسوق.
- مفهومه عن النوم.
- مفهومه عن الخناقة.
- مفهومه عن النضافة.
- مفهومه عن الخيانة.

للمزيد من الروايات والكتب الحصرية
انضموا لجروب ساحر الكتب



مفهومه عن الكلام

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

مبدئيا فيه حركة مهمة جدا لو حضرتك عملتها بلسانك هتلاقي
الراجل اللي في حياتك مستمتع ومثار لأبعد مدى، وهي إنك تحطي
لسانك في بؤك وماتكلميش خالص، يعني تبطلي رغي وماتعمليش
دوشة علشان مافيش راجل بيحب الكلام أصلا.

أرجوكي افهمي وخديها قاعدة مالهش غير استثناء واحد، وهو
الراجل اللتات، وده نوع من الرجالة لوربنا غضب عليكى وابتلاكي
بواحد زيه يبقى قولي يا رحمن يا رحيم على دماغك وأعصابك.

وده للأسف يبقى واخذ كل جينات الست والدته، من حيث
الانتقاد والتوبيخ والرغي في الفاضية والمليانة.

أما الراجل العادي الطبيعي اللي بيمثل غالبية الرجالة فهو الراجل
السايلنت.. الصامت يعني.. ويبقى فايريشن لما يتعصب.

وده لأنه (زي ما بنقول دايا) كائن عملي ومترمج على تحقيق الأهداف
وإنجاز المهام، علشان كده مايحبش غير الكلام المباشر اللي يوصل
لنتائج محددة، ويكره جدا الكلام المطاطي والملتوي وأسلوب اللف
والدوران اللي جنبك كأنشى بتميزي به، وللأسف سواء كان استتاجي
ده حقيقي أو بافتري عليكى فالواقع والتجربة يقولوا انه دايا شايف
ان كلامك كله عبارة عن رغي وهري وفضفضة لا بتودي ولا بتجيب،
وده يفسر هو ليه مايحبش يتكلم معاكى ودايا قاعد في البيت صامت
وحاطط وشه في الجرنال أو التليفزيون أو الشات.

كمان ده هيفسر لك ردوده عليكى أحيانا لما تفتحي معاه موضوع
من باب الدردشة، فيبتدي يهز راسه بعدم اهتمام أو يقول لك ماشي،

حاضر، إنجزني، خلاص فهمت.. وانتي للأسف بتمادي في الكلام
وما بتبقيش ملاحظة انه هنج منك.

طبعا حضرتك دلوقتي زعلانة من كلامي وحاسة اني ظالمك!

طب ممكن اديكي أمثلة وتحكمي انتي على نفسك؟

مثال (١)

لو حضرتك عايزة منه فلوس هيبقى كلامك معاه كالأني:

والله ما انا عارفة مصروف البيت بيخلص بسرعة كده ازاي، ده
انا يا دوب ادخل السوبر ماركت اجيب مسحوق وهو ووب الأني
الفلوس اتطرقعت.. تقولشي ركبها ميت عفريت، لدرجة ان محمود
جوز اختي زود لها المصروف مرتين السنة دي.

طبعا كل اللي قلتيه ده هو مقدمة وتمهيد وتبرير وإسهاب علشان
تقولي كلمة واحدة (عايزة فلوس) وطبعا لأن جوزك حافظ أسلوبك
فبيبتدي كالعادة يهز راسه بعصبيه وهو بيردد إنجزني، اخلصي، هاتي
م الآخر.. ولما يحس انه مافيش أمل بينفجر فيكي ويقول لك.. يعني
لازم كل المقدمة دي؟ ما تقولي يا مسعود عايزة فلوس! طبعا انتي ما
هتصدقني وهتقولي فورازي شيرين في مسرحية المتزوجون (مسعودي
عايزة فلوس) وهو هيرد (وانا كمان عايز فلوس، تعالي نشوف حد
يسلفنا).

مثال (٢)

راكيبين العربية ورايحين الساحل وعدينا على (أون ذارن) وحضرتك

كالعادة جعانة علشان مالحقتيش تظفري بسبب انشغالك بتحضير
السنط وتلبس الهدوم للعفاريت ولادك.

يبقى المتوقع منك دلوقتي إنك تقولي له (حبيبي اقف نجيب
ساندوتشات)

لكن للأسف اللي هيحصل غير كده.. وهو سؤال استفزازي:

- حبيبي هو انت ماجعتش؟

طبعا هو شعبان لأنه صحي وضرب ١٢ سندوتش فول لما كان
مستنيكي تجهزي السنط والعيال، علشان كده هايرد عليكى بمتهى
الرخامة:

- لأ ماجعتش.

وساعتها طبعا هيجيلك إحباط وهتسكتي وتطلعي غلك على الولاد
(أقسم بالله لو سمعت صوت حد فيكم لا ارميه من العربية) وهتكلمي
بأقي الكلام في شرك (جاتكم البلا فيكم وف أبوكم على الصبح).

طب ماكتي تقولي من الأول جعانة وخلص.. لازم تقر فينا معاكى!؟

.....

طب ازاي تخليه يجب يتكلم معاكى؟

١ - الوقت المناسب:

يعني ماينفعش تطلبي منه حاجة أو ترغبي ف حاجة تافهة وهو لسه
راجع من الشغل تعب، أو وهو مشغول ومندمج ويبتفرج على الماتش،

أو معاه واحد صاحبه، أو ييشيت مع صاحبه الي مسميها طارق.

٢- الطريقة:

أهم حاجة لما تيجي تكلميه تدخلي في الموضوع على طول وبلاش مقدمات أو صور جمالية أو استعارة مكنية، أرجوكي بلاش كل النحو ده وهاتي م الآخر، ولو عايزاه يستجيب بسرعة لكلامك يبقى ابتدي معاه الكلام بالمدح، يعني مثلاً... الله يا حبيبي انت وشك منور النهارده وزى القمر.. عايزة فلوس علشان اروح للكوافير.

٣- نوع الكلام:

إحنا اتفقنا انه مايجبش أي كلام مش بيوصل لنتيجة، ولا يحب الكلام من باب الفضفضة والتسلية.. بس طبعا حضر تك بتحيي النوع ده من الكلام ومحتاجاه جدا وبالذات معاه، يبقى الحل انك ماتبتديش بالفضفضة والحكاوي على طول، يعني مثلاً ماتقوليش (سها صاحبتني اتخانقت مع جوزها ومنى اتطلقت ونيفين انتحرت)، والأفضل انك تبتدي بموضوع مهم بالنسبة له يلفت نظره وبعد كده تدخلي في مواضيعك التافهة لا مؤاخذه (تعرف يا حبيبي ان الشقة الي احنا ساكنين فيها دي زادت ٥٠ ألف جنيه؟ يعني يا خسارة لو سها صاحبتني كانت سمعت كلامي واشترت واحدة زيتها قبل ما تتخانق مع جوزها، كان زمانها اتطلقت منه ورمته هو وولاده في الشارع... إلخ).

وبكده تبقي لفتي نظره لكلامك، وف نفس الوقت الوقت اتطلقتي بسرعة، يعني ضربتي عصفورين بحجر واحد.

إيه رأيك فيا؟ عبقرى طبعا!

وعلى فكرة قبل ما اقبل الفقرة دي، عايز اقول لك على سر.. لما بتقولي لجوزك أو خطيبك (عايزة اتكلم معاك شوية) بيتربع وبيتوقع مصيبة، لأنه عارف انك دايمًا بتتكلمي بدون استئذان فيسأل نفسه (هي ناوية لي على إيه؟ - أكيد عرفت حاجة - أكيد شافت الرسالة اياها على الموبايل - أكيد عايزة تزود المصروف) وطبعًا كل دي توقعات تشاؤمية من وجهة نظره، مع إنك عايزاه في حاجة أبسط من كده بكثير.. عايزة تسألينه (انت إيجوزت عليا كام مرة عرفي من يوم ما اتجوزنا؟).





مفهومه عن الأكل

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

زمان كانوا يقولوا أفضل طريق للوصول لقلب الرجل معدته، لكن اتضح بعد كده ان الوصول لقلب الرجل محتاج حاجات أكثر أباحة من كده بكثير، بس المهم خلونا في موضوعنا علشان الرقابة.

علماء الاجتماع يقولوا إن الأكل واحد من أهم خمس حاجات في حياة الرجل، لدرجة ان من أهم خطواته لتقييم زوجة المستقبل هو قدرتها على الطبخ، علشان كده بانصح حضرتك تقفي كثير مع الست والدتك في المطبخ علشان تتعلمي منها، كمان لازم تتفرجي كثير على برامج الطبخ، لأن أسلوب والدتك في الطبخ بأكلها الأورياتل مابقاش كفاية والدنيا اتطورت (دلوقتي الشيف عبد المتجلي بيعمل سمك بالمهلبية رائع ويسميه فيش لايبون).

وطبعا من الحاجات اللي هتخليكي تكرهي الجواز من أول شهر هو ذوق جوزك في الأكل، والمقارنة بين أكلك وأكل الست والدته، حفظها الله.. دايا هيقول لك إيه ده (دي ملوخية دي؟) ... يع... دي ماما كانت بتعمل لي الملوخية بطريقه تانية خالص... وخدي على كده كل يوم مقارنة وتوييخ وحرقة دم، لحد ما يتعود على أكلك، وانتي لازم طبعا تبسمي ببرود وتقولي له (معلش يا حبيبي أديني باتعلم فيك) وصدقيني ماعنديش مانع تتصلي بوالدته وتحليها تقول لك طريقة طبخ الملوخية بتاعتها، لأن ده كمان هيعمل ألفة مع أمه ويخليه يحس انك مهتمة ترضيه..

ملاحظات سريعة:

- على الرغم من إن الرجل بيحب الأكل، لكنه دايا بيتعامل معاه بمنطق الخسائر والمكاسب، علشان كده يهيمه الفايده والقيمة

الغذائية أكثر من شكل الأكل وطعمه، بس ده مايمنعش انك تخلي السفارة شكلها جميل لأنه بصري، لكن الأهم ركزي على القيمة الغذائية في الأكل، زي الفسفور بكل أنواعه، وبالذات الجمبري (بلاش تفهمي نيته غلط لما يطلبه، هو فعلا يقصد النية السيئة).

- الكوليسترول والدهون الثلاثية بتبقى ضمن تكوين الراجل بعد الجواز، وبتزيد بعد الأربعين، علشان كده لازم تتعايشي مع ظاهرة الكرش، بس أرجوكي قللي من الأكلات اللي فيها زيوت ودهون مركبة علشان يعمر معاك أطول، إلا إذا كان غني وعايزة تورثيه بسرعة.

- الراجل وهو بياكل بيبقى جوة صندوق الأكل (راجعني باب دماغ الراجل) ويبقى سرحان جدا وكأنه ف غيبوبة، يعني ماتزعلش لما تحطي الأكل قدامه ويكتشف وجودك بعد ما يمسح الترابيزه، وماتزعلش كمان لما مايعلقش زي الأجانب ويقول لك (أوووو دليشيز) الأوبشن ده مش نازل مع الراجل الشرقي... إحنا بناكل بس.. وعلى فكره تقدري تكتشفي الحالة المزاجية لجوزك وهو سرحان وبياكل... يعني لو عنده مشكلة في الشغل هتلاقه بياكل وهو مكشر بالإضافة للتنيحة (بجد ربنا يكون في عونك).

- أخطر جريميتين ممكن تعملهم مع جوزك بخصوص الأكل:

الأولانية:

إنك تسأليه وهو نازل الشغل (تحب أعمل لك إيه النهارده على الغدا)
طبعا انتي بتقوليهما بحب وفاكرة انك بتجامليه وبتعملي له حساب،
لكن هو طالما مش جعان يبقى دلوقتي بيفكر في حاجة أهم، وهو
مشواره لحد الشغل والطريق الزحمة وباقي تفاصيل الساعات الرخمة
اللي جاية، وماينفعلش طبعا تشتتته وتشغلي دماغه بحاجة جديدة، علشان
كده ماتستغريش لما يرد عليكى بمنتهى الحب ويقول لك (اعملي أي
زفت يا حياتي).

الثانية:

إنك تسأليه تفطر إيه وهو لسه صاحي من النوم، ساعتها ماتستغريش
برضو لو حدفك بحاجة في وشك لأنه بيبقى لسه نايم إكلينيكي (الراجل
محتاج ٦٠ دقيقة على الأقل علشان يفوق من النوم) وممكن يكون واقف
قدامك وشايفاه صاحي بس هو لسه بيكمل الحلم... عادي جدا.

للأسف كمان الراجل الشرقي اتعود بيتدي الأكل بالانتقاد من أيام
طفولته لما كانت امه بتتحايل عليه علشان ياكل، وكان يقول لها أي مبرر
علشان يخلع (طعمه دليع - سخن قوي - مش باحب الأكلة دي) وأمه
كانت بتدلعه وتتحايل عليه علشان يطفح ويتخن ويربرب... وطبعا
الموضوع ده بيجي على دماغك بعد الجواز، فهاتستغريش لما يكون أول
تعليق على الأكل (الملح كتير - ليه بارد كده؟ - الأكل ده طعمه بايت)
بلاش تزعلي وتاخدي الموضوع على أعصابك لكن ابتسمي ببرود وقولي
له إنت والمصحف ذواق يا حبيبي، علشان كده المرة الجاية هاخليك
تطبخ معايا وتعلمني الطبخ على أصوله، وفعلا خليه يجرب معاكي
وامدحي طريقته في الطبخ، لأن أي راجل جواه بالفطرة حلم يكون

طباخ، بدليل النجاح الهائل الي حققوه في مجال الطبخ (شوفي عندنا كام شيف في الإعلام... ييقبضوا ملايين ولاد اللذين اللهم لا حسد).

وآخر حاجة لازم تحدي بالك منها، إن زمان برضو لما أمه كانت بتسأله أحضر لك الأكل يا حبيبي؟ كان يجاوبها فورا (لأ) علشان تتحايل عليه، يبقى هانصحك دايا حطي الأكل على الترابيزة قدامه وهتلاقيه جاي لواحد بمفعول الريحة ويطفح (حاسة الشم عنده فظيعة).





مفهومه عن التسوق

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



تسمح لي ما اتكلمش في الموضوع ده؟

بجد باكرهه، كل ما اتخيل مراتي وهي جازاني وراها بالتروولي اللعين ده في السوبر ماركت، وعماله تحط فيه أي حاجة تقابلها بمتتهى البساطة، ومش فاهمة انها مع كل حاجة بتحذفها في البير اللعين ده بتقطع حته من لحمي الحمي، يااه أعوذ بالله من دي رحلة، بيبقى يوم أزرق ماطلعتلوش شمس ولا قمر، وخصوصا لما أقف في طابور الكاشير لحد ما اوصل للحظة الحساب، واشوف بعيني الشريط خارج من الماكينة الملعونة ومش باين له آخر، يا عم كفاية، يا سيدي أبوس إيديك، ده حسابي انا ولا حساب الطابور كله؟! يا سيدي اقطع الشريط بقى وارحمني! مافيش فايده.

- كام الحساب يا سيدي؟

- ٨٧٨١٦٨٤٦ جنيه.

- نعم يا حبيبي! أنا كل ده؟ والمصحف ما اشتريت غير علبة كبريت، وبعدين إيه كل ده يا حبيبي؟ وإيه المساحيق دي كلها؟ ما احنا عندنا ٢٠ علبة مسحوق في البيت!

- يا حبيبي ده عرض المسحوق (اشترى ٤٠ قطعة وخدي خصم ربع جنيه) خسارة نضيعه، وبعدين هو فيه حاجة بتقعده؟! دا أنا باغسل في اليوم خمس مرات.. وبعدين انت بتنزل بالقميص زي القشطة ترجع بيه معفن ومقيح.. تقولش بتشتغل في الفاعل! ده غير ولادك العفاريات اللي بيغيروا هدومهم في اليوم عشرين مرة و...

- خلاااص... اشترى اللي انتي عايزاه، هاتي ٨٠ علبة احتياطي

ولا يهملك أنا هاتلقح على جنب اشرب عصير علشان انتي عارفة اني
بيجيلي دوار لما الف، وابقى ناديني لما تخلصي.

- أخلص إيه؟ هو انا لسه اشترت حاجة؟!

في هذه اللحظة يغيب الزوج عن الوعي ويمر شريط عمره أمام
عينيه، ثم يهمس الطيب في أذن زوجته وأولاده: ما اكذبش عليكم
الحالة خطيرة، وانا بأشك ف ذبحة صدرية.

وهنا تصرخ الزوجة قائلة: يا نهار اسود.. نسيت الجبنة الرومي!





مفهومه عن النوم

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

زمان أول ما تجاوزت مراتي سألتني: بتحبني أكثر ولا بتحب النوم،
يوميها ماقدرتش ارد لأنني مش باحب اكذب، والطبيعي اني كنت اقول
لها طبعا باحب النوم أكثر، وللأسف دي طبيعة معظم الرجال، علشان
كده مهما حلفت لك بنحب النوم قد إيه مش هتصدقني، وعلشان اقرب
لك أكثر هاقول لك مثال بسيط:

زي ما حضرتك تتمني دلوقتي تروحي الساحل أو الجونة طيران
وتقضي يوم تحفة، هو يتمنى تقفلي عليه الأوضة يوم كامل وتقولي له
نام يا حبيبي وشخر، نامت عليك حيطة (كده هيطلقك) وده لأن
النوم بالنسبة له هروب من ضغوط الحياة وشحن للطاقة والقوة، كمان
الدوبامين (راجعني فصل الهرمونات) وهو هرمون الإثارة والسعادة في
حياته بيفرز وهو نايم، علشان كده تلاقية مبتسم وهو نايم لأنه بيشحن،
وطبعا بيصحى مكشر علشان شافك وفي نفس الوقت اتحرم من متعته
الأساسية.. شفتي بقى لأي مدى بيحب النوم.

كمان زي ما قلنا قبل كده هو محتاج لساعة كاملة علشان يخرج من
مرحلة النوم لمرحلة الصحيان، لكن حضرتك محتاجة ١٠ دقائق بس
علشان تفوقني وتلبسي وتعملي فطار وتنزلي الشغل وترجعني (لهلوبة
والله) أنا شخصيا باحتاج ١٢ ساعة علشان اصحى من النوم.

وطبعا ده هيررر لك اللي بيعمله لما يصحى بدري يوم ما تكونوا
طالعين الرحلات أو المصايف... هتلاقي بوزه شبرين ومش طايق
دبان وشه، وحذاري حذاري حد يكلمه... سيبه كده لواحد لحد
ما يوصل الساحل وهتلاقيه دخل نام وصحى من النوم مخلوق تاني
خالص مبتسم ببلاهة.

الراجل عموما بيحب يصحى متأخر من النوم، بالذات أيام الأجازات،

يضرب فنجان القهوة أو النسكافيه ويقرأ الجرنال أو يدخل على النت،
ويعد كده يتغدى ويجبس بكوباية الشاي المتينة ويدخل يقيل تاني، يعني
الأجازة بالنسبة له نوم وانتحة.





مفهومه عن الخناقة

للمزيد من الروايات والكتب الحصرية
انضموا لـجروب سحر الكتب

sa7eralkutub.com

او زيارة موقعنا

الخنافة عند الرجل هي مصغر لكلمة معركة، أو بروفة للحرب بكل مفرداتها.. علشان كده بيحركه ساعتها فكرة النصر أو الشهادة... يعني لازم ينتصر على خصمه ويحطمه أو يخليه على الأقل ينسحب، حتى ولو رسيت على موته، ولا حظي كده أي خنافة ف شارع وبالذات في الأحياء البسيطة، هتلاقي أسلحة غريبة، اللي بيطلع مطواه أو سنجة أو مية نار، وفي القرى والصعيد بيزيد الموضوع أكثر ويوصل للرشاش والآلي وأحيانا المدافع (راجعى فيلم الجزيرة الجزء الأولانى علشان الجزء الثانى زفت).

دا مفهوم الخنافة عند الرجل مهما كانت بسيطة، وهو عبارة عن فعل حركي بيتدي بتشويجة الإيد وشتيمة اللسان ويوصل لحد البونية والشلوت واستخدام السلاح زي ما قلنا.

طبعا أنا عارف ان حضرتك بتقولي دلوقتي وانا مالي بالكلام ده؟

بس للأسف الكلام ده بينطبق كمان على خنافة الرجل معاكى ومع أي زوجة.. يعني هي بمجرد ما ترفع صوتها وتشوح بإيديها بتلاقي لمبة نورت جوة دماغه بتدق طبول الحرب، فيستعد بكل أدواته لدخول المعركة، وأدواته دي إنتي اللي بتحدديها... يعني انتي ممكن تخليه يكتفي بالرد عليكى بالكلام، وممكن تخليه يستخدم إيده أو رجله حسب نبرة صوتك وحركات جسمك.

- الخنافة ف مفهومك:

وعلشان تفهمي أكثر الخنافة عند الرجل تعالي نفهم الخنافة في قاموسك كأنثى، وهتلاقي الموضوع بقى أوضح:

• سوزي صاحبكك شافتك في الشارع ودت وشها الناحية الثانية.

- نيفين ماردتش عليكى ٣ مرات فى الموبايل .
- سها ماجاتش عيد ميلادك وماقدمتش أهداء .
- قاعدين فى قعدة حريمي ومريم اتجنبت الكلام معاكى .

لو انا سألتك بعد أي موقف من دول هي ليه صاحبتك فلانة عملت كده معاكى؟ هتقولي لي علشان متخانقين مع بعض .

يبقى المقاطعة والتجاهل فى قاموسك معناها إعلان الخناقة من طرف واحد .

علشان كده لو جوزك رجع من الشغل وماعبركيش وقفل على نفسه الأوضه، أو ماردش عليكى وإنتي بتكلميه، هيبقى ده معناه فى قاموسك انه متخانق معاكى .

وهو ده الفرق:

الخرقة ف قاموسه عبارة عن صوت عالى وتشويح بالإيد، والخرقة ف قاموسك تجاهل ومقاطعة... ومن هنا بيحصل بينكم خناقات كتير مجهولة السبب... هو تجاهلك علشان راجع مخرق من الشغل، وانتي شوحتي وصوتك علي فى الكلام معاه علشان العيال معصيينك... وقامت الحرب، يعنى الخناقات بينكم غالباً بيبقى أساسها اختلاف مفاهيم وتوقع خاطئ .

بس على فكرة، ومن باب الإنصاف، هو فى الخناق أجدع منك.. يعنى لو زعلانين مع بعض هيجيب لك برضو كل احتياجاتك واحتياجات البيت، لكن انتي لو متخانقة معاه مش هتعملي له حتى كوباية الشاي بتاعة كل يوم (بصراحة ندالة) .

طب إليه أكثر حاجات بتعمل خلاف و خناقة بينكم؟

- تقليل طرف من كرامة الطرف الثاني، والاستهتار بمجهوده ودوره في الحياة الزوجية.
- الانتقاد اللاذع والتوبيخ باستمرار.
- تعمد أي طرف انه يضايق الثاني ويخرج القرف الي بيشفه طول اليوم عليه.
- كتم الزعل وتراكم الإحباط وعدم البوح وتصفية العلاقة أول بأول.
- فتور العلاقة الجنسية أو عدم تجاوب طرف من الاتنين.
- اختيار خاطئ (وقت - طريقة - مكان) للعتاب والشكوى.

دي أكثر ٦ حاجات ممكن تعمل مشاكل بين الزوجين، وأهمها رقم ٦، علشان كده تعالي نقف عندها شوية لأنها من أهم أسباب معظم المشاكل وسبب رئيسي في انفجارها وتطورها.

الحكاية من أولها:

محسن اتخانق النهارده مع زميله في الشغل واتحول للتحقيق، واتخصم له نص شهر وخذ لفت نظر، وهو نازل لقي عربيته عطلانه فوداها للميكانيكي الي لَصَمها له علشان يمشي بيها لحد ما يوصل البيت، فتح الباب لقي إيمان في وشه:

فلاش باك

إيمان من ساعة ما صحيت الصبح وهي دايرة في الشقة زي النحلة...

ما بين كنس وطبخ وتنظيف وحناقات ومشاكل مع العفاريت ولادها..
والأسوأ من كده انها عرفت من شوية ان الطماطم غليت ووصلت ٢٠
جنيه الكيلو، يعني مصروف البيت خلاااص كده جاب آخره، وطبعاً
محسن ولا على باله، ومكبر دماغه، وبالتالي أخذت القرار لازم النهارده
يكون فيه وقفة حازمة وصارمة مع هذا الكائن.

ده الحوار اللي كان بيدور في دماغ إيمان لحظة ما محسن فتح باب الشقة.
تخيلوا معايا المشهد دلوقتي بين الفريقين، بعد ما شفتنا حالة كل
واحد فيهم قبل اللقاء المصيري ده:

- إنت جيت يا أستاذ؟

- لالسه ماجيتش، جاي في السكة.

- وكمان ليك عين تهرج؟

- باقول لك إيه... اخلعي من نافوخي دلوقتي انا مش ناقصك.

- مش ناقصني إيه؟ اقف وكلمني زي ما باكلمك.

- لاااا إنتي شكلك كده عايزة تتخانقي وانا أصلاً مش فايق لك
(ويدخل على أوضته).

- باقول لك اقف هنا وكلمني زي ما باكلمك، إحنا لازم نوضع حل
لمشكلة المصروف والطماطم حالا... مش كفاية انك ماجبتليش هدية
في عيد ميلادي السنة اللي فاتت؟! حتى شبكتي بعثها بعد جوازنا..
ولا انت ناسي ان خالتك ما حضرتش فرحنا... كويس قوي ان ولادك
واقفين اهم وشاهدين على ابوهم.

أنا عارف طبعا ان حضرتك ملاك ومؤدبة ولا يمكن هتعملي كده مع جوزك، وعارف كمان ان الست إيمان دي شريرة وهتروح النار. علشان كده تعالي نحلل موقفها على اعتبارها من أهل النار وكده.

١ - الوقت:

طبعا الوقت مش مناسب تماما لفتح أي موضوع أو حل أي مشكلة... لأن أصعب وقت على الرجل هو رجوعه من شغله، بسبب البلاوي اللي بتقابه طول اليوم، يبقى كان لازم إيمان تأجل الكلام في الموضوع ده لحد ما يغير هدومه ويتغدى، ولو هيريح ساعة تستنى لما تلاقيه هادي ومبسوط، وتفتح موضوع الطماطم والمصروف.

٢ - الطريقة:

أكيد التشويح والتأبيح والتأصيح والصوت العالي مش أفضل طريقة تكلم بيها جوزها، وأكيد التكشيرة وهو داخل بتقفل مسام جسمه لسماع أي كلمة، وخصوصا لو انتقاد أو اتهام، وإيمان أكيد عارفة ان دي أكثر حاجات بيكرهها الرجل، وكان الأفضل تستنى زي ما قلنا في الخطوة الأولى وتلبس حاجة مثيرة وتحط برفان وتدخل عليه بكوباية عصير مبتسمة، وتقول له شفت يا حبيبي كيلو الطماطم بقى بكام؟

٣ - المكان:

المكان هنا مش البيت... لكن هو باب الدخول للبيت، يعني أول حاجة عينه وقعت عليها وهو داخل، والمفروض انه راجع تعبان وبيحلم يدخل جنته اللي بيستريح فيها... علشان كده كانت لازم تستقبله كويس، وبعد كده تفتح الموضوع في الليفينج أو أوضة النوم (بعد كل الخطوات اللي قلنا عليها).

طب ازاي الخناقة بتتحول لمعركة:

- لما الراجل بيستخدم التهديد أو الشتيمة أو مد الإيد.
- لما الست بتستخدم الصوت العالي والتوبيخ وحركات الجسم.
- لما المشكلة بتكون في حضور طرف ثالث (أهل - جيران - أصدقاء - أولاد) وبالتالي كل واحد يحاول ينتصر لكرامته.
- سلبية الطرف الثالث في حل المشكلة (اخزوا الشيطان - مالكوش غير بعض - دي عين وصابتكم) أو تسخين الطرف الثالث (إزاي تسمحي له يعمل كده؟ - إنت غلطان علشان دلعتها - إنتي غلطانة علشان سكتي له).
- استرجاع المشاكل القديمة (مش كفاية انك ماجبتليش هدية في عيد ميلادي وخالتك ما حضرتش فرحنا؟).
- عدم التركيز على المشكلة الحالية الأساسية واستحضار مشاكل قديمة أو ثانوية مش في وقتها.
- كل طرف بينسى ان الهدف هو حل المشكلة، ويركز على إنه ينتصر لنفسه ويطلع الطرف الثاني هو اللي غلطان.
- عدم حل المشكلة من جذورها والهروب منها بالخروج من البيت أو المصالحة الغير مشروطة... ده بيعمل تراكم.
- عدم وعي كل طرف باختلاف الطرف الثاني عنه في التركيبة النفسية، وبالتالي مش هيحس باللي مضايقه وهيسخر من مشاعره واحتياجاته (بقي بتعطي علشان نسيت عيد ميلادك؟ - بقي بتشخط علشان حولت الريموت وانت بتتفرج ع الماتش؟)
- الحسد... هو طبعا بيان سبب عيبط ومش علمي ومش منطقي،

لكن صدقوني يبقى سبب كبير في الخلافات والخناقات الزوجية، وبالذات لما نظهر حياتنا الزوجية بشكل وردي ونحط صورنا على الفايسبوك واحنا ف مارينا والساحل وجمصة... ياريت نداري على شمعتنا أحسن.

- طب آخر سؤال..

هل كل المشاكل بين الزوجين قابلة للحل؟

الحاج (چان جوتمان) علشان يجاوب على السؤال ده عمل بحث على شريحة متكونة من ٤٠٠ زوج وزوجة، وحصر مشاكلهم، وقال هما نوعين من المشاكل:

١- مشاكل قابلة للحل

ودي بتمثل ٣١% من المشاكل الزوجية، وبتكون ناتجة عن ظروف استثنائية لحياة الزوجين، أو مرتبطة بمكان أو زمان معين.

زي مثلا إنهم بيعزلوا من شقتهم وكل واحد مشدود، أو طرف من الاتنين عنده ظروف في شغله، أو عندهم طفل مريض مخليهم مخنوقين من الحياة، ودي بيسميتها مشاكل عارضة وقابلة للحل بزوال المسبب، وأحسن حاجة ليها اتنا نصبر ونستحمل بعض لحد ما تعدي.

٢- مشاكل مزمنة

ودي بتمثل ٦٩% من المشاكل الزوجية، وبتيجي نتيجة الفروق في الطباع (زي إن هي مثلا عاطفية وهو عملي - هو بخيل وهي كريمة - هي عصبية وهو بارد) ودي حلها كالأتي:

نشيل من دماغنا توقع إن الطرف الثاني هيتغير، لأن ده مش هيحصل،
ولازم نصدق انها صفة من صفاته، مش عيب فيه.

نحاول نغير الصفة دي بالتدريج وبالحب والرحمة، ومانتوقعش
أكثر من ٢٠٪ تغيير.

نحاول بقدر الإمكان نتعايش مع الصفة دي.

نفكر نفسنا دايمًا في مميزاته، ونتجاهل الصفة دي ونركز على باقي
الصفات الكويسة اللي فيه.

نصدق إن مشكلتنا اننا شايفين الصفة دي عيب لأنها مختلفة عننا،
ودي الكارثة، وبالتالي لازم ندرس الفروق بين الراجل والمرأة علشان
نفهم ونتأكد انها مش عيب.

وأخيرا وليس آخرا، لازم نتفق ان مافيش حياة بدون خلافات
ومشاكل، بالعكس دي ممكن تبقى بوهارات الحياة الزوجية اللي بتحميها
من الملل والرتابة، بشرط اننا نقدر ندير الخلافات دي صح ونراعي
ربنا ف بعض.



مفهومه عن النظافة

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

لو دخلتي شقة أي واحد عازب عايش لواحد أو مع أصحابه
الولاد، هتفهمني قصدي إيه وهتشوفي المأساة بعينك!

سرير متبهدل كان لونه في الأصل أبيض وبقى بيعج، ثم أصبح بني
غامق، وريحته تخلي صاحبه يغمى عليه مش ينام بعمق بس.

أطباق مرمية في كل حته، على السرير والأرض وفوق الدولاب
وتحت الدولاب وجوة الدولاب، والأطباق دي جواها فضلات قطنية
لونها أبيض كانت في الأصل تونة وعفنت، هدوم ماتغسلتش من بدء
الخليقة.

يعني بيته بيبقى لوحه تشكيلية لدافنشي بس رسمها بعد ما مات،
ولو جرتي تسأليه عن سر استمتاعه بالمزيلة دي هتلاقي إجابات منطقية
تحولك انتي شخصيا لواحدة معفنة زيه.

- إنت ليه مابتوضبش السرير يا حبيبي؟

- طب واوضبه ليه طالما هارجع انام عليه واهدله تاني بالليل!؟

- طب ليه مابتنفضش الشقة؟

- أصلي بصراحة كل ما انضفها تتوسخ تاني، طب وعلى إيه بقی
وجع الدماغ!؟

وفي الحقيقة الصفة دي في الراجل ليها سببين، واحد فطري وواحد
مكتسب، الأولاني إنه معفن بالفطرة، أما الثاني فده بسبب الست والدته
ساحمها الله، اللي عودته من طفولته يرجع من المدرسة يرمي هدمومه ع
الأرض ويخرج بلبوص ينزل التربة (أنا باتكلم على جيراننا في البلد)،

كمان ياكل وأمه تنده أخته علشان تشيل مكان السبع اخوها، لأنه هو
الراجل، وطبعا البنت لازم تقول حاضر علشان تتعلم وتبقى ست
بيت وماتطلقش، وطبعا أبو الولد نموذج مشرف قدام ابنه ويعمل
نفس المصايب والست الحاجة تلم وراهم.

طب هل الصح إنك تستلمي للطبيعة دي ف أول الجواز؟

- لأ طبعا... يعني لو الأم فشلت انها تربيه يبقى انتي لازم تنجحي
في إنك تعوديه... يعني زي ما قال ديكارت في كتابه الشهير (علمني
القوم والنبي يا احمد) مقولته الشهيرة (إنك على ما تربيه وجوزك على
ما تعوديه).

يعني لازم تعوديه من أول الجواز على الصح، مش تستسلمي زي
ما ستات كثير بتعمل وهي فرحانة بدور الشغالة أو الأم المضحية اللي
بتريح جوزها... صديني غلط... وهيكمل معفن كده وهيطلع ابنه
معفن زيه، وهيفضل جيل يورث جيل لحد ما البيوت تبقى مقلب
زبالة كيبير.. يع.. إيه القرف ده!

علشان كده أرجوكي بلاش تياسي وحاولي مرة واثنين وتلاتة... في
البداية الفتى نظره، وغالبا هيحس بإحراج وهيعمل كده، ولو ما استجابش
اطلبها صراحة بس بهزار، لو طنش حاولي تاني، ولو استخدم معاكي
سياسة الصوت العالي والزعيق، ابتسمي برود ودلع وقولي له علشان
خاطري يا بيبى، والله تعبانة طول النهار، وحياتك ساعدني، أرجوك
أرجوك أنا عارفة انك بتخاف عليا، وممكن كمان تستخدمني معاه أسلوب
المكافأة.. يعني لو ساعدتني وغسلت الأطباق هاوري لك ليلة حمرا
والبس لك بيبى دول إسود النهارده (ترغيب وتهديد في نفس الوقت).

أما بقى لو فضل مطنش يبقى سبيي كل حاجة مكانها لما يرجع من الشغل، واستحملي كلمتين وخلاص، وقولي له كنت تعبانة، بس طبعاً من الحكمة انك ماتطلبيش منه الحاجات دي بصيغة الأمر أو بعصية أو قدام حد (أهل - ولاد - أصحاب - جيران)، كمان بلاش تنتقدي سلوكه ده.. يعني أكدي له ثقتك في إنه نضيف بس تعبان ومكسل... ولما يعمل حاجة حلوة أو يساعدك يبقى لازم تمدحيه بشكل شخصي علشان تنمي جواه الرغبة دي، ويا ريت تمدحيه قدام الناس وولاده بالذات (لازم يا ولاد تطلعوا معفين زي بابا) كمان كلمي صاحبك في الموبايل وهو جنبك، واعملي مش شايفاه وقولي لها (تصدقي يا سوسو جوزي دا تحفة.. ماعندوش أي استكبار.. أقول له على أي حاجة يعملها زي الجزمة) طبعاً هيسمع ويتسم وبعد كده هيطلقك. وآخر حاجة لازم تفهميها إن نضافته الشخصية برضو مرهونة بالتعود، يعني وارد تتجوزي واحد وتلاقيه دايا يقعد في البيت ودقنه منبته وكرشه قدامه شبرين ويريحته مقننله ونادر لما يغسل سنانه، والموضوع ده كنت كتبه بالتفصيل في كتاب (واي من لوف مزز) والحل برضو إنك تاخدي الموضوع بهزار ومن غير ما تخرجيه (يا حبيبي الجيران ابتدوا يشتكوا من الريحة) يلا نقوم نستحمي، وممكن تشتري فرشاة سنان ليكي وواحدة ليه وكل يوم بالليل والصبح تشغلي موسيقى (مارش عسكري) وتقولي له حان الآن موعد غسل السنان ولا بد أن نلبي النداء.



مفهومه عن الخيانة

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

منه يوم القيامة ويحرقه بجاز.. لكن يعمل علاقة عاطفية ويجب واحدة
تانية! صعب جدا، لأنها شايقة نفسها هي بس اللي حبيته.

كمان تعبيرها عن الخيانة وردود فعلها بتبقى غاية في الرومانسية،
يعني تقول له (إهه إهه) بقى هنت عليك يا برعي.. هانت عليك
العشرة؟ ضيعت حب السنين، كسرت قلبي، جرحت مشاعري، دست
على صباعي).

علشان كده تومسيون بيقول إن الرجل بيتجنب ان مراته تعرف
خيانتة حفاظا على مشاعرها (شايقين الأخلص) لكن هو في قرارة
نفسه مش شايق انه يعمل حاجة غلط، بالعكس ده بيشحن طاقته
علشان يرجع لها مبسوط (والمصحف نظرية برضو).

طبعا مش معنى اني باجيب وجه النظر دي أبقى مؤمن بيها، لأ طبعا
ده استهبال، بس حبيت اوريكي اللي بيدور في دماغ بعض الرجالة..
ولو كان الكلام ده حقيقي ماكانش ربنا ساوى بين (الزاني والزانية)
وشدد على عقابهم في الدنيا والآخرة، الاتنين اسمهم خيانة.

والأكيد ان شيوع الخيانة في أي مجتمع بتدمره بالكامل، والأصعب
من كل ده هو وقع الخيانة على الزوجة اللي بتدمر مشاعرها وتكسر
روحها وتفقدتها الرغبة في الحياة.

من فترة كنت ضيف على برنامج وسألتني المذيعة بسخرية:

- تفتكر يا إيهاب كل الرجالة خاينين؟

أنا طبعا انتفضت ورفعت صوتي كأني باترافع في محكمة وقلت لها:

لأ طبعا.. مش كلهم.. بدليل اني قابلت السنة اللي فاتت راجل



مخلص لمراته في جنوب شرق الصين، وانصورت معاه كمان.

يمكن إجابتي وقتها كانت هزار، لكن الحقيقة ان نسبة مش قليلة من الرجال بتخون، وفيه إحصائيات غير معلنة من مراكز الأبحاث بتقول إن نسبة خيانة الرجال إلى المرأة ١ : ٥

يعني عدد الرجال اللي بتخون ٥ أضعاف عدد الستات اللي بتخون.

ودة برضو رأى المعلم (دايفين باس) واحد من علماء الاجتماع في الغرب، اللي شايف ان الرجال كائن خاين بالفطرة، وإن ٨٦٪ من الرجال في العالم بيخونوا زوجاتهم - حد أدنى خيانة عاطفية - وإن ٦٦٪ من الرجال مدمنين ستات، وإن اللي مش بيخون منهم هو الغير قادر ماديا وصحيا أو اللي عنده زوجة كاملة.

وتفسيراته لكده:

إن الرجال دايبا عنده شعور انه يقدر يحقق السعادة (ماديا وجسديا) لأكثر من مرأة.

إن الرجال طماع بالفطرة ويميل لتحقيق كل أنواع المكاسب، ويعشق الفتوحات والإنجازات، وبالنسبة له الدخول في علاقة جديدة وامتلاك المرأة هو انتصار.

الرجال ملول بطبيعته ويحتاج يجدد علاقته العاطفية والجسدية.

الرجال بطبيعته صياد وامتلاك المرأة الجديدة هو صيد جديد.

ده رأى المعلم دايفين، لكن الرئيس إيهاب (اللي هو انا) ليه رأى

تالت خالص، وهو:

أولا أسباب خاصة بالراجل نفسه:

- الراجل يبخون لأن مافيش رادع ييمنعه من الخيانة، ومش دايا خايف من العواقب (رد فعل المجتمع والزوجة وانتقام ربنا) وواثق انه قدها ويقدر يتفادها، وده عكس المرأة تماما اللي خيانتها معناها انها تقتل.
- الراجل يبخون لأن المجتمع بيتعامل مع خيانتته على إنها فهلوة، والراجل الخاين هو الصايغ اللي مقطع السمكة وديلها، لكن المرأة الخاينة هي الساقطة المنحرفة اللي عايزة الدبح.
- الراجل يبخون لأنه أيام ما كان طفل، كانت امه لما تشوفه مع بنت تقول له يا واد يا شقي، لكن لو شافت اخته مع ولد تجيبها من شعرها.
- الراجل يبخون لأنه فاهم تعدد الزوجات غلط، يعني متوقع ان حقه الطبيعي يجرب دي، ويعمل علاقته مع دي، لحد ما يلاقي زوجة تانية مناسبة، رغم ان النوع ده في الآخر مش بيتجوز، وبيكتفي بالعلاقات الغير مشروعة.
- يبخون لأنه مش مقتنع ان اللي بيعمله خيانة زي ما يقول (تومسيون).
- يبخون أحيانا لما يدخل مرحلة أزمة منتصف العمر، ويحاول يدخل تجربة علشان يثبت انه لسه صغير ومرغوب، ويقدر يحب تاني ويشبع أي امرأة.
- كمان أحيانا يبخون غصب عنه لما يكون غني جدا أو وسيم جدا، وتبتدي الخيانة تجيله غصب عنه فيضعف.

- أحيانا بسبب زيادة التستوستيرون في جسمه، وزيادة الطاقة والقدرة الجسدية اللي ماتقدرش تحتويها مرأة واحدة.
- ممكن يخون بسبب الضغوط المادية والمسؤوليات الكثير اللي حواليه، فيهرب لتجربة تنسيه ضغوطه.
- أحيانا بيكون فعل انتقامي من زوجة باردة أو مهملة أو عصبية أو بتفطرط في حقوقه، فيقرر يخون علشان ينتقم منها.
- طبعا مش هيخون إلا إذا كان الوازع الديني عنده ضعيف، ومش مؤمن بعواقب الزنا والخيانة على نفسه وولاده وفلوسه.
- ظهور صديق سوء في حياته يعوده على الخيانة.

دي أهم أسباب خيانة الرجل من وجه نظري، بالإضافة طبعا لانفتاح المجتمع والاختلاط السلبي، ورفع سقف أحلام الرجل في المرأة عن طريق تقديم (امرأة الميديا) وهي المطربة والفنانة اللي بتظهر غاية في الرقة والأنوثة والجمال (ستات تصنيع بيروت وتركيا)..

وطبعا دي كلها أسباب مصدرها الرجل لواحد، لكن أحيانا بتبقى الزوجة بدون ما تقصد سبب خيانة جوزها أو ساعدت على كده، ورغم ان النسبة بسيطة لكنها للأسف موجودة.

أسباب خاصة بالزوجة نفسها:

- عدم فهم الزوجة لطبيعة الرجل وطريقة تفكيره وإشباع احتياجاته الغريزية (مؤدبة زيادة عن اللزوم).
- عدم فهم الزوجة للتعامل مع الخيانة الأولى، واللي بتبقى أحيانا نزوة وتعدي، أو بداية لخianات كثير حسب تعاملها معها.

- طبعاً السبب التقليدي الذي هو إهمال الزوجة لنفسها بعد الجواز، وثقتها إنها بقت تمتلك الرجل، واهتمامها بالولاد أو الشغل أو الطموح، أو انشغالها بأصدقاءها وأهلها.
- عدم تقدير الزوجة أحياناً لكفاح الرجل ومجهوره، ومحاولتها للتقليل منه ومن قدراته، وده بيخليه يدور على ست تانية ترد له اعتباره وتحسسه بقيمته ورجولته.
- كثير من الستات بعد ما تخلف أول طفل بيحصل لها فتور جنسي، وتكره العلاقة وتهجر جوزها، فتدفعه للخيانة.
- عدم قدرة الزوجة على تجديد الحياة الزوجية وإعادة البريق للعلاقة، والتركيز على متطلبات الحياة والمشاكل.

إزاي تتعاملي مع خيانة الزوج؟

أولا لازم تفهمي إن الوقاية خير من العلاج، والطبيعي إنك من بداية الخطوبة تخلعي من أي راجل عينه زايغة، وماتصدقش امك لما تقول لك هيتغير بعد الجواز (أقسم بالله بتشتغلك وعايضة تخلص منك). بس هنعتبر انك خلاص وقعتي واتنيلتي على عينك واتجوزتية وطلع خاين! هنعمل ايه؟

ساعتها هيبقى عندنا كذا احتمال وكذا طريقة للحل:

١ - لو الزوج بيخون لأول مرة:

أنصحك عموماً بلاش تدوري ورا جوزك وتفتحي باب الشك بينكم، وثقي إن ربنا لو عايذ يفضحه هيفضحه، وثقي إن أحياناً ربنا بيستره

علشان عارف انه هيفوق ويرجع، وأحياناً بيستره علشان مايوجعكيش
انتي.. يبقى الأحسن افترضى حسن النية واستنى لحد ما الخيانة تقع
قدام عينيكى وساعتها قرري:

- نرجع للحل:

أنا شايف انها لو أول خيانة يبقى ساعتها هاسألك.. هو عرف
انك كشفتيه؟

- لو الإجابة (لألسه ماعرفش) يبقى استنى وبلاش تقولي له انك
كشفتيه، لأن الراجل فى الحالة دي ممكن يتحول لكائن بجح.. (إنتي
ازاي تتجسسى عليا، أنا كده واذا كان عاجبك وأعلى ما ف خيلك اركبيه)
أو يعمل العكس.. يعنى ينكسر ويمثل انه ندمان وبتندي ياخذ حذره.

يبقى الحل الأفضل انك تعملي عبيطة وبتندي تفتشى ف أسباب
خيانته... لو خاصة بيكي، يعنى إهمال منك، يبقى ابتدي صلحي من
نفسك.. ولو خاصة بيه يبقى أسألي متخصص عن حالته، وهيقول
لك الحل، وابتدي حسنى معاملتك معاه.. أظهرى الطيبة والحنية،
خلي ضميره يأتبه واديله أمثلة ف كلامك عن جوز صديقتك اللي
خانها وربنا ابتلاه فى ولاده أو فلوسه (خوفيه).. ابتدي ازرعى الدين
فى البيت واعملي صداقة بينك وبينه.

طب لو الإجابة (أيوه عرف) عرف انك كشفتيه.. يبقى حضرتك
مجرة تاخدي موقف حاسم وراذع، يعنى اطلبى الانفصال (كده وكده
طبعاً) وتمسكى بقرارك، بس يبقى الغالب على شخصيتك هو الحب
والحزن والانكسار مش القوة والجبروت (أنا باحبك قوي بس مش

قادرة اكمل معاك حياتي) وإياكي إياكي تفضحيه أو تقولي لحد من أهلك حتى لو غضبتي عندهم.. قولي فيه بيننا خلاف عادي، بس الفضيحة لأ، صدقيني هيحترمك قوي، كمان مش هتعملي حاجز نفسي بينه وبين أهلك فيما بعد.. طبعاً لو كان محترم هيحاول مرة واثنين يستعيدك ويطلب تسامحه، وساعتها استجيبى للرجوع، بشرط انه مايكررهاش تاني، وصدقيني هيبقى ده قلم قوي ومش هيكورها تاني (غير بعد أسبوع).

٢- الزوج الخاين بطبيعته:

يعني بقى المعتاد انه يخونك ويعتذر، أو يخونك ويتحجج.. ساعتها هاقول لك الاختيار ليكي، تكلمي أو تنسحي، وانتي أدري بظروفك وقدرتك على التحمل.

وعلشان اساعدك في القرار ده هاقول لك وجهة نظري بصراحة:

- لو جوزك اللي بيخونك كان مليون مميزات، وعيبه الوحيد هو الخيانة، يعني محترم في تصرفاته معاكي وبراعي ضميره ف بيته وحياته عموماً، لو بيندم بعد الخيانة ويحاول يبقى كويس، لو بيعتذر ويطلب الغفران ويعوضك بالحنية والكرم والحب والاهتمام.

الراجل ده أنصحك تكلمي معاه وتصبري، وتثقي إن مافيش راجل كامل، ووارد ربنا يهديه، بس انتي بلاش توجعي نفسك وتدوري وراه.. علشانك انتي والله مش علشانه.. هو غبي.

- أما لو جوزك اللي بيخونك مليون عيوب بالإضافة للخيانة.. بمعنى إنه بيشتم ويضرب ويحجج، وكمان بخيل أو بتاع امه ومش مراعي ربنا

فيكي، ساعتها هاقول لك انفدي بجلدك النهارده قبل بكرة.

هتقولي لي طب والعيال؟

هاقول لك تربية العيال مع راجل زي ده ظلم ليهم، لأنهم غالبا هيطلعوا زيه، هتقولي لي طب شكلي قدام أهلي والناس؟

هاقول لك طز، المهم تلحقي عمرك بدل ما تصبري النهارده وتنفجري بكرة وانتي عندك ٥٠ سنة، ساعتها هيبقى صعب تكلمي لواحدك.

لكن السؤال المؤلم بقى، هل ينفع الزوجة تكمل مع الراجل الخاين وهي مضطرة؟

للأسف الشديد أيوه ينفع، وساعات بانصح بكده رغم أنني.. بس ده لما تكون كل الطرق مقفولة قدام الزوجة أو ما عندها ش استعداد تتطلق أصلا زي صاحبة الرسالة دي:

(أنا متجوزة من ١٠ سنين وعندي بنتين، جوزي حنين وطيب ويحبني، ورغم اني مهتمة بيه وبنفسي جدا إلا إني كل يوم والثاني أكتشف خيانتته واقلب الدنيا، يوعدي ويرجع تاني، بس انا للأسف ماليش غيره وباحبه ومستحيل اتطلق منه، أعمل ايه؟).

هنا الزوجة اعترفت انها مستحيل تتطلق، يبقى لازم اكون واقعي واجاب من منطلق ظروفها، يعني مش هاردد الحل التقليدي (إديله بالجزمة واتطلقني) ولا هاصبرها واقول لها بكرة هيتغير، ولا حتى اقدر اقول لها اعترزليه في نفس البيت لأنها بتحبه، وكم ان ده وارد يزود نسبة الخيانة عنده، لكن هاقول لها قاومي شعور الغيرة جواكي بقدر الإمكان، وثقي إن العيب عنده مش عندك، بلاش تسعي لاكتشاف

خيانته لأنها مش هتضيف ليكي غير الوجة، وكمان هتزد الخلافات بينكم، لكن اعملي العكس، يعني لو شفتي حاجة طنشي وادعي ربنا يخفي عنك خيانته علشان ماتتعيش أكثر، وثقي إنك مش مسؤولة ولا هتتحاسبي عنه، هو اللي هيدفع التمن لواحد، ادعي له وتعاطفي معاه وخليه يشوف النضافة فيكي وفي البيت وفي الولاد، علشان يقارن بالقذارة اللي عايش فيها! وأكد بإذن الله هتكسبي، حافظي على أسراره وبلاش تفضحيه، حاولي تحققي متعتك الشخصية من خلاله، يعني اطلبي كل احتياجاتك واحتياجات ولادك، اطلبي خروج وفسح واهتمام وجنس ورفاهية وادعي تفرطي في حقوقك، وثقي إن إحساسه بالمعصية هيخليه مكسور من جواه حتى ولو بين العكس، وهيحاول يرضيكي دايمًا، كمان ادعي الشيطان يلعب بدماعك ويقول لك ردي له الخيانة فتخسري الدنيا والآخرة، وثقي إنك في ابتلاء واختبار عظيم ولازم تصبري وتحسني الظن بالله.

ده رأيي، لكن لو حضرتك مختلفة معايا وليكي رأي تاني يبقى اسكتي وبلاش تفتي، كفاية انا بافتي.



الفصل الرابع تركيبية الراجل البيولوجية

- مراحل عمره
- تركيبية دماغه
- ذاكرة التواريخ
- الحواس
- الهرمونات والناقلات العصبية

للمزيد من الروايات والكتب الحصرية
انضموا لجرؤب ساحر الكتب

sa7eralkutub.com

او زيارة موقعنا



مراحل عمر الراجل

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

فيه متخصصين يقيموا عمر الراجل لمراحل حسب التطورات النفسية والجسدية، وهي:

طفولة ومراهقة وشباب ورجولة وشيخوخة.. بس انا شايف ان المراحل دي مش دايمًا بتكون خاضعة للسن، بمعنى ان ممكن راجل يعيش المراهقة من سن ١٢:٢١ زي ما يقيمواهم، وممكن راجل يعيش المراهقة من سن ١٢:٨٢ عادي جدا، ووارد يحصل العكس، يعني ممكن الرجولة بكل خصائصها تتولد عند الراجل من سن ١٨ وتكمل معاه مدى الحياة، بس بما إننا بتكلم على غالبية الرجال، مش الاستثناء، يبقى تعالي نلتزم بالقاعدة الأساسية وهي ربط السن بالمرحلة.

المرحلة الأولى من سن ١٥:٢٠

في المرحلة دي بيكون دخل سن البلوغ بقى له ستين ثلاثة (من ١٧:١٢) وبقى شاب وبالتالي ابتدى يحس بنفسه ويكتشف رجولته ويحاول يثبتها بكل الطرق.. هتلاقه متمرد على كل حاجة حوالية من دين لعرف لقيم، وبتندي يرفض أي ثوابت ويصنع لنفسه معتقدات وأيديولوجيات خاصة بيه، كمان وارد يعتنق أفكار شاذة علشان يؤكد لنفسه تميزه واختلافه، وهتلاقه دايمًا عايش في محاوله لإثبات قدراته، وبالتالي هيرفض وصايا الأهل ويصطدم بأساتذته.

طبعي هبتندي يحلم بوجود بنت ف حياته علشان برضو يؤكد رجولته، وطبعًا هيفرض عليها وصايتها وهيتخيل إن دي زوجة المستقبل ويوعدها بكده، بس بعد كام شهر هيتمرد عليها ويسيبها وبتندي يفكر في واحدة غيرها، كمان هتزيد في جسمه الرغبة الجنسية وهتلاقه دايمًا في حالة توهج نتيجة زيادة هرمون الذكورة والإثارة في

جسمه (تستوستيرون) علشان كده لو في حياتك شاب في المرحلة دي تأكدي إن علاقتكم مجرد انفعالات عاطفية وغريزية وهتنتهي لما حضر تك تسبقه وتدخلي مرحلة النضوج.

المرحلة الثانية من سن ٢٠:٢٥

معظم المرحلة دي بيقضيها في الجامعة، ويمكن النص الثاني منها يقضيه في الجيش، علشان كده بتبقى مرحلة اضطراب، نصها الأولاني ممتع ورائع، والنص الثاني سواء كان جيش أو بحث عن عمل بيبقى صعب نفسيا عليه.

في نصها الأولاني جامعة يعني انطلاق ورحلات (هذا الكلام لا ينطبق على بتوع طب ربنا يعينهم) ومذاكرة وأحلام وخطط لبكرة، قصة حب غالبا بتنتهي بعد التخرج لما كله ينزل المفرمة (نسبة نجاح حب الجامعات ١%) طبعا في المرحلة دي بيكون ابتدى يهتم بجسمه وعضلاته ويلاعب رياضة أو يروح جيم، وطبعا بيبقى مرتبط بأصدقائه زي المرحلة اللي فاتت، بس اللي يهملك هنا إن الراجل في المرحلة دي بيبقى مش في دماغه فكرة الجواز خالص (إلا استثناء لو أهله مظبطينه ماديا) بيبقى لسه بيحلم بحريته لأنه زي ما اتفقنا مش ممكن هيفكر في الجواز غير لما يحس بكيانه ويحقق أول خطوة على الأقل، علشان كده بانصحك تفكري كويس قبل ما تربطي مصيرك بشاب في المرحلة دي، وضروري تتابعي خطواته، وتتأكدي إنه فعلا جاد وطموح وبيجتهد علشان يكسر القاعدة ويتجوزك.

المرحلة الثالثة من سن ٢٥:٣٠

ممكن يكون خلص جيش أو لسه ظابط احتياطي وقدامه سنتين

أو ثلاثة ويخلص، وممكن مايكونش عنده جيش بس دخل الطاحونة
وابتدى يدور على شغل، خلاص كام سنة وهيدخل التلاتين ولازم
يموت نفسه علشان يستقر ف شغل، لأنه طبعا مابقاش ينفع ياخذ
مصروف من أهله، والكلية والجيش بح.. يا باشا يلا وريني رجولتك..
أعصابه تعبانة ومشدود وحاسس انه ضايع وفاشل، لو في حياته
حب أو خطوبة بيبقى عصبي ومشدود بين خطوات الجواز وصراعات
الشغل وإثبات الوجود، علشان كده لو في حياتك راجل في المرحلة
دي حاوي تستحمله وتقفى جنبه.

المرحلة الرابعة من ٣٥:٣٠

خلاص اللي ذاكر ذاكر، واللي لاقى شغل اشتغل، واللي ماشغلش
تايه في الدنيا وضايع، بيقارن نفسه بكل أصدقائه وبيترعب لما يلاقي
زميله فلان اتجوز وفتح بيت وعنده شغل وعربية... يا هنااااا.. اجري
بسرعة العمر بيضيع.. لازم تخطب وتجيّب شقة، بس الأول لازم تكون
عندك شغلانة محترمة، لو كان لاقى شغل وكمان اتجوز هيبقى أكيد
عايش جوة الطاحونة علشان تحقق استقرار في البيت والشغل، يعني
المرحلة كلها ضغوط، علشان كده لو في حياتك راجل في المرحلة دي
يبقى الله يكون في عونك، لازم تتحملي.

المرحلة الخامسة من سن ٤٠:٣٥

بيكون غالبا إتجوز وممكن يكون عنده طفل أو اتنين، وابتدى يعقل
ويلتزم دينيا وأخلاقيا، أو العكس لسه ماتجوزش ومقضيها مراجيح كل
يوم يقابل واحدة (ينشن على البنت فوق التلاتين) ويعيش حياته معاها

ويقرر يتجاوزها كذا مرة وبعد كده يتردد ويتراجع، علشان كده لو في حياتك راجل في المرحلة دي ولسه ماتجوزش دايمًا خلي بالك واسأل نفسك ليه ماتجوزش لحد دلوقتي؟!

أكيد متردد أو عنده مشكلة نفسية أو جسدية وساعتها اخلي (إلا إذا كان ضيع عمره في الشغل أو الدراسة أو كان بيراعي أهله)

المرحلة السادسة من سن ٤٠:٥٠

ده بقى سن اكتمال الرجولة والنضج والوقار.

استقرار في شغله وبيته.. رفاهية مادية ورجوع لنفسه وحياته.. بيتدي يركز أكثر على ملامحه وجسمه، يبسأل نفسه يا ترى ابتديت تبان عليا الشيخوخة؟ إيه أخبار الكرش؟ إيه المانع أشترى هدموم وبرفانات واشوف نفسي من جديد قبل ما العمر يخلص؟

طبعا نسبة وقوعه في تجربة جديدة بتزيد في السن ده، علشان كده بيسموها مراهقة متأخرة، وأخطر حاجة ممكن تحصل في المرحلة دي هي أزمة منتصف العمر، عشان كده هاتكلم عنها بالتفصيل ولازم تذاكرها كويس جدا.

أزمة منتصف العمر:

عموما هي اسمها مرحلة منتصف العمر، ويمر بيها كل البشر ستات ورجالة، بس بتتحول لأزمة عند ١٠٪ بس من البشر أغلبهم رجالة.

ممكن تبتيدي مع سن الأربعين أو تتأخر لسن الخمسين، وممكن تستمر مع الراجل سنة وممكن تستمر ٢٠ سنة حسب التعامل معاها، وارد

تبقى أزمة بسيطة ودمها خفيف، ووارد تتحول لمرض نفسي وتصرفات شاذة، علشان كده لازم تفهميها كويس علشان تعرفي تتعاملي معاها:

أولا أعراضها:

بيصحى الراجل من النوم فجأة في السن ده، ويقرر يقعد مع نفسه ويبتدي يقيمها ويعيد حساباته في كل حاجة، أنا حققت إيه؟ أنا جاي مين؟ أنا رايح فين؟ يا ترى العمر ضاع؟ يا ترى هاقدر ألحقه؟ ينفع أرجع شاب تاني؟ إزاي أقدر استثمر نجاحاتي وفلوسي علشان أبقي سعيد؟ يا ترى أنا لسه مرغوب عند الستات؟

حاله توتر وتمرد ورغبة في التغيير، عايز يجرب كل حاجة جديدة (أماكن - ناس - أفكار - هدم - أسلوب حياة) كل هرموناته بتتلخبط ويبتدي هرمون الذكورة (التستوستيرون) يقل بنسبة ١٪ كل سنة، وده بيوتره أكثر من غير ما يعرف السبب، ويبتدي يخاف على قدراته الجنسية لاحسن تقل.

بيبتدي كمان يركز مع تجايد وشه ويتربع من الشيخوخة.. علشان كده ممكن يلجأ لمراكز التجميل (زرع شعر - صبغة - شفط كرش) وغالبا بيرجع للجهيم والرياضة بحماس كبير، ويفكر ازاي يستعيد شكل جسمه وعضلاته.. ويبتدي يتصل بأصدقاء زمان (الطفولة - الدراسة) ويبتدي يحلم برجوع الماضي بكل صورته.

وارد جدا يدخل بإرادته تجربة حب أو جواز، وبالذات من بنت صغيرة، علشان يثبت انه لسه شاب ومرغوب، وساعتها بيبالغ أكثر في مظهره ويبتدي اختياره لهدمه يبقى شبابي بشكل مبالغ فيه...

وارد جدا الموضوع يتحول معاه لحالة مرضية.. يعني يكتشب، وينام كثير، ويتعصب على أقل حاجة، ويتندي ينتقد مراته بعنف ويتهمها بالبرود والتقصير، ممكن جدا ياخذ قرارات عشوائية ومجنونة في شغله وممتلكاته، وأحيانا يضيع كل حاجة عملها بالتهور والصراف ببذخ على شهواته وجنونه.

راجعني فيلم (show me dance)

ثانيا أسبابها:

- ممكن مايكونش عاش فترة مراهقة وشباب مشبعين، أو ضيع شبابه في الشغل والطموح، أو كان ملتزم خلقيا ودينيا بشكل قوي.
- ممكن يدخل المرحلة دي بسبب فقدان الثقة بنفسه وإحساسه إنه مش مرغوب من اللي حواليه، وبالذات مراته.
- ممكن يكون بسبب تراكم الضغوط النفسيه نتيجة مسؤوليات عائلية كثيرة أو منصب كبير.
- ممكن طبعا بسبب تقصير الزوجة وانشغالها عنه، بالذات لأن الزوجة في المرحلة دي بتقرب من ربنا أكثر وتعمل للآخرة (من عبادات وأعمال خيرية) وطبعا الزوج بيكون لسه بيدور على الدنيا ومتعتها، فيحصل تباعد بينهم وإهمال منها.
- كمان في السن ده بيكون الأولاد استقلوا وخرجوا من معادلة الأسرة، الولد غالبا بيبقى اتحرر وعاش مع أصحابه أو اتجوز، والبنت غالبا بتكون اتخطبت أو اتجوزت، فيبتدي الراجل يحس بالوحدة.

- طبعاً الملل الزوجي والفتور العاطفي والجنسي ليهم دور كبير.
- وارد يدخل المرحلة دي بسبب فقد عزيز (سفر أو موت).
- وارد يكون اتأثر بصديق أو مجموعة أصدقاء بيعملوا نفس التصرفات الشاذة.

ثالثاً علاجها:

١- دور الراجل في العلاج:

مبدئياً لازم يبقى العلاج الأول في إيد الراجل نفسه، لازم يفهم اللي بيحصل جواه وبيتدي يتعامل مع الأزمة وهو فاهم أسبابها وطرق علاجها، لازم يشغل نفسه بفكرة جديدة وطموح جديد وهدف جديد، لازم يملا حياته ويجدد الأمل في بكرة، مهم جدا يهتم بأحلام ولاده ومستقبلهم ويشاركهم حياتهم حتى ولو اتجوزوا، مافيش مانع يصنع بيهم وبأولادهم مجتمع صغير، ويتقابلوا على طول ويسافروا مع بعض ويتجمعوا كل ويك إند، مهم كمان يفهم إن دي أهم مرحلة في عمره لضمان الجنة، ولازم يقرب من ربنا ويدوق متعة جديدة هي متعة وحلاوة الإيمان (يا سلام على ورع أهلي).

٢- دور الزوجة في العلاج:

لو جوزك ركب قطر المراهقة اركبي وراه، يلبس جديد البسي زيه، يعمل عمليات تجميل اعملي زيه، يصاحب بنات بلغي عنه.

كمان لازم تفهمي وتقدري الحالة اللي بيمر بيها، وأرجوكي بلاش انتقاد وتوبيخ واتهام بالمراهقة والجنون والكلام ده كله... افهمي إن

عنده نوع من أنواع المرض النفسي، علشان كده بيسموها أزمة... اغفري له على قد ما تقدرى، اقفى جنبه وقولي له إنك متفهمة حالته، ودعهمي الثقة جواه إنه قدها وهيتخطاها، حسسيه بأهميته ف حياتك و حياة ولاده وخلي ولاده يهتموا بيه ويتابعوه دايبا ومايتخلوش عنه..

ارجعي اهتمي بنفسك وبلاش تقولي (خلاص كبرنا بقى يا سي محمود)

الكلمة دي بتدمره لأنه مش مصدق انه كبر أصلا...

الأحسن من كده إنك بتبدي تصغري في السن انتي كمان.. اشتري لبس وروحي من وراه مركز تجميل وانفخي واشفطي واحقني وشدي، وبهدي الدنيا (اخري بيت أهله في الفلوس) ارجعي طفلة في شكلك وتصرفاتك.. سافري معاه واتجنني معاه واعلمي علاقة معاه في الأسانسير وعلى السلم... عادي جدا... خديه وقربوا الربنا في الملاجى ودور المسنين والجمعيات الخيرية.. استلفي من ابوكي واعزميه على عمرة أو حج في السعودية أو حتى في الفاتيكان، المهم تشتركي معاه في كل حاجة.

ملحوظة:

أنا عارف ان حضرتك وارد تكوني من ده % من الستات اللي ممكن يمرؤا بأزمة منتصف العمر، وعارف انك ممكن تتجنني وتنزلي صورك ع الإنستاجرام والفيسبوك وتقولي لجوزك ولصحباتك (إلحقوا الشباب بيدخلوا يعاكسوني ومش عارفة أعمل إيه)

أنصحك ساعتها تتلمي شويه وتشيلي الصور وتبطلي جنان.. أنا مش ناقصك انتي كمان، كفاية عليا جوزك اللي قارفنا في حياتنا.



المرحلة السابعة من سن ٥٠:٦٠

خلاص التوتر واللخبطة راحت، والنضج اكتمل، هديت الرغبة وابتدى يفكر أكثر في تأمين كل الناس اللي ف حياته من زوجة وأولاد... هيبتي يخاف من الموت ويجيله شوية أمراض زي السكر والضغط والنقرس، علشان كده هيبتي يعمل للأخرة (صدقات - حج - عمرة) كمان هيبتي يلم كل ولاده وأحفاده حواليه.. هيبتي يقرب منك أكثر ويحس بقيمتك في حياته، ولو مش بخيل هياخدك وتسافروا وتلفوا الدنيا وتعيشوا مع بعض مرحلة الهدوء والتأمل الجميل.

علشان كده أنصحك لو كتتي لسه بنوته واتقدم لك راجل فوق الـ ٨٠ اتجوزيه فوراً، علشان تشتغلي ممرضة كام شهر وبعد كده تورثي.



تركيبة دماغه وطريقة تفكيره

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

الراجل قاعد بيتفرج على الماتش ومندمج والمدام قررت تسأله..
حبيبي عايز تتغدى إيه؟ طبعاً الراجل مايردش! بتكررها كذا مرة وهو
مش سامع، فجأة بيتنفض وكأنه لسه مكتشف وجودها، يصرخ فيها..
عايزة إيه؟ بتتخض الولية الغلبانة وتقول بمتتهى الأدب.. يا حبيبي أنا
بقى لي نص ساعة باسألك تتغدى إيه وانت مش معبرني.

ده المشهد اللي بيتكرر مع ستات كثير، ويخليها تزعل وتسال نفسها
هو ليه دايا يتجاهلني.. يعني غلطتي اني باهتم بيه؟ وبعدين هو ليه
اتفزع كده ورد بعصية؟

وإجابة الأسئلة دي كلها هتعرف فيها لما تفهمي ترقية دماغه:

دماغ الراجل من جوة متقسمه لفايلات أو غرف أو صناديق.. زي
ما تحبي تسميها، والصناديق دي كلها مفصولة عن بعضها وبيتحكم
فيها صندوق كبير اسمه الإنجاز وتحقيق الأهداف، ولأن الصناديق
دي كلها مفصولة عن بعضها زي ما قلنا يبقى صعب جداً الراجل
يتنقل من صندوق للتاني بسهولة، واللي حصل مع صديقتنا في القصة
اللي فاتت إن جوزها كان عايش جوة صندوق الماتش بكل كيانه وهي
قررت انها تفتح الصندوق ده وتحاول تخرجه منه لصندوق تاني اسمه
صندوق الأكل (عايز تتغدى إيه؟) علشان كده الراجل اتعصب عليها
لأنه ماكانش سامعها أصلاً، وعموما الموضوع ده محتاج وقت مايقلس
عن ٣٠ ثانية علشان بيتدي يخرج ويركز معاها، وحضرتك ممكن تقيسي
على كده وتفهمي صناديق الراجل اللي ممكن تكون (بلاي ستيشن أو
ماتش أو برنامج أو مسلسل).

وعلى فكرة، كل ما كان الصندوق بيعمل إثارة أكثر زي الماتش
والمصارعة مثلاً، هتلاقيه مندمج جواه أكثر.

كمان الشغل والوظيفة من ضمن أهم صناديق الراجل، لأنها مرتبطة بالإنجاز وتحقيق الأهداف زي ما قلنا، علشان كده لو جوزك في الشغل وحاولتي تكلميه هتلاقيه عصبي جدا وردوده كلها كالاتي (أفندم - نعم - عايزة إيه - ما انتي عارفة اني في الزفت الشغل - حاضر هاجيب بامبرز بس غوري دلوقتي).

صندوق اللاشيء

هو أخطر صندوق في دماغ الراجل، ودا الصندوق اللي بيدخله علشان يهرب من كل الدنيا ويشحن طاقته من جديد.

يعني مثلا تلاقيه نايمع الشيزلونج في البلاج وباصص للسما وسرحان في الملكوت كأنه بيحل شفرة الكون، ولو كلمتيه يرد بعد نص ساعة كأنه كان في حطة تانية خالص.

نفس المشهد لو قاعد في الليقينج قدام التليفزيون، وماسك الريموت وعمال يقلب من قناة لقناة بدون هدف.

وبرضو لما يقعد يصطاد سمك تلاقيه سرحان وخارج الوعي تماما.

كل دي وغيرها اسمها صندوق اللاشيء، والراجل لما يدخل صندوق اللاشيء بيبقى هدفه يشحن طاقته النفسية أو يهرب من مشكلة مواجهاه أو يدور لها على حل، وهتلا حظيها قوي لما يرجع من الشغل ويقفل عليه الكهف بتاعه زي ما بيقول (جون جراي) بسبب خناقه مع مديره في الشغل... عادي يعني.. في الحالة دي حضرتك بتسألني نفسك.. هو ماله؟!!

زعلان من إيه؟!!

وبالتالي بتدخلني وراه الأوضة وهاتك يا أسئلة، مالك بس؟ إيه اللي مضايقتك. طب احكي لي!

طبعا هو ساعتها بيبقى مش طايقك ونفسه يجدفك من البلكونة، بس للأسف انتو ساكنين في دور أرضي، يا ستي غوري.. أبوس إيديكي سييبيني لو احدي، أقسم بالله مش متعمد اتجاهلك ولا بافكر في واحدة غيرك، أنا بس محتاج أشحن وأوصل لقرار وحل لمشكلتي وبعد كده هاخرج وابقى زي الفل، وصدقيني عمري ما احكي لك انتي بالذات لو انتططي قدامي.

- طب السؤال، إيه الغلط اللي عملتية علشان يتعصب كده؟

- الغلط إنك دخلتي صندوق اللاشيء، يعني هو كان فاضي قبل دخولك ودلوقتي بقى مليان باقتحامك، والمشكلة بقى لو انتي تخينة شوية.. الصندوق هينفجر.. يبقى كان الصح إنك ماتدخليش الصندوق من أصله ولا تقتحمي سكوته وعزلته.. وكان الأفضل إنك تسألني مرة واحدة (مالك يا حبيبي)... ماردمش أو قال لك (ما فيش) يبقى تخلعي من سكات وتطبقي قانون الجذب لأرشميدس (خفي تعومي)... ويا ريت كمان تحطي جنبه فنجان القهوة أو كأس العصير أو طبق المحشي بمنتهى الهدوء، وتقولي له بمنتهى الأدب (أنا متلقحة في الأوضة اللي جنبك لو عوزتني ابعت لي فويس نوت) وأقسم بالله ما هيعبرك.

طبعا اللي باقولهولك ده بيان من وجهة نظرك مسرحية كوميدية، لأنه مختلف تماما عن دماغك وطريقة تفكيرك..

وده لأن نخك من جوة عبارة عن حزمة أسلاك متوصلة ببعضها

وبيربطها كابل كبير اسمه العاطفة، وده اللي بيخلي كل تصرفاتك تحكمها المشاعر، والأسلاك دي كلها متداخلة مع بعضها بشكل عجيب..
كمان حضرتك تقدر تفكري بفصين دماغك (الشال واليمين) في وقت واحد، وبالتالي تقدري تخرجي من موضوع لموضوع ثاني بمنتهى السهولة، ويبقى جوزك قاعد بيسمعك وهو منبهر وعمال يضرب كف على كف...

(شفت يا حبيبي نيئين صاحبتني غيرت لون شعرها ولون بشرتها ولون شقتها.. دا حتى البواب بتاعها طلع حرامي، وأختها هتتجوز بكرة، طب ماقتليش تحب تتغدى إيه بكرة؟).

كمان ترابط الأسلاك جوة دماغك بيخليكي تقدري تعملي مليون حاجة ف نفس الوقت وبنفس المهارة وبدون أي توتر أو إجهاد.. يعني مثلا ممكن تبقي واقفة في المطبخ بتطبخي وبتقلبي الأكل على النار، وف نفس الوقت شايلة طفلك بترضعيه، وإيدك الثانية فيها الريموت بتحويلي ع المسلسل التركي وبتعيطي علشان مهند بيخون عمه، وف نفس الوقت مايلة بدماغك علشان تمسكي الموبايل على كتفك وبتكلمي أمك وتحكي معاها وتضحكي، وف نفس ذات الوقت بتمسحي برجلك المية اللي وقعت على الأرض.. يقوم جوزك يدخل عليك المطبخ يحضنك فتنفعا علي معاه بمنتهى الحب... يااااه والمصحف جبروت، دا إنتو بلاوي أقسم بالله.



ذاكرة التواريخ

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

زمان قبل ما أبتدي أستقبل مشاكل ع الإنبوكس، ماكتش عارف الفرق الرهيب بين ذاكرة التواريخ عند حضرتك وعند الأستاذ.

يعني مثلا: أول رسالة جات لي ولفتت نظري للموضوع ده، كانت من زوجة زعلانة من جوزها، ويوميها افتكرتها مجنونة:

أستاذ إيهاب، أنا خلاص اتخنقت ومش هاقدر اكمل مع البني آدم ده.. تخيل اني اتعرفت عليه يوم السبت ٣ / ١٠ / ٢٠٠٥ وحيننا بعض يوم الاتنين ٢٥ / ٣ / ٢٠٠٦ يعني بعد ست شهور وتمن تيام بالظبط، واتقدم لي في آخر فبراير وقعدنا مخطوبين ست شهور كمان، اتخانقنا كذا مرة، آخرها كان شهر ٧ في نفس السنة... واتجوزنا.....

أنا طبعا يوميهما عملت لها بلوك وماقدرتش اكمل الرسالة للآخر، وقلت دي أكيد شغالة في الجهاز المركزي للتعبئة والإحصاء، وإن ده مآثر على شخصيتها، لكن مع الوقت اكتشفت ان كل البنات كده... عندهم ما شاء الله ذاكرة تواريخ رهيبية، وده طبعا عكس الرجل اللي مش ممكن يفتكر حتى تاريخ ميلاده، بدليل إنك كل سنة بتعملي له مفاجأة ف عيد ميلاده، ويسألك بمنتهى البلاهة يا أروبة افتكرتي ازاى؟ وانتي طبعا بتتصدمي لما تلاقيه ناسي، بس للأسف هو فعلا ما عندوش ذاكرة تواريخ... علشان كده هتلاقيه يلصق ورق على الحيطه يفكره بأي تاريخ مهم، ولو قلتي له عندنا مشوار يوم الجمعة الجاية، يقول لك فكريني قبلها بيوم، وتصحي الصبح يوميهما تقولي له يلا اجهز... تلاقيه يسألك باستغراب (ليه هو احنا عندنا حاجة النهارده؟) علشان كده فكريه قبلها بدقايق وريجي دماغك.

وأكثر حاجة مايفتكرهاش ومايحبش يفتكرها، ويتحصل بسببها معظم الخلافات، هي الأعياد والمناسبات، وبالذات الأعياد المقدسة

الخاصة بحضرتك واللي اتكلمنا عنها قبل كده... عيد أول مرة شفتيه
فيها، عيد يوم ما اتقدم لك، عيد يوم ما خطبك، عيد كتب كتابكم،
عيد جوازكم، عيد ميلادك، عيد...

كفاية ارحميني، والمصحف كل دي بدع... بس ماعلشي ساعيني
أنا فعلا ماعنديش ذاكرة تواريخ.

ده الانفجار اللي بيحصل عند الراجل واللي يخليكي كل مناسبة
تسألني نفسك:

- يعني أسببه ينسى كل الأعياد دي واعيش من غير هدايا وفسح
ومفاجآت؟

- لأ طبعا... بس أرجوكي تعاملي على إن دي طبيعته ومش متعمد
يتجاهلك ولا ينساكي.

- طب ما هو كان يفتكر الحاجات دي أيام الخطوبة وقبلها، وكان
بيجيب لي هدايا كمان! هو ليه بس اتغير؟

- صدقيني هو ماتغيرش، هو استعاد طبيعته... زمان أيام الخطوبة
كان بيمثل طبيعة تانية علشان يرضيكي، أو بمعنى أصح يصطادك...
دلوقتي خلاص حضرتك ولا مؤاخذه يعني متلقحة جوة، يعني هتجيبني
لنفسك هدية على حسابك أو خنصري من مصروف البيت واشترىها
بدل ما انتي مصدعاني معاكي.

- على فكرة انت رخم والكتاب بتاعك ده مالوش أي لازمة.

- خلاص ماتزعلش هاقول لك على حل كويس:

أولا لخصي الأعياد دي شوية.. يعني كفاية قوي عيد جوازكم (مع إنه نفسه ينسى اليوم ده) وعيد ميلادك.

ثانيا خلي حد يفكره بيهم، زي ما قلنا قبل كده..

وماتاخذيش على كرامتك، لأنك دلوقتي اتأكدتي إن المشكلة ف ذاكرته مش في جبه ليكي، والمهم إنه يكع ويحيب هدية.. ولا إيه؟





الحواس

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



١ - الرؤية والبصر :

الراجل يشوف الصورة على بعضها، يعني بشكل جماعي، بس صعب جدا يركز في تفاصيلها، يعني مثلا لو دخل معاكى مطعم.. هيقول الله المطعم ده جميل، لكن حضرتك تقولي مكان هایل بس البرواز ده مش مطبوط، الترابيزة مائلة، المفرش معوج، وده يفسر لما تبقي مجددة حاجة ف ملاحك (لينسز مثلا أو لون شعرك) وتلاقيه مش واخد باله فتتضايقي وتعتبريه مش مركز معاكى، لكن للأسف دي طبيعته.

كمان لو ناسي مفاتيح عربيته يدخل يقلب الأوضة عليها ومايلاقيهاش، لكن حضرتك بمتتهى البساطة تقولي له أنا فاكرة اني شفتها على الترابيزة الصغيرة في أوضة الولاد جنب الفايزة البيضاء، وده لأن ذاكرتك بتخزن كل شتتوفة، لكن ذاكرته بتخزن الصورة على بعضها.

ده كمان بيفسر قدرته الرهيبه على ركن العربية، لأنه يشوف الشارع على بعضه وكمان يقدر يشوف مسافات أطول منك بدون أي تعب.

كمان خدي بالك إن الراجل مايقدرش يشوف غير الألوان الأساسية (أحمر - إسود - أزرق - أخضر) لكن حضرتك طبعا تقدرني تحسي باللون ودرجاتها كلها وتفرقي بينهم، علشان كده لما بتطعلي مهندسة ديكور بتعذبي أي نقاش (غمق اللون ده شوية - لأفتحه شوية - طب خليه يميل على بينك)

٢ - السمع :

الراجل متبرمج على الأصوات اللي تناسب شخصيته، يعني مثلا

لو ناييم في عز النوم ممكن يصحى على صوت أكرة الباب بتفتح، لأنه كان في الأصل محارب وصياد ولما ينام لازم يركز مع صوت مهاجمة العدو أو سقوط الفريسة.

والي يأكد لك ده إنه لا يمكن يصحى على صوت الطفل الرضيع اللي ناييم جنبه لأنها مش مسؤوليته ومش متبرمج عليها، لكن حضرتك فوراً تقومي من أحلى نومة وترضعيه (أقصد الطفل طبعاً) وده لأنك متبرمجة على كده نفسياً وجسدياً.

كمان الراجل بيركز مع صوت واحد بس ويسمعه بانتباه جداً، علشان كده يقدر يفرق بين أي صوتين مختلفين وبالتالي سهل جداً يطلع عازف وملحن، لكن انتي رغم حبك الرهيب للأغاني والموسيقى مش بسهولة تطلعي ملحنة، بس الجميل فيكي إنك تتأقلمي مع أي صوت لما تحبيه، وبالتالي وارد تنامي جنب جوزك وهو بيشخر، لكن هو مستحيل... هيطلقك فوراً.

٣ - الشم:

الشم تاني حاسة بتثير الراجل بعد البصر، بس محتاج يقرب منك علشان يشم ريحة برفانك، أو تكوني حاطة برفان نفاذ، أما ريحة العرق والبصل والطبخ والسجائر فتقلل الرغبة جواه وتخليه يكرهك، على عكس حضرتك اللي ممكن أحياناً تحبي ريحة عرقه أو سجائره وتميزهم وتتأقلمي عليهم، بس لما يزيدو طبعاً بيجيلك انهيار عصبي (ياريت كل زوج يطلع محترم ويستحمى ويغسل سنانه على الأقل قبل العلاقة).

كمان حضرتك بتختلفي عنه في تمييزك للروائح، يعني لو جوزك

حضن بنت حاطة برفان هتقفشيه أول ما يدخل على طول، وتقولي له
دي ريحة برفان نيئين اللي ساكنة في الشارع اللي ورانا.

٤ - التذوق:

هو إلى حد كبير زي حضرتك في التذوق بس هو يميز أكثر الحمضيات
ويجب طعم الموالح والكحوليات، ويقدر يفرق بين طبيخك وطبيخ
الست الوالدة، وبالتالي دايا بينكد عليك، كمان عنده قدرة رهيبية على
اكتشاف منسوب الملح ف أي أكلة، وبالتالي دايا هيعترض على النسبة
دي مهها كانت.

أما حضرتك تقدر تميزي جدا طعم الحلويات، وبالذات الشيكولاتة،
وحافظة كل أنواعها ومصانع إنتاجها وأماكن بيعها.

٥ - اللمس:

هتلاقي عنده حاسة اللمس أقل منك بكثير، وده طبعا بسبب جلده
الخشن السميك، (سمك جلده وخشونته مابتخليش التجاعيد والسن
بيان عليه، عكس الست اللي جلدها رقيق وسهل يكرمش أو يتعب)
كمان نادر لما تلاقي خلايا إحساس على جلده، وبالتالي صعب إثارته
عن طريق اللمس أو الحضن، وده برضو عكس حضرتك اللي خلايا
الإحساس متوزعة على كل جسمك وجلدك، وبالتالي سهل إثارتك
من أي مكان، وبالذات الإيد والرقبة والحضن عموما.

٦ - الحاسة السادسة:

الحاسة السادسة دي اللي هي الاستنتاج والتوقع، ودي مش بتعتمد
على باقي الحواس الخمسة التقليدية ومفصلة عنهم تماما، لكن بتعتمد
أكثر على الخيال...

وطبعا لأن الراجل كائن تقليدي بنسبة كبيرة هتلاقي الحاسة دي شبه منعدمة عنده، على عكس حضرتك تماما، يعني انتي مثلا أول ما يدخل جوزك من برة تبصي في عينيه وتراقبي مشيته وحركات إيدته، فورا تستنتجي هو كان بيخونك إمتى ومع مين، ومهما قعد يألف في قصص وروايات انتي بتبقي واقفة وعارفة القصة الحقيقية.

٧ - القدرات الخاصة:

علشان الراجل بيعتمد على استخدام الفص الأيسر في مخه، هتلاقيه عنده قدرة رهيبية على تجسيد الأمور لأبعاد ثلاثية وبالذات الصور والمناظر، يقدر يتخيلها ويرسمها بسهولة بالأبعاد الثلاثية، علشان كده سهل يشتغل في الملاحة وتحديد الاتجاهات، كمان سهل يشتغل في السواقة وفي المسائل الرياضية وفي العلوم وفي الهندسة.

وده طبعا عكس حضرتك، لأنك بتفكري بالفصين في وقت واحد، وبالتالي تركيزك أقل، وكبيرك تجسمي أي حاجة لبعدين فقط، علشان كده انتي تبقي مدرسة شاطرة وصبورة، لكن في السواقة وتحديد الأبعاد عملي مليون حادثة في اليوم، والطبيعي عندنا كرجالة لما نلاقي واحدة ست سايقة عربية نهرب لأي شارع تاني.



الهرمونات والناقلات العصبية

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

الكلام دا بقى علمي وكبير جدا... بس لازم تفهميه كويس.
الهرمونات والناقلات العصبية من أهم الحاجات اللي تقدرني من
خلالها تفسري تصرفات كتير من الرجالة:

أولا: الدوبامين (كمية الإثارة)

وده يعتبر مادة زي الهرمون بس بيسموها موصل عصبي، بيفرز
في مخ البني آدم عموما بس عند الرجل بيفرز بكمية أكبر وأهميته
عنده كبيرة جدا، يعني نقدر نقول إنه هرمون السعادة بالنسبة له (زي
السيروتونين عندك).

المادة دي بقى بتخليه في حالة إثارة واستمتاع دائمة، علشان كده
بيتمنى إن جسمه يفرزها ٢٤ ساعة، والغريبة إن الرجل بالفطرة وصل
لتصرفات لو عملها بيفرز في مخه بكمية كبيرة زي (سباق السيارات -
سباق الخيول - البلاي ستيشن - الرهانات - الفرجة ع الماتش - المبارزة -
الفرجة على المصارعة - وكل أنواع التحدي - المضاربة في البورصة).

وأكيد حضرتك ملاحظت معايا إن التصرفات دي كلها ذكورية،
ونادر لما تلاقي ست بتحبها أو بتمارسها، وده لأنها مش محتاجة ف
جسمها دوبامين باستمرار زي الباشا، حتى في السينما لاحظني كده
كام خناقة حصلت بينه وبينك علشان اختيار الفيلم؟

هو عايز فيلم أكشن لبروس لي (قديم قوي) وانتي عاوزة فيلم
رومانسي لكاظم الساهر (مالوش أفلام).

حتى في العلاقة الحميمة بعد الجواز تلاقيه بيميل للتصرفات الغريبة..
عايز بوسة في المطبخ - حضن في الأسانسير - سيكو سيكو على الأرض -

شيكو شيكو في البلكونة.. أو أي حاجة مجنونة تثيره وتحفزه وخلص
(قلنا الكلام ده ف باب الغريزة).

كمان هو بيعحب النوم لأن الدوبامين بيفرز كثير جدا أثناء نومه (قلنا
الكلام ده ف باب النوم).

ثانيا: التستوستيرون هرمون الذكورة:

هو هرمون الذكوره والرغبة والتقدير، وده بيفرز في الدم (عندك
وعنده) بس هو أكبر بـ ٣٠٪ وده المسؤول عن تشكيل الصفات الذكورية
(صوت عريض - خشونة جلد - شعر الجسم - العضلات - الرغبة
الجنسية - الاستمتاع بتحقيق الانتصارات - الرغبة ف عدم الكلام -
الرغبة في التقدير - الرغبة في النوم)..

والهرمون ده بيزيد في الجسم بأكلات الزنك عموما والرياضة
العنيفة والشغل البدني الكثير والمجهود (علشان كده نلاقى الحرفيين
والفواعلية بيعحبوا الجنس أكثر من الناس اللي بتشتغل بدماعها زي
الدكاترة والمهندسين)، كمان معروف ان لعبية كمال الأجسام بياخدوا
الهرمون ده ف صورة كبسولات علشان عضلاتهم تكبر بسرعة وتبان،
والعكس بيحصل في فترة المعاش والشيخوخة عند الراجل لما بتقل في
جسمه بسبب انه بيقل من غير مجهود وشغل، فييحبط وتقل الرغبة
الجنسية عنده..

لكن لو ربنا كان فاتحها عليه وعنده صحة وفلوس وبيشتغل، حتى
لو بعد السبعين هتلاقه زي القرد وعايز يتجوز عليكي، وفي الحالة دي
خليه نايم واسحبي (بسر نجة) الهرمون ده من جسمه، أو اديله حقنة
سم فيران واخلصي.

إنتي كمان عندك الهرمون ده وممكن يزيد ويخليكي مسترجلة (شكلاً
وموضوعاً) وبالتالي بتزيد الإثارة عندك، وده مش وحش، والرجالة
دلوقتي بتدورع الستات المسترجلة عشان تبقى مثيرة وف نفس الوقت
تبقى جدعة وتصرف عليه..

وده طبعا من أهم أسباب لجوء ٩٩,٩% من الستات لإجراء عملية
التحويل من سها لعبد العال.





الفصل الخامس دليل اختيار شريك الحياة

- ازاي تختارى العريس المناسب
- جواز الصالونات
- تحت فترة الخطوبة

للمزيد من الروايات والكتب الحصرية
انضموا لجرؤب ساحر الكتب



إزاي تختاري الزوج المناسب؟

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

أيوه بقى.. هو ده الموضوع، من أول الكتاب وأنا مصدع دماغك
بـ سي السيد وصفاته وبوهراته، وانتي عماله تقولي لي إنجز وادخل في
الموضوع.. إزاي اصطاده؟

حاضر يا ستي.. يلا بينا.

زي ما النيشان على الهدف وارد يصيب ووارد يجيب.. اختيارك
للاجل المناسب برضو وارد يصيب ووارد يجيب، ويمكن يصيب من
أول مرة أو ياخذ وقت علشان يصيب، وكله حسب تركيزك (من غير
تجاهل للقسمه والنصيب طبعا).

يبقى علشان خاطرني لازم تركزي قوي في الحته الي جاية دي:

لو أخطأت الهدف أول أو تاني أو عاشر مرة.. يبقى لازم هترجعي
لورا شوية وتشوفي نيشانك أصاب الضحية ف مكان غلط ولا ماجاش
فيها أصلا؟ لو أصابه يبقى الحمد لله العمليه تمت بنجاح، لكن لو
ما أصابوش يبقى لازم تروحي يمين شوية أو شمال شوية أو ترجعي
تعديلي وضعك (تغيري من رؤيتك) وتقفي من جديد في المكان المناسب
للتنشين.

وعمليا مخك هيعمل التعديل ده بشكل لا إرادي، بشرط تكوني
مركزة ومش مهزوزة أو خائفة من التجربة الي فاتت الي..

خرجتي منها بكوارث (النهايات السليمة تؤدي إلى بدايات جديدة
سليمة)، وثقي إنك مع التجربة وبالممارسة هتختاري صح، علشان كده
ما عنديش مانع تتخطبي ١٠٠ مرة لحد ما تتعلمي تختاري صح وتلاقي
الشخص المناسب.

طب لو كل مرة تختاري نفس العيوب؟

يبقى وارد تكوني انتي اللي بتجذبيها ليكي (قانون الجذب) ولازم تبطلي تفكري فيها، وافهمي إن المشكلة عندك انتي ولازم تعالجها بالتجاهل واستعادة ثقتك بنفسك، وأهم من كده حسن الظن بالله.

ولازم في الأول تثقي إن مافيش إنسان كامل، وكل إنسان هتلاقي عنده عيب أو مجموعة من العيوب، وساعتها لازم تتأكدي الأول إنك قادرة على تقبل العيوب دي والتعايش معاها (لو مش عيوب خطيرة)، من منطلق إنها عيوب مناسبة لشخصيتك.

كمان لازم تثقي إن اللي انتي شايفاها عيوب في الراجل ممكن تبقى مميزات لواحدة غيرك، علشان كده بلاش تسميها عيوب لكن الأفضل تسميها صفات، وقرارك هنا هيتوقف على إنك تتأكدي إن الصفات دي مناسبة ليكي أو مش مناسبة، وده طبعا يتطلب منك تكوني نضجتي وقدرتي تفكري بعقلك، مش تندفعي بعواطفك ناحية بني آدم مليون عيوب جسيمة ومش مناسبة ليكي تحت مبرر انك بتحبيه وهتقدري تغيرها.. صدقيني مش هيحصل.

يبقى كده وصلنا لأن أهم نقطة في الاختيار هي خروجك من مرحلة اللانضج لمرحلة النضج، ساعتها هتعرفي انتي عايزة إيه من الجواز ومين هو الشريك المناسب ليكي.

وعلشان اسهّل عليك الموضوع أكثر هاقول لك كام سؤال أسألهم لنفسك وانتي تعرفي هل انتي نضجتي وابتديتي تحددتي إيه هي صفات شريك حياتك المناسب اللي انتي محتاجاها فعلا ولا لسه شوية؟

١ - إيه هدفك من الجواز؟

لو عرفتي عايزة تتجوزي ليه هتعرفي مين هو الزوج المناسب، يعني لو عايزة تتجوزي مثلا علشان تعي نفسك وتدخلي الجنة يبقى خلاص جوزك هو الراجل المتدين، ولو عايزة تشتغلي في العمل التطوعي بعد الجواز يبقى لازم تختاري واحد متقبل فكرة عمل المرأة بشكل خاص والعمل التطوعي بشكل عام، وقيسي على كده الهدف الشخصي والمناسب للهدف.

٢ - إنتي مين؟

لو عرفتي انتي مين بجد من غير ما تضحكي على نفسك أو تصدقي الصورة اللي الناس تعرفها عنك (والي مش شرط تكون حقيقية) ساعتها بس هتعرفي إيه مواصفات شريك حياتك اللي المفروض تركزي عليها. يعني مثلا لو حضرتك راسمة قدام الناس انك متدينة، وانتي من جواكي مجنونة وبتحلمي بالحريه الكامله! ساعتها ماينفعش تتجوزي راجل متدين زياده، والأفضل تختاري راجل وسط عادي، لأنك لو اتجوزتي راجل متدين جدا بناء على الصورة الوهميه اللي رسمها لنفسه هيحصل صدام دايم بينكم (نفس الكلام بالنسبة للراجل لما بيضحك على نفسه ويختار بنت متدينة وهو من جواه بيحلم بواحدة عكسها، وبالتالي ينحرف بعد الجواز ويصاحب عليها بنات شمال).

٣ - إيه عيوبك؟

لما هتعرفي عيوبك وتعرفي بيها بصدق لنفسك هتحاولي تغيريها في الأول، ولو فشلتي هتبقي مضطرة تعترف بيها لشريكك، أو من البداية تختاري اللي يقدر يتقبلها ويتعايش معاها.

٤ - إيه مميزاتك؟

لما تعرفي مميزاتك صح هتختاري الشريك اللي شايفها مميزات فعلا. يعني انتي مثلا لو ناجحة في شغلك تبقى دي ميزة، بس وارد ان الراجل يشوفها عيب فيكي لأنه عايز ست بيت، يبقى بديهي الراجل ده ماينفعكيش، علشان كده لما تعرفي مميزاتك هتختاري اللي يفهمها ويقدرها ويزودها كمان.

٥ - إيه اللي بييسعدك؟

لازم تعرفي إيه اللي بييسعدك علشان تختاري حد يقدر يحقق لك السعادة دي، يعني مثلا حضرتك مادية ونفسك تعيشي ف فيلا؟ أو رومانسية وعايزة اللي يتغزل فيكي ليل نهار، أو مازوخية وعايزة اللي يديكي على دماغك، يبقى لازم تحدد مصادر سعادتك الحقيقية لأنك لو ماتعرفيش إيه الحاجات اللي بتسعدك أو فهمتها غلط هتختاري حد غلط.

٦ - إيه الصفة الأساسية في شريك حياتك؟

جوة كل بنت صفة أساسية بتحلم بيها في شريك حياتها، والصفة دي لا يمكن تتخلي عنها، كمان بتبقى جواها مجموعة صفات تانية مهمة بس ثانوية (ينفع تستغنى عنها أو تتجاهلها في الشريك)، علشان كده بانصحك تلمسكي جدا بالصفة الأساسية دي علشان تحسي طول عمرك بالرضا في العلاقة...

بس السؤال المهم والخطير جدا، ازاي تعرفي إن الصفة دي أساسية ولا ثانوية جواكي؟

هاقول لك:

حضرتك مثلاً بتحلمي براجل دمه خفيف، بس مش عارفة دي
صفة أساسية ولا ثانوية جواكي.

يبقى هتخيلي إن جاي لك عريس عنده كل المميزات التقليدية
(أدب - أخلاق - دين - نجاح - وسامة... إلخ) لكن دمه ثقيل، وتسألني
نفسك هل هتقدري تتجوزيه؟

لو الإجابة لأ.. تبقى دي الصفة الأساسية عندك وإوعي تتخلي
عنها.. لكن لو قلتني ماشي مافيش مشكلة علشان خاطر باقي مميزاته،
تبقى دي مش الصفة الأساسية وعادي إنك تتجاوزي عنها، وبرضو
قيسي على كده.

سي السيد فارس الأحلام

لم تكن تدري أن إعصاراً سوف يجتاح ويريدها هذا الصباح...

اجتازت الباب الزجاجي بصحبة الزميلة التي تطوعت لتعرفها
بالمكان، ثم أشارت إليها وهي تعود من حيث جاءت قائلة:
- ده مكتبك.. وان شاء الله تنبسطي معانا هنا في القسم.

قالتها وهي تشيعها بابتسامة مرحبة، فردت إليها سلمى الابتسامة
ملوحة بكفها... كانت سلمى على بعد بضع خطوات من مكتبها الجديد
عندما التقت عيناها بعينه... تسمرت في مكانها وهي تستعيد رائحة
الرجل الذي داهمها مراراً في أحلامها، فصار شبحاً تنفرسه في كل
الوجوه، انقطعت أنفاسها وهي تواصل السير المرتبك صوب مكتبها

حتى وصلت إلى كرسيها فألقت بجسدها عليه... غابت عن الوعي وهي تستعيد ملامحه التي رأتها لتوها وتطابقها بصورة الحلم المستقر في قلبها منذ الطفولة، مضت بضع ثوان قبل أن تملكها الرغبة في التأكد من حقيقة ما رأت.. رفعت رأسها لتراقبه في حياء ثم أطرقت وقد اتسعت عيناها أكثر من فرط السعادة، نعم.. هو فارس أحلامها وأبداً لن تحطئه.. هو بقوامه الرجولي الخشن، هو بطلته المشرقة ونظراته الثاقبة العميقة، هو بابتسامته الحنون التي أرسلها رداً على ابتسامتها، مرات ومرات تحدثنا معاً في عالمها الخاص.. مرات ومرات ناشدته متوسلة أن يمسي واقعا في عالمها الرتيب.. وها هو اليوم يستجيب لنداء قلبها ويغدو واقعا أجمل من الخيال.

مضت الدقائق تسابق دقات قلبها وتسبقها، لكن ما إن وقعت عيناها عليه وهي تسترق النظر حتى خارت قواها وغابت مرة أخرى في خدر ممتع.. لم تفق منه إلا على صوته الذي ظنته لإحدى زميلاتنا! - أهلا ببيبيكي.

لم تكن تشعر باقترابه الهادئ، ولم تكن تتوقع أن يباغتها هكذا، وهي ما زالت تلملم أشلاءها المبعثرة.. تسارعت نبضات قلبها بجنون عندما رفعت رأسها لتجده منتصباً أمامها في زهو وثقة.. انحبست أنفاسها لثوان ثم سرعان ما استعادت رباطة جأشها، فردت عليه بابتسامة تشي بعودة سندريلا إلى الحياة:

- أهلا بحضرتك.

قالتها بحروف متقطعة، ثم صمتت برهة وواصلت:

- اسمي سلمى.. مسؤولة الائتمانات الجديدة... وحضرتك؟

- وأنا دودي.

قالها وهو يتمايل في رقة، ثم واصل:

- دودي ابن مدام سامية مديرة البنك.

- دودي! اسمك كده؟ دودي؟!!

قالتها بتعجب، بعد أن توارت ابتسامتها وحل محلها استياء محبط.

كان يمكنها أن تتجاوز عن صوته الأنثوي ووقفته المرنة المقززة..

لكن كيف لها أن تتجاوز عن اسمه ولقبه الذي اختاره لنفسه..

يعني دودي وكيان ابن مديرة البنك؟! يع.. إيه القرف ده!

- على فكرة أنا عازمك على فراياي في كوستا النهارده بعد الشغل،

بس انتي اللي هتدفعي هه هه.

قالها بصوته الأنثوي المصبوغ بالمرح الطفولي المقيت، ليثير في أمعائها

الرغبة في القيء، ويهدم بداخلها كل القصور التي شيدها في لحظات،

قامت من كرسيها على عجلة وهي تدفعه ليفسح لها الطريق.

- أووف.. هو البنك ده مافيهوش تكييف؟!!

قالتها وهي تنطلق دون أن تعرف وجهتها.. ثم واصلت في يأس:

- مش ممكن بجد حاجة تخنق.. ده بنك إيه المقرف ده؟!!

مضت سلمى في حسرة بينما كان يدور بداخلها حوار أكثر يأسًا..

كيف سيتسنى لها البقاء في هذا العمل مع وجود كائن لزوج كهذا؟

يا له من حلم رائع أمسى واقعًا مريًا.

.....

ده يا ستي وهم فارس الأحلام

يا ترى سلمى رفضت كام شاب اتقدم لها علشان كانت بتحلم بصفات شكلية زي دودي، بدون ما تفكر تقعد مع شاب مختلف وتشوفه من جوة؟ أكيد كتير.

عايشة في انتظاره من يوم ما اتولدت، حلم اتخلق جواكي واتشكلت صفاته نتيجة ظروف معينة، ومع الزمن ابتديتي تطابقي الصورة اللي ف خيالك بالواقع (الناس اللي بيتقدموا لك) والنتيجة ما فيش حد عاجبك! علشان طبيعي ما فيش واقع جاهز ممكن يطابق حلم مصنوع بعناية زي الحلم اللي في دماغك، وخصوصا انك أكيد رفعتي سقف الحلم زيادة شويتين.

يمكن ما تكونشي القصة دي حصلت لك، ويمكن ماتحصلكيش أصلا، بس الحقيقة اللي هتفضل مؤلمة إن فارس الأحلام ده وهم بيدمر اختيارات بنات كتير، وخصوصا البنات الرومانسية بزيادة.

طب يعني إيه فارس الأحلام أصلا؟

أولا: إزاي اتكونت صورته جوة دماغك؟

• حلم اتخزن في دماغك.

وارد انه يشبه حد كنتي معجبة بيه من زمان.. مدرس الفرنساوي مثلا أو واحد من قاريكم أو جيرانكم، اتخزن إعجابه في دماغك وبعد كده نسيته، ولما شفتي أخينا ده ابتديتي تحسي بحاجة غريبة جواكي ومشاعر ماتعرفيش مصدرها وقلتي أيوه هو ده.

• فارس أحلام بالعدوى.

ليكي مثلاً صديقة دائماً تحكي لك عن الرجل الطويل الوسيم (اللي بتجبه هي) وتحكي لك هو قد إيه راجل جدع ومحترم، فابتديتي تخزني جوة دماغك صورة تشبه اللي بتتحكي لك عنه وتحلمي بالرجل الطويل الوسيم! رغم انه مش فارس أحلامك انتي.

• فارس أحلام الميديا.

المسلسلات اللي بتشوف فيها (وبالذات التركي والهندي) بتوّد جوة دماغك صورة تشبه أبطال المسلسلات دي، يعني نص بنات مصر كانت بتحلّم بواحد شكل مهند مثلاً رغم انه واطي وخان عمه.

• فارس أحلام بالموقف.

وارد يقابلك راجل يعمل موقف محترم وإنساني يحرك قلبك، أو يعمل حركة جدعنة تثيرك، فتبتدي إجباري تطابقه بصورة فارس أحلامك، وتخرجي بنتيجة إجبارية مفادها أيوه هو ده.

• فارس أحلام محترف.

نفس الموضوع لو قابلك شاب وسيم جداً وصايع، قدر يخطفك، وعمل موقف مناسب لشخصيتك سواء بالحنية أو سواء بالعكس - التجاهل - والطريقة دي عجبتك.. هتبتدي برضو تجبري عقلك إنه يصدق ان ده فتى أحلامك (بتشتغلي نفسك).

اللي بيحصل في الحالات الخمسة إنه هرمون التوتر (أدرينالين) يفرز جوة جسمك فترتبيكي وقلبك يدق ويفرز بعده على طول هرمون السعادة

(سير وتونين) اللي بيحسك بالنشوة والمتعة، فتخيلي إن ده خلاااااص
الحب اللي كنتي بتحلمي بيه، وإفراز الهرمونات دي بتعمي عينيك
وتملا مخك اللي بيبقى ساعتها غير قادر انه يرفضه أو يوزيكي عيوبه.

بس للأسف اللي بيحصل بعدها بنسبة كبيرة هو اللي حصل لصاحبتنا
سلمى في البنك.. يعني تلاقي صورة رائعة وتشبه فارس أحلامك بس
وارد يطلع غاية في السطحية ومليان عيوب لا تحتمل، ساعتها ممكن
تطلعي صادقة مع نفسك وتخلعي منه، ووارد تضحكي على نفسك
فتكملي العلاقة بسبب إحساسك الوهمي إن ده هو فارس الأحلام
وحب العمر وتكملي معاه، والنتيجة طلاق تاني يوم جواز.

علشان كده أرجووووكي خلي بالك من المصيدة دي - مصيدة فارس
الأحلام - بنات كتير بتقع فيها لما تتجاهل حب الصفات وتكتفي بحب
الشكل والمواقف السريعة... صديقي فارس الأحلام مش شرط يخطفك
من أول نظرة، ووارد جدا يحصل العكس، يعني تسترخيه أول مقابلة
(زي ما حصل مع صديقتك الأنتيم لما قابلتها أول مرة وماكتيش
طايقاها) لكن من خلال المواقف تلاقيه جدع وشهم طموح.. ساعتها
أنصحك تجبري عقلك انه يعتبره فارس الأحلام الحقيقي وتدي لنفسك
فرصة تعريفية، لحد ما هو بصفاته الكويسة يغير صورة فارس الأحلام
الوهمي جواكي ويتحول لفارس أحلام حقيقي.

إيه الفرق بين الخوف المرضي والخوف الصحي؟

وانتي بتختاري العريس لازم تتأكدي ان قبولك أو رفضك مش
مبني على أي مخاوف جواكي، لأن فيه ساعات بنت بتضيع عمرها في
الخوف من الراجل بشكل خاص أو الخوف من دخول تجربة الارتباط

بشكل عام، وبالتالي بتضيق من إيديها فرص كثير كانت ممكن تخليها إنسانة أسعد، ووارد انها بعد ما تتخلص من الخوف (بالتجربة أو العلاج) تندم على كل اللي ضيعته في حياتها وكل العرسان اللي رفضتهم.

كمان أحياننا بيحصل العكس، يعني بنت تلاقي قدامها راجل مليون عيوب ورغم كده توافق عليه من باب الخوف (من العنوسة - خايقة تكون بتتبطر - خايقة تكون بتظلمه - خايقة مايجيش أفضل منه) وبالتالي تندم برضو بعد ما تدخل التجربة وتتخلص من خوفها وتكتشف انها مش قادرة تتعايش مع صفاته السيئة، وساعتها ممكن تكون اتجوزته وتعيش باقي عمرها ندمانة.

علشان كده هنسمي الحالتين خوف مرضي.

وعلشان أوضح لك أكثر هاذيلك أمثلة على كده:

مثال: (١)

- أنا بنوثة اتقدم لي أكثر من ٢٠ عريس ورفضتهم كلهم، لأنني أولا خايقة أفضل في الجواز زي كثير من التجارب حواليا، ثانيا باحس بانقباضة وبخنقة كل ما اشوف أي عريس فيهم (تمت).

ده اسمه خوف مرضي لأنه غير مبرر، يعني مافيش وقائع أو أدلة تخليها ترفض الراجل أو التجربة، حتى خوفها من تجارب اللي حواليا ماتعبرش مبرر، لأنها أكيد قابلت تجارب ناجحة بس اختارت (بشكل لا إرادي) تتأثر بالتجارب الفاشلة بس، ثانيا كرهاها للرجالة عموما أو رفضها ليهم أكيد ليه سبب جواها هي ماتعرفوش، يعني وارد يكون بسبب معاملة ابوها لأمها أو سلوك اخوها أو تجربة فاشلة مرت بيها وكرتها في الجنس كله.

يبقى الحل هنا إنها تواجه نفسها بالحقيقة وتعرف ان العيب فيها،
مش في العرسان، وبالتالي لازم توافق على أفضل عريس اتقدم وتدي
لنفسها فرصة تعرفه وتواجه خوفها، ساعتها هتقدر تقيم صفاته، وأكد
لو عريس كويس هيساعدها تتخلص من خوفها.

أما لو الخوف زاد عندها رغم ظهور صفات كويسة في العريس، يبقى
لازم تعرض نفسها على سيكاترك أو كوتش يساعدها تواجه نفسها.

(السيشن عندي بـ ٢٠ جنيه و٤ سندوتشات)

مثال: (٢)

- أنا مخطوبة من سنين، وخلص دُخلتنا الشهر الجاي، وخطيبي
مليان عيوب جوهرية (بخيل - بتاع امه - مهزوز - بتاع ستات) بس
رغم كل ده حاسة اني مش هاقدر اسييه، و متمسكة بيه لأبعد الحدود،
ده انا حتى كمان باترعب لما افكر انه ممكن يسبيني (تمت).

ده هنا خوف من الانسحاب من التجربة مش خوف من المواصلة،
يعني عكس البنت اللي فاتت، علشان كده برضو هاسميه خوف مرضي
لأنه غير مبرر أو بمعنى أصح مبرها عبيط وغير منطقي، والحالة دي
تشبه بنوته راكبة عربية والعربية ماشيه ببطء جدا وواضح انها هتقع
من على جبل، ورغم كده مكلمة وخايقة تنزل!

يا بنتي ما هي العربية ماشية ببطء جدا، يعني أسوأ احتمال انك
هتتعوري لو نطيتي! يبقى أنهو أحسن.. تتعوري ولا تموتي؟ برضو
هتكمل!

أنا عارف انها احتمال تكون خايقة من العنوسة، أو خايقة من كلام

الناس (علشان اتخطبت كتير قبل كده وفشكلت)، أو خايفة على ماما من الحسرة، أو خايفة ماتلقاش عريس أحسن منه، أو بتبرر لنفسها بيانه هيتغير، أو حتى لو ماتغيرش هتأقلم عليه.. كل ده خوف مرضي ولازم قرار حاسم وقوي وانتفاضة سريعة، لأن الانفصال النهارده أحسن من الانفصال بكرة.

مثال: (٣)

أنا خايفة جدا ومش قادرة اكمل مع خطيبي.. تصرفاته مريبة، كل يوم اكتشف مصيبة وراه، ورغم كده يقنعني انها بسيطة جدا، ساعات كتير يكذب ويرجع يعترف انه كذب، وساعات اكتشفه بنفسه، كمان زمايله كلهم مش بيحبوه، والأخطر إن طريقة أهله وبالذات امه معايا محسساني اننا عمرنا ما هنتفاهم كعيلة (تمت).

.Stoooooooooop

- هو ده بقى الخوف الصحي.. لأنه مبني على مبررات منطقية، تصرفات الراجل وأهله واضحة زي الشمس، والاختبارات أثبتت انه هيكون زواج غير مناسب.

يبقى هنا الخوف لصالحها مش ضدها، وميزة مش عيب، لأن الخوف ده هيخليها تراقبه وتدور وتسأل وراه، كمان هيخليها تسأل أهلها، وتستشير صاحباتها، وتستخير ربنا، لحد ما توصل للحقيقة، وساعتها لو ماكانش عنده تبرير منطقي يرضي عقلها وعقل كل اللي حوالها هتنسحب فوراً، ولأنها ناضجة يبقى أكيد التجربة مش هتسبب جواها أي عقد بإذن الله.

إزاي تفرقي بين الإعجاب والانبهار والحب والعشق؟

أ- الإعجاب:

واحد شفتيه في ظروف معينة، وبالذات لو في مكان يساعد على تحريك المشاعر، زي الساحل أو الجونة أو في أي حفلة، كمان هو عنده مواصفات شكلية كويسة وعرف يجذبك، اتعلقتي بيه بدون ما تدوري على مواصفاته ولا تحاولي تعريفها ولا هتفرق معاكي أصلاً، لأن اللي بيحركك هنا زي ما قلنا (أدرينالين وسيروتونين) يعني شوية هرمونات عبيطة بتشتغللك، ومش قلبك اللي اتحرك خاااالص.

ب- الانبهار:

نفس الراجل اللي فات بس عمل موقف أبهرك، أو لقيتي البنات موهومة بيه، أو عرفتي انه كمان ناجح أو مشهور، ساعتها هتلاقي قلبك بيدق وعايش في مرحلة الانبهار، وهيتحول جواكي لحلم فجأة، وهنا برضو اللي حصل إن إفراز الهرمونات دي عملت تنشيط لعضلة القلب فابتدى يدق، لكن هو مش حب خاااالص.

ج- الحب:

الحالة دي بقى مشاعر حقيقية (مرحلة استقرار الهرمونات وتصحيح الرؤية)، يعني وارد يكون شخص مميز زي اللي فاتوا ووارد يكون شخص عادي جداً، بس اللي حصل المرة دي انكم اتوجدتم مع بعض لفترة ما تنقلش عن ٣ شهور، لقيتي منه أخلاق وتصرفات تجبرك انك تحبيه (متدين - شهيم - جدع - طموح)، شفتي مميزاته وتقبلتي عيوبه وبقيتي بتحبيه في كل الأحوال (من غير هرمونات عبيطة)، وده اللي أنصحك تتجوزيه، لأن ده الحب الحقيقي زي ما بيقول محمد فؤاد



(الحب الحقيقي هو اللي يجلي مرار الأيام)

د-العشق أو الغرام:

ودي حالة متطرفة من الحب.. يعني كانت حب واتحولت بفعل الزمن لإدمان، وده راجل موجود في حياتك من فترة واتعودتوا على بعض (حبيب - خطيب - زوج)، ومع الوقت بقى هو كل حياتك بمعنى الكلمة، بقيتي تفرحي لوجوده وتموتي في غيابه، مقضية حياتك حواليه ودايا خايفة على فراقه وبتسألني نفسك ليل نهار:

يا ترى لسه بيعبني، يا ترى ناوي يسينني، يا ترى ممكن يعرف غيري!
ده بقى اسمه الحب المرضي أو الإدمان، والاسم العلمي ليه هو (الغرام).

والغرام هو حاله مذمومة، ودرجة من درجات الحب المتطرف، بدليل ان القرآن ذكرها في موضع غريب ومرعب جدا (ربنا اصرف عنا عذاب جهنم إن عذابها كان غراما).

لاحظني في الآية ارتباط الغرام بالجحيم، وده اللي ممكن تعيشي فيه فتعذبي نفسك، وكم ان تخلي شريك حياتك يكرهك ويحاول يهرب من حصارك.

إزاي تختاري العريس المناسب؟

العريس المناسب ليكي مش اللي يشبهك ولا اللي يختلف عنك، لكن هو الراجل اللي بيكملك، يعني مثلا انتي كسولة وهو نشيط فيحفزك على الحياة، إنتي دمك خفيف وهو دمه ثقيل فتعملوا توازن

في الحياة، إنتي بتحبي القرابة وهو يشجعك، إنتي طموحة وهو مقدر
طموحك، إنتي قصيرة وهو طويل علشان ولادك ميطلعوش أقزام زي
حضرتك، (بس اوعي تتجوزي واحد اقصر منك.. صدقيني هتبقي
ماشية في شقتك وتكعبلي فيه في الضلمة).. خدي الطويل بيعيش ه
سنين أكثر من القصير.

وأهم من كل ده يكون عنده اله صفات الأساسية دي:

١ - الدين:

مهم جدا يكون عنده دين - مش متدين - علشان يراعي ربنا فيكي
(هيكرمك لو حبك، ومش هيظلمك لو كرهك) وهيساعدك تبنا
بيت طائع لربنا وتخلفوا عيال محترمين تدخلوا بيهم الجنة.

٢ - الأخلاق:

صدقيني لو عنده دين وماعندهوش أخلاق يبقى ييمثل عليك
التدين، لانا لازم أخلاق ومعاملات ورحمة بالناس وبالذات مع أهله
وأهلك.

٣ - الطموح:

الراجل الطموح اللي عنده مقومات النجاح أحسن من الناجح
بالوراثة أو بالصدفة، والراجل الطموح ببيان من خطواته واجتهاده،
وماعنديش مانع تبتدوا مع بعض وتستمعوا بالنجاح مع بعض.

٤ - التكافؤ:

مهم قوي يكون فيه تكافؤ اجتماعي بينكم، يعني العيلتين متقاربتين

وفيه انسجام واضح بينهم، علاقته بأهلك تكون كويسة وبالذات أمك،
كمان علاقتك بأهله تكون كويسة وبالذات أمه (فاهماني طبعا).

وعلى فكرة مش فارق كثير التكافؤ المادي أو العمري، بس طبعا
التكافؤ الكامل (اجتماعي - مادي - ثقافي - فكري) أفضل بكل الأحوال.

٥ - القبول:

كل الصفات اللي فاتت دي المفروض تولد جواكي قبول ناحية
الشخص ده، علشان كده لازم تحكمي على مشاعرك بعد ٣ مقابلات
على الأقل، لكن لو ما حصلش قبول يبقى عندنا احتمالين.

الاحتمال الأولاني:

إنك بتحبي واحد غيره ومش عارفة تنسيه ولسه جواكي .. ساعتها
أنصحك تقبلي الجديد صاحب الصفات الكويسة، وأوعدك أنك هتنتسي
الأولاني مع الوقت وبالعشرة الطيبة.

الاحتمال الثاني:

إنك معقدة وبترفض أي حد كويس، وفي الحالة دي راجعي فقرة
الخوف المرضي اللي فاتت.

الاحتمال الثالث:

إنه فعلا شخص لا يطاق رغم كل مميزاته .. يعني رخم جدا وقعدتي
معاه ٣ مرات ولسه مافيش فايده، ساعتها للأسف لازم تخلعي منه.

آخر نصيحة وأرجوكي صدقيني .. الاقتناع أهم من الحب بشرط
وجود بذرة مشاعر (القبول) وتهيئه مع الوقت والعشرة بسبب صفاته ..

انسي الماضي طالما ماكانش يستاهل أو ماكانش يصلح، ركزي في الحاضر وأخلصي له، كمان لازم تثقي إن مافيش راجل كامل ولازم تقبلي بعض العيوب في زوج المستقبل، بشرط ان مميزاته تكون أكثر من عيوبه والعيب اللي عنده مش قاتل (مش بخيل - بتاع امه - ماعند هوش دين)، ولازم يكون العيب اللي عنده ينفع تتعايشي معاه ومناسب ليكي.

كمان أبوس إيدك سيبك من المحترف اللي بيعرف ياكل دماغك بالكلام، وركزي مع المحترم اللي داخل البيت من بابه، لأنك فعلا محترمة وتستاهلي أحسن راجل في الدنيا (رقم موبايلي في الصفحة الأخيرة).

إيه هو فرق السن المناسب بينكم؟

كل الاستثناءات واردة في موضوع السن، يعني ممكن يكون أكثر بكتير أو أصغر بكتير ويبقى مناسب، بس طبعا الأفضل يكون أكبر منك بحوالي ٤ سنين على الأقل، وهو الفرق العقلي بينكم (لأنك عقليا أكبر منه بأربع سنين) بمعنى إن البنت في سن الـ ٢٠ بتفكر زي الولد في سن الـ ٢٤، علشان كده الأفضل يبقى أكبر منك، وممكن الفرق ده يوصل لـ ١٠ سنين أحيانا، برضو يبقى مناسب علشان انتوف نفس الجليل ومتشبعين بنفس الأفكار وليكو نفس الاهتمامات.

طب لو الراجل أكبر منك بأكثر من ١٠ سنين؟

ماعنديش مانع بس بشروط:

١ - عمره الجسدي والصحي:

يعني شكله صغير ومهتم برشافته ووسامته، بيروح چيم، مش

بيدخن أو ماشي غلط ومحافظ على صحته، والنوع ده مش هيبان عليه السن خالص (زي اخونا عمرو دياب اللي عنده حاجة وخمسين سنة وعمنا كاظم الساهر اللي عنده - اللهم لا حسد - حاجة وستين سنة)

٢ - عمره العقلي والروحي:

يعني متفتح كده وناضج، ومش معقد بحكم فرق السن، لأنه طبعا بقى ف جيل تاني غيرك، ووارد تكون أفكاره واهتماماته بقت مختلفة عنك، لكن لو مواكب لأفكارك وبتحسي ان روحه شابة ودمه خفيف ومش مكلكع من جواه يبقى توكلني على الله، والأهم من كده طبعا يكون بينكم تفاهم ومصداقية وراحة وقبول.

٣ - عنده مقومات زيادة:

يعني طالما أكبر منك بكتير يبقى لازم يكون عنده مميزات كتير تخليكي تتجاوزي عن فرق السن ده وتوافقي، يعني ممكن مثلا يكون ناجح جدا ويهقق لك أحلامك، أو ناضج لدرجة الجاذبية، وشيك واستايل (برضو رقمي ف آخر صفحة).

طب هل ينفع يبقى أصغر منك سنًا؟

إحنا اتفقنا انه الأفضل يبقى أكبر منك، ووارد التجربة تنجح لو كان من سنك، بس احتمال نجاح التجربة بيقل كل ما فرق السن بيزيد بينكم بالسلب، يعني كل ما يبقى أصغر منك بكتير، بس برضو الاستثناء هنا وارد زي ما قلنا في البداية، بس لو عنده المقومات اللي اتكلمت عنها في باب التقدير، وهاعيدها تاني علشان تفتكرها:

أ- أنضح وأعقل منك، قادر يحتويكي وتحسي انه فعلا كبير وشخصيته قوية ومش بيعمل عليكى كبير علشان يعوض فرق السن، مثقف وواعي وعنده خبرة حياتية، وف نفس الوقت انتى قادرة تتجاهلى فرق السن بينكم.

ب- تكونى انتى عندك الشجاعة والثقة ف نفسك انك تواجهى كل الناس بدون أى خجل أو إحساس بالنقص، وثقتك فى نفسك دى تخليكى ماتوقعيش انه ممكن يحب عليكى واحده أصغر منك مع الزمن.

ج- يكون عنده القدرة على مواجهة المجتمع، وبالذات أهله وبشكل خاص أمه، لأن معظم الأمهات بتكره ان ابنها يتجوز واحده أكبر منه.

د- تكون عندك القدرة على الاحتفاظ بجاذبيتك وشبابك وأنوثتك مدى الحياة، لأن فرق السن بيبان أحيانا عند بعض الستات بعد دخول الأربعين (هيفاء داخله فى الخمسين) وفى الحالة دى لازم تكونى على طول جذابة ومترونقة وبتتغذى كويس وبتروحي چيم، وبكده هيبان عليه العجز قبلك.

الراجل يفكر فى الجواز ازاي؟

زى ما قلنا قبل كده إن الجواز فى حياة الراجل مرحلة ولازم يمر بيها، بس هو بيرتبها فى المركز الثانى (عكس حضرتك) يعنى بعد تحقيق أحلامه وتكوين نفسه، (راجعى مراحل تكوين الراجل)، يعنى لما بيتدى يقف على رجله ويلاقى شغل هيبتدى يفكر بشكل جاد فى الجواز، لكن قبل كده بتبقى مجرد فكرة مؤجلة، حتى لو وعدك بغير كده.

طب إيه الخطوات اللى بيمر بيها علشان يرتبط بيكى؟

هما ، خطوات لازم تركزي معاهم:

١ - الانجذاب:

شافك، عجبتيه، اتشد ليكي، أمورة قوي، دمك خفيف، دماغك حلوة، المهم انك عجبتيه وخلص، لسه هو دلوقتي مجرد صياد شاف سمكة ملونة ماشية في البحر ويفكر يصطادها.

٢ - التردد:

وارد جدا يكلمك ويلاقيكي سهلة فيخلع زي ما قلنا قبل كده، أو يلاقي دماغك فاضية فيخلع برضو، أو تهمني بيه زيادة أو تطلبي يتقدم لك! وفي كل الحالات إما هيخلع أو هيكتفي بعلاقة سريعة.

وارد كمان تدخل على الخط سمكة تانية تعجبه ومايكمش معاكي، يعني بكل الأحوال هو لسه على البر وماخدش القرار، علشان كده أرجوكي بلاش تهمني بيه وتحسسيه إنه خلاص بقى في علاقة معاكي، وياريت أحسن عملي العكس، يعني لو طلب يرتبط بيكي (بيجس نبضك) قولي له انك مبسوطة إنه فكر فيكي وإنه حد رائع بس انتي مش جاهزة دلوقتي للارتباط، خليه يحاول يقنعك بتصرفاته وإلحاحه.

٣ - القرب:

خلاص اقتنع بيكي والسنارة غمزت وقرر يركز معاكي انتي بس، هو دلوقتي محتاج يدخل التجربة ويكمل في العلاقة ويعيش حب واهتمام، بس انتي محتاجه ياخذ خطوة ويبي يتقدم! وارد تلاقي عنده مبررات كثير علشان مايتقدمش، ممكن تبقى حقيقية وممكن تبقى وهمية، ووارد يبقى نيته يستمتع بالعلاقة بدون أي التزامات، في المرحلة دي أي تنازلات

هتقدميها علشان تحتفظي بيه هتبقى ضدك (تنازلات جسدية - مادية - عاطفية) كمان لو حاصرته باعتباره خلاص بقى بتاعك ممكن يهرب، يبقى أفضل حل إنك تحتفظي بثقتك في نفسك وتحطي النقط على الحروف من البداية (هي العلاقة دي آخرتها إيه)؟

من خلال إجابته هتقرري تكلمي ولا لا، لو لقيتي تسويف ومبررات وهمية يبقى اخلعي، وممكن لو شكيتي إن مبرراته وهمية اعملي عليه خطة، يعني قولي له تعالى اتقدم وانا هاوافق على كل ظروفك وكمان هاقتع أهلي، لو فرح بكده وطلب ميعاد علشان يتقدم يبقى جاد وشاري، وساعتها افضل جيبه بعد ما تقولي له ان أهلك أجلوا مقابلته لحد ما ياخذ خطوة أولى ف حياته، لكن لو اتردد أو اتحجج بأي مبررات عبيطة (لأ طبعاً مش هينفع اقابل أهلك بظروفي دي) ساعتها اخلعي فوراً.

٤ - القرار:

خلاص دخل البيت واتقدم وانخطبنا، مبروك دخل نص القفص، بس أكيد مش هتقضيها حب وهيام ومراجيح، لأ طبعاً دي فترة التقييم الحقيقية ودراسة العريس وظروفه ووضع جذور العلاقة، يعني لازم تبقي ف غاية التركيز.

الراجل بيتجوز علشان محتاج إيه؟

اتكلمنا في الفصل الأولاني عن الاحتياجات الأساسية للراجل عموماً، بس هاتكلم على احتياجات الراجل من الجواز بشكل خاص، وهي عبارة عن ٥ احتياجات أساسية، مطلوب من حضرتك تعرفيهم وتحاولي توفيرهم في حدود قدراتك وإمكانياتك.

أولا الاحتياج الجسدي:

طبعاً احنا اتفقنا انه كائن بصري، يبقى أكيد الشكل والملامح هي فرقوا معاه، واتفقنا كمان إن الغريزة مهمة ف حياته، يبقى أكيد الجسم والتفاصيل الأنثوية مهمين جدا في تقييمه لحضرتك، يبقى طبيعي ان حضرتك هتهتمى بقوامك ومظهرك وأنوثتك في حدود الشرع.

بس هل معنى كده إن البنت اللي جمالها محدود مش هتلاقى راجل يجبها؟ ويا ترى الراجل عموماً تافه لدرجة انه يقيم إنسانة هتبقى شريكة حياته بجمالها وشكلها بس؟

علشان تعرف في إجابة السؤالين دول وغيرهم من الأسئلة اللي بتدور في دماغك، لازم تفهمي نقطتين مهمين:

الأولانية:

الجمال عند الراجل نسبي، يعني ممكن واحد تعجبه بنت شقرا ورفيعة، وواحد تاني تعجبه بنت مليانة وسمرا، إذن كل البنات اللي في الدنيا حلوين بمنظور راجل معين.

الثانية:

الجمال مجرد بوابة لدخول عالمه.. يعني ممكن بنت جميلة واستايل وعودها تحفة تدخل حياته ويكتشف انها مغرورة أو دمها ثقيل أو فاشلة، وفي الحالة دي بيرفضها مهما كانت جميلة، كمان ممكن يحصل العكس، يعني بنت محدودة الجمال يشوفها أول مرة ماتعجبوش، بس مع الوقت يتعلق بيها، علشان عندها مواصفات ثانية، زي جاذبية

الروح وخفة الدم والطموح والاحترام والثقة، وساعتها هيشوفها ملكة جمال الكون.

يبقى نفهم من كده إن أي بنت تقدر تكون جميلة ومثيرة وجذابة في عين أي راجل، لو كان عندها المقومات دي واللي بنسميها الذكاء الأنثوي.

علشان كده، ومن منطلق الاحتياج الجسدي ده، مطلوب من كل بنت وكل زوجة تفهم إن الشكل والجسم - اللي هما المحرك الغريزي - هما أكبر نقطة ضعف عند الراجل، ودي من نعم ربنا عليها، لأنه بكده إذاها مفتاح الراجل في إيديها علشان تقدر تسيطر عليه وتحتله وتأخذ كل حقوقها.. يعني ده ماطلعشي عيب في الراجل زي ما ستات كتير فاهمة وشايفاه حيوان لمجرد ان الاحتياج الجسدي يبحره.

ثانيا الاحتياج العقلي:

مهما كان الراجل محتاج للجمال والشكل لكن في النهاية هو إنسان، وربنا ميزه عن باقي المخلوقات بالعقل، علشان كده بديهي يحتاج إنسانة تشاركه أحلامه وأفكاره ومشاريعه، والإنسانة دي هي الزوجة العاقلة الحكيمة اللي تقدر تطور منه وتفهمه وتساعدته وتصحح طريقه وتقف جنبه في رحلة كفاحه.. مش بس كده، ده الأفضل يكون ليها رحلة كفاح وطموح وأحلام موازية ليه.. يعني مقومات تميزها عن غيرها وتخليها مصدر فخر ليه في وسط أهله وأصدقائه والمجتمع المحيط بيه، كمان ذكاءها ف منظوره هيساعدها تربي ولاده بشكل جديد، علشان كده مطلوب من كل بنت تكون ناجحة ف حياتها قبل ما تفكر في الجواز، كمان مطلوب من كل زوجة إنها داياا تطور نفسها ويكون ليها أحلام ومشاريع خاصة بيها يصبوا كلهم في مصلحة كيانها وكيان أسرتها.

ثالثا الاحتياج العاطفي:

طبعاً ما انكرش ان الاحتياج ده مهم عند البنت أكثر من الرجل، لكن من الطبيعي إن جوة أي رجل طاقة حب محتاج يعيشها مع شريكة حياته، جواه احتياج عاطفي ببيان في العلاقة الزوجية الناجحة، لما تكون الزوجة رقيقة وحساسة وتعرف تبادل له كلام الحب، لما تكون بتعرف تلعب على أوتار مشاعره وتتعامل معاه كأنها طفلة صغيرة، وبالتالي تخرّج من جواه كل المشاعر الحلوة اللي بنشوفها دايماً في عين أي رجل ناحية حبيبته أو بنته.

رابعا الاحتياج الروحي:

المطرب هاني شاكر ليه أغنية جميلة بيقول فيه كويليه حلو قوي (محتاج لحببية بقلب صديق) وهو ده معنى الاحتياج الروحي، يعني محتاج حببية بطعم الصديق، أقدر احكي معاهها وافضفض، لينا مع بعض اهتمامات مشتركة، نروح النادي، الجيم، الجمعيات خيرية، ممكن نصلي جماعة، نروح نعتنم ونحج مع بعض، هي دي الصداقة اللي لا يمكن أي رجل يقدر يعيش من غيرها، ودايماً هتلاقي الجواز الناجح هو اللي الزوجين فيه أصدقاء مش بس حبيين.

خامسا الاحتياج الاجتماعي:

أكيد جزء كبير من احتياج الرجل للجواز هو رغبته ف تكوين بيت وأسرة وأولاد... يعني مجتمع جديد ووطن صغير.

وده بيتم بشكل أفضل لما يكون فيه توافق بين أهلك وأهله من بداية الارتباط، علشان أولادكم يتربوا ف جو صحي بين أسرتين متفاهمين ومترابطين.

علشان كده دايبا باقول يا ريت يكون فيه تكافؤ اجتماعي، وعلاقة طيبة بتربط الأسرتين ببعض من بداية الاختيار.

دول الخمس احتياجات اللي محتاجها أي راجل من الجواز، بس السؤال.. هل مطلوب يكون عند حضرتك اله؟

للأسف أيوه.. لازم يكون عندك الخمسة، بس بنسب حسب قدراتك انتي واحتياجاته هو... يعني إيه؟

- بنسب حسب قدراتك.. يعني لا يكلف الله نفسا إلا وسعها.

دي قدرات ربنا خلقها جواكي بس طبعا ينفع تطورها زي ما قلنا.. يعني الست اللي حاسة انها مش جميلة، لازم أولا تزود ثقتها ف نفسها، وثانيا تلعب على وتر الأنوثة بالكلام الحلو والحركات والإحساس، علشان دايبا تخلي جوزها في حالة استمتاع دائم بأنوثتها، ويشوفها على طول جميلة.

- أما عن نسبية الراجل في احتياجاته فده لازم نذاكره كويس:

الراجل محتاج كل الحاجات دي بنسب، يعني ممكن يكون مثلا شخصية جادة، رجل أعمال أو دكتور مثلا، فيحتاج الجانب العقلي أكثر في شخصية الزوجة علشان تساعده ف مشاغله الكثير، وممكن يكون عادي عنده طاقة جسدية فيحتاج الأنوثة والإثارة أكثر، وقيسي على كده.

ومن الذكاء إن أي زوجة تتابع جوزها وتفهم أكثر احتياجاته اللي بتبقى أحيانا نقطة ضعف ممكن من خلالها يقع في الخيانة (لو ما قدرتش الزوجة تشبع الاحتياج ده)، وده سهل جدا تعرفية من تصرفاته، يعني

مثلا لو قلت لك إن راجل مراته قفشته يبص للشغالة هتقولي لي أكيد ده مش احتياج عقلي أو روحي.. أكيد ده احتياج جسدي.

ولو قلت لك إن راجل مراته ظبطته بيشيت مع بنات على الفايس بوك ويرغي وخلاص، هتقولي لي يبقى عنده فراغ روحي ومحتاج زوجة صديقة، ولو قلت لك راجل متعلق بالسكرتيرة بتاعته ومايقدرش يستغنى عنها؟ هتقولي لي لأنها بتنظم له حياته وتتابع شغله، يعني عنده احتياج للإشباع العقلي.

وعلى كده تقدري تتابعي كل تصرفات الراجل اللي ف حياتك، وتكتشفي احتياجاته ونقط ضعفه وتلعي عليها علشان تحتليه.

إيه أقصى أحلام الراجل في الزوجة؟

نجيب محفوظ قدم لنا في ثلاثيته الرائعة نموذج حلم كل راجل في الزوجة في بدايات القرن العشرين، وهو نموذج أمينة (الزوجة الأم) صاحبة الحياء والياشمك، الزوجة الحنونة الطيبة المنكسرة اللي مابتقولش غير حاضر وطيب.. واللي لا تجرؤ تسأل جوزها كنت فين ولا جاي مين... والزوجة دي كانت نص حلم سي السيد أحمد عبد الجواد وقتها، وكانت مهمتها متلخصة ف تجهيز الأكل والشرب وخلفة وتربية العيال..

أما النص الثاني من حلمه في الزوجة فكان بيلاقيه في الشقة المشبوهة (كانت مرخصة وقتها) مع الأخت زبيدة العالمة سلطانة الطرب والرقص والمياعة وقلة الأدب، وبكده كان بيوازن بين احتياجاته الفطرية في السكن والبيت والأسرة والأولاد، واحتياجاته في الغريزة والاستمتاع.. وده طبعا كان نوع من أنواع الشيزوفرينيا.

في أوائل الثمانينات قدم لنا المخرج علي عبد الخالق رائعة فيلم (العار) والي قدم فيه نموذج ثاني للزوجة الي بهرت الرجال وقتها والي لسه بتبهرهم لحد دلوقتي، والدور ده جسده الممثلة الجميلة نورا.. وهو (روقة أو روءة) زي ما كان بيناديها نور الشريف في الفيلم..

وروقة زي ما قدمها المخرج وجسدها البطلة هي التطور الطبيعي لأمينه بعد ما خلعت الياشمك وقررت تنزل تشارك جوزها ف شغله وحياته.. وف نفس الوقت احتفظت لنفسها بدور زبيدة العالمة، وده عن طريق احترافها للأنوثه وقدرتها على إمتاع الرجل وإشباعه الجسدي. روقة ابدت تناقش جوزها ف شغله.. مش بس كده.. دي بقت تساعده في تهريب البضاعة (يا رب ارزقنا بالبضاعة والزوجة الي تهربها معنا).

روقة رغم أنوثتها الطاغية إلا أنها كانت الأم والصدر الحنون لجوزها، بس للأسف زيها زي أي زوجة بتضحى ببلاش، كان لازم تموت وتغرق وهي بتجيب البضاعة من البحر.. وفي الآخر كل الي كسبته إن (كمال) جوزها قرر يتصدق بنصيبها لوجه الله..

هيتصدق على روحها بمخدرات.. تخيلوا! يعني مش كفاية انه خلاها تموت على معصية.. لأ كمان هيدخلها جهنم بالصدقة المقتدلة بتاعته.. حقها ولا مش حقها؟ حقها يا ابو كمال.

طيب دي كانت احتياجات الرجل في الثمانينات وأوائل القرن العشرين... طب دلوقتي بقى محتاج إيه من الزوجة؟
بصراحة لسه الرجل عنده الشيزوفرينيا القديمة، والمصيبة إنها زادت

كمان في العصر ده.. الباشا بقى عايز زوجة ٣ في ١ .

١ - (أمينة) الزوجة التقليدية والأم الحنون (اختيار أبوه القديم) الست اللي تربي العيال وتلبس محترم وتتكلم بحياء وماتقولش غير حاضر وطيب، وتسييه يصاحب ويقابل بدون أي اعتراض وتكتفي بدورها الفطري.. تخلف وتربي وتغسل وتطبخ.

٢ - (زبيدة العاملة) الزوجة المثيرة الجذابة الأنثى اللي تعرف تسيطر عليه وتشبع غرايزه وتدلعه، الأنثى المحترفة اللي فاهمة في الجنس والغرام.. اللي تخليه لا يمكن يبص برة ولا يخونها ولا يعرف عليها.

٣ - (روقة) الزوجة السند اللي توازن بين كل ده (الطاعة - الأنوثة) وف نفس الوقت تساعد ف شغله وترسم معاه أحلامه ومشاريعه وتهرب معاه البضاعة طبعا (جوة كل راجل تاجر مخدرات صغير).

طب السؤال بقى علشان عارف ان كلامي مستفز لحضرتك، هل فيه راجل يستاهل المرأة الثلاثية دي؟ الإجابة: طبعا لا، لأن مافيش رجالة كتير تقدر تجمع بين الرجولة والاحترام والنجاح والإخلاص علشان يستاهل الزوجة دي (ربنا يستر والرجالة ماتقتلنيش).

طب لو لقيتي راجل بجد ويستاهل تبقى علشانه كل ده، هل هتعرفي تجمعي كل المتناقضات دي ف شخصية واحدة؟

أعتقد ممكن لو كنتي بتحببيه بجد وجواكي إرادة وإصرار (ومعاكي فلوس تروحي بيروت).



جواز الصالونات

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

توجهت أم صفاء إلى غرفة ابنتها، تعلو وجهها ابتسامة قلقة..
توقفت برهة تفكر في ردة فعل صفاء تجاه هذا الأمر المعتاد.

كان هذا هو العريس رقم ٢١٣٣٠ الذي يتقدم لخطبتها منذ أن كانت
في الثامنة عشرة دون جدوى، بعضهم لم يكرر زيارته دون إبداء أي
سبب، والبعض الآخر رفضتهم صفاء وهي تردد في كل مرة كلمة
واحدة (كلهم عاهات).

ولكن عليها توافق هذه المرة، خصوصا أنها أتمت عامها الخامس
والثلاثين منذ أيام، ذلك الأمر الذي جعل منها فتاة غير مبالية، لا
تكثر إلا بالمسلسلات الهندية والطعام بكل أنواعه، حتى تجاوز وزنها
المئة كيلوجرام.

استبدلت الأم ابتسامتها وغيرت ملامح وجهها لتبدو أكثر صرامة
وهي تجتاز الممر الضيق وصولا إلى الغرفة المنسودة.. توقفت أمام الباب..
تنهدت، ثم أدارت المقبض وأطلت برأسها دون استئذان...

كانت صفاء تفتش الأرض وبين أصابعها الرقيقة صباع محشي،
وفي اليد الأخرى محرك التلفاز..

رفعت رأسها ونظرت إلى أمها في تعجب، ثم أطرقت تواصل التهام
طبق المحشي..

رغم التجاهل المستفز، آثرت الأم الحنون ضبط النفس، وقالت
في حنو:

- قومي يا موكوسة استحمي وشوفي لك هدمة نضيفة بدل جلابية
البوايين اللي لابساها لي على طول دي.

حدقت صفاء في وجه أمها بتعجب، وقالت باستفسار وهي تلقي بصباغ المحشي في حلقها:

- أستحمى ليه يا ولية؟ هي الرؤية بانة وقالوا بكرة العيد؟

تعجبت الأم من كلمات ابنتها، فسألته في سخرية:

- هو انتي يا معفنة ماتستحميش غير في العيد؟!

- والنبي يا أمًا ماتتريقيش وخلي الطابق مستور، ده انا الوحيدة اللي باستحمى في البيت ده. قالتها وهي تواصل الأكل، وعيناها معلقتان على التلفاز، فقاطعتها الأم:

- طب قومي يا روح قلب امك استحمي كده وانضفي علشان جايلك عريس.

ألقت الأم بالكلمة الأخيرة وهي تدرس وقعها على الفتاة البائسة واستعدت للرد..

خيم على الغرفة هدوء حذر ينذر بعاصفة قادمة، قبل أن تصرخ صفاء:

- عريس تاااني! إلهي ربنا ياخذني واغور من وشك! هو انتي يا ولية ماوراكيش غيري؟! كل يوم والثاني عريس، ويا ريت حد فيهم عليه القيمة!

لم تكمل صفاء جملتها حتى اختنق صوتها بالبكاء، فهتفت في أمها بتوسل:

- إلحقيني يا ولية بكوباية ميه.. صباغ المحشي اتحشر في زوري..

خرجت الأم مسرعة ثم عادت بكوب الماء لتجد صفاء منهمكة
مرة أخرى بين التلغاز والمحشي.. فصرخت فيها:

- انتي لسه بتطفحي؟ يا بت فزي قومي العريس على وصول!

رفعت صفاء رأسها وقالت في عتاب:

- هو أنا هافضل طول عمري كده بيعه وشروة لخلق الله؟! يعني

مش من حقي أحب وأتعب زي البت بتاعة فيلم عبده موتة؟!

عقدت أم صفاء ذراعها على صدرها في امتعاض، ورمقت صفاء

بنظرة نارية، ثم أتبعتها بوابل من الكلمات الحارقة:

- حبك برص وعشرة خرس.. الحب ده يا روح امك تشوفيه في

الأفلام بس.. لكن انا عندي غيرك نص دسنة بنات متلقحين جوة،

وعايزة اخلص منك علشان افوق لهم.. هي كلمة ومش هاتنيها.. قومي

استحمي واجهزي أحسن ودين النبي أجيبك من شعرك.

كانت الشمس قد مالت للغروب، وبدأ الظلام يجيم على حي الجمالية،

حين دقت ساعة الحائط بنسق بطيء مألوف معلنة الساعة.. إنه الميعاد

المرتقب...

- يا ألف أهلا وسهلا.. خطوة عزيزة.. دا إحنا زارنا النبي.. اتفضلوا،

اتفضلوا.

صافحت أم صفاء بحرارة والدة العريس التي تقدمت الموكب في

زهو واضح... تبعها العريس وشقيقته في مشية عسكرية..

فصافحتهم ثم قادتهم إلى غرفة الجلوس..

كانت صفاء في غرفتها تهتم بوضع اللمسات الأخيرة على هندامها،
حين بلغت مسامعها أصوات مختلطة قادمة من غرفة الجلوس، تبعها
شقيقها الأصغر محروس يهتف بحماس متقدماً نحو غرفتها:

- العريس جه جه، العريس جه.

ألقت صفاء بمشط رأسها في رمية محترفة لتصيب الطفل في وجهه،
قائلة:

- غور يا ابن العبيطة.

تلقي محروس كلمات شقيقته في أسى عميق، وحدث فيها قائلاً:

- أهو إنتي اللي عبيطة وستين عبيطة.. طب والمصحف لا أقول
لامك يا جزمة.

قالها وهو يهرع نحو باب المطبخ ليسرق قطعة جاتوه من الثلاجة،
قبل أن يراه أحد..

تحركت صفاء في هدوء نحو غرفة المعيشة حاملة في يدها صينية
العصير، حتى وصلت إلى الباب المفتوح... تنحنحت في حياء استئذانا
في الدخول، فتوجهت إليها كل الأنظار..

- إدخلي يا ست العرايس قدمي العصير لحماتك الأول.

تمت صفاء بكلمات غير مفهومة، استتج منها الجميع أنها تعترض
على كلمة حماتك..

واصلت الأم:

- ما تدخلي يا صفاء واقفة ليه؟

وأشارت إلى السيدة الجالسه أمامها وهي تعرفها إلى ابنتها.

- دي بقى ست العرايس صفاء.

توجهت صفاء نحوها وألقت التحية وهي تمد يديها بالصينية.

- اتفضلي يا حاجة.

عضت أم العريس على شفتها السفلى غيظا من الكلمة، وسألتها

بتجاهل متعمد:

- هو انتي بقى ست العرايس؟!

قالتها ثم أشارت بوجهها ناحية ابنها مواصلة الحديث بسخرية زائدة:

- حلوة قوي عروستك يا عين امك.

تلقت أم صفاء الكلمات وجزت على أسنانها وهي ترد إليها القذائف:

- أيوه يا حبيتي هي دي ست العرايس، إيه؟ ماتعجيش ولا ماتعجيش؟!

خيم الصمت على المكان برهة حين لم ترد أم العريس بكلمة..

فأشارت أم صفاء لابنتها بحركة من مرفقها مفادها «اخلعي».

همت صفاء بالوقوف فانطلق صوت أحد الجالسين:

- لا.. تقوم ليه.. هو احنا لسه اتعرفنا عليها؟

كان ذلك صوت العريس الذي خرج من صمته للتو.. قالها ثم

نظر لأمه متسائلا:

- مش كده يا ماما.. تقعد معانا شوية ولا انتي رأيك إيه؟

رشقته أمه بنظرة فأطرق برأسه في ندم، فأدارت أمه وجهها إلى

الناحية الأخرى في امتعاض.



أشارت أم صفاء إلى ابنتها بالجلوس في نفاد صبر.

- والآنسة بقي معاها إيه؟

وجه العريس سؤاله إلى صفاء، وهو ينظر إلى أمه ليرى إن كان على حق في سؤاله.. فأومأت أمه برأسها علامة القبول.

ردت صفاء بعصبية:

- معهد خدمة اجتماعية.

- وده ستين ولا اربعة؟

- ده بكالوريوس، هو فيه حد مايعرفش معهد الخدمة الاجتماعية؟!!

قالتها بعصبية فردت أخت العريس:

- وهتفرق إيه يعني ستين ولا اربعة، ما كلنا في الآخر بتتلقح في

البيت نربي العيال.

نظرت صفاء إلى أخت العريس وقالت بتحفز.

- لأ طبعا انا بادور على شغل وهانزل من أول الشهر ان شاء الله،

وهافضل اشتغل بعد الجواز.

انتفضت أم العريس واقفة بسخط واضح رافضة كل ما سمعته،

ثم جذبت ابنها من يده مندفعة إلى الخارج، فتبعتها الأخت مسرعة

خلفهما، وخيم الصمت على المكان..

.....

أنا عارف ان المشهد ده اكرر قدامك قبل كده، أو على الأقل سمعتي
عنه، وبالتالي بقت دي الصورة الذهنية المرسومة جوة دماغك عن جواز
الصالونات، والتي هي عبارة عن

عريس جاي بيع ويشترى فيكي، واحد غريب ماتعرفيش عنه
أي حاجة جاي ياخذك لبيته، راجل تقليدي وممل عايز يتجوز بطريقة
الخاطبة، وطبعاً كلها صور مرفوضة جواكي والتجربة عندك وعند
صحابتك أثبتت إنكم صح بسبب العاهات اللي بيتقدموا لكم كل
يوم والثاني، تاني حاجة ودي الأهم إن حضرتك نفسك تدخلت قصة
حب، وواثقة ان من حقتك تحبي وتتحي وتدخلت المغارة الأسطورية
اللي اتربتي عليها من طفولتك في القصص، زي سندريلا وسنو وايت
وغيرها من القصص اللي رسخت في دماغك فكرة فارس الأحلام،
الأمير العاشق اللي هيخطفك على حصانه الأبيض وينقذك من ضغوط
البيت وجمود بابا ورخامة ماما وتبانة اخوكي (كل الاخوات الولاديتين)
حاسة ان من حقتك تعيشي القصص اللي اتفتحت عليها أنوثتك في
الأفلام العربي، فاتن حمامة وعمر الشريف وأحمد رمزي وعبد الحامولي
(أكيد ما حضر تيهوش سنة ٥٠) ده غير مسلسلات الحب الهندي والتركي
اللي ملت دماغك وعلى رأسهم مهند ومرات عمه الواطية.

دي أسباب كرهك لجواز الصالونات.. صح؟!!

طب ما تيجي نفكر مع بعض ف نقطتين مهمين، يمكن أغير رأيك
وتقبلي عريس صالونات وأبقى كسبت فيكي ثواب.



- النقطة الأولانية:

أ - ليه بتسميه واحد جاي بيعع ويشترى فيكي؟ طب ما تعتبره واحد جاي ومكلف نفسه ٢ كيلو برتقان علشان يقف ويلف قدامك وانتي تقرر ينفع والا ماينفعش؟

ب - واحد غريب ماتعرفيش عنه حاجة؟ ماشي طب ما هو برضو أي قصة حب هتعيثي فيها هيبقى واحد مجهول، ومع الوقت هتعرفي عنه حاجات تخليكي تحبيه أو تكرهيه، يبقى إيه المانع تجربي؟ مش يمكن مع ثاني أو ثالث مقابلة تقتنعي بيه؟!

ج - راجل تقليدي لأنه عايز يتجوز بشكل تقليدي؟ طب مش يمكن يكون ليه تجارب فاشلة بسبب البنات الشمال وقرر يختار بنت ناس زيك؟ أو محترم ومالوش تجارب بس رومانسي جدا وخجول ماقدرش يفتح أي بنت؟ أو طموح جدا وعملي وناجح وطموحه سرقه فقرر يتجوز بالشكل التقليدي؟

النقطة الثانية:

ليه الفكرة المسيطرة على دماغك إن جواز الصالونات حاجة والجواز عن حب حاجة ثانية؟

على إنك لو ركزت شوية هتلاقي معظم قصص الحب اللي حوالكي بتنتهي بالفشل مهما طالت مدة العلاقة، وحتى لو حصل جواز غالبا بيكتشفوا بعض من جديد جوة البيت ويشوفوا عيوب بعض اللي كانت مستخبية ورا نصارة الحب، ويمكن يكون ده السبب في إن كل الأفلام العربية تنزل فيها كلمة النهاية (the end) بمجرد دخول المأذون، زي

ما يكون المخرج عارف ان القصة هتسخف وتبان على حقيقتها بعد الجواز.

ولو حضرتك مذاكرة تاريخ كويس هتعرفي إن عنتر، صاحب أعظم قصة حب في التاريخ العربي، طلق عبلة بعد ٣ شهور جواز، وإن قيس وليلي، وروميو وجوليت، ودودي وديانا، كلهم اتحولوا لقصص حب أسطورية لأنهم ماتوا قبل ما يتجوزوا.

للأسف هو ده الجواز عن علاقة، أو اللي بتسميه حضرتك وغيرك من البنات جواز عن حب الجامعة والفيسبوك والكافيهات اللي نسبة نجاحهم أقل من واحد في الألف..

صديقي الحب الوهمي ده مجرد انفعالات ممكن تعمي عينيك عن صفات الإنسان اللي قدامك، وصدقيني كمان جواز الصالونات ممكن يتحول لقصة حب عنيفة لو اكتمل الاقتناع بالصفات، وثقي إن الفرق بين الجواز عن حب وجواز الصالونات هو نوع المكان بس مش أكثر، بمعنى جواز الصالونات بتقابل العريس في صالون.. لكن الجواز اللي بتسميه جواز عن حب بتقابل العريس في كافيه أو بلاج، أو أي مكان (مرة ضحككت على بنت وقلت لها شيلي الصالون من بيتكم وحطي مكانه ترايزة عليها ورد وكرسيين، علشان لما يجيلك عريس مانقوليش انه عريس صالونات وتعرفي تحسي بيه) اشتغلته يعني.

يااارب أكون اشتغلتك.. قصدي أقنعتك.



طالما الكتاب ده إسمه كتالوج سي السيد، يبقى تعالي
أكلمك شوية عن أنواع سي السيد عريس الصالونات:

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

النوع الأول العريس المحترف:

وده شاب قطع السمكة وديلها ومناخيرها كمان، وفي النهاية قال أحسن حل يتجوز صالوناتى، يعني يدخل البيت من بابه، من غير ما يعرف حتى مين اللي ورا الباب، وقناعته بتقول كفاية انها متربية وخام وماهاش تجارب، طالما مستتية عريس صالونات... (فاهم غلط العييط).

والنوع ده بيبقى إلى حد كبير جذاب ومهندم ووسيم ومتكلم، بس عينه تندب فيها رصاصة، يعني هيبص لك ويفرزك من فوق لتحت بمنتهى الجراة، هتلاقيه هو اللي بيتكلم مش حد من أهله.. دالو جاب حد أصلا معاه.. هيخطفك بالكلام ويخطف أمك بالإعجاب.. (تسلم إيديكي يا طنط على البيسي سكره مضبوط جدا).

والنوع ده أكيد هيعجبك، ووارد جدا توافقي عليه فوراً (لو اتخلىتي عن خوفك) وعلى فكرة أنا مش ضدك توافقي، بس لازم تعامله من أول لحظة بالطريقة اللي تناسبه ومتوقعها منك، يعني كلام في حدود.. عنيكي باصة في الأرض بحياء شديد.. هدوم متحفظة جدا.. تسيبي لأبوكي مساحة يتكلم وتحترميه جدا.

بس الأول خدي بالك من كام نقطة...

(الأولانية)

مش معنى إنك محترمة ومتربية ومالكيش تجارب، إنك تبقي رخة وخنيقة وقاعدة مكشرة وبوزك شبرين، وقاعدة زي الكبة..

لااا يا مامااا كده هيخلع، ومش هيخلع بس.. ده هيخلع ويروح يتجوز رقاصة من شارع الهرم وهو يقول لنفسه مش ناقصة خنقة يعني.. مش هاجيب لنفسى كابوس في البيت.

علشان كده لازم تفهمي إن بنت مؤدبة يعني بنوثة الحياء باين في كلامها، مافيش ألفاظ مباشرة فيها إعجاب... ماتقبليش تجاوز منه أبدا... صوتك يبقى واطي (تصوصوي)، ردودك بسيطة ومش هجومية.. ابتسامتك بسيطة وخجولة (مش ضحكة سونيا العاملة) بس طبعا مهم تكوني لبقة وتجاوبي بحكمة.. وتسألينه أحيانا مش تخليه يركنك في ركن الاعتراف ويحولك لرد فعل وتعرقى وترتبكي وتتوتري وتفضحينا!

لا على إيه؟ وري له سونيا العاملة أحسن!

(الحاجة الثانية)

اسألني نفسك..

هل انتي موافقة أصلا على النوع ده من العرسان؟ يعني عايزة واحد ليه تجارب ولا بتفضلي العريس الخام الملتزم؟ ده اختيارك، فيه بنات بترفض النوع ده رغم إنه بيبقى جذاب.. وبتقول مش ناقصة وجع دماغ.. أنا إيه اللي يجبرني آخذ واحد ليه تجارب ووارد مايكونش اتغير، ووارد يكون عايز يتجوز واحدة محترمة تربى العيال ويكمل حياته زي الأول وعلى فكره ده فعلا وارد.. ووارد بنسبة كبيرة لأن الراجل صعب يتغير، وفي الحالة دي هاقول لك اعتذري لأنه مش مناسب لقناعاتك.

لكن لو وافقتي من منطلق انه جرب وتاب وشبع واتهدد.. يبقى لازم تفهمي إنه لو ماكانش اتغير أو على الأقل ماتغيرش ف فترة الخطوبة يبقى عمره ما هيتغير وهيفضل طول عمره ف تجارب، وهتعيشي معاه أيام سودا وهتكروي اليوم اللي التجوزت فيه... علشان كده النوع ده بالذات لازم أبوكي وأخوكي يسألوا عليه في شغله والحلي بتاعه، ويعرفوا

نوع أصدقاءه وأهله، تحطيه تحت الميكر وسكوب من أول يوم.. كما أن ما عنديش مانع لأي اختبار عمليه معاه، المهم تتأكدى انه اتغير أو على الأقل عند استعداد يتغير، ولو اكتشفتى إنه لسه ماشى ف طريقه ومصمم على تجاربه يبقى أرجوكى اخلعى، لأنه كده مستحيل هيتغير، وأرجوكى أرجوكى إوعى تقولى لى الجملة اللي بتعصبنى (صدقنى أنا هاقدر اغيره مع الوقت).. جبتي منين الثقة دي؟ مش عارف! أبوس إيدك بلاش تضحكى على نفسك.

تاني نوع العريس الخام:

وده عريس مش بتاع لف ودوران.. شاب مالوش تجارب.. يعنى كان مقضيها فى الجامعة مذاكرة وبعد الجامعة شغل.. وارد يكون دخل تجربة حب وباطت فقرر يعتزل الحب...

ووارد يكون عملي ومحترم والحياة بالنسبة له مراحل وخطوات.. والجواز هو خطوته الحالية.. ويمكن يكون سافر بعد التخرج لأي دولة واشتغل برضو وراجع عايز يتجوز ويلحق عمره ويفتح بيت. النوع ده غالبا ليه صفات مميزة، وبتكون عكس صاحبنا الأولانى (المحترف).

يعنى غالبا مش بيبكون مهندم ولا لبق، وأحيانا بيبقى خجول بسبب انعدام تجاربه، علشان كده بترفضيه من أول مقابلة، لأنك بتتخيلي إنه هيفضل كده على طول..

والنوع ده بيشكل جوة دماغك صورة عريس الصالونات التقليدي. بس والله الراجل ده مظلوم، ومش ذنبه خالص إنه عاش حياته محترم ومؤدب.

من صفات العريس ده إنه وارد تلاقي أهله بيتكلموا بالنيابة عنه، وبالذات أمه.. برضو ماتخافيش لأن ده غالباً بسبب انعدام خبرته واحترامه ليهم، وأحياناً بسبب إنهم بيساهموا مادياً في جوازته، وبالتالي بيطالبوا بحقهم في التدخل خوفاً عليه..

(لو بتاع امه أو ممسوح الشخصية هيبان مع الوقت، بس بلاش نتسرع في الرفض).

بصي.. أنا شخصياً باحترم النوع ده من العرسان، علشان كده بارجوكي بلاش تقيّميه من أول مرة، وادّيله فرصة أو اتنين كمان، وبإذن الله ربنا هينفخ في صورته ويتدرج وتبان شخصيته الحقيقية ف تاني أو تالت مقابلة، وثقي تماماً إنك ممكن مع الوقت تساعديه يغير طريقة لبسه ومظهره بالكامل... (وممكن ينزل كرشه ويزرع شعر لو ضايع خالص يعني.. احمدي ربنا إنك لقيتي عريس أصلاً) يعني شيلي من دماغك فكرة انه هيفضل كده مدهول على طول.

طب لو لقيتي أمه بتتكلم بالنيابة عنه زي ما قلت؟ برضو ماتتسر عيش في الحكم (أنا عارفك بتترعبي من بتاع امه) بس ركزي في المقابلات اللي بعد كده، هل هو بيحترمها ويبرها؟ وده يبقى أعظم راجل في الدنيا، ولا شخصية ممسوحة قدامها ومش بيعمل أي حاجة غير لما يرجع لها؟ وده بقى أسوأ راجل في الدنيا، وساعتها اخلعي فوراً واديله كمان البرتقان اللي جابه ف داهية، يبقى يأكله لأّمه.

طب لو اتقدم لك عريس مسافر برة وما جاش وباعت حد يشوفك؟ اعتذري وارفضي لحد ما يجي.

وبرضو لو نازل أجازة أقل من ٣ شهور وعائز يتجوز ارفض،

وماتقوليش هاعرفه مع الوقت، وبالذات لو هياخذك معاه.. صدقيني
جوازات التيك او اوي مش بتعمر، لأنك مستحيل هتكتشفي صفاته
هناك، وهتبقى غربة وطن وغربة راجل.. صعب، بلاش...

- طب لو خطب وسافر على طول؟

ماعنديش مانع، بس يرجع برضو ونقعد على الأقل من ٣ ل ٦ شهور
نعرف بعض قبل الجواز.. وماينفعش نقول أصلنا خلاص عرفناه بالشات
والتليفون.. غلط غلط.. مش هيبان غير بالعشرة والمعاملة صدقيني.

تالت نوع الملتزم دينيا

طبعا هو عريس هايل.. هيبقى محترم ويحافظ عليكى ويبنى معاكى
بيت يوحد ربنا وياخد بإيدك للجنة.. بس قبل ما توافقى عليه لازم
تراجعي مفهوم الالتزام الديني جواه.. يعني هل هو متدين بالشكل
والعبادات بس؟

(جلباب وحية وعلامة صلاة والتزام بالفروض والنوافل وكلام
بالحديث والكتاب؟) ولا ملتزم كمان بالمعاملات؟

يعني ازاى بيعامل أهله وجيرانه؟ ازاى بيعامل الناس اللي مايعرفهمش
في الشارع؟

هل فعله زي عمله؟ ولا متدين صورة بس؟

ركزي الله يكرمك، علشان المصيبة دي بتقع فيها بنات كثير، يعني
تقول لي يا عمو إيهاب انا زهقت من الشباب المنحرفة وعازية اتجوز
واحد بتاع ربنا، علشان احس معاه بالأمان ويحافظ عليا.. وبناء عليه

بتختار المظهر الديني بس، وتتجوزه بسرعة جدا بدون ما تصافه
الي ممكن أحيانا تكون أسوأ من الشخص المنحرف..

يبقى لازم قبل ما توافق على العريس الملتزم تعرفي الفرق بين
العريس المتدين والعريس الي عنده دين، ودول هاشرحهم لك حالا:
١- العريس المتدين منظر:

متدين دي صفه على وزن متزين، عايننا منها كثير، وده غالبا بيبقى
حاجة من اتنين:

- إمان نصاب... وده عبارة عن شاب لابس قناع الدين، سواء بالسمت
(المظهر الخارجى) أو بالكلام، وأحيانا بكثر العبادات الظاهرة والمعلنة
للناس (على طول صوم وصلاة قدامهم بس) طبيعي لما تشوفيه هتحسي
بالأمان، وتقولي هو ده اللي هيحافظ عليا ويراعي ربنا فيا! لكن مع
الاحتكاك والمواقف تلاقيه إنسان بلا قلب أو ضمير، وأفعاله مخالفة
لكلامه، وده على طول لازم تفهمي إنه بيمثل التدين، وواخده مصيدة
يصطاد بيها البنات اللي بتدور على الشاب الي عنده دين زي حضر تك.

- إمان متشدد... وده عبارة عن شاب اتعلم الدين غلط، اتعلم انه
عبادات بس، وتلاقيه مواظب عليها جدا وبيبالغ في أداءها بشكل
يبهرك، يهتم بالسمت جدا وعلى طول شايف ان معاه الحقيقة المطلقة
وأي حد غيره إما جاهل أو فاسد، بيتبع أكثر الشيوخ والمناهج تشددا
ويعتبرهم آلهة منزهين عن الخطأ، تلاقيه قاسي جدا ومش بيغفر ولا
يرحم، تلاقيه منغلق على ناس معينين بيغلفوا عالمهم بسور يعزلهم عن
غيرهم، هيطلب منك تبقي متشدة زيه من منطلق إننا ف زمان الفتن
والحل هو الانعزال عن الناس اللي هيفتنوكم في دينكم.

وده برضو باسميه متدين زي اللي قبله، يعني متزين.

للأسف النموذجين أسوأ من بعض وماينفعوش...

علشان كده بلاش تنخدعي بالمظهر والكلام وشوفي التطبيق، اسألي عليه كثير، شوفي أولا معاملته مع الناس وبالذات أهله وجيرانه، زملاؤه وأصدقائه، ثانيا معاملته معاكي بالذات في الماديات والمواقف الصعبة والأمور الأخلاقية، لو لقيتي صفاته مش متناسبة مع عباداته اخلعي فوراً.

٢- العريس اللي عنده دين:

أما بقى اللي عنده دين فهو إنسان رائع، إنسان بيعرف ربنا بجده، ممكن يكون عنده سمت وممكن لأ، بس هو طبعا لازم يكون بيأدي الفروض والنوافل على الأقل، تلاقي الناس كلها بتحبه وبالذات أهله، لأنه دايماً جنبهم ويعرف يعني إيه صلة رحم، تلاقيه هادي ومتواضع ومتقبل للخلاف، تلاقيه رحيم وبسيط، شايف ربنا ف كل تصرفاته، عارف يعني إيه امرأة ضعيفة، طفل محتاج، شيخ عاجز، شايف إن العاصي حد مريض ومحتاج ربنا ياخذ بيده، وواثق إنه كان زيه ف يوم من الأيام وربنا كتبه الهداية، إنسان اترى على الأخلاق واتعلم ان كل العبادات غير إنها طاعة لله في نفس الوقت تقويم للأخلاق، هو ده... هو ده اللي نعاشره ونكمل معاه حياتنا، حتى لو لسه بيتدي حياته.

رابع نوع العريس المطلق

وده راجل سبق له تجربة الجواز مرة وفشل (لو طلق مرتين يبقى كوني حذرة أكثر) وارد يكون الفشل بسببه هو، ووارد يكون الفشل بسبب مراته، والفيصل في الموضوع هو إجابة السؤال ده:

يعني مش هتقبله غير لما تعرفي سبب فشله في جوازه بكل الطرق (ومش عيب تقولي له هنسأل طليقتك)..

وبالفعل حاويي توصلي لها وتسألني عليها حتى لو من بعيد... لو كانت محترمة ومشهود لها بالأخلاق والدين يبقى الاحتمال الأكبر العيب كان منه، ولو العكس يبقى احتمال كان مظلوم، كمان مهم تعرفي ازاى طلقها.. هل كان تسريح بإحسان زي ما الدين بيقول؟ ولا قواضي ومحاكم؟ والأهم لازم تعرفي اداها حقوقها ساعة الطلاق ولا كان طلاق على الإبراء؟ طبعا الزوجة اللي بتبري جوزها أو بتخلعه، وبتتنازل عن كل حقوقها، أكيد كان نفسها تخلص منه بأي طريقة.. وساعتها لازم تقلقي..

أما لو كان طلقها بما يرضي الله وادها حقوقها، أو سمعتي انها بتقول عنه كلام كويس بعد الطلاق، وهو كمان بيتكلم عنها كويس، يبقى أكيد كان خلاف في الشخصيات وخرجوا بالمعروف زي ما دخلوا، وساعتها التجوزيه وانتي متطمنة.

كمان ثقني إنك مش هتتجوزي واحد مطلق لأنك مضطرة، أو لأنه المتاح قدامك، أو سنك كبر، أو عايزة تهربي من زن أمك وابوكي... لاااا دا إسمه جواز هروبي، إوعي تقعي فيه، وخليكي في بيت أبوكي أحسن... لكن ما عنديش مانع تتجوزي راجل مطلق لأنه محترم، وعنده دين وأخلاق، أو اتظلم في جوازته الأولانية.. وف كل الأحوال انتي هتسألني عليه، وكمان هتأمني نفسك معاه بالحقوق الشرعية المعقولة.

- طب لو كان عنده أولاد؟

لو أولاده مع أمهم ما عنديش مانع.. لكن لو معاه، يبقى أسألني نفسك هل هتقدري تبتي حياتك بتربية ولاد غيرك؟ رغم ان وجودهم معاه دليل على إنه محترم وأمهم هي اللي كانت ظالمة.. بدليل انها اتخلت عن ولادها وعاشت حياتها (إلا إذا كان واخدهم منها غضب)..

في كل الأحوال لازم تفكري كويس.. هل هتقدري تربي ولاد غيرك مع ولادك في المستقبل ان شاء الله ولا لا؟

أنصحك كمان ماتعمليش كده إلا إذا كان عريس لقطه ف كل حاجة، وخرج من التجربة الأولى مظلوم ومراته رمت له العيال زي ما قلنا، أو يكون عندك القدرة النفسية انك فعلا تربي ولاد غيرك وبتعملي ده تقرب لربنا سبحانه وتعالى.

خامس نوع العريس الأرملة

طبعا ده راجل ربنا ابتلاه ابتلاء عظيم، وغالبا يبقى دليل انه إنسان كويس (إلا إذا كان هو اللي قتلها) وفي الحالة دي بانصحك تتجوزيه بعد ما تتأكدي من أخلاقه ودينه.. وتسألني برضو عن علاقته السابقة، ولو عنده عيال يبقى فكري بنفس الطريقة اللي فاتت (العريس المطلق) مع اعتبار إنهم يتامى وثوابك عظيم لو ربيتهم (بس تكوني قادرة نفسيا) ولو مش قادرة يبقى ارفضني وثقي إن رفضك مش عيب ولا حرام، والأحسن تخلعي من البداية، أحسن ما تتعييه وتتعي مع الوقت (لا يكلف الله نفسا إلا وسعها).

أنا ليا كتاب قديم اسمه (برضه هاتجوز ثاني) كنت اتكلمت فيه عن الموضوع ده باستفاضة، وهاخلص لك هنا موقفي بكل حيادية وصرحة.. بس لازم تفهمي من البداية إني عموما ضد ان البنت اللي ماسبقش ليها الجواز توافق على الراجل المتجوز، لأنها أكيد ماجربتش قبل كده مشاعر الغيرة، وخصوصا الغيرة من زوجة ثانية، كمان ماجربتش تحس ان جوزها مش بتاعها لواحد، كمان ماجربتش تستحمل ان جوزها يبات في حضن غيرها أو يهتم بولاد غيرها.. يعني لازم تغمضي عينيكي وتتخيلي بكرة بدون أي أو هام أو انفعالات عاطفية.

حالة واحدة اللي باقول ينفع تتجوزي واحد متجوز (بالإضافة طبعا للنقط اللي جاية) إنك تكوني عندك أحلام كتير وعالم خاص كبير وواسع (دكتوراه - نجاح إعلامي - نشاطات كتير - أسرة ثانية محتاجة جزء من حياتك)، في الحالة دي مش هتبقني محتاجة حياة كاملة، أو راجل كامل، ولا هيبقى عندك وقت كافي تعملي بيت بالأسس التقليدية.. ساعتها ممكن تتجوزي راجل متجوز (برضو بالشروط اللي جاية) علشان انتي أصلا ساعتها اللي هتبقني محتاجة لنص جوازة علشان تتفرغي لنصك الثاني..

ودي الشروط اللي تراعيها لو ناوية توافقني عليه:

- ماتكونيش مضطرة، يعني مش جواز هروبي من أي حاجة.
- مايكونش راجل كل يوم يتجوز ويطلق أو بتاع ستات.
- مراته تكون عارفة، لأنها لو عرفت بعد كده هيطلقك.
- يتجوزك بنفس طريقة جوازه الأولى (إشهار - شقة - مؤخر - شبكة)

- يكون سنه وصحته مناسبين.
- مايكونش بيتكلم وحش على مراته الأولانية، ويكون حنين معاها ومديها كل حقوقها هي وولاده.
- يكون عنده القدرة المادية والصحية والوقت والطاقة للجواز الثاني.

• يكون أهلك وأهلك موافقين بالكامل وسألتو عليه كثير.

طبعاً الشروط دي لو كانت دي أول جوازة لحضرتك.. لكن لو سبق ليكي الجواز أو عندك أولاد، هيبقى الموضوع مختلف شوية.. بمعنى إن الجواز بينكم هيبكون مبني على الاحتياجات المشتركة.. هو هيقدم ليكي احتياجاتك، وانتي هتقدمي له احتياجاته مقابل وجودكم في حياة مشتركة... وده مش عيب لأنه أصل من أصول الدين، وإوعي تقولي انها صفقة، لأن الحياة نفسها صفقة.

سابع نوع العريس العادي

وده شخص عادي جداً ممكن مايكونش واحد من الستة اللي فاتوا.. وممكن يكون كلهم.. المهم انه راجل قرر يتجوزك انتي بالذات، يعني سمع عن أخلاقك وجمالك.. أو كان زميلك في الجامعة وافتكرك لما شافك في فرح، أو ممكن يكون زميلك في الشغل أو جارك في الحي.. أو من قرابيك أو معارفك أو أخو صاحبك، المهم انه شخص عادي.

والعريس ده مش هنسميه عريس صالونات، لكن هنسميه عريس معارف.. وده أفضل نوع في العرسان على الإطلاق، لأنه بيتوفر عنه مسبقاً معظم المعلومات المطلوبة، ويبكون بينكم ناس كثير يعرفوكي ويعرفوه، فيسهلوا الموضوع.. لكن ده مايمنعش طبعاً إننا نسأل عليه..

ونأخذ فترة خطوبة كافية حتى لو كان زميلك في الجامعة أو الشغل، لأن العريس يبيان على حقيقته مع الاحتكاك في الحياة العادية، مش في الشغل ولا الدراسة..

.....

دي قناعاتي عن جواز الصالونات، ودي معظم نماذج العرسان اللي وارد تيجيلك عن طريقه، وانتي طبعا من حقك تقبلي الفكرة وتقتنعي بكلامي أو ترفضيه.

وعلشان أبقي عملت اللي عليا وراضيت ضميري هاديكي ملخص لكل اللي قلته، لأنني عارف انك واخدة على موضوع الملازم والملخصات والجوده، وتموتي في المذاكرة آخر يوم قبل الامتحان:

علشان جواز الصالونات ينجح:

- مهم جدا الوسيط ينقل المعلومات الأساسية عن كل طرف للتاني قبل الزيارة الأولى، علشان نوفر على نفسنا حاجات كثير.. يعني لازم تعرفي ويعرف مستواكم الاجتماعي.. وقناعاتكم ومذاهبكم الدينية، وأهم حاجة تسألني عن دينه (ودين أهله).... تعرفي كمان بيشتغل فين؟ حالته الاجتماعية (مطلق - أرمل - عازب) ويا ريت كمان كل واحد فيكم يشوف صورة التاني قبل ما يجي، وده مهم علشان صدمة المقابلة الأولى (لو انتي مش منتقبة خلي ليكي صورة على الفايس بوك وسط الفوتوز واقفة بالكامل وجنبك أهلك أو حد من أصحابك).

• لازم نشيل من دماغنا فكرة إننا لازم نتجوز عن حب، ونصدق
إننا ممكن مع الوقت نحب واحد جاي يتقدم صالونات بسبب
صفاته.

• لازم نشيل فكرة إن العريس جاي ينقي بضاعة أو يبيع ويشترى
فيها، ونصدق إنه هو كمان في مجال تقييم.

• لازم نشيل من دماغنا فكرة فارس الأحلام القديمة، ونقعد
نقارن بين الواقع والخيال.. وبين الواد اللي كنتي مصاحباة قبله.

• لازم نصدق إن جواز الصالونات لو تم بيقي أنجح من جواز
الحب.. لأنه ابتدى بالتقييم العقلي في غياب العاطفة اللي بتبرر
وتخفي العيوب.

• لازم نصدق إن المقابلة الأولى بلا قيمة ولا تدل على شخصية
أي طرف، نتيجة الخجل والتوتر، وبالتالي نتخلص من فكرة
الانطباع الأول وندي العريس فرصة ثانية وثالثة.

• لازم نتق إن المقابلة الأولى هدفها التقبل وليس القبول (يعني
لو مش ممسوخ شكلا وموضوعا نديله فرصة ثانية).

• لازم نبطل نتكلم في القضايا المصيرية ف أول قعدة (هتسكن
فين؟ - هتخليني أشغل ولا لأ بعد الجواز؟ - هنخلف كام
عيل؟) لأنها مقابلة تعارف فقط.

• لازم البنت ترفض إن الولد يزقها ف خانة الاعتراف، وبتبدي
يسأل بصيغة التحقيق (والعكس طبعا).

• لازم البنت تبطل تقييم العريس بكيس الفاكهة اللي داخل بيه
(المعفن داخل إيد ورا وإيد قدام - القبيحة داخل بكيس حرنكش).

- لازم البننت (إذا عجبها العريس) تبطل تبالغ في مجاملة أمه، أو تمسك فيهم على العشا، أو أبوها يقول بنشترى راجل وكلام الهجص ده، كمان بلاش نطلب ولا نوافق نقرا فاتحة من أول مرة.. خليكي ثقيلة.

تحذيرات عامة:

- إوعي تقيمي العريس بعريته ولا بهدومه ولا بطريقة كلامه من أول مقابلة، استنى المقابلة الثانية أو الثالثة وتمعرفي كل حاجة.
- لما العريس يطلب موبايك في المقابلة الأولى اعتذري بشياكة، طالما لسه ماقراش فاتحة.. ولو طلب الأكونت ماشي، بس ماترديش عليه لو دخل الخاص.
- لو العريس أو الوسيط سألك عن رأيك في العريس وكان عاجبك، قولي مستريحة مبدئيا بس هاستخير ولسه لما نقعد ثاني هيبان.
- لو العريس مشي وماتصلش أو الوسيط ماعتذرش بلاش تسألني، وافهمي إنه ماحصلش نصيب.
- بلاش تبالغي في التصنع (هدوم - طريقة كلام) والأخطر بلاش تبالغي في التلقائية (ملامح شاحبة - هدوم مبهدلة - كلام باستهتار) على أساس انك عايزاه يقبلك زي ما انتي...
- أرجوكي بلاش ضحكة إيغمالادوس خاالص ونكتفي بابتسامة ورد مختصر وكلام محدد ثقيل ومرتزن.
- لو لقيتي القعدة كلها استجواب ليكي، اقلبي الموضوع هزار وبطي تجاوبي.. كمان بلاش تستجوبي العريس.

• وأهم حاجتين بلاش تقولي لأم العريس يا طنط، قولي لها حضرتك ويا فندم، لأنها لسه مابقتش طنط.. كمان بلاش أمك تزغرط لو العريس قال نقرا الفاتحة، أو حدد ميعادها.. كفاية فضايح بقى عريتونا.

• بلاش مكياج ثقيل، وبلاش ندهن الشقه قبل ما يجي.. يعني لا تدهني وشك ولا تدهني الشقة.. خليك كده على المحارة (قال يعني مش فارق معاكم جنبه) بس أرجوكي استحمي علشان الريحة.





فترة الخطوبة

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

ألف مبروك العريس خلاص اتقدم وخطبك، يعني بقيتي خطيبته وكلها كام شهر وهتبقي مراته، علشان كده ومن منطلق المفهوم الدارج ده هيبتدي يطالب بحقوق أقرب لحقوق المتجوزين، رايحة فين، وجاية منين، ماتنزليش غير بإذني حتى لو مع ابوكي، ووارد يطلب تجاوزات غير محترمة من نفس المنطلق، ما انتي خلاص هتبقي مراته!

لكن هل الكلام ده صح؟

تعالى اما اصدمك:

تعرفي إن أكثر من ٨٠٪ من الخطوبات في مصر والمنطقة العربية بتنتهي بالفشكلة؟ يعني الباشا اللي عامل فيها جوزك ده احتمال ٢٠٪ بس إنه يتجوزك، والـ ٨٠٪ الباقين الموضوع هيتفشكل، سواء منك أو منه، وهتقابليه في الشارع بعد كده زي أي واحد غريب.

تخيلي بقى لو كنتي عاملتيه كجوزك أو قدمتي أي تنازلات كان هيبقى شكلك إيه قدامه أو حتى قدام نفسك؟ (مش هاقول لك قدام ربنا علشان ماتقوليش عليا عايش في الدور، رغم انها أهم واحدة فيهم) يبقى لازم تفهمي من دلوقتي يعني إيه كلمة خطوبة، وإيه حقوق الخطيب وإيه المسموح بينكم وإيه المرفوض.

الخطوبة مش جواز

الخطوبة مجرد وعد بالجواز، مجرد تجربة وفترة تعارف، وارد تفشل ووارد تنجح، علشان كده لازم تعتبرها الجسر اللي بتعبريه علشان تروحي لعش الزوجية، وعلشان تعبري الجسر ده بأمان لازم تذاكري

كويس، علشان تجيبي مجموع يدخلك عش محترم (مش أوضة وحمام
إيجار جديد مع صبي ميكانيكي)، ماينفعش تقضيها مراجيح وحب
وهيام وسهام ومنال والكلام الفارغ ده، ماعنديش مانع نستمتع بيها
لكن يبقى عقلنا شغال وحاطين العريس في فترة تقييم واختبار، علشان
كده أرجوكي التزمي بالقواعد دي:

- طالما لسه ماتجوزتيش يبقى ماينفعش يتقال له يا بيبي ويا حبيبي
ويا جوزي والكلام الاهبل ده... وطالما الموضوع كله دبلتين
بـ ٢٠٠ جنيه، واحده منهم فضة، يبقى بالكثير تقولي له يا مدهول.
- قرارات ابوكي وامك واخوكي تمشي على التخين (فاهماني أقصد
مين طبعا) ماينفعش يقول لك رايحة فين وجاية مينين وصاحب
دي وقاطعي دي، يعني لو ناوي يعمل عليك راجل اعلمي
عليه شوربة.
- لو اكتشفتي عنده عيوب وفيه أمل إنه يتغير يبقى هيتغير في
فترة الخطوبة، لكن يقول لك بعد الجواز هتغير! ده عند امه.
- مش عايز قلة أدب، وطبعا فاهماني كويس.. أقسم بالله إن
الغريزة لو دخلت على الخط هتهدم العلاقة، وهتعمي عينيك
عن كل عيوبه، وهتدمنيه، ومش هتفوقي على العيوب دي غير
بعد الجواز، ده غير إنه وارد يخلع قبل الجواز وتعيشي طول
عمرك مكسورة علشان ادتي لحد ما يستاهلش، يعني كلام في
الجنس ممنوع، وصف لجسمك في الموبايل ممنوع، شات لوش
الصبح ممنوع، تعلمك السواقة في طريق السويس الصحراوي
ممنوع جدا، تدخلني سينما جلاكسي وجولدن سيتي أقطع رقبتك

(فيهم سراير)، يزور أهلك وهما مش موجودين وتزوري أهله
ومن غير اخوكي هاخنقك.

• مافيش داعي تحكي عن تجاربك السافلة.. أقصد السابقة قبله،
ربنا سترك يبقى توبي كده واتلمي وابتدي حياة جديدة على
مية بيضا.

• فيديو كول أو شات بصورة بلاش، لأنه عادي جدا يسجلهولك
ويفضحك على اليوتيوب لو فشكلتو، هيقول لك ابعتي لي
صورتك بشعرك بهدوم البيت.. والمصحف تلاقهم بكرة على
مواقع التواصل، وتحتهم رقم تليفونك وتليفون الوالد لمزيد
من المعلومات.

• لازم نخلع الأقنعة من أول يوم، ونعترف بعيوبنا ونخير الطرف
الثاني يكمل ولا يخلع، أو نتفق نساعد بعض علشان نتغير، ولو
فشلنا نعترف، لكن لو ظهر مع الوقت ف خطيبك عيوب لا
تطاق زي (البخل - الشك - الكذب - تبعية الأهل - عدم التدبير
- الغرور والأنانية) ساعتها لازم تخلعي وإوعي تسمعي كلام
امك لما تقول لك (صدقيني يا بنتي هيتغير بعد الجواز) أقسم
بالله عايزة تخلص منك وخلاص، وبكرة ترجعي لها مطلقة
بعيلين (العيلين ولاد جوزك من مراته الثانية).

• نحط دايا العريس تحت الاختبار ونسأل عليه، ونزور أهله
ونتعرف عليهم، ونشوف رأيهم فيه، ونعزم صحابه معاه مرة،
ونشوف خلقتهم إيه.

• ماينفعش تحكي حاجة مش كويسة عن أهلك ولا تطلعي

أسرارهم، ولا تسمححي له يتكلم عليهم بشكل مش لائق،
ودايبا انقلي كلام حلو من كل طرف للتاني (ماما بتحبك قوي)
يعني ازرعني الحب بين كل الأطراف، واتعاملي كويس مع أم
العريس ماسمهاس (حماتي ولا ماما) اسمها طنط بس، وجيبني
لها هدية ف عيد الأم لما هو يجيب هديه لأمك، واللي مايعبرش
امك ماتعبريش اللي جابوه.

- لما تلاقي خطيبك غبي في التعامل مع أهلك، أو مش يفهم في
الأصول، علميه بشكل غير مباشر (خطيب اختي كان بيعمل
كذا) يعني مثلا ماتخليهوش يجيلكم كل يوم علشان امك ما
تتخفقش منه، ومش لازم يتعشى كل مايجي (مش هنصرف على
أهله كمان)، ومش لازم يجيب هدية أو فاكهة كل مرة، ممكن كل
شهر كفاية وحاجة بسيطة من باب التقدير، وأرجو كي بلاش
تخليه يستهيف وياخذ على أهلك بزيادة ويعمل واحد منهم،
خلي دايبا بينهم حدود الوقار، وبلاش يعمل فيها على طبيعته
ويزوركهم بالبيجامة أو يجيب سندوتشات طعمية وهو جاي.
- مقابلاتكم تبقى في النادي وسط الناس، أو زيارات في بيت
أهلك وبقوا شايفين المقابلة بس مش سامعين حواركم.

حفلة الخطوبة وطقوس الجواز المقلدة

من الآخر كده حفلة الخطوبة عند المصريين والعرب عموما معناها
خراب بيوت، سواء كانت ظرو فهم كويسة أو حتى مقلدة، في الحاليتين
تبقى بذخ وفشخرة على خلق الله.

واحنالسه بنقول انها فترة تعارف واختيار ووارد تفشل، يبقى إيه

لازمتها بقى المصاريف والبهدة والفضايح وصور الفايسبوك اللي
بتخلي الناس يحسدوكم وتفشكوا بعدها بيومين؟!!

وبعدين مش فاهم ازاي هتفشكلي بعد كل الفضايح والمصاريف
دي لو طلع مش مناسب؟

طب تصدقي بالله.. نص حالات الجواز اللي بتجيلي المركز والاقبيها
فاشلة باسأل الزوجة.. هو انتي ماشفتيش عيوب العريس أيام الخطوبة؟
تقوم ترد تقول لي والله شفتها بش ماكانش ينفع افشكل علشان شكلي
قدام الناس، ده احنا عملنا فرح بالشيء الفلاني وعزمننا الدنيا كلها
وصورنا كانت مالية الفايسبوك، وبعدين انا اتخطبت قبله مرتين...
يعني ماكانش ينفع افشكل تالت!

طب وليه كده؟ ما نحترم نفسنا ونداري على شمعتنا!

يعني إيه المانع لما العريس يتقدم، ونقرأ فاتحة لمدة شهر شهرين، من
غير ماحد في الدنيا يعرف غير أقارب الدرجة الأولى؟ ولما نتأكد ان
العريس مناسب، نعمل خطوبة محدودة جدا بدون تكاليف، يعني نعزم
الأهل والأصدقاء بس (٥٠ فرد هاي تي) وشكرا، ولو الموضوع فشكل
نبقى نطلب من المعازيم تمن الجاتوه والشاي اللي شربوه... حقنا طبعاً.

كمان لو حسيتي إنه مش مناسب يبقى اخلعي، حتى لو قبل الدخلة
بساعة، صدقيني اتخطبي مرة واتين وخمسين لحد ما تلاقي العريس
المناسب، وإوعي تسمعي كلام امك ولا كلام مدام فوزية جارتكم
الحشرية (يا بتي الناس هتقول عليكى إيه؟ كل يوم تتخطبي وتفشكلي!)
أيوه اتبلطجي وفشكلي وعلى ضمانتي، ولو مش عاجبهم خدي
سنطتك وروحي دار مسنين أو تعالي نضرب ورقتين عرفي.

لا أنا محتاجة واحد يعيشني بكل تفاصيلي وأعيشه بكل تفاصيله،
واحد مشغول بيا وفاكرني طول اليوم، وبعدين لما احنا دلوقتي كده،
أو مال بعد الجواز هنبقى ازاي؟!

أنا فعلا حاسة اني لسه سنجل، بس إيه اللي يجبرني على كده؟ والمصحف
لاخلع أمه من دلوقتي.

.....

هو ده بعينه المرض اللي معظمكم كينات متجوزين أو مخطوبين
عايشينه، مفهوم عقيم زرعه فيكم من طفولتكم (الراجل كل حياتك!)
والنتيجة: ٨٠% من الخطوبات فاشلة و ٦٠% من الجوازات فاشلة، يعني
منظومة فاشلة بالكامل، وكل ده لأن الأستاذة بتكتشف مع الوقت إنه
مش الكائن الوهمي اللي راساه في خيالها، نتيجة صورة ذهنية اترسمت
من خلال حب الأفلام والقصص الأسطورية اللي اتكلمنا عليه، بس
الحقيقة إن الراجل عمره ما كان ولا هيكون الكائن الوهمي اللي بتحلمي
بيه، لأنه ببساطة إنسان من الواقع، راجل متبرمج بطريقة مختلفة عنك،
متبرمج على تحقيق الأحلام وتحمل المسؤوليات وبتحركه الاحتياجات
مش المشاعر زي حضرتك، حتى لو كان بيمثل في بداية العلاقة انه
رومانسي وهاريكي كلام حب فده عكس طبيعته العلمية (وطبعا الاستثناء
موجود لكن قليل) بس في المجمال اللي بتعمليه ده خنقة ليكي وليه.

علشان كده اسمعيني قبل ما اموت مشلول وهاقولهالك لآخر مرة:

١ - للمرأة عالم خاص ومكتمل بدون الرجل، عبارة عن (دراسة -
أحلام - دين - أصدقاء - عيلة - ثقافة - حرية - أفكار) هذا العالم ليس

للرجل وجود فيه (لا الزوج ولا الخطيب ولا الحبيب) إلا مجرد زائر
لحد ما طرف من الاتنين يغور في داهية بعد الشر ويموت.

٢- وللراجل نفس العالم بنفس التفاصيل، وليس للمرأة أي مكان
(لا الحبيبة ولا الزوجة ولا الصديقة) مجرد زائرة خفيفة تلقي التحية
وتختفي في أي مصيبة.

٣- العالم المشترك:

هو ده اللي من حقتك تتكلمي عليه وتلاقي فيه كل أحلامك معاه،
عالم خاص بيكم لو حدكم، مش من حق حد يقتحمه، لا فايسبوك ولا
واتساب ولا موييلات ولا أصدقاء ولا أهل ولا حتى أولاد، تلاقوا
فيه الهيام والرغي والود، ولو متجوزين تبقى الرغبة كمان ضمنهم.

بس افهمي أرجوكي... العالم ده مجرد ساعات وأحياناً دقائق، ووارد
يزيد في الرحلات والأجازات ويبقى أيام، لكن العبقرية بقى إن كل
واحد يحتفظ بعالمه الخاص بدون ما يدوب في عالم الثاني، ولا يطلب منه
يدوب في عالمه، وده أولاً علشان مانتخنقش من بعض، وثانياً علشان
لو العالم ده اختفى بالفتور أو الملل أو باختفاء الآخر (التجوز - خلع -
مات) نبقى لسه عايشين عالمتنا مش نتححر.

لكن هابقي معاكي جدا انتي وصاحبة الرسالة لما تقولي لي هاخلع
من خطيبي أو جوزي علشان مافيش بيننا العالم المشترك ده وعلاقتنا
ميتة، وكلامنا أخرس مااااشي كده اخلعي.

إزاي نكتشفي شخصية خطيبك:

بالتعود والمواقف هتعرفي كل حاجة عنه وبالذات:

- لما يركب تاكسي أو يسوق عربيته هتعرفي إذا كان محترم ولا لسانه طويل وعصبي.
- لما تزوريه في الشغل هتعرفي شخصيته من معاملة زمايله وحبهم أو تجنبهم.. ولو كان بيشتغل كل فترة شغلانة ويسيبها ويشغل غيرها، ده طبعا يبقى راجل مش بتاع شغل أو متخيل ان إمكانياته أعلى من أي شغل، ومستحيل حد هيقدره، وده ماينفعش زوج.
- كمان لو شدتو مع بعض وغلط فيكي هتبقى فرصة هايلا انك تعرفي شخصيته لو عملتي الخطة دي:

استني لما يغلط وركزي على الهدف، والهدف دلوقتي هو إنك تكتشفي شخصيته، مش تجيبي حقك، علشان كده هتبتدي الأول بسلاح الأنوثة والضعف (عياط إهمي إهمي - هنت عليك يا بيبي - كنت فاكر انك بتجنبي أكثر من كده يا مرزوق).

وشوفي رد فعله:

أ- حس يا حراج، اتكسر، حس بيكي، قدر ضعفك واحترمه، ابتدى يصلح ويتقرب ويحبب هدية؟

يبقى قشطة، ده راجل محترم ورومانسي، وكويس انك ماعملتيش العكس (رد الإهانة بالإهانة) كان هيتحول لوحش أو يخلع.

ب- طب لو بييتي ضعفك ده وساق فيها وقال لك (هو انتي عايشة في الدور؟ - كل شوية تعيطي؟ - علشان تحترمي نفسك - أهو أنا كده بقي - سابك ومشي - اشتكى لأهلك) كده بقي تعرفي انه راجل واطي وضعيف، اقلبي فوراً فردة الشراب (لأ و حياة خالتك انا كنت باعيط

بس علشان الجزمة ضيقة، لكن سمعني بقى يا حيلتها كنت بتقول إيه؟)

ساعتها هيعمل حاجة من الاتنين:

هايخبطك بكازلك في عينك ويعمل لك عاهة مستديمة، وساعتها اخلعي لأنه لبط ومسجل ومش هيتغير، أو بلغني عنه.

أو هيعمل فرخة ويعتذر، وساعتها برضو اخلعي حتى لو هيبيض قدامك.. مش ناقصة بيض يعني.

إمتي تفشكلي الخطوبة:

- لو فترة الخطوبة طالت جدا والعريس كل يوم يتنقل من شغلانة للتانية بدون خطة، وكل اللي وعد بيه مش بيتحقق، وخطواته سلبية جدا (كان محامي وفجأة اشتغل على توكتوك، كان أستاذ في الجامعة واستقال واشتغل رقاصة).
- لو ظهرت فيه عيوب جوهرية (بخيل - مالوش شخصية وبتاع امه - ما عندهوش دين - نصاب - بيشتم ويمد إيد - شعره بيقع لما يتعصب).
- لو شايفة انه متردد وكل يوم يخلع منك ويرجع تاني بأعذار وهمية غير منطقية (كنت باختبر حبك - ماما كانت بتولد - أختي اتحرقت - نسيت اني خاطب).
- لما بيان عدم احترامه لأهلك أو أهله، أو يتكلم عليهم وحش باستمرار (أبوكي مش بيتنزل لي من زور - أمك بترفع لي الضغط - خالتك بتعمل لي حساسية).

- لما تتأكدوا ان ما فيش أي تفاهم أو نقط تلاقي بينكم، ودأبها فيه صدام وخلاف، واللي رابطكم ببعض هو الخوف من الفشل والأهل (شكلنا هيبقى وحش قدام الناس لو انفصلنا - أصل ده خامس عريس يخلع - يا بت هو حد لاقى عرسان - بكرة هيتغير ونفهم بعض - اتجوزيه وبعد الجواز ابقى اقلته).
- لما يجيلك عقد عمل في الخليج، ساعتها اخلي وكوني مستقبلك وارجعي اتجوزي واحد هندي بفلوسك، والمصحف رجالة زي الفل.

الخطوبة العرفي

قبل ما اقبل باب الخطوبة ده أحب احذرك من موضوع منتشر قوي الأيام دي، وباسميه الخطوبة العرفي، وهو شاب محترف بيدخل معاكى العلاقة ويحاصرک باهتمامه لحد ما تدمنيه وتجييه، ولما تطلبي انه يقابل أهلک هيقول لك ماشي، خليني أقابل أو أكلم امك الأول، وطبعاً لأنه صايع ولسانه حلو هيشغل امك زي ما اشتغلك، ويديها مبررات لتأجيل دخول البيت، وللأسف امك هتقتنع، ومن اللحظة دي هتعتبره خطيبك العرفي.. هتقول لقرايكم انك مرتبطة والعريس زي الفل وجاي قريب ان شاء الله، بس الأهم والأخطر انها هتسيبك تتكلمي معاه كل يوم للفجر في التليفون - عادي جدا - وممكن تسيبك تخرجي معاه، وبمنتهى البساطة تتصل بيه وتقول له خلي بالك من خطيبتك، ولو اخوكي اعترض هي اللي هتخليه يسكت، ولو شخصيتها قوية هتخلي ابوكي مايفتحش بؤه كمان (سيب البت تتعرف على الواد ما حدش لاقى عرسان)، احتمال كبير ان أم الولد ده تكلم امك وتتعرف

عليها من منطلق انكم بقيتوا عيلة وبرضو هتديها وعود... والنتيجة انه بقى خطيبك العرفي.. يعني خطيبك ومش خطيبك.. وف أغلب الظن النوع ده مع الوقت يبشبع من العلاقة ويخلع، وخصوصا لو سرق منك حاجة (فلوس - جسم).

علشان كده لو في حياتك شاب بقى له ٦ شهور أو أكثر وعاش معاكي قصه حب، ويقول لك مش عارف اتقدم علشان الأسباب الوهمية اللي جايه دي.. يبقى اخلعي:

- أبوه رافض.
- أمه عايزة تجوزه بنت اختها.
- مستني عمته في الخليج لما تبعت له عقد عمل.
- شايف انكم محتاجين وقت أطول تعرفوا بعض.
- مديكي فرصة علشان تتغيري للأفضل.
- محتاج فرصة علشان يتغير للأحسن.
- خايف من الجواز وعنده عقدة.
- في حياته حب مش عارف ينساه.
- عنده جيوب أنفية ويهرش بالليل.

صدقيني اللي بيقدم مبررات زي دي وهو كل يوم بيقابلك ويكلمك ويوعدك بالمستقبل ده عيل وبريالة ويلعب بيكي، وانا واثق من كده لسبب بسيط.. إن الظروف الصعبة بتخلي الولد يتمسك باللي بيحبها أكثر ويحارب علشانها، يعني أرجو كي اخلعي وأقسم بالله هاجوزك سيد سيده بس انتي تشاوري كده بصباeck (باشتغلك).

وأخر حاجة خالص، وعلشان ابقى عملت كل اللي عليا، لازم
احذرك من ه رجالة مريضة.. إوعي تتجوزي واحد فيهم:

الأول مستر بريالة:

أنا اسمي فارس وقررت أخطب سها، وسها دي مزة المزز ومعايا
في الشغل، قمر يجبل بجد، شعر إيه! قوام إيه! دلع، وروشنة، وهزار،
وضحك إيه، طوب الأرض بيحب يتكلم معاها، عندها ع الأكونت ١٠
آلاف فولورز، وعلى الإنستاجرام ٢٠٠٠ صورة ونص مليون فولورز.

أيوه بقى هي دي الحلم، زوجة تطول العمر صحيح، مش تقول لي
(منى) صاحبها الرخمة القتمة اللي مابتضحكش غير في المواسم، أعود
بالله، دي مش بتلبس هدموم! لااااا دي بتغلف نفسها، مستحيل تحرك
أي راجل، علشان كده لا ليها اصحاب ولاد على صفحتها، ولا صورة
ع الإنستاجرام، حاجة تخنق.

- ألف مبروك يا فارس سمعنا انك خطبت سها.

- يا عم ألف مبروك إيه بس دي حاجة تقرف.

- ليه بس؟

البت طلعت دلوعة قوي ولبسها محرج جدا! تخيل ان ليها اصحاب
ولاد، وصور بالهبل ع الإنستاجرام، لااااا دي ماتنفعش زوجة خالص.

- طب خطبتها ليه؟

خطبتها علشان عجبتني فقررت اتجوزها بس اخليها تلبس كويس
وتفقل الأكونت وتبطل دلع وماتصاحبش ولاد، بس هي للأسف رافضة.

- أيوه فهمت، يعني انت خطبت سها علشان تحولها لمنى!

- إممممم تصدق آه!

- تصدق انك عيل بريالة.

التاني مستر متردد:

أنا بقى الأنسة منى اللي فارس اتكلم عليها من شوية، وانا فعلا كثيبة، بس مابقتش كده من فراغ، بقيت كثيبة من كتر العاهات اللي دخلوا حياتي، وخصوصا الندل الأخير اللي كان خاطبني، الأستاذ قعد لاطعني جنبه سنتين علشان أبو سيادته حلف ما هيجي معاه يتقدم لي غير لما يخلص فترة تجنيده، وخلص زفت، بس ماجاش يتقدم، علشان الهانم عمته قررت تبعت له عقد عمل في الخليج، وبعتت له زفت، ولطعني جنبه كمان سنتين، ونزل أول أجازة بعد سنة علشان يعرفني بالست والدته على أساس انه هيتقدم لي خلاص بقى، تقوم الحاجة الفاضلة أطال الله عمرها تقول له بصراحة العروسة مش قد كده، وبنت خالتك أحلى بكثير، يقوم الواطي يقول لي انا آسف مش هاقدر ازعل امي وانتي عارفة غضب الأم، وانتي بجد تستاهلي أحسن مني ولو لينا نصيب هنرجع في يوم، سلامو عليكمو.

وشكرا ه سنين حب وهيام ووعود، بدمتكم دي رجالة!؟

التالت هو مستر قيحة:

بخيل مووووت، هتعرفيه من أول يوم يتقدم لك، غالبا بيدخل بإيده فاضية أو بالكثير نص كيلو يوستفندي أو ربع حرنكش، حسب إعجابه بيكي، ولو ماحصلش نصيب بيطالب باستردادهم، أو بتعويض مادي عنهم، لو اتخطبتي له هتشوفي فيلم موسم الجفاف، لما تخرجوا هيقعدك على الكورنيش على اعتبار انه بسيط ومش متكلف، والبديل

انكم تقعدوا في مطعم، بس حضرتك اللي تدفعي، لأنه مؤمن إن الست زي الراجل والمليان يكب على الفاضي والزوجة سند جوزها، والقفة اللي ليها ودينن تشيلها انتي لواحدك، هيتعمد ينسى عيد ميلادك أو يستشيخ يومين ويقول لك دي كلها بدع، لكن عيد ميلاده مش بدعة لأنه يوميا يقبل ليرالي أو ممكن علماني، عادي جدا، المهم تجيبي هدية قيمة، يتكلم كثير هو وامه وابوه في التكاليف والفرح، ويشيلوكي معظم الليلة لأنك هتتجوزي الفلته.

علشان كده لازم تحفظي القاعدة دي:

البخيل في الفلوس بخيل في الاهتمام بخيل في الحب بخيل في الرغبة...
يعني يغور في داهية.

الرابع مستر شيزوفرينك:

ده بقى ولد بيحرم عليك كل حاجة، ويجرم الحلال قبل الحرام، ماينفesch تكلمي صاحبتك فلانة، ماينفesch تهزري على الفايس بوك وتقولي رأيك، لازم تقولي لي نازلة ليه ورايحة فين وجاية منين، وياريت أحسن ماتنزلش، لا ازم تاخدي إذني قبل ما تسلمي حتى على ابوكي، ممنوع ممنوع ممنوع، كل حاجة ممنوع، لكن هو بقى من حقه يعمل كل حاجة ف أي وقت، يكلم بنات ماشي، يصاحب ستات ماشي، يبقى له أصدقاء مسجلين قشطة، ومش من حقتك تتدخلي في حياته ولا تفتحكي بؤك، لأن هو الراجل وانت الست، هو الحاكم بأمره والناهي بجبروته، وده ف علم النفس بيسموه (شيزوفرينك بوي) وترجمتها بالعربي (واد اهيل وعبيط)، إوعي تتجوزية.

الخامس مستر ذئب:

تاتاتاتاناااااا، يا عزيزي كلنا ذئاب، لا اا بس ده ذئب بجد مش مجرد راجل بيص زي حالاتنا، ده راجل مدمن بنات بمعنى الكلمة، يبقى خاطب، ومتجوز رسمي، وعرفي، ومسيار، ومصاحب، ويبدو على عروسة، كله ف نفس الوقت، يخطبك ويرسم على جارتك وصاحبتك وعمتك و بنت خالتك، ولو امك مزه شوية برضو هيرسم عليها، والغريبة ان عنده مبررات للخيانة لا تنتهي، مرة انتي شكاكه انا كويس، ومرة انا غلطان وباعترف، ومرة انا ضعيف وأرجوكي اقفي جنبي وساعديني اتغير، ومرة أصل العيب منك علشان باردة ومش مظبطاني (إوعي تظطيه، هيخلع برضو)، ومرة أصلي عندي عقدة من البنات بسبب تفيدة اللي خاتنتي وانا في كي جي وان، ومن ساعتها وانا باصاحبهم علشان انتقم منهم، فترة يبقى معاكي حلو، وفترة يتتنك ويتعصب عليك ويختفي، وانتي زي الهبله تساحي وترجعي علشان بتحببه، لأنه طبعا جذاب ومحترف ودي شغلته.

وده يا ستي لا يصلح زوج من أصله، مهما كان أمور ومتكلم ويعرف يشتغلك، مهما حاولتي تقنعي نفسك انه اختارك وفضلك على غيرك، أو انك هتقدري تغيريه، والمصحف ما هيحصل، وعهد الله بتضحكي على نفسك وبكرة تقولي عمو إيهاب قالها.

.....



خلاص..

خلص الكتاب.. وما عنديش أسرار تاني أقولها لك عن سي السيد، بس أرجو كي دايمًا ركزي على الهدف من الكتاب ده، وهو إنك تفهمي شخصية الراجل، علشان تقدري تختاري المحترم وتتعايشي مع طباعه وتقدري برضو تتفادي السيء وتتقي شره.

سأحيني لو أخطأت ف تقديرى لأي نقطه أو حسيتي انها مش منطقية أو مبالغ فيها.. يمكن اكون عملت كده متعمد علشان اوصل لك المعنى وأأكده جواكي.

وأهم من كل ده لازم تثقي إن الأفكار والأسرار اللي هنا هي خليط من أفكاري وأفكار كتير من الأساتذة والمتخصصين، يعني مش كتاب مقدس ولا مسلمات ولا بدييات، ووارد يكون فيها أخطاء، كمان لو لقيتي هنا صفات مش متماشية مع الراجل اللي في حياتك إوعي تستغربي، لأن فيه رجالة استثنائية، كمان إوعي تتخضي لو لقيتي صفات ذكورية تشبهك، ده برضو وارد ومش عيب فيكي.

مبسوط بالوقت اللي قضيته معاكي هنا وربنا يوفقك دايمًا.

عمو إيهاب



إهداء

لريهام مراقي

لعائشة بنتي

لإجلال أمي

للإهام وإيمان وإيناس إخواني

ه ستات وبنوتة

أنا الولد والراجل والشايب بتاعهم..



شكر لأصدقائي الي دايبا جنبي ويساندوني:

دكتور محمد فتحي

دكتور معتز بالله عبد الفتاح

الإعلامية رشا نبيل

الأستاذ مصطفى الفرماوي

الكوتش بشير مدني

الكوتش هبة السواح

الكوتش سارة سليمان

الكوتش شيرين أبو عاذرة

الكوتش أيمن عبد الله

أخي محمد صابر

الروائي أحمد عبد المجيد



المحتويات

٥	تقديم
٧	المقدمة

الفصل الأول

١١	الاحتياجات الأساسية عند الرجل
١٢	التقدير
٤٥	الغريزة
٧٥	العاطفة

الفصل الثاني

٩٣	صفات الرجل الأساسية
٩٤	مايفهمش في الستات
٩٨	بيحب الغموض ويعشق التميز
١٠١	مايحبش المفاجآت
١٠٨	صياد بالفطرة
١١٩	بيعشق استرداد ممتلكاته
١٢٣	أهم حاجة يطفى الحريقة
١٢٦	بيحب الحرية ويكره الحصار
١٣٠	كائن بصري جدا
١٣٣	ملتزم جدا عكس تصوراتك
١٣٩	ماييدف عش فلوس في حاجة ممكن ياخذها ببلاش

الفصل الثالث

مفاهيم الراجل الخاصة

١٤٣	مفهومه عن الكلام
١٤٤	مفهومه عن الأكل
١٥٠	مفهومه عن التسوق
١٥٥	مفهومه عن النوم
١٥٨	مفهومه عن الخناقة
١٦١	مفهومه عن النظافة
١٧٠	مفهومه عن الخيانة
١٧٤	مفهومه عن الخيانة

الفصل الرابع

تركيبة الراجل البيولوجية

١٨٥	مراحل عمره
١٨٦	تركيبة دماغه
١٩٦	ذاكرة التواريخ
٢٠١	الحواس
٢٠٥	المهرمونات والناقلات العصبية
٢١٠	المهرمونات والناقلات العصبية

الفصل الخامس

دليل اختيار شريك الحياة

٢١٥	ازاي تختارى العريس المناسب
٢١٦	جواز الصالونات
٢٤٦	فترة الخطوبة
٢٧٢	فترة الخطوبة



إيهاب معوض

مهندس ديكور وكاتب صحفي ومقدم
برامج حاصل على بكالوريوس فنون
ودبلومة في الإرشاد الزوجي ولديه شقة
ويشارك في الجهاز

للتواصل مع الكاتب:

الفييس بوك

<https://www.facebook.com/Ihabmeawad>

الإيميل

ehab.meawad@hotmail.com

قناة الكاتب على اليوتيوب

<http://www.youtube.com/user/emeawadtv>

للمزيد من الروايات والكتب الحصرية
انضموا لـجروب ساحر الكتب

sa7eralkutub.com

او زيارة موقعنا




إيهاب معوض

كتالوج سي السيد



- علشان (منى) اللي عدت التلاتين ولسه ماتخطبتش، رغم إنها أمورة ومؤدبة بشهادة الجميع.
 - علشان (سهى) اللي عصرت على نفسها لمونة واتخطبت سنتين لواحد حفي وراها، ورغم كده هو اللي سابها.
 - علشان (تقى) اللي اكتشفت بعد شهر جواز إنها اتجوزت واحد غير اللي كانت تعرفه.
 - علشان (نهى) اللي جوزها خانها بعد 10 سنين احترام وإخلاص وحب وهيام.
- علشان منى وسهى وتقى ونهى، وغيرهم من البنات اللي فشلوا يخلوا بشفرة الرجل.. علشاتكم قررت أعمل زي رامز وأبيع أصحابي - جنس الرجال كله - وأكشف أسرارهم.

تصميم الغلاف كريم آدم



للنشر والتوزيع